

82.3/591

2-18

XX аср

ЎЗБЕК

ФОЛЬКЛОРШУНОСЛИГИ



АНТОЛОГИЯ

«O‘zbekiston milliy ensiklopediyasi»

Давлат илмий нашриёти

Тошкент–2017

УЎК: 398(575.1)(082.21)

КБК 82.3(5Ў)

Й 18

Тузувчилар:

**Олим ТЎЛАБОЕВ, Маматкул ЖЎРАЕВ, Баҳодир КАРИМОВ,
Ҳабиб АБДИЕВ, Иброҳим САИДОВ**

Масъул муҳаррир:

Ўзбекистон Республикасида хизмат кўрсатган маданият ходими,
филология фанлари доктори, профессор **Маматкул ЖЎРАЕВ**

Тақризчилар:

Насимхон РАҲМОНОВ,
филология фанлари доктори, профессор
Олим УСМОНОВ,
филология фанлари номзоди, доцент

Й 18

«XX аср ўзбек фольклоршунослиги». Антология [Матн] / Тузувчилар: О. Тўлабоев ва бошқ. – Т.: «O‘zbekiston milliy ensiklopediyasi» Давлат илмий нашриёти, 2017. – 592 б.

Халқимиз поэтик тафаккурининг беқиёс даҳоси туфайли яратилган оғзаки бадиий ижод дурдоналарини ёзиб олиш, нашр этиш ва ўрганиш борасида самарали иш олиб борган фольклоршуносларнинг ижодий фаолияти ҳақида мухтасар маълумотларни ўзида жамлаган мазкур антология ўзбек фольклорининг турли масалаларини тадқиқ этишга доир мақолалардан тузилган. Мажмуадан ўрин олган тадқиқотлар XX асрда ўзбек фольклоршунослиги фанининг шаклланиши ва тараққиётини ўзида мужассамлаштирганлиги билан эътиборни тортади.

Антология ўзбек халқ ижодини ўрганувчи фольклоршунослар, филолог олимлар, олий ўқув юртлари талабалари ва тадқиқотчиларга мўлжалланган.

УЎК: 398(575.1)(082.21)
КБК 82.3(5Ў)

Китоб А-1-107 рақамли «XX аср ўзбек мумтоз адабиётшунослиги» ва «XX аср ўзбек фольклоршунослиги» антологияларни нашрга тайёрлаш» мавзусидаги амалий лойиҳа доирасида тайёрланди ва «Ўзбекистон миллий энциклопедияси» Давлат илмий нашриётининг 27 сентябрь мажлис баённомаси қарори асосида нашрга тавсия этилди.

ISBN 978-9943-07-566-5

© О. Тўлабоев ва бошқ., 2017.

© «O‘zbekiston milliy ensiklopediyasi»
Давлат илмий нашриёти, 2017.

XX АСР ЎЗБЕК ФОЛЬКЛОРШУНОСЛИГИНИНГ ЎЗИГА ХОС ХУСУСИЯТЛАРИ

Халқимиз бадиий салоҳиятининг асрлар давомидаги изчил тараққиёти натижасида хилма-хил жанрлардан иборат оғзаки бадиий ижод дурдоналари яратилган. Бинобарин, ўзбек халқ ижодиёти аجدодларимизнинг кўп асрлик бадиий тафаккур дурдоналарини ўзида мужассамлаштирган бебаҳо миллий қадриятларимиздан биридир. Фольклоршунослик эса асрлар давомида яратилиб, ривожланиб келган халқ оғзаки бадиий ижоди асарларини тўплаш, фольклор асарларини архивлаштириш, унинг энг яхши намуналарини нашр этиш, илмий ўрганиш ва оммалаштириш билан шуғулланади.

Ўзбек фольклори асарларининг тўпланиши ва ёзиб олинishi тарихи ҳақида сўз юритилганда X асрда яшаб ижод қилган машҳур муаррих Абу Бакр ибн Жаъфар Наршахийнинг «Бухоро тарихи» асарида шаҳар ва қишлоқ номлари, тарихий обидалар ҳамда ўтмишда бўлиб ўтган воқеа-ходисалар ҳақидаги халқ ривоятлари, афсоналари келтирилганлиги; XI асрнинг буюк олими Маҳмуд Кошғарий туркий қавмлар диёрини кезиб, мақол, матал, кўшиқ, ривоят ва афсона сингари фольклор жанрларига оид бой материалларни ёзиб олиб, «Девону луғотит турк» асарига киритганлигини эслаш керак бўлади. Шунингдек, мақол ва маталларни ёзиб олиб, уларнинг хусусиятларини ўрганган Маҳмуд Замахшарий, қадимги хоразмликларнинг миф, афсона, ривоят ва ҳикоятларини «Қисаси Рабғузий»га жамлаган Носируддин Бурҳонуддин Рабғузий; ўзбек халқ шеърятининг жанрлар таркиби хусусида фикр юритган Алишер Навоий; улуғ ўзбек шоири тўғрисидаги халқ ривоятларини нақл қилган тарихнавис Хондамир; мусиқа фольклорининг турли хил жанрий ранг-баранглигига доир материалларни ёзиб қолдирган Дарвеш Али Чангий; ўзбек халқининг урф-одатлари, маросимлари, мақол ва

ҳикматли сўзлари, ривоятлари ҳақида қизикарли фактларни келтирган Заҳириддин Муҳаммад Бобур; ўзи тузган луғатда халқ кўшиқларидан мисоллар келтирган Шайх Сулаймон Бухорий ўзбек фольклори асарларининг илк тўпловчилари эдилар.

XIX аср охири – XX аср бошларида Ўрта Осиёда фаолият юргизган шарқшунос, тилшунос, этнограф, фольклоршунос олимлар, шунингдек, ўлкашунос ва сайёҳлар – А. Диваев, А. Эйхгорн, А. Н. Самойлович, Н. П. Остроумов, В. Вяткин, Л. Кунь, Н. Ликошин, П. Комаров, А. Хорошхин, К. Г. Зелеман, Ю. Казбеков, Л. Бундзинский, М. Ростиславов ва бошқалар маҳаллий аҳолининг фольклори, ирим-сиримлари, мифологик эътиқодлари, маросим ва удумлари, анъанавий таквими, байрам ва сайилларига оид материалларни ёзиб олиб, асосан, рус тилида нашр эттирдилар.

Ўзбек халқ оғзаки бадиий ижоди асарларини бевосита жонли ижродан ёзиб олиш, тўплаб нашр этиш ва илмий ўрганиш ишлари XX асрнинг 20-йилларидан бошланди. «Маориф» журналининг 1918 йил 1-сонида халқ оғзаки бадиий ижоди асарларини тўпловчилар учун қўлланма чоп этирилиши билан ўзбек фольклори материалларини илмий асосда ёзиб олишга асос солинган. Фольклор асарларини тўплаш ва ўрганиш ишлари 1918–20 йилларда Туркистон Маориф халқ комиссариатининг Туркий секцияси, 1921–24 йилларда эса Давлат илмий кенгашининг Ўзбек билим ҳайъати томонидан амалга оширилган. Ўзбек билим ҳайъатининг Тошкент вилояти Бўстонлик туманига (1921), Самарқанд ва Сирдарё вилоятларига (1922), Фарғона водийсига (1922) уюштирган фольклор экспедициялари, айниқса, самарали бўлган. Бу илмий сафарларда қатнашган Ғози Олим Юнусов ва Ғулом Зафарий лапар, ўлан, болалар кўшиқлари, оғзаки драма, эртак ва афсона, маросим фольклорига оид материалларни ёзиб олишган. Ўзбек билим ҳайъати томонидан ташкил этилган фольклор-этнографик экспедицияларга бошчилик қилган Ғ. О. Юнусов халқ оғзаки бадиий ижоди намуналарини тўплаш ва оммалаштиришнинг ташаббускорларидан бири бўлган. Фозил Йўлдош ўғли, Эргаш Жуманбулбул ўғли каби халқ бахшиларини аниқлаган Ғ. О. Юнусов ўзбек эпосшунослиги тарихида биринчи бўлиб 1922 йилнинг ёзида Фозил Йўлдош ўғли ва Ҳамрокул

бахшилардан «Алпомиш» достонидан парчалар ёзиб олган, Тошкент, Сирдарё, Самарканд вилоятларида бўлиб, кўплаб қўшиқ, эртақ, афсона, мақол, топишмоқ ва ривоятларни ёзиб олган, ўзбек маросим фольклорига доир кузатишлар олиб бориш билан бир қаторда бой этнографик материалларни ҳам тўплаган.

1925–28 йилларда фольклористик ишлар Ўзбекистон Маориф комиссарлиги Илмий шўросининг Ўзбекларни ўрганиш комитетида марказлаштирилган. Бу даврда Ғози Олим Юнусов, Ҳоди Зариф, Абдулла Алавий каби миллий қадриятларимиз фидойилари халқ бахшиларини, эртақчи ва қўшиқчиларни аниқлаш, уларнинг репертуаридаги асарларни ёзиб олишни ташкил этиб, Фозил Йўлдош ўғли, Пўлкан шоир, Эргаш Жуманбулбул ўғли, Нурмон Абдувой ўғли, Берди бахши, Абдулла шоир ва бошқа кўплаб бахшилардан халқ достонларини ёзиб олишган. Бу шарафли ишга Маҳмуд Зарифий, Исо Эрназар ўғли, Фотима (ҳозиргача тўла исми-шарифи аниқланмаган), Товфиқ Мустафоев, Баҳром Иброҳимов, Муқим Ҳамзабеков, Назарқосим Мирзаев, Ҳусайн Каримий каби хаваскор фольклор тўпловчилар ҳам жалб қилинган.

XX асрнинг 20–30-йилларида В. А. Успенский, Н. Н. Мионов, Е. Е. Романовская, Юнус Ражабий ўзбек мусиқа фольклори асарларини ёзиб олган бўлишса, Ғулом Зафарий, А. К. Боровков, К. К. Юдахин, М. Ф. Гаврилов ўзбек халқ оғзаки театри анъаналарини ўргандилар. Ғози Олим Юнусов, Элбек, Е. Д. Поливанов, Л. Потапов, Бекжон Раҳмон, Ҳ. Зарифов, А. К. Боровков, Е. М. Пешчерева, В. Дружинин, В. Г. Андреев, Қ. Рамазонов, А. Алавий, Ш. Ризо, Ш. Рўзи, Ш. Абдуллаева, Б. Каримий, М. Алавия ва бошқалар ўзбек фольклорининг энг нодир асарларини ёзиб олиш мақсадида ташкил этилган дастлабки фольклор экспедицияларида фаол қатнашдилар.

Ўзбек фольклоршунослигининг филологик йўналишдаги фан сифатида шаклланиши Ҳ. Зарифов илмий фаолияти билан бевосита боғлиқдир. Фольклор асарларини ёзиб олиш, тўплаш, нашр этиш ва ўрганишга улкан хисса қўшган бу олимнинг ташаббуси билан 1928 йилда ташкил этилган «Этнография фольклор ва археология бўйича илмий-текшириш кабинети» негизи-

да кейинчалик Тил ва адабиёт институтининг Фольклор бўлими юзага келган. Ҳ. Т. Зарифов ана шу бўлимнинг раҳбари сифатида бутун умрини ўзбек халқ оғзаки ижодиётини тўплаш ва илмий ўрганишга бағишлаган. Ўзининг фольклоршунос сифатида илм фаолиятини тўпловчиликдан бошлаган Ҳ. Т. Зарифов Фозил Йўлдош ўғли, Эргаш Жуманбулбул ўғли, Пўлкан ва Ислом шоирдек забардаст сўз санъаткорларини аниқлаб, уларнинг ижодий меросини тўплаган. Бу бахшилардан ёзиб олинган «Алпомиш», «Ёдгор», «Жаҳонгир», «Рустам», «Равшан», «Очилов», «Ҳасан батрак», «Юсуф ва Аҳмад», «Авазнинг уйланиши», «Мардикор», «Шайбонийхон» каби дostonлар ўзбек эпосининг энг ажойиб намуналари сирасига киради. У 1929 йилда Қашқадарё–Сурхондарё воҳаларида бўлиб, Абдулла Нурали ўғли, Холёр Абдукарим ўғли каби чечан бахшилар ижодиётини ўрганган. 1930 йилги Хоразм фольклор-этнографик экспедицияси чоғида эса Бола бахши, Қурбон созчи, Биби шоира, Аҳмад Матназар ўғли, Хўжаёр бахши Воис ўғли каби халқ шоирларидан «Асилхон», «Хирмондали», «Қирқ минг» дostonларини ёзиб олган. 1935 йили Фаргона водийси дostonчилик мактабининг Бўри Содик ўғли, Усмон Маматқул ўғли, Умрзоқ бахши, Ҳасан Худойберди ўғли, Ҳасанбой Расул ўғли каби ижрочиларни аниқлаган.

Ҳ. Т. Зарифов ўзбек фольклоршунослиги тарихида биринчи бўлиб, XX асрнинг 20-йилларидаёқ халқ ижоди асарларини тўплаш ва нашр этиш учун махсус транскрипция ишлаб чиққан. Бу илмий принцип чуқур назарий билим ва кенг кўламли матний тайёргарликка асосланганлиги учун ҳам хозирга қадар нафақат ўзбек, балки қардош туркий халқлар фольклоршунослигида ҳам самарали қўлланилмоқда. Ўтган давр мобайнида шу принцип асосида «Ўзбек халқ ижоди» кўпжилдлигининг қирққа яқин жилди, икки жилдлик «Ўзбек халқ мақоллари», «Рустамхон» ва «Алпомиш» дostonларининг академик нашрлари, икки жилдлик «Ўзбек халқ эртаклари», «Ўзбек халқ дostonлари» кўпжилдлик силсиласи, дoston, этак, мақол, кўшиқ, топишмоқ, латифа каби жанрларга оид матнларнинг алоҳида нашрлари чоп эттирилди.

Ҳ. Зарифов «Шайбонийхон», «Равшан», «Малика айёр», «Чамбил қамали», «Кунтуғмиш», «Ойсулув», «Ёдгор», «Кундуз билан

Юлдуз», «Очилов», «Хуршидой», «Маматкарим полвон», «Жиззах кўзғолони», «Ҳасан батрак», «Алпомиш», «Якка Аҳмад», «Холдорхон» каби дostonларни нашрга тайёрлаган. У «Ўзбек фольклоридан намуналар» (1939), «Ўзбек фольклори» (1939), «Оталар сўзи – ақлнинг кўзи» (1947), «Ўзбек халқ шоирларининг ижоди» (1958), «Ўзбек шеърятини антологияси» (1-жилд, 1961) мажмуаларининг ҳам ноширидир. У ўзбек фольклорининг ўзига хос хусусиятлари, фольклоршунослик тарихи, халқ шоирларининг ижоди ва ижрочилик маҳорати, репертуари, эпик анъана, дostonлар таснифи, дostonчилик санъати, Кўргон, Булунғур, Шаҳрисабз, Хоразм, Жума каби дostonчилик мактабларининг ўзига хос хусусиятлари каби эпосшуносликнинг назарий масалаларига доир асарлар яратган.

Ўзбек фольклоршунослиги мактабининг асосий илмий йўналиши халқ ижодиёти юзасидан фундаментал илмий тадқиқотлар яратишдан иборат бўлиб, Ҳ. Зарифовнинг илк тадқиқотлари билан ўзбек фольклорини илмий ўрганиш ишига асос солинган. Айниқса, унинг йирик эпосшунос В. М. Жирмунский билан ҳамкорликда яратилиб, рус тилида нашр эттирилган «Ўзбек халқ қаҳрамонлик эпоси» монографияси, шунингдек, ўзбек халқ дostonларининг эпик табиати ва тарихий асосларини текширишга оид қатор мақолалари халқ эпосини фундаментал тадқиқ этишнинг мумтоз намунаси бўлиши билан бирга ўзбек фольклоршунослиги мактабининг илмий-назарий асоси ҳам ҳисобланади.

Ўзбек маросим фольклори жанрларининг тўпланиши ва ўрганилиши фольклоршунос олима Музайяна Алавия номи билан боғлиқдир. У Қашқадарё, Сурхондарё, Хоразм, Самарқанд, Бухоро, Андижон, Фарғона, Тошкент вилоятларида фольклор экспедицияларида бўлиб, халқ кўшиқлари, афсона, ривоят, эرتакларни тўплаган. Фозил Йўлдош ўгли, Ислом шоир, Боймурод Боймат ўгли, Ҳайдар Бойчаев, Абдулла шоир Нурали ўгли, Умр шоир Сафаров, Кўзи ва Тўқли Рўзиев каби халқ бахшиларидан ўнлаб термалар ва дostonларни ёзиб олган. Олиманинг кўп йиллик изланишлари натижасида «Ўзбек халқ кўшиқлари» (1955), «Янги кўшиқлар» (1959), «Ўзбек фольклоридан намуналар» (1955), «Оқ олма қизил олма» (1979), «Халқ кўшиқлари» (1983)

каби тўпламлар юзага келган. У Фозил Йўлдош ўғлининг «Интизор» достонини нашрга тайёрлаган. М. Алавия ўзбек халқ маросим кўшиқларининг мавзу қамрови, ғоявий мазмуни, бадий хусусиятлари, ижтимоий моҳияти, кўшиқчиларнинг ижрочилик санъати, кўшиқларнинг тарихий асосларига доир кўплаб илмий тадқиқотлар муаллифидир.

Ўз илмий фаолиятини 1932 йилда Тошкентдаги Маданий қурилиш институтида бошлаган Мансур Афзалов ўзбек халқ насри асарларини тўплаш, нашр этиш ва илмий ўрганишга катта ҳисса қўшган. Ўзбек халқ эртаклари, достон ва афсоналарни тўплаб, тадқиқ этган М. Афзалов Ислом шоирнинг «Орзигул» (1940, 1956, 1961), «Гулихиромон» (С. Асқаров билан ҳамкорликда, 1965), Фозил шоирнинг «Ширин билан Шакар» (1955), «Муродхон» (Х. Расул билан ҳамкорликда, 1956), «Балогардон» (Х. Расул билан ҳамкорликда, 1957), «Фарҳод ва Ширин» (1966), «Зулфизар» (1969), Эргаш Жуманбулбул ўғлининг «Хушкелди» (1962) достонларини нашрга тайёрлаган. У Ислом шоир «Танланган асарлар»и (1953), «Ўзбек фольклоридан ўқув материаллари» (1950), «Ўзбек достонлари» (1956–58), «Ўзбек шеърятини антологияси (1948), «Ўзбек халқ эртаклари» (1951), «Ўзбек халқ эртаклари» (1960–62), «Ўзбек халқ мақоллари» (1958–60) мажмуаларини ҳам чоп эттирган.

Ўзбек халқ насрининг жанрлар таркиби, халқ бахшилари-нинг ҳаёти ва ижоди, фольклор ва ижтимоий ҳаёт, фольклоршунослик тарихи масалалари билан шуғулланган олимнинг «Ўзбек халқ эртаклари ҳақида» (1964) асари ўзбек эртаклари ҳақидаги биринчи йирик тадқиқотдир. Бу китобда ўзбек халқ эртаклари тасниф қилинган, эртақларнинг ўрганилиш тарихи, образлар тизими, мотивларнинг тарихий асослари, эртақларнинг юзага келиш тарихи ва бадий хусусиятлари, эртақ ижрочилиги тадқиқ этилган.

Ўзбек фольклорини тўплаш, нашр этиш, тадқиқ этишга катта ҳисса қўшган олима З. Хусаинова 1951 йилдан ЎЗР ФА Тил ва адабиёт институтининг фольклор экспедицияси сафида Республикамизнинг барча вилоятларида, Жанубий Тожикистон ва Ўшда бўлиб, халқ оғзаки ижодиётининг кўшиқ, мақол, топишмоқ,

эртақ, латифа каби жанрларига доир матнларни тўплаган. Бекмурод Жўрабой ўғлидан «Малика айёр», «Холбека» (1946), Умр Сафар ўғлидан «Зандигор» (1949), Абдулла Нурали ўғлидан «Алпомиш», Тошмурод бахши Тўрабовдан «Майда савдогар», Ҳамро Эргашевдан «Алпомиш», Ниёз Алимкул ўғлидан «Юсуф ва Аҳмад», Бекназар Раҳматовдан «Қорақум» дostonларини ёзиб олган. Олима «Ошиқ Ғариб ва Шохсанам (1958), «Гулнор пари» (1965), «Гулшанбоғ» (1966), «Авазхон» (1967), «Холбека» (1968), «Алибек ва Болибек» (1973), «Тўлганой» (1974), «Чамбил қамали» (1978), «Авазхоннинг ўлимга ҳукм этилиши» (1976), «Машриқо» (1988) дostonларини нашрга тайёрлаган, шунингдек, профессор Т. Мирзаев билан ҳамкорликда Нурали Нурмат ўгли ва Абдуғафур Шукуров каби эртақчилардан ёзиб олинган эртақ, нақл, латифалар ҳамда Раҳмагулла Юсуф ўгли репертуаридаги «Гўрўғли» туркум дostonларни чоп эттирган.

Халқ театрини ўрганишни анъанавий оғзаки драмаларни ёзиб олишдан бошлаган М. Қодиров 1958 йилдан бошлаб Ҳамза номидаги Санъатшунослик институтининг фольклор экспедицияси таркибида Сурхондарё, Самарқанд, Бухоро, Қашқадарё, Фарғона, Наманган, Андижон, Ўш, Хоразм вилоятларида бўлиб, 300 га яқин халқ театри ижрочиларининг ижодий фаолиятини ўрганган, элликдан ошиқ профессионал ва ҳаваскор масҳарабозлар билан ижодий суҳбатлар ўтказган, юзга яқин халқ драмаси, кулги-ҳикоя ва қизиқчилик намуналарини ёзиб олган, кўплаб пантомима, халқ рақслари ва томоша санъатига доир материаллар тўплаган. М. Қодиров томонидан йиғилган материаллар ўзбек халқ томоша санъатини ўрганишда янги йўналишларни очиб берди. Чунки илгари «ўзбек халқ театри» деганда фақат Фарғона водийси қизиқчилик санъати назарда тутилган, холос. М. Қодиров эса республикамизда ўзбек халқ театрининг Бухоро, Қўқон ва Хоразм мактаби мавжудлиги ҳамда ҳар бир анъананинг умумий ва ўзига хос томонларини аниқлаган. У ўзбек халқ оғзаки драмасининг фольклор асари сифатидаги ўзига хос бадиий хусусиятлари, образлар тизими, халқ санъаткорларининг ижрочилик маҳоратини чуқур тадқиқ этиб, театр фольклоршунослиги йўналишига асос солган.

Ўзбек халқининг мусиқа меросини тўплаш билан изчил шуғулланган Ю. Ражабий 1955–59 йилларда ўзи тўплаган материаллар асосида мингдан ошиқ халқ кўшиқлари ва чолғу куйларини ўз ичига олган «Ўзбек халқ мусиқаси» мажмуасининг беш жилдини нашр эттирган. У Тошкент–Фарғона мақом йўллари, Бухоро «Шашмақом»и ва унинг таркибий қисмларини тўплаб, мукаммаллаштириб нашрга тайёрлаган ҳамда 1966–75 йиллар давомида олти жилдлик китоб ҳолида чоп эттирган.

Фольклоршунос олим Р. Муҳаммадиевнинг ташаббуси ва иштирокида аския санъати материалларини тўплаш, ўрганиш ва оммалаштириш мақсадида махсус фольклор экспедициялари ўтказилган. 1961 йилда Фарғона водийсида иш олиб борган биринчи экспедицияда аския жанрининг тарқалиш доираси ва тарихий тараққиётини ўрганишга доир материаллар тўпланган, аския пайровларини ёзиб олинган. 1963 йилда ўтказилган иккинчи экспедиция чогида машҳур аскиябозларнинг репертуари тадқиқ этилган. Устоз сўз санъаткорлари ҳақидаги хотиралар, ривоятлар, латифалар ва ўзбек аскиячиларининг ижодий мероси тўпланган. 1965 йилнинг ёзида эса Фарғона водийсининг шимолий туманларида, Сирдарё ва Тошкент вилоятларидаги ёш аскиячилар ижодиёти ўрганилган.

Ўзбек халқ дostonчилигида бадий маҳорат масалаларини чуқур тадқиқ этган М. Саидов «Нурали», «Зулфизар», «Гулнор пари», «Авазхон», «Мисқол пари», «Тоҳир ва Зухра», «Суманбар», «Зевархон», «Варқа билан Гулшоҳ», «Вомиқ ва Узро», «Балхувон», «Гулшанбог» дostonларини чоп эттирган. Ўзбек фольклорини тўплаш, нашр эттириш ва ўрганишга катта ҳисса қўшган Ж. Қобулнӣёзов Хоразм халқ дostonлари ва кўшиқларини ёзиб олиб, халфалар ижодини ўрганган. Бола бахши Абдуллаевдан «Бозиргон», «Авазхон», «Ошиқ Маҳмуд», Маҳмуд Юсуповдан «Ошиқ Маҳмуд», «Сайёдхон ва Ҳамро» дostonларини ёзиб олиб, 1966–70 йилларда чоп эттирган. 1966 йилда эса ўзи тўплаган халқ кўшиқлари асосида «Хоразм халқ кўшиқлари» тўпламини нашр эттирган.

Ўзбек фольклори асарларини тўплаш ва системалаштириш ишига катта ҳисса қўшган М. Муродов 1959 йилдан то 90-йил-

ларнинг охиригача республикамизнинг турли вилоятларида фольклор экспедицияларида бўлиб, Юсуф Ўтаган ўғли, Раззоқ Қозоқбой ўғли, Хусан бахши Ражаб ўғли, Ҳайдар Бойча ўғли, Усмон Мадумар ўғли, Эшқобил Кўшок ўғли, Ҳазраткул Худойберди ўғли, Қодир Раҳим ўғли, Хушвақт Мардонакул ўғли каби бахшиларнинг репертуарини ўрганган, юзлаб эртак, ривоят, афсона, мақол ва топишмоқларни ёзиб олган. У «Гўрўғлининг туғилиши», «Хиламан», «Баҳром ва Гуландом», «Зевархон», «Гулрух пари», «Қоракўз ойм», «Жорхун мастон», «Нурали» каби дostonларни нашрга тайёрлаган. Ўзи ёзиб олган материаллар асосида «Алло-малар ибрати» (1983) ривоятлар тўплами ва «Ўзбек халқ фантастикаси» силсиласидаги «Оймома аждаҳо» (1983), «Қора дев» (1984), «Ёнар дарё» (1985), «Илон пари» (1986) «Само тулпори» (1987), «Гулиқаҳқаҳ» (1988), «Олтин олма» (1989) каби эртак мажмуаларини чоп эттирган.

XX асрнинг 40–80-йилларида Х. Зарифов, А. Алавия, М. Афзалов, М. Тошпўлатова, З. Ҳусаинова, Ф. Кароматов, Ҳ. Раззоқов, Т. Ғозибоев, Ж. Қобулниёзов, О. Собиров, М. Саидов, М. Қодиров, Ё. Жўраев, Т. Мирзаев, М. Муродов, Т. Очилов, Ғ. Жаҳонгиров, Р. Муҳаммадиев, Т. Ашуров, С. Асқаров, Ф. Султонова, А. Қаҳҳоров, С. Содиқов, К. Имомов, Б. Саримсоқов, Р. Абдуллаев, О. Мадаев, Т. Собитова, М. Қаландарова, С. Рўзимбоев, О. Сафаров, А. Мусақулов, И. Ёрматов, У. Жуманазаров, А. Турсункулов, И. Бекмуродов, К. Очилов, А. Эргашев, М. Жўраев, Ш. Турдимов ўзбек фольклоршунослари кенг кўламли фольклор тўплаш ишлари билан машгул бўлдилар.

XX асрнинг 60–70-йилларида дostonчилик мактаблари, бахши-шоирлар эпик репертуари, халқ дostonларининг вариантлари ва бадиияти (Х. Зарифов, М. Афзалов, Т. Мирзаев, А. Қаҳҳоров, Т. Очилов, М. Саидов, М. Муродов, О. Мадаев, О. Собиров, Т. Ашуров), халқ кўшиқлари (М. Алавия), ўзбек фольклорининг тарихий тараккиёти (Ж. Қобулниёзов, О. Собиров, С. Асқаров), аския, халқ драмаси ва қизиқчилик санъати (Р. Муҳаммадиев, Ҳ. Раззоқов, М. Қодиров), мусиқа фольклори (Ф. Кароматов), ўзбек халқ эртаклари (М. Афзалов, К. Имомов,

Ғ. Жалолов), топишмоқ (З. Хусаинова), болалар фольклори (Ғ. Жаҳонгиров), латифа (Ф. Йўлдошева)га бағишланган йирик монографик тадқиқотлар яратилган.

1967 йилдан 1981 йилгача ЎзР ФА Алишер Навоий номидаги Тил ва адабиёт институти Фольклор бўлими томонидан «Ўзбек халқ ижоди бўйича тадқиқотлар» сериясидаги еттита китобнинг тайёрланиб, нашр этилиши ўзбек фольклоршунослигининг назарий уфқларини янада кенгайтди. Фольклор бўлими ходимлари «Алпомиш» достонининг муҳокамасига бағишлаб ўтказилган регионал кенгаш (1953), Эргаш Жуманбулбул ўғли ижодий меросини тадқиқ қилиш ва чоп этиш (1972), Фозил Йўлдош ўғли, Пўлкан шоир ва Ислом шоирларнинг 100 йиллиги (1973) ҳамда «Алпомиш» достони яратилганлигининг 1000 йиллигини нишонлаш (1999) муносабати билан салмоқли илмий ва илмий-оммабоп асарларни яратдилар.

Ўзбек халқ қаҳрамонлик эпосининг классик намунаси ҳисобланган «Алпомиш» достонини таниқли фольклоршунос Т. Мирзаев тўла ўрганиб, бу эпик асарнинг ўзбек бахшилари репертуарида қайд қилинган барча вариантларини қиёсий тадқиқ этди ҳамда достоннинг ўзбек халқи эпик тафаккури тараққиётида тутган ўрнини белгилаб берди. Олим достон сюжетининг тарихий асослари, шаклланиш босқичлари ва бадиий ривожини, сюжет тизимидаги етакчи мотивлар поэтикасини изчил ўрганиб, «Алпомиш» достони яратилган даврни аниқлаб берди. У ўзбек фольклорининг жанрлар таркиби, фольклор ижодкорлари ва ижрочилари, тарихий-фольклорий жараённинг ҳозирги ҳолати, эртак, мақол, кўшиқ, лапар каби фольклор жанрларининг поэтик табиати, фольклор ва ёзма адабиёт муносабати масалаларига доир илмий тадқиқотлар олиб борган.

Т. Мирзаев Эргаш Жуманбулбул ўғлининг ўзбек тилидаги беш жилдли «Булбул тароналари» ва русча уч жилдли «Песни Булбуля» номли китоблари яратилишида масъул муҳаррир ҳамда тузувчи сифатида фаол иштирок этди. Унинг раҳбарлиги ва бевосита иштирокида «Ўзбек халқ ижоди» кўпжилдлигининг ўттиз етти китоби босмадан чиқди. У нашрга тайёрловчи ва масъул муҳаррир сифатида бу силсилага кирувчи «Алпомиш» (1979),

«Эрали ва Шерали» (1987), «Юсуф ва Аҳмад» (1987), «Малика айёр» (1988), «Ўзбек халқ мақоллари» (1989), «Луқмони ҳаким» (1989), «Нурали» (1989) каби китобларни чоп эттирди. Бундан ташқари, «Жонодил» (1970), «Одилхон» (1971), «Авазхоннинг ўлимга ҳукм қилиниши» (1976), «Нуралининг ёшлиги» (1993), «Гўрўғлининг туғилиши» (1994), «Райҳон араб» (1994) дostonларини Т. Мирзаев нашрга тайёрлади. Унинг ташаббуси билан «Ўзбек халқ дostonлари» кўпжилдлигига кирувчи ўнлаб асарлар китобхонларнинг севимли асарига айланди. «Ўзбек халқ мақоллари»нинг бир нечта алоҳида мажмуа ҳолидаги нашрлари ҳамда икки жилдлик академик нашри чоп эттирилди. Фольклор асарларини нашр этиш борасида катта ижодий тажриба тўплаган олим «Алпомиш» дostonининг бешта бахши варианты ва Раҳматулла Юсуф ўғли репертуаридаги «Гўрўғли» дostonларининг мукамал нашрини тайёрлади. Т. Мирзаев ўзбек фольклоршунослигида биринчи бўлиб ҳар бир фольклор ижрочисининг ижодий меросини тўла нашр этишнинг илмий принципларини ишлаб чиқди.

Ўзбек халқ эртақларининг тўпланиши, нашр этилиши ва ўрганилиш тарихи, эртақлардаги анъанавий синов мотивининг генезиси ва эпик вазибалари, ўзбек халқ эртақларида комик ва ҳажвий қаҳрамон масаласи, ўзбек сатирик эртақларида конфликт ва ижтимоий мотивлар масалаларини ўрганиш билан шуғулланган фольклоршунос К. Имомов ўзбек халқ оғзаки насрий асарларнинг жанрлар таркибини кенг кўламда тадқиқ этган. Олим ўзбек халқ эртақларидаги анъанавий мотивларнинг тарихий-генетик типологиясини тадқиқ этиб, ўзбек эпосидаги ғайритабиий туғилиш, синов, шарт, кураш, туш кўриш, қаҳрамоннинг ўлиб-тирилиши, қаҳрамонни оловда куйдириш мотивларининг келиб чиқиши қадимги мифологик тасаввурлар ҳамда эътиқодий қарашларга боғлиқлиги аниқланган. Афсона ва ривоят жанрларининг ўзига хос ҳамда муштарак жиҳатлари, афсоналар таснифи, мифологик, тарихий ва топонимик афсоналарда ҳаётий воқелик ҳақидаги ахборотнинг эпик талқин қилиниши, мифологик афсоналарнинг образлар талқини ва қадимги тасаввурлар билан боғлиқлиги каби масалалар К. Имомов тадқиқотларида кенг ёритилган.

80-йиллардан бошлаб ўзбек маросим фольклори Б. Саримсоқов томонидан ўрганила бошланган. Олим ўзбек маросим фольклорининг жанрлар таркиби, таснифи, генезиси ва тарихий тараққиёти, ўзбек оилавий-маиший маросимлар фольклори, мавсумий маросимлар фольклори, сўз магиясига алоқадор бадик, кинна, олқиш ва қарғиш каби жанрларни тадқиқ этган. У халқ эпосининг ўзига хос табиати, таснифи ва халқ дostonларининг келиб чиқиши, тарихий-тадрижий тараққиёти, ғоявий-бадий хусусиятлари ўзига хос тарзда таҳлил қилинган.

Ўзбек фольклоршунослиги мактаби вакиллари фольклор асарларини тўплаб, архивлаштириш ва илмий тавсифлаш борасида ўтган асрнинг 20-йилларидан буён изчил иш олиб боришмоқда. Ўзбек фольклорни тўплаш мақсадидаги илмий экспедициялар XX асрнинг ўрталаридан то ҳозирги кунга қадар мунтазам равишда ўтказилиб келинмоқда. Экспедиция қамрови кенглигини шундан ҳам билса бўладики, турли йилларда Ҳ. Зарифов, М. Афзалов, Б. Каримов, М. Алавия, З. Ҳусайнова, Ғ. Жаҳонгиров, С. Қосимов, М. Муродов Т. Мирзаев, К. Имомов, Б. Саримсоқов ва бошқа олимлар бошчилик қилган фольклор экспедициялари мамлакатимизнинг барча вилоятлари ва Қорақалпоғистон Республикасида, шунингдек, қўшни республикаларнинг ўзбеклар истиқомат қиладиган ҳудудларида илмий сафарларда бўлиб, ўзбек фольклорининг барча жанрларига оид материаллар тўплادилар.

XX асрнинг 70–80-йилларида Қашқадарё (А. Қаҳҳоров, К. Очилов, Ч. Ҳамро, А. Эргашев), Бухоро (О. Сафаров, Й. Нурмуродов, Д. Ўраева), Хоразм (С. Рўзимбоев, Ҳ. Абдуллаев, Н. Сабуров), Наманган (Т. Ғозибоев), Андижон (Ҳ. Раззоқов), Сурхондарё (Қ. Мамашуқуров), Қўқон (Ғ. Акрамов, И. Бекмуродов)да ўз илмий фаолиятларини олиб борган фольклоршунослар ўзбек халқ дostonларининг поэтикаси, вариантлари ва локал хусусиятлари, дostonчилик анъаналарининг сақланиши ва етакчи бахшиларнинг бадий маҳорати, дostonларда туркумлилик, болалар фольклорининг ўзига хос табиати ва жанрлар таркиби, меҳнат қўшиқларининг бадиияти, мифология ва бошқа мавзуларда йирик тадқиқотларни яратдилар.

Бу даврда уч жилдли «Ўзбек фольклори очерклари»нинг икки жилди нашр этилганлиги, эпик репертуарнинг ўзига хослиги, халқ бахшиларининг бадий маҳорати, халқ дostonчилигининг худудий-локал табиати (Т. Мирзаев, М. Муродов, М. Қўшмоқов, С. Рўзимбоев, Ҳ. Абдуллаев, О. Мадаев), халқ дostonчилигида туркумлилик (М. Мирзаева, М. Обидова, Қ. Мамашукуров), дostonлар поэтикаси (М. Саидов, С. Йўлдошева, Т. Зуфаров, Т. Ашуров), мифология ва унинг ўзбек фольклори эпик жанрларида тутган ўрни (Ғ. Акрамов, Б. Саримсоқов, М. Жўраев), ўзбек маросим фольклорининг жанрлар силсиласи, генетик асослари ва поэтикаси (М. Алавия, Б. Саримсоқов), эртақ бадиияти ва эпик сюжетлар типологияси (Ғ. Жалолов, Х. Эгамов, К. Имомов, М. Жўраев), ўзбек болалар фольклори (Ғ. Жаҳонгиров, О. Сафаров), ёзма адабиёт ва фольклор муносабати (О. Собиров, Ғ. Мўминов, Б. Саримсоқов, И. Ёрматов), ўзбек фольклори ва тарихий воқелик (М. Бобоев, У. Жуманазаров, С. Умаров)нинг тадқиқ этилганлиги, терма (А. Мусақулов, А. Турсунқулов), топишмоқ (З. Ҳусайнова), лирик кўшиқлар (Ш. Турдимов), мусиқа фольклори (Ф. Кароматов, Р. Абдуллаев), ўзбек халқ оғзаки драмаси (М. Қодиров, Р. Муҳаммадиев) чуқур ўрганилганлиги ўзбек фольклоршунослигини янги босқичга кўтарди.

XX асрнинг 90-йилларида ўзбек фольклоршунослигида олиб борилаётган илмий тадқиқотлар моҳиятан янги босқичга кўтарилди. Ўзбек фольклори асарларини барча худудлар бўйича изчил тўплаш ва тизимга солиш борасидаги ишлар жадаллаштириб юборилди. Мамлакатимиз мустақилликка эришганидан кейин фольклор асарларини нашр этиш борасидаги ишлар ҳам сифат, ҳам миқдор, ҳам қамров жиҳатидан ўсди. Кўпгина дostonлар, халқ китоблари илк бор нашр эттирилди. «Алпомиш» дostonи яратилганлигининг 1000 йиллиги кенг нишонланиши муносабати билан профессор Т. Мирзаев бу дostonнинг Берди бахши, Пўлкан ва Эргаш Жуманбулбул ўғли, Бекмурод Жўрабой ўғли, Саидмурод Паноҳ ўғли вариантларини 1999 йилда алоҳида китоблар ҳолида тўла нашр эттирди. У фольклоршунослик амалиётида биринчи мартаба «Алпомиш» дostonи Фозил Йўлдош ўғли вариантининг матни рус тилига қилинган илмий-адабий

таржимаси билан биргаликда академик нашрга тайёрлаб, чоп эттирди. Т. Мирзаев ва З. Хусаинова халқ бахшиси Раҳматулла Юсуф ўғли репертуаридаги «Гўрўғли» туркумига кирувчи дostonларни тўла нашрга тайёрладилар ва унинг асосий қисми «Гўрўғлининг туғилиши» (1996), «Авазхон» (1997), «Гўрўғли дostonлари» (2006) номи билан нашр этилди. 2006 йилда эса Раҳматулла Юсуф ўғли репертуаридаги «Гўрўғли» дostonлари тўла ҳолда нашр этилди. 2007 йилда уч жилдли «Ўзбек халқ эртаклари» мажмуаси нашрдан чиқди. Афсона ва ривоятлардан тузилган фольклор тўпламлари, Наврўз байрами билан боғлиқ халқ кўшиқлари, мақол ва топишмоқлар, ўзбек дафн ва таъзия маросимлари фольклори намуналари, тўй-маросим кўшиқлари нашрдан чиқди.

90-йилларда «Алпомиш» дostonининг шаклланиш тарихи ва поэтикаси (Т. Мирзаев, М. Муродов), ўзбек халқ лирикасининг тарихий асослари (А. Мусақулов), ўзбек халқ дostonлари поэтикаси (Ж. Эшонқулов, И. Ёрматов, Ш. Турдимов); фольклор-этнографик жамоалар ижодиёти ва унинг ҳозирги тарихий-фольклорий жараёндаги ўрни (С. Йўлдошева), ўзбек мифологияси (М. Жўраев, Т. Ҳайдаров, Т. Раҳмонов, Ш. Шомусаров), дев, ялмоғиз, пари, илон-аждар, Хизр каби мифологик образлар (Ж. Эшонқулов, Б. Жуманиёзов, О. Қаюмов, Д. Файзиева, Ф. Нурмонов), «Гўрўғли» туркуми дostonларининг тарихий илдизлари, типологияси ва бадиияти (Ш. Турдимов, С. Сориев), афсона ва ривоятлар (К. Имомов, М. Жўраев, У. Сатторов, М. Раҳмонова, Р. Саидова, З. Жумаев), лингвофольклористика (М. Ёқуббекова), болалар фольклори (О. Сафаров, С. Авезов), халқ кўшиқлари (А. Мусақулов, К. Очилов, Н. Қосимов), тарихий воқелик ва фольклор (У. Жуманазаров, Б. Бобоев, С. Умаров) фундаментал тадқиқ этилди. Бу даврда халқимизнинг миллий ўзлигини намойиш этувчи урф-одат ва маросимлари фольклорининг жанрлар таркиби, генезиси ва бадиий хусусиятларини тадқиқ этиш тамоийили кучайди.

XX асрда ўзбек халқ оғзаки бадиий ижодиёти асарларини ёзиб олиш ва архивлаштириш, дostonчилик мактабларининг ўзига хос хусусиятларини ўрганиш, бахшилар, кўшиқчилар, ас-

княбозлар, лапарчилар, ўланчилар, эртақчилар репертуаридаги асарларни тўплаш, бадий жиҳатдан энг мукамал фольклор асарларини нашр этиш ҳамда уларни илмий тадқиқ этиш борасида улкан ишлар амалга оширилди. Натижада ўзбек фольклоршунослиги Марказий Осиёнинг халқ оғзаки ижодини ўрганишга ихтисослашган энг етакчи илмий мактабларидан бири даражасига кўтарилди.

Муҳтарам ўқувчи! Сиз ўқишга чоғланган мазкур антологияга XX асрда ўзбек халқ ижоди асарларини тўплаш, нашр этиш ва илмий тадқиқ қилиш билан изчил шуғулланган фидойи фольклоршунос олимлар ҳақидаги мухтасар маълумот ҳамда улар томонидан яратилган тадқиқотлардан намуналар киритилган. Ўйлаймизки, бу мажмуа ўзбек фольклоршунослигининг фан сифатидаги шаклланиш жараёни ва тадрижий ривож босқичлари ҳақидаги тасаввурларингизни бойитишга хизмат қилади.

Маматқул ЖЎРАЕВ,
Ўзбекистон Республикасида хизмат кўрсатган
маданият ходими, филология фанлари доктори,
профессор

Ғози
ОЛИМ
(1893—1939)



Ғози Олим Юнусов 1893 йилда Тошкент шаҳрида тугилган. Профессор (1930). Истамбулдаги Туркия университетини тугатган (1923—25). Шундан кейин у савдо жамиятининг раиси, Юстиция халқ комиссарлигида илмий котиб, Ўзбекистон Халқ Маориф комиссарлиги қошидаги Тил ва терминология қўмитасида илмий ходим вазифаларида ишлаган. Ўзбек давлат университети (ҳозирги СамДУ)нинг филология, Тошкент педагогика институтининг Тил ва адабиёт факультетларида дарс берган ва Халқ Маориф комиссарлигининг Тилишунослик секциясига мудирлик қилган (1931 йилдан). Тил ва адабиёт илмий-текшириш институтида ишлаган (1934 йилдан). Фозил Йўлдош ўғли, Эргаш Жуманбулбул ўғли каби халқ бахшиларини аниқлаган. Фозил Йўлдош ўғли ва Ҳамроқул бахшилардан «Алпомиш» достонидан парчалар ёзиб олган (1922). «Алпомиш» достони» (1923), «Алпомиш» (1928) каби мақолалар муаллифи. Ўзбек фольклоршунослиги тарихида биринчи бўлиб «Ўзбек эл адабиётига тегишли материалларни тўпловчиларга қўлланма» услубий қўлланма ёзган (1926). 1939 йилда Тошкентда вафот этган.

«АЛПОМИШ» ДОСТОНИ

Халқ адабиётида достон энг аҳамиятли, балки биринчи ўринни тутаду. Достон қабилавий турмушнинг намунаси бўлганли-

гидан қабилавий ҳаётнинг ҳамма хусусиятларини энг очуқ кўрсата оладургон бир ажойиб қуролдир.

Чиндан ҳам, агар биз турк-ўзбек дostonларини тушунсак, турк қабилаларининг ўзаро бўлган курашлари билангина эмас, балки ул курашларнинг иқтисодий-сиёсий сабабларини, ул вақтдаги уруш усуллари, қуроллари, қахрамонларининг табиатлари, уларнинг қабила турмушидаги ўрни ва аҳамияти, алҳосил, ул даврдаги ижтимоий турмушнинг бутун борлиғи билан яқиндан танишган бўламиз. Миллий дostonлар эл оқини ва чечанлари томонидан ишланган услуб ва таъбирларни, ҳам эски луғатларни сақлайдирки, бу дostonнинг асосий хусусиятларидандир.

Турк эли дostonға бойдир. Турк уруғларининг кўписининг ўзига хос қабилавий дostonи бор: қипчоқнинг Қубланди ботир, нўғойнинг Ийдака ботир, қўнғиротнинг Алпомиш ботир, қирғизнинг Манас ботир деган дostonлари бор.

Булардан бошқа яна кўп Олтой жойларида, Туркистон қирларида, Идил ва Жойиқ сувлари бўйларидаги турк-ўзбек оқинлари томонидан ўқилмоқда бўлса ҳам, эсизки, матбуот юзиға чиқмағандир.

Бизда уйғониш даври бошланиши билан ёшларимизда миллий адабиёт туғиш даври кўзгалғанлиғини кўрамыз. Эндигина туғилиб келган янги адабиётимиз услуб, қолип ва руҳни форсдан олған чигатойчиликдан – бу бизнинг адабий турмушимиздаги ёлғон класизмдан («классицизм» демоқчи – О. О.) анчагина қутула бошласа ҳам, ҳали кучли бир миллий асосли қурулғон йўқ. Янги адабиётимизга кучли миллий асос бизнинг халқ адабиёти бўлиши керакки, бу тўғридаги мулоҳазаларимни иккинчи вақтға қолдириб, ҳозир менинг номимдан бўлтур ёз саёҳат қилиб юрганимда Тошканд ва Самарқанд уездларида яшайтурған ўзбекларнинг машҳур оқинлари Ҳамроқул бахши, Фозил жиров Йўлдош ўғлининг оғзидан ёздиғим ва «Билим ўчоғи»нинг бу нўмирида босилған «Алпомиш» дostonи тўғрисида бир-икки сўз айтиб кетмакчиман.¹

¹ Дарҳақиқат, «Билим ўчоғи» журналининг ушбу сониди (1923 йил, 2–3-қўшма сон, 39–59-бетлар) «Алпомиш» дostonидан Ғози Олим тайёрлаган парча босилған (О. Олтинбек).

«Алпомиш» достони бундан бир неча йиллар илгари турк этнуғрофи, мухтарам профиссур Абубакир Диваев томонидан ёзилиб, ўтган йил маориф камиссарётининг Билим кенгаши олдидаги Қирғиз-козоқ билим ҳайъати томонидан китобча ҳолида босилган эди. Мен Қозонда босилган яна бир козоқча «Алпомиш» достонини кўрган эдим. Керак профиссур Диваев томонидан ёзилган ва керак Қозонда босилган «Алпомиш» достони тамом эмасдир. Профиссур Диваевникида достоннинг биринчи воқеасигина кўрсатиладир. Иккинчи воқеасики, бу достоннинг энг фожеа ва шоирона қисми, кўрсатилмайдир. Биринчи воқеадан-да кўп муҳим воқеалари тушиб қолган. Қозон босмасида бунга тескари ҳол кўрамыз: достоннинг биринчи воқеаси ёзилмасдан иккинчи воқеасигина ёзилган. Фақат унда-да кўп гўзал лавҳалар тушиб қолган ва оқиннинг истеъдодсизлигидан достоннинг нафосатига кўп зарар келган.

Менинг томонимдан ёзилган «Алпомиш» достонига Алпомиш ботирнинг бошидан ўтган бутун воқеалар кирадир. Мен бу достонни ўзбек оқинлари оғзидан ёзганда эшитилганча ёзишга ва воқеаларни-да ҳеч бир лавҳасини, ҳатто айрим таъбирларни қолдирмасга тиришдим. Бундан мақсад шул маҳаллардаги (Самарқанд ва Тошқанд уездларидаги) ўзбекларнинг лавҳаларини қайд қилмоқ ва воқеаларни тўлалиғича сақламоқ эди.

Достоннинг кўп жойлариға эскартиб ва изоҳлар бериш керак эди. Аммо вақтим бўлмаганликдан бу муҳим ишни ишлай олмадим.¹

¹ Мақола куйидаги манба асосида босилмоқда: Ғози Олим Юнусов. «Алпомиш» достони // Билим ўчоғи. 2–3-сонлар, Тошкент, 1923. Б. 37–39.

ЭЛБЕК
(1898—1939)



Элбек (Маширик Юсупов) 1898 йилда Тошкент вилояти Бўстонлик тумани Хумсон қишлоғида тугилган. Тошкентнинг Девонбеги маҳалласидаги Ҳокий мактабини (1911), Шайхонтоҳур маҳалласидаги «Намуна» мактабини (1914), Тошкентдаги саккиз ойлик ўқитувчилар тайёрлаш курсини (1919) тугатган. Тошкент эрлар билим юрти ва Наримонов номидаги педагогика техникумида ўқитувчи бўлиб ишлаган. Туркистон Маориф халқ комиссарлиги қошидаги илмий даргоҳларда, «Маориф ва ўқитувчи», «Билим ўчоғи» каби журналларнинг таҳририятида ишлаган (1921 йилдан). «Лапарлар» номи остида халқ қўшиқларини чоп қилдирган (1922). «Топишмоқ, мақол ва ашула тўплами» (1923), «Ашулалар тўплами» (1935), «Болалар қўшиғи» (1937) каби мажмуаларни, «Эртақлар. Халқ адабиётидан болалар учун терма эртақлар» (1936) китобини нашр эттирган. 1939 йили Тошкентда вафот этган.

ЛАПАРЛАР

Бу кунгача халқ адабиётини (этнографиясини) йиғиш тўғрисида оғзимиз тинмай сўзлаб келсак-да, уни ишга оширишга ҳамон кўчганимиз йўқ.

Адабий қиймати ва ичиға олғон чуқур маънолари билан кўнгилни ўзига тортадурғон матал, эртақ, чўпчак ва лапарларимиз букун ўз-ўзидан йўқолиб борадир.

Буларнинг кундан-кун йўқолиб кетмакда эканини кўриб турган биз ўзбекларнинг жим турмай, уларни тўплашқа ва китоб равишида бостириб тарқатишқа ҳаракат этмагимиз тигиш.

Бу кунларда шу тилакни илгарига суруб ҳаракат қилғучи Ўзбек билим ҳайъати ва билим кенгаши каби илмий ўрунлар бор эса-да, бир томондан буларни тўплаш ишига қизиққан кишиларнинг бўлмаслиғи, иккинчидан халқ адабиётининг энг юксалган ўрунларининг тинчсиз бир ҳолда қолиб турганлиғи бу ҳаракатларга тўсиқ бўлиб турмоқда.

Лекин биз мундин сўнгра илгариги каби аҳамиятсиз қарайтурғон эсак, узоқ бормасдан шундай тарихий аҳамиятга эга бўлган бу адабиётларимизни(нг) ерга қўммагимиз аниқдир.

Мисол учун шул халқ адабиётининг энг муҳимларидан бири бўлган лапарларни олсак, букун лапарларни билгучи кишилар ёлғуз қишлоқлардагина қолганлиғи ва уларда ҳам илгариги аҳамиятини йўқота борганлиғи кўриниб турадир.

Бурунларда боболаримиз томонидан тўйдан-тўйга кўчурулуб, буюк ҳавас билан айтилиб келинган бу адабиёт букун сўнар ҳолига етмишдир.¹

Халқ адабиётимизнинг орасида лапарни айруча бир маънога эга бўлмаганлиғини кўрсатмак учун букунги ўзбекларнинг қишлоқда яшағучиларининг орасида қиз чиқаришларда айтилиб юрганларидан аҳамиятига қараб бир қанчасин кўчуруб ўтаман.

Лапарлар ўперага яқинроқ бир руҳда айтилган нарса бўлиб, буни қизларнинг никоҳидан бир-икки кун бурун ўюн кечасида куй билан айтиб ўқуйдирлар. Мунда келин бўлгучи қиз ўзининг яқин ўртоқларини чоқириб базм кечаси ясайдир. Бунинг бу кечасига қизлардан ташқари хотунлар ва куёв томонидан йигитлар ҳам келадир.

Бу кўнгилли кечани бошқариш иши қари хотунларга топширилганликдан, тартиб сақлаб кечани жуда яхши ўтказадирлар.

¹ Кафказия ўзбеклари (қўмиқлар) орасида букунги Туркистондаги лапарларнинг айни бўлган лапарларнинг давом этиб келмакда эканлиғини сўзлағучилар бор (Муаллиф изоҳи).

Бу ясалғучи базм кечада қизлар ва йигитлар ўзларининг кўнглидаги нарсаларин лапар йўли билан бир-бирларига англа-тадирлар.

Лапарни бошлаш олдидан қизлар билан йигитлар орасида турған хотунлардан бири лапарнинг бошланғичи бўлган ушбу куйидаги лапарни айтиб, уларни лапарга ундайдир.

Бошланғич лапар

*Лапарнинг аввал боши мармар тоши,
Чит рўмолни хўл қилган кўзнинг ёши.
Чит рўмолим хоса-ё, қўлида чинни коса-ё,
Қизлар лапар айтганда йигитлар қулоқ солса-ё.*

Бундан сўнг йигитлар тартиб билан ушбу йўлда лапар бошлайдир ҳам бир гал қизлар, бир гал йигитлар айтиб тонг оттирадирлар.

*Лапар айтсанг тўйда айтгил, сулук қизлар қочар-о,
Очилмаган гулгунчани булбул сайраб очар-о,
Эй булбул, мунча сайрайсан тоғу тошни ўйдириб,
Иссиқ-совуқ сув ичарсан мой юракни куйдириб.*

*Кўзам олуб сувга чиқсам оҳ уродур бир йигит,
Кўзам кўюб, қулоқ солсам – ёрдан айрилган йигит.
Ёрдан айрилган йигитнинг ёри ман бўлсаммукин?
Кўлига қирғий бериб, кўксидан жон берсаммукин?*

*Дарёнинг нарёгида бир туб гўза,
Ул гўзанинг тагида олтин кўза.
Жон янгажоним янга, арзим сиз(г)а,
Бир кеча қўшиб қўйинг қаро кўз(г)а.*

*Дарёнинг нарёгига қўй берамиз,
Тўтиқуш боласига тўй берамиз.
Тўтиқуш боласига ипак керак,
Ёр билан ўйнамоққа юрак керак.*

*Қизларжон, қайнар булоққа бошланг,
Моли кўп деб бой боласин хушланг.
Мол деган қўлнинг кири – ювса кетар,
Тирик қўлга мол битар, ўлган кетар.*

*Субҳидамнинг салқини сўлдурди гуллар баргини,
Кимга айтиб, кимга йиғлай бевафо ёр дардини?
Бевафо ҳаргиз вафодор бўлмади,
Тол оғоч асти мевадор бўлмади.*

Мана шул юқоридағи айтилган лапарлар ҳар ер – айрим парчаси ўзига тегишли бир маънони ичига олиб, табиий ҳолда ўтмиш замондағи қизлар билан йиғитларнинг тўйларида қилган адабий суҳбатларини бизга очиқ кўрсатадир.

Энди шундай халқ адабиётарини йўқота бошласак, бизнинг ўчун ўқунарлик иш юз берса керак.¹

¹ Мақола қуйидаги манба асосида босилмоқда: Элбек. Лапарлар // Билим ўчоғи. 1-сон, – Тошкент, 1922. Б. 96–98.

Ғулом
ЗАФАРИЙ
(1899–1938)



Ғулом Зафарий 1899 йил Тошкент шаҳрида туғилган. Туркистон маориф комиссарлиги илмий кенгаши Ўзбек билим ҳайъатининг Театр-этнографик билим ҳайъатига раис бўлган (1921–24). У 1921–22 йиллар Тошкент ва Фарғона водийсига сафар қилиб, халқ томоша санъатининг анъанавий жанрларини аниқлаган, кўзирчоқбоз, қизиқчи, аскиябоз ва раққослар санъатига оид материаллар тўплаган, халқ мусиқасидан намуналар, бир нечта оғзаки драма ёзиб олган. Ғулом Зафарий ўзи ёзиб олган «Мақтанчоқ киши» ҳамда ҳозиргача ёзиб олинган ягона оғзаки назмий пьеса ҳисобланадиган «Эр ва хотин» асарини нашр эттирган (1923). Унинг фольклоршунослик масалаларига доир «Ўзбек театри тарихи» («Ўзгаршичи ёшлар», 1923 йил, 2-сон), «Чигатой ўзбек халқ театруси» («Билим ўчоғи», 1923 йил, 2–3-сонлар, 62–68-бетлар) каби асарлари чоп этилган. Ғулом Зафарий тўплаган фольклор материаллари ўзбек халқ театри, мусиқа фольклори ва кўшиқчилари санъатини ўрганишда муҳим аҳамиятга эга. «Ҳалима» (1919), «Турғунбой» (1926) каби пьесалар яратиб, ўзбек болалар драматургиясининг шаклланишига катта ҳисса қўшган. 1944 йилда вафот этган.

ЧИГАТОЙ-ЎЗБЕК ХАЛҚ ТЕАТРУСИ

Чигатой (ўзбек) театруси илгарилари ҳозиргича «театру» деб аталмай, «томоша» деб аталиб, элнинг қизиқ ўюнчилари томони-

дан сайилларда, тўйларда, гапларда ва катта йиғинларда кўпрак эрмак – «танқид» йўли ила баъзан ўрнак бўладирган томошалар ясалиб келинган бўлса ҳам, китоб тарзинда ёзилган бўлмай, ўюнчилар томонидан тузилиб, ёдаки сақланган. Шул томошалар ўзбекларнинг илгариги тараққийсига кўп ёрдам берган.

Бу ўюнчилар элнинг келишмаган ишларин эрмак ва ўрнак йўли ила тузатишлари баробар беклар, хонларнинг ҳам ўрунсиз ҳаракатларин ўзларига кўрсатиб, ҳар чоқ кўзларин очиб турганлар. Туркистоннинг энг улуғ хонларидан бўлган Қизбек Арслонхон қизиқ ва ўюнчиларга зўр аҳамият бериб, ўз ўрдасида қизиқ ва ўюнчилар сақлаб, шулар орқали беклар ва ҳокимларни танқид этдириб, ҳар бир келишмаган ишларин тузатмакка чолишганлиги кулоқдан-кулоққа эшитилиб сақланиб келган хабарлар ила собитдир.

Илгарилари қизиқ ва ўюнчиларга эл ва хонлар томонидан яхши қаралиб келинган. Локин сўнг, ҳар бир маданиятга бошловчи ҳаракатларга дин отидан қарши турувчи «уламо»лар томонидан моненьликлар бўлиб, хонлар кўзидан тушган бўлса ҳам, эл ўртасида сақланиб келинган.

Кейинги чоқларда ўюнчилар, зўр моненьликлар орқасида эл кўзидан ҳам тушаётган бўлсалар ҳам, элнинг ўюнчиларга зўр рағбати орқасида шул чоқгача «қизиқлар» дебина сақланиб келди. Шул қизиқларни «эл ўюнчиси» (актиёр), ўюнларин «эл томошаси» (театрусси) дейилса бўлур. Негаким, шул чоқдаги қизиқларнинг ўюнлари илгариги эл қизиқ ва ўюнчилари томонидан тузулиб қолдирилган томошалардир. Буларнинг эл томошаси эканлигига таянч қидириб овора бўлмасдан қизиқларнинг ўюнларин бир йўл кўриш кифоя килур.

Шундоқки, қизиқлар бир ўюн ўйнамоқчи бўлганда тус ўзгартиб бошқа кийимлар киярлар-да, воқеага жойни (уй, ҳовли, боғ, кўчами) керак бўлса фаразий кўрсатурлар-да, ўйнаб берадирлар. Шунга мисол учун Фарғонанинг атоқли қизиқчилариндан бўлган Пирмат қизиқдан сўзлатиб ёзиб олган «Мақтанчоқ киши» номли томошани ёзиб ўтаман. Бу томоша ўйналганда кўрсатилган фаразий жойни (айтиб берувчининг сўзича) куйидагидай сахнада ўйнашга ярағудек қилиб декоратсия тайинлаб, сўзларининг уятликларин чиқариб ташлаб, ўз холича, яъни Пирмат қизиқ қандай айтиб бер-

ини бўлса шундай ёзиб кўрсатаман. Бунинг тузувчиси, айтиб берув-
чининг сўзига қараганда, (Кўқоннинг) энг сўнгги хони Худоёрхон-
нинг атоқли кизиклариндан бўлган тошкандли Усмон қизиқ эмиш.

МАҚТАНЧОҚ КИШИ

(Кулги бўлса керак)

Саҳна катта кўча. Турда бир самоварчилик дўкони, ёнида бир баққоллик. Самоварчиликда 5–6 чойхўр, самоварчи ҳам хизматчи. Чойхўрлар чой ичиб, бир-бири ила сўзлашиб турурлар. Бири дутор чалур. Ҳар замон кўчадан у ёқ-бу ёққа кишилар, болалар ўтиб турурлар. Баққолдан ҳам ҳар замон бир-икки киши келиб нарса олиб кетуб турар. Парда кўтарилгач, Турди савлат келур. Ҳар ўтган кишига бошдан оёқ тикилуб, бошини бироз эгуб, салом талаб қилгансимон кўринур. Салом берган киши бўлса та-каббуруна алик олур, салом бермаган кишининг кетидан қараб қолур. Кўлида тиш кавлагич, ҳар вақт тишини кавлаб юрар.

Турди: – (баққолга) Ассалому алайкум, ҳа, Холиқбой сўфи, эсан-соғмисиз?

Холиқ: – Ҳаййа, келинг, Турди савлат, жуда кам кўринасиз?

Турди: – Эй, сира қўяберинг, биз жуда катта киши бўлиб кетганбиз. Обру десангиз энди «Иш катта, ҳамён латта», дегандек жуда катта. Ўзимиз бўлсақ эшак бозорга оқсоқол бўлганмиз. Энди шундоқ катта бўлганмизки, жуда қўяберинг! Кўрган одам салом ўрнига туруб даъво қилатурган бўлди. Обру десангиз, шундоқ обрумиз борким, савдо қилиб турган икки кишини ўртасига бориб қолсам, шошилиб ақчасин беркитадирган бўлиб қолди. Ҳа, топишимиз бўлса жуда яхши, бир бойча бор. Еганимиз олдимизда, емаганимиз кетимизда, хотиним ҳам шундоқ. Ош қилишга шундай уста бўлибдирким, ол-ол билан зўрга бир-икки ошам еб, олдимизда ортиб қоладир. Шундоқки, қозоқ айтганидек: «Сен же, мен же, қолганини томга таша».

Холиқ: – Хо-хо, муборак оқсоқоллик, муборак. Қани, нонга қаранг, чой ичинг.

Турди: – Хуш, ҳозир ош қилдириб еб чиқдим. Чой ичсам бўлади (Чой ичиб, тишини кавлаб турар).

Эргаиш: – (ўғли ҳовлиқиб югуруб келуб) Дада, дада, токчадаги мўйлаб ёгингизни мушук еб қўюбдир.

Турди: – Ҳа, майли, хумчадаги мойдан солиб қўя қол, шуни ҳам сўз деб манга сўзлагани чиқдингми? Ўзинг билуб қила қолмайсанми?!

Эргаиш: – Қайси хумчадаги ёғ, дада? Ҳали шу чоқгача уйимизга косачада ҳам ёғ келганини кўрганам йўқ-ку?!

Турди: – Бор, йўқол кўз олдидан! (Турмоқчи бўлар).

Эргаиш: – Мана, кетвотман-ку! (Халқга қараб) Уйларида ҳеч нима йўқ-ку, яна менга қараб гердаялар (кетади).

Турди: – Аҳмоқ бола, ҳали уйдан чиқишимда, уйда хумдаги ёғ соп бўлубдир, деса бўлади-ку! Онаси ярамас, онаси ўргатган-де, шундақа десанг, тезрак олиб келадир, деб. Кошки мен бошқа одамлар сингари: бугунча эблаштириб тура тур, эртага олиб бераман, дейдирган одам бўлсам. Бир марта айтди ҳозир, борди-ю, ўзим йўқ бўлсам югуриб бориб Чорсудаги Булдуруқ қассобга айтса қанча ёғ, гўшт деса берадир. Худога шукур, уйда ёғ соп бўлган бўлса қазноқда қоп-қоп ун, гуруч бор, чангакда гўшт бор. Ундан бошқа нарсаларни ботмон-ботмонлаб олиб бериб қўюбман. Онаси ўзи нафси ёмон, бўлмасак хотун, ҳозир ош қилиб еган бўлса ҳам, яна ош егиси келибдир. Ҳа, ош бўлмаса бошқа томоқ-дэ!

Эргаиш: – (югуриб келур) Дада, дада! Оишонанинг калитини беринг, онам иккимиз чой қайнатиб, қўшимизникидан тилаб олиб чиққан икки бурда қаттиг нонини ивитуб еймиз. Жуда қорнимиз очиб кетди. Кечадан бери ҳеч нима еганимиз йўқ.

Турди: – Йўқол, кет, аҳмоқ! Калит манда нима қилсун, онанда-ку!

Эргаиш: – Онаминг ўзида эмас, ҳатто халони қулублаб, калитин ўзингиз олиб юрасиз-ку!

Турди: – (урмакчи бўлуб югуриб) Тўхтаб тур, нималар деб ётибсан (қулар, Эргаиш қочар, ўтурганлар ҳаммаси эрмак қилуб куларлар). Бу ҳаромига бир гап бўлган, ё онаси ўргатган-дэ, бори мани шарманда қилмоқ учун шу сўзларни айтадир. Холиқ ака, ўзингиз ўйланг, шу сўзлар кўчада сўзланатургон сўзларми?

Холик: – Ҳали ёш-дэ, ҳар бир сўзни сўз деб сўзлай берадир.

Турди: – Ахир, ман катта, обрўли киши бўлсам, ҳар ким айтган сўзимни ҳозир қилса, деган нарсам тайёр бўлса, қандоқки машини уйимда ҳеч нарса бўлмаса, ҳужра тўла галла бўла туруб жўртага келуб мани уялтирадир. (Шул чоқда ўгли Эргаш иши хотуни жулдир-жулдир паранжи ёпунгон, келиб қулоқ солиб турарлар. Турди буларни кўруб четга қараб.) Эй, шарманда бўлдим-ку, бу ҳароми онасин бошлаб келибдир-ку!

Хотуни: – Ҳа, обрўли киши, билмаганларнинг олдида нималар деб мақтаниб ётибсан, уйингда ҳеч ниманг йўқ-ку! Уялмасдан сўйлашингни қара!

Турди: – Сан нега мандан сўроқсиз кўчага чиқдинг?

Хотуни: – Ҳа, нима қилардинг, очлиқ жонимга тегди, чиқдим. Сан эр бўлиб уйингдан хабар олмасанг, очми-тўқми демасанг. Келасан, мўйлавингга озгина ёғ сурасан-дэ, кўчага чиқиб тишингни кавлаб гердаясан.

Эргаш: – (онасига) Келинг, ойи, отамни бир шарманда қилайлиқ.

Хотуни: – Ҳа, кел, уйда нимаси бор, нимаси йўқ бир-бир айтиб бериб, бир уялтирайлуқ.

Эргаш: – Қани, бошланг.

Хотуни: – Ҳа, худо кўтаргур савлат, (иккиси бирга) тахмони кўчага йиқилиб ётган бир эски уйинг бор, ундан бошқа ниманг бор, ниманг бор?! Бир олди тушиб кетган, босай деб турган айвонинг бор, ундан бошқа ниманг бор, ниманг бор?! Бир томони босиб ётган эски отхонанг бор, ундан бошқа ниманг бор, ниманг бор?! Ўчоқбошингда ярмисини мушук гажиган, умрида ун бетини кўрмаган супранг бор. Ундан бошқа ниманг бор, ниманг бор?! Бисотингда, нон топиб келсанг ҳар беш-олти кунда бир қайнатадургон, пучуқ қумгонинг бор. Ундан бошқа ниманг бор, ниманг бор?! Олиб келганингдан бери аталадан бошқа нарса пиширмаган лаби учуқ бир қозонинг бор. Ундан бошқа ниманг бор, ниманг бор?! Уйингда ярмиси йўқ, ярмиси ер ёпишиб ётган эски наматинг бор. Ундан бошқа ниманг бор, ниманг бор?!

Эргаш: – Тўхтанг, ойи, энди ўзини мақтайлиқ. (Иккиси бирга) бизни очдан-оч қўйиб, ош едим деб чираниб, ёғ суруб чиқиб бу-

раб ўлтурсан мўйловинг курсун. Бизни совуқда дийратиб қўюб, онангинг тўйингда қилиб берган чопони курсун. Ёлгондакам кўпни кўрганман деб, кийиб юрган қизил тўппингинг попуги курсун. Бу ёлгон сўзларни валдираб юрган оғзинг курсун.

Турди: – Индамаган сари нималар дейсанлар?! (Кувлар. Онабола қочар. Саҳнани бир айланиб, човуб кетурлар).

Парда тушадир.

Мана буни ўқуб кўрган ҳар бир киши ўз-ўзидан биз театруни овруполиклардан кўруб ўргандук, деб караб турмасдан, бизда ҳам эскидан театрумиз бор деб, ўзбекларга театруни биз ўргатдик деювчиларнинг оғзиға ура биладир.

Бундан бошқа гап ва тўкмаларда ўйналадирган «Сутхўр акам жон берадир», «Ололмайдир, кал, кал», «Кичкинажон, кичкина», «Ялмоно-ялмон» ўюнлари, «Лўли», «Овчи», «Раис», «Қози», «Оқсоқол» деган таклид ўюнлари эл орасида томошанинг яхши ўрун тутганлигин кўрсатадир.

Бори томоша ва ўюнларнинг яхши йўлга қўйилмаганиға сабаб, юқорида айтилганча, уламолар бўлган. Ислон динининг бўш ўюн-кулгудан қайтарганини курул қилуб, томошаларнинг фойдали эканлигин тушунмай ёки тушунсалар ҳам ўзларига эргаштирмакка қизиқуб қайтаришлари зўр монень бўлган.

Яна томошалардан бошқа ўзбекларда куйлик эрмак (ҳажвий куфлет)лар бор бўлган. Бунга мисол учун Ўлка маориф ходимлари курултойида театру тўғрисида ўқуған доқладимдағи «Эр ва хотун» куфлитини ёзиб кўрсатаман.

ЭР ВА ХОТУН

Хотун: – Манинг бир ёрим бор жонидан тўйгон,

Жонидан тўйибон жаброна қўйгон,

Жаброна қўйибон олдизга келгон.

Қози: – Қани?..

Хотун: – Мана ўзи.

Қози: – Қўйдингми, аҳмоқ?

Эр: – Тақсир, қўймас эдим чочлари пахмоқ,
Хотун: – Қатиқ келтирмади, тақсир, ювмадим,
Тароқ келтирмади тарай олмадим.
Эр: – Қатиқ олиб берсам, ялаб қўюбдир,
Тароқ олиб берсам, қалаб қўюбдир.
Хотун: – Тақсир, тумов эдим ялаб қўювдим,
Хўрдам қайнамовди қалаб қўювдим.
Эр: – Тақсир, олиб келдим бир бог янтоқни,
Худой олсин мундай чочи пахмоқни.
Хотун: – Ман ҳам чиқмас эдим, соқоли пахмоқ,
Қатиқ келтирмаган ўзлари аҳмоқ.
Қози: – Бор кет, сани қўйди, эринг олмайди,
Бу хил эру хотинчилик бўлмайди.

Бул куфлет ҳам Худоёрхоннинг энг сўнгги чогидаги тўйида Усмон кизик томонидан тузилгани Пирмат кизик ва хўқандлик кўп чоллар томонидан сўйланадир.

Томоша (театру)лар тўғрисида овруполикларнинг, ўзбеклар биздан кўриб билдилар, деган даъволари ўз-ўзидан йўққа чиқса ҳам, кўғурчоқ ўюни Шарқга Овруподан ўн бешинчи асрдан бошлаб ўтди, деган даъвосига жавоб беришга кучим етмайди. Бул тўғрида билувчи кишилар бўлса матбуотда ёзиб кўрсатмакларин ўтинур эдим.¹

¹ Мақола куйидаги манба асосида чоп этилмоқда: Фулом Зафарий. Чигатой халқ театруси // Билим ўчоғи. – Тошкент, 1923. Б. 62–68.

Ҳоди
ЗАРИФ
(1905–1972)



Зарифов Ҳоди Тиллаевич 1905 йил 20 мартда Тошкент шаҳрида туғилган. Ўзбекистонда хизмат кўрсатган фан арбоби унвони (1967). Боқу ўқитувчилар семинарининг талабаси (1923–26). Ўзбекистон халқ Маориф комиссариати илмий марказида илмий ходим (1926–27), Этнография, фольклор ва археология бўйича илмий-текшириши кабинетини ташкил этган ва унга раҳбарлик қилган (1928). Самарқанд қишлоқ хўжалик техникумида муаллим (1928–29), Ўзбекистон Марказий музейида раҳбар (1929–31), Ўзбекистон Маданий қурилиш илмий-текшириши институти этнография секциясида мудир (1931–34), Тошкент давлат педагогика институти ўқитувчи (1934–38), Тошкентдаги Адабиёт музейининг ташкилотчиси ва директори (1940–56), ЎзР ФА Шарқшунослик институтининг ташкилотчиларидан бири ва директор муовини (1943–44), йилларда Ўрта Осиё давлат университетиди ўқитувчи (1943–45). ЎзР ФА Тил ва адабиёт институти директори (1944–48), директор муовини (1955–62), Фольклор бўлимининг мудирини (1934–1972), «Ўзбек энциклопедияси» бўлимининг бошлиғини (1965–1972) вазифаларида ишлаган. Фозил Йўлдош ўғли, Эргаш Жуманбулбул ўғли, Пулкан ва Ислон шоир каби бахшилардан «Алтомии», «Ёдгор», «Жаҳонгир», «Рустам», «Равшан», «Очилдов», «Ҳасан батрак», «Юсуф ва Аҳмад», «Авазнинг уйланиши», «Мардикор», «Шайбонийхон» каби достонларни ёзиб олинган. «Шайбонийхон» (1928), «Равшан» (1940, 1941, 1954, 1963), «Малика айёр» (1941, 1954), «Чамбил қамали» (1944), «Кунтуғмиш» (1949, 1955), «Ёдгор» (1956), «Кундуз билан Юлдуз» (1963), «Рустам» (1965), «Алтомии» ва бошқа достон-

ларни ёзиб олган. *Наширга тайёрлаб, чоп эттирган. Ўзбек халқ ижоди кўп эзилдигига кирадиган асарларни тайёрлаш принципларини ишлаб чиққан ва шу асосда «Ўзбек халқ ижоди» кўпэзилдигининг 37 жилдини нашр эттирган. «Ўзбек халқ қаҳрамонлик эпоси» (1947, ҳамк.), «Алпомиш» достонининг асосий мотивлари» (1957), «Ўзбек халқ шоирларининг ижоди» (1958), «Фольклор ва археология материалларини қиёсий ўрганиш масалаларига доир» (1958), «Ўзбек фольклористикаси тарихидан» (1970), «Кунтузмиш» достони ҳақида (1971) «Равшан» достони ҳақида (1971), «Фозил шоир – машҳур достончи» (1973), «Ўзбек халқ достонларининг тарихий асослари бўйича текширишлар» (1976), «Наврўз – халқ байрами» (1990), «Аршақ – шақ қаҳрамони» (1995) каби асарлар муаллифи. Абу Райҳон Беруний номидаги Давлат мукофоти лауреати (1973). 1972 йил 13 январда вафот этган.*

АРШАҚ – ШАҚ ҚАҲРАМОНИ

Ўрта Осиёда яшаган қадимги шақ ва массагет қабилалари тўғрисида ҳикоя қилувчи тарихий битикларда «*Аршақ*» атамаси учрайди. Биз ушбу мақоламизда ана шу терминнинг келиб чиқиши хусусида сўз юритишни кўнглимизга тукканмиз. Бинобарин, сўзни тилшунос Н. Я. Маррнинг «*Аршақ*» атамаси ҳақидаги мулоҳазаларини таҳлил қилишдан бошламоқчимиз.

Н. Я. Марр «*Аршақ*» атамаси бевосита Арманистон билан боғлиқ, деб ҳисоблайди ва ўз фикрларини Аршақийлар ҳаракатига дахлдор тарихий маълумотлар билан далиллашга ҳаракат қилади. Олимнинг эътироф этишича, ўтмиш муаррихлари асарларида қайд қилинган (гарчи атиги бир мартагина бўлса-да), «*Аршақуни*» (*arshaq – uni*) сўзи «*Аршақ*» атамасининг қадимий шаклларида биридир.

Н. Я. Марр бу лисоний шаклнинг қадимийлигини исботлаш мақсадида *Arshat – uni*, *Arshar – uni*, *Rasht – uni*, *Sahar – uni*, *Bagrat – uni* каби атамаларни келтиради. «*Uni*» суффикси арман тилига мансублигига ҳеч бир эътирозимиз йўқ. Аммо муайян лисоний бирлик таркибидаги суффикс сўз ўзагининг келиб чиқиши ҳақида тугал илмий хулоса чиқаришга асос бўлмайди, албатта. Туб сўзлар тил сўз бойлигининг асосини ташкил этади ва муайян

тилдаги ўзак сўзлар бошқа тилга ўзлашиши ҳамда ўзга маънода, яъни сўз маъносини ўзгартирган ҳолда қўлланилиши ҳам мумкин. Шу боис «аршақуни» сўзи биз таҳлил қилаётган «аршақ» терминининг келиб чиқишини ойдинлаштирувчи асосий далил бўлолмайди, деб ўйлаймиз.

Н. Я. Марр шундай деб ёзади: «Юқорида қайд қилинган «*uni*» суффикси «аршақ» сўзининг ўзагини арман манбалари асосида яфетологик нуқтаи назардан таҳлил қилишга имкон беради. Агар бу сўз, ҳақиқатан ҳам, тотем атамаси бўлса, аршақийларнинг асл ватани қаерда жойлашганлигидан қатъи назар, бу сўз моҳиятини яфетик боскич заминидан излаш керак бўлади. Бинобарин, кўлимизда «*ap*» ўзагига алоқадор *Arshavir*, *Ardat*, *Arsharuni*, *Artanud*, *Arberani* каби этнотопонимик атамалар мавжуд экан, нега энди бу заминни Арманистон ҳудудидан изламаслигимиз керак экан?»¹.

Кўринадики, аввало, Н. Я. Марр «Аршақ» атамаси «тотем» маъносини англатади, деб ҳисоблайди. Қолаверса, тарихимизнинг ойдинлаштирилмаган лавҳаларини равшанлаштиришда муҳим аҳамиятга эга бўлган масалалардан бири – бу атама юзага келган этно-жўғрофий ҳудудни белгилашда ҳам чалкашликларга йўл қўйган кўринади.

Маълумки, Н. Я. Марр муайян сўз ёки тушунча моҳияти ва этимологиясини ёритишда машрику мағриб тилларига хос кўплаб лисоний маълумотларни қиёслаб, фикр юритади. Унингча, «*Аршақ*» атамаси «*Ap+шақ*» қисмларидан иборат бўлиб, «*ap*» сўзининг ўзи «*қўл*» маъносини англатувчи «*ap*» лексемасига ўзакдошдир. Н. Я. Марр ўз фикрларини умумлаштириб, «тотем вазифасини бажарувчи «*ap + шақ*» атамаси «*ap*» детерминитиви (тотем кейинчалик илоҳа, тангри сифатида ҳам тасаввур қилинган) ва «*шақ*» – «*сак*», яъни «*скиф*» сўзларининг бирикувидан ҳосил бўлган», – деб ҳисоблайди.²

Шундай қилиб Н. Я. Марр «*ap*» сўзи тотем маъносини билдирган бўлиб, кейинчалик ҳатто «*тангри*» маъносида ҳам

¹ Марр Н. Я. Собрание сочинение. Т. III. – М.: Государственное социально-экономическое издательство, 1936. – С. 354–355.

² Ўша манба. – 357-бет.

қўлланилган деб талқин қилади. Унинг таниқли шоғирдларидан бири В. В. Абаев эса «*шак*» сўзи ҳам «кийик» тотемига алоқадор этник атама деб ҳисоблайди.¹

Аслида эса «*Аршақ*» тушунчасининг дарахт култи ёки қўлнинг магик-тотемистик талқинларига алоқадорлигини тасдиқлайдиган бирорта тарихий-мифологик далил мавжудлиги маълум эмас. Милоддан бурунги даврларга оид тарихий ҳужжатларда эса Аршақ, ҳақиқатан ҳам, ҳаётда яшаб ўтган реал шахс номи сифатида таърифланади. Маълум бўлишича, милоддан аввалги III асрнинг ўрталарида яшаган Аршақ Ўрта Осиё худудида истиқомат қилган бир неча қабила ва уруғларнинг сардори бўлган экан. У ўз қавмдошлари билан биргаликда юнон-македония босқинчилари ва эроний ҳукмдорларнинг талончилик хуружларига қарши узоқ йиллар мардонавор кураш олиб борган.

Страбон (милоддан бурунги I аср)нинг гувоҳлик беришича, «Аршақ скифлар авлодидан бўлиб, дай қабиласининг сардори эди. Ўзларини парналар деб атайдиган бу қавм Оху (Теджен) дарёси соҳилларида яшар эди».² Арриан (милоддан бурунги II аср) эса дайлар.³ Сирдарё бўйларида ва Бактрия тупроғида ҳам истиқомат қилганликларини қайд қилади.⁴

Тарихий манбалардаги маълумотларга қараганда, Аршақ Парфия ҳоқонлигига асос солган халқ қаҳрамонидир. Аршақнинг саргузаштларини қаламга олган муаррихлар унинг Тириdot деган укаси ҳам бўлганлигини алоҳида қайд қиладилар. У ўз акаси – Ўрта Осиёда яшаган кўчманчи ва ерли қабилаларнинг мустақиллик йўлида олиб борган мардонавор курашига бошчилик қилган бу ёвқур, жасур сардорнинг энг яқин маслаҳатгўйи, содиқ кўмакчиси бўлган. Оғир жангларнинг бирида Аршақ қаҳрамонларча ҳалок бўлгач, унинг ўрнини эгаллаган Тириdot Парфия давлатини мустақил, озод диёрга айлантиради. Аршақийларнинг ҳозирги Арманистон худудида пайдо

¹ Абаев В. В. Осетинский язык и фольклор. Т. I. – М. – Л., 1949. – С. 179.

² Древние авторы о Средней Азии. – Ташкент, 1940. – С. 91.

³ Бу сўз «Авесто»да «даха» тарзида қайд қилинган.

⁴ Древние авторы о Средней Азии. – Ташкент, 1940. – С. 47.

бўлиши эса нисбатан кейинги даврларда рўй берган тарихий ҳодисалар сирасига киради.¹

Бизнингча, «*Аршақ*» атамасининг келиб чиқиши ва моҳиятини бевосита Ўрта Осиё халқларининг тили ҳамда қадимий тарихидан излаш керак. Модомики, ўтмиш битикчиларининг «*Аршақ* – скифлар авлодидандир» деган таърифига асосланадиган бўлсак, унинг асли шақ қабиласига мансублигига ҳеч бир шубҳа қолмайди. Бизнингча, Страбоннинг ана шу қайдномаси «*Аршақ*» атамасининг моҳиятини ойдинлаштиришда ҳал қилувчи аҳамиятга эга бўладиган маълумот деб қаралиши лозим.

Бу атама икки қисмдан, яъни «*ар*» ва «*шақ*» узвларидан ташкил топган. Эътироф этиш керакки, Н. Я. Марр ҳам «*Аршақ*» сўзи таркибидаги «*шақ*» элементини уруғ-қабила атамаси, яъни этник ном дея тўғри талқин қилган эди. Аммо унинг «*Аршақ*» сўзидаги «*ар*» элементи «тотем», «тангри» маъноларини англатади, деган фикрига қўшилиб бўлмайди. Шунингдек, Н. В. Тревернинг «*ар*» сўзи «қуёш», «ёғду» маъноларини билдирувчи «*хвар*» лексемасига алоқадорлиги тўғрисидаги фарази² ҳам ҳақиқатдан йироқдир.

Айрим муаррихлар «скиф» номи билан аталган массагет ва шақ қабилаларининг ўзбек халқи этногенезида муҳим ўрин тутганлигини етарлича асослаб беришган. Шу боис, ўзбек халқ оғзаки ижодида шақ ва массагет эпоси, уларнинг қахрамонона жасоратлари мадҳ этилган кўҳна дostonларининг қолдиқ ҳолда етиб келган рудиментлари сақланганлиги бежиз эмас. Хусусан, «Ойсулув» ёки «Кунботир» дostonида тасвирланган воқеалар милoddан бурунги VI асрда рўй берган тарихий ҳодисаларнинг бадийий инъикосидир. Бу дoston сюжети Геродот «Тарих»ида келтирилган қадимий қиссалардан бири – массагетларнинг подшо Кир бошчилигидаги босқинчиларга қарши курашига бағишланган эпик ҳикояларга³ ўхшаб кетади. Буюк муаррих нақл қилган бу қиссанинг айрим мотивлари ўзбек бахшилари репер-

¹ История народов Узбекистана. Т. I. – Ташкент, 1950.

² История народов Узбекистана. Т. I. – Ташкент, 1950. – С. 91.

³ Геродот. История. Т. I. – С. 200–214.

туаридаги бошқа дostonларда ҳам учрайди.¹ Масалан, ўртаосиёлик бахшилар шак паҳлавони Рустам жасоратлари мадҳ этилган эпик асарларни ҳамон тилдан қўймай қуйлаб келмоқдалар.

Ўзбек тилининг луғат бойлигида келиб чиқишига кўра қадимги сўғд, шак ва скиф² тилларига мансуб бўлган сўзларнинг кўп қўлланилиши ҳам тасодифий эмас.

Масалан, шак лаҳжасида «ем-хашак» маъносидаги «*хваси*» сўзи тилимизда «*хашак*» тарзида ишлатилади. Шунингдек, «чўп», «майда хашак» маъносидаги «*хас*» сўзи ҳам юқоридаги ўзакка алоқадор. Тилимиздаги «*чарви*», «*жир*» сўзлари шак тилида «ё» маъносида қўлланилган «*тсарби*» лексемасининг фонетик вариантларидандир. «Авесто» битикчилари сўғд лаҳжасидаги «*тан*» сўзини «исинмоқ» маъносида ишлатганлар. Бинобарин, «*оловга тобла*», «*оловнинг тапти*» ибораларидаги «*тоб//тан*» сўзлари ҳам ана шу лисоний бирликка алоқадор бўлиши керак.

Шак тилидаги «*кава*», сўғдча «*кана*» сўзларининг маъноси «*балиқ*» демакдир.³ Назаримда, жонли сўзлашувда кўп қўлланиладиган «оғзингни каппа-каппа очма», «мунча оғзингни каппа-каппа очасан?» каби иборалардаги «*кана*» ҳам худди шу кўхна сўзга маънодошдай туюлади.⁴ «Авесто»да, сўғд тилида

¹ Милоддан бурунги VIII асрдан бошлаб эрамизнинг V асригача бўлган даврни ўз ичига олган шак эпосининг ўзига хос хусусиятлари ва ўзбек эпосининг юзага келишидаги ўрни масаласи Т. Мирзаев ва Б. Саримсоқовлар томонидан кейинчалик чуқур ўрганилди. Бу ҳақда қаранг: Мирзаев Т., Саримсоқов Б. Дoston, унинг турлари, тарихий тараккиёти // Ўзбек фольклорининг эпик жанрлари. – Тошкент, 1981. – 28–35-бетлар (Мақолани таржима қилиб, нашрга тайёрлаган М. Жўраевнинг изохи).

² Бу ўринда Оврупо худудида истикомат қилган скифлар эмас, балки қадимги Ўрта Осиёда яшаган қавмлар назарда тутилмоқда.

³ Муайян сўзнинг у ёки бу қабила ёки уруғ бирлашмаси тилига тааллуқлилиги шартлидир. Биз фойдаланган манбаларда қандай қайд қилинган бўлса шундайлигича қўлладик. Ўтмишда яшаб ўтган муаррихлар бирорта скиф сўзини қайд қилишаётганда кўпинча шак ёки массагет қабилаларини назарда тутганлар. Маълумки, ўша даврда Ўрта Осиёда истикомат қилган кўпгина этник гуруҳлар ва уруғлар ана шу икки қабила бирлашмаси таркибига кирган.

⁴ Нос ёки талқонсифат емишни оғизга солмоқ маъносида қўлланиладиган «каппаламоқ» сўзи, шунингдек, шеваларимизда «бўйиннинг бўғиз қисми» маъносини билдирувчи «капиржак» лексемаси ҳам ана шу қадимий ўзак асо-

«*гау*» сўзи «*сигир*» ёки «*буқа*» маъноларини билдиради. Скиф ва сўғд тилларида «*қўл*» маъносини англатувчи «*чанг*» сўзи ўзбекча «*чангал*» (бу сўз таркибидаги «*ал*» элементининг ўзи ҳам «*қўл*» маъносини билдиради) сўзининг пайдо бўлишига асос бўлган.¹

Скифлар жанговар дружина ёки аскарлар гуруҳини «*бала*» дейишган. Зеро, ўзбек халқ эпосининг шавкатли қаҳрамонларидан бирининг номи *Бāl Аваз*, *Балā Аваз*, *Аваз балā* деб аталишининг боиси ҳам ана шу кўхна терминга боғланади.² Тахминимча, «*аскарбола*» («аскар + бола») сўзининг келиб чиқиши ҳам «*чанг+ал*» типидagi лисоний бирликларнинг шаклланишига ўхшаб кетади. Бу сўзнинг биринчи қисми, яъни «аскар» асли араб тилига мансуб лексема бўлиб, феодализм даврида ўзбек тилига ўзлашган. Унга, аслида, «аскарлар тўпи» маъносида қўлланилган сўғдча «бала» элементи қўшилишидан «аскарбола» сўзи ҳосил бўлган. «Бала» сўзи ўзбек халқ этногенезида муҳим ўрин тутган қадимги қабилалар тилига мансуб бўлиб, ҳозирда унинг асл маъноси унутилиб кетган.

«Авесто»даги «*тану*» (бадан) сўзини ўзбеклар «*тан*», «*тана*» тарзида ишлатадилар. Киши исми «Авесто»да ва скифларда «*нама*» дейилган. Ўзбеклар эса ҳозир ҳам шахс отини «ном» деб атайдилар.

«Авесто»даги скифлар тилида қўлланилган «*нар*» ҳамда ўзбек тилидаги «*нар*» ва «*нор*» сўзлари «эр киши», «эркак» маъноларини англатади.

Республикамизда «*сак*» ёки «*шақ*» атамаси билан алоқадор жуда кўп топонимик номлар ҳам қайд қилинган. Бу эса қадимги шақ қабилалари қачонлардир Ўзбекистон ҳудудида яшаганликларидан далолат беради. Хусусан, Тошкент вилоятининг Паркент туманидаги Сўқоқ қишлоғи яқинидаги тоғлардан бири *Шаққўрғон* (Шак + қўрғон) деб аталади. Шаққўрғон тоғи эта-

сида юзага келган бўлиши керак (Мақолани таржима қилиб, нашрга тайёрлаган М. Жўраевнинг изоҳи).

¹ «Чанг солмоқ» ибораси ҳамда «чангча» (арик сувидаги шох-шаббаларни олиш учун ишлатиладиган қўлга ўхшаш илгак, мироблар иш қуроли) сўзи ҳам ана шу ўзак асосида шаклланган (нашрга тайёрловчи изоҳи).

² Мен илгарирок «Бол Аваз» атамасини «Ширин Аваз» («Сладкий Аваз») тарзида нотўғри изоҳлаганман.

гида *Сахсартена* номли тепалик ҳам бор. Остида каттагина ғор бўлган бу тепаликнинг қадимийлигини археологик топилдиклар ҳам тасдиқлайди.¹

Қашқадарё вилоятидаги Тенграхарама яйлови яқинида *Қиршак* ёки *Қирсак* деб аталувчи жой бор. Ўша ердаги кичкинагина бир дарё ва дара ҳам ана шу ном билан аталади. Лақай номли ўзбек уруғи таркибида «*шакаш*» (шак-ай) шохобчаси борлиги маълум; «-ай» қўшимчаси ўзбек этнонимларида, хусусан, лақай уруғига мансуб қавмлар номи таркибида кўп учрайди. Масалан, *дўсай* каби. Бундай мисолларни жуда кўплаб келтириш мумкин. Шу каби сўзларни ўлка ва халқ тарихи билан боғлиқ ҳолда тадқиқ қилиш учун эса этнолингвистик изланишлар олиб бориш мақсадга мувофиқдир.²

¹ 1946 йилда ер қимирлаш натижасида тепаликнинг устки қисми ўпирилиб кетган ва сочилиб ётган суяклар орасидан остон, яъни оссуарий топилган. Сахсартепада археологик казиш ишлари олиб борилиши тарихнавислар учун ноёб материаллар тўплашга имкон беради. Бундан ташқари, «Сўқоқ» топонимининг ўзи ҳам мутахассислар эътиборини тортиши лозим. Маҳаллий аҳоли орасида «Сўқоқ» топоними «сув» + «оқ» сўзларидан ясалган деган талкинлар мавжуд. «Сўқоқ» топонимининг ҳақиқий маъноси аллақачонлар унутилган бўлиб, одамлар ўз кишлоклари номининг келиб чиқишини ўша ердаги чашмалар билан боғлиқ афсоналарга алоқадор деб биладилар.

Маҳмуд Кошғарийнинг «Девону луғотит турк» асарида, XV аср адиби Қутбнинг «Хусрав ва Ширин» достони ва бошқа манбаларда «сўқоқ» сўзи учрайди. Бу сўз кийикнинг бир тури атамаси маъносида қўлланилган. Хусусан, Маҳмуд Кошғарий бу сўзни «сўқоқли тоғ» иборасида ишлаган. Қутб «сўқоқ» сўзини «кийикнинг йирик тури» маъносида қўллаган бўлса, Маҳмуд Кошғарий бу лексемани «оқ кийик» деб изоҳлайди. Эслатиб ўтаман, илмий адабиётларда «жайрон» (*Gasella subgutturusa*) номи билан юритиладиган жайдари чўл кийигини ўзбеклар ҳозир ҳам «оқ кийик» дейдилар.

² Бир қанча ўзбек уруғлари номининг этимологиясини фақат ўзбек тили материаллари асосида аниқлаш ғоят мушкул. Муайян этнонимнинг келиб чиқишини таҳлил қилишда ўзбек халқининг этногенезида иштирок этган қадимги қавмлар тилига оид материалларни жалб қилиш у ёки бу этноним тарихини ёритишда ҳал қилувчи аҳамият касб этиши мумкин. Масалан, «чаркас» (фонетик варианты «черкес») номли ўзбек уруғи номининг пайдо бўлишини, назаримда, сўғд тилидаги «бургут» маъносини билдирувчи «*čarkas*» сўзи билан боғлаб изоҳласа бўлади. Бинобарин, ўзбек уруғларининг шажара тизимида «лочин», «бахрин», «тувадоқ» каби бевосита қуш номи билан боғлиқ этник атамалар мавжудлигини назарда тутсақ, бу қиёсий таҳлил нечоғлик асосли

Тилимиздаги эскирган, архаик сўзларнинггина эмас, балки ҳозир ҳам муомалада бўлган айрим сўзларнинг асл маънолари ва келиб чиқиш тарихи ўлкамизда қачонлардир яшаган аجدодларимизнинг ўтмиши, турмуш тарзи ва ёзма ёдгорликларини ўрганиш орқали ойдинлаштирилади.

Маълумки, «калта» сўзи «қиска», яъни «узун»нинг антоними ҳисобланади. Баъзи бир тилшунослар фикрича, бу сўз туркий ўзакдан ясалган. Аслида эса «калта» сўзи ҳам тарихан сўғд тилига хос лексик бирлик экан. Ўрта Осиёда кечган тарихий-этноик жараёнлар натижасида сўғдлар ўзбек ва тожик халқлари таркибига сингиб кетганлиги учун «калта» сўзини ҳар икки халқ бир маънода тушунади. Бунинг устига, бу сўз қозоқ, қирғиз, қорақалпоқ ва туркман тилларида мавжуд бўлгани ҳолда, озарбайжон, татар, турк ва бошқа бир қатор туркий халқлар луғатида учрамаслиги ҳам бу сўз туркий халқлар бобокалонлари тилига эмас, балки Ўрта Осиёда яшаб, шу заминда шаклланган халқлар таркибига сингиб кетган қадимги сўғдлар лаҳжасига тааллуқли эканлигидан далолат беради.

Шакл/сак, сўғд ва ўзбек тилларидаги лисоний муштаракликларни келтириш орқали, биринчидан, ҳозирги ўзбек тилида Ўрта Осиёда яшаган қадимги уруғ-қабилалар тилидан ўзлаштирилган лексик қатлам мавжудлигини қайд қилиш, иккинчидан, айрим луғатчиларимизнинг у ёки бу сўз этимологияси, тарихи қайси тилга мансублиги хусусидаги баъзи мулоҳазалари бир томонлама эканлигини кўрсатиб бермоқ зарур. Ўзбек тили тарихини халқимиз этногенезидан ажратиш, фақат ёзма манбалар асосида тадқиқ этиш ҳам ана шундай нотўғри илмий хулосаларнинг оммалашшишига сабаб бўлмоқда.

Ўзбек халқи ва ҳозирги ўзбек тили айрим олимлар ўйлаганидек, кейинги беш юз йил давомида шаклланган эмас, балки бир неча минг йиллик тарихий даврлар маҳсулидир. Проф. А. Ю. Якубовский, Я. Ғ. Ғуломов ва М. Ваҳобовлар жуда тўғри қайд қилишганидек, ўзбек халқининг этногенезиси милоддан бир неча аср аввалги даврлардан бошланади.¹

эканлиги аён бўлади.

¹ История народов Узбекистана. Т. 1. – Ташкент, 1950. Профессор Я. Ғ. Ғуломов ва М. Ваҳобовларнинг фикрлари эса ЎзР ФА конференцияси

Энди бевосита «*Аршақ*» атамаси таҳлилига ўтаман. Юкорида кайид қилинганидек, бу атама, шубҳасиз, икки лисоний узвдан ташкил топган. «Аршақ» «*ар*» сўзига Ўрта Осиёда яшаган қадимги қабилалардан бирининг номи – «*шақ*» этноними қўшилишидан ясалган. Менимча, «*ар*» сўзининг маъносини ҳам Ўрта Осиёнинг қадимги аҳолиси тилидан излаган маъқул.

«*Шақ*» ва «*сақ*» сўзининг маъноси ҳозирга қадар бизга қоронғу. Балки, бу сўз кийик ёки буғунинг бир тури номининг ифодаси бўлиши ҳам мумкин. «*Шақ*» ва «*сақ*» бир сўзнинг икки хил фонетик варианты бўлиб, қадим замонлардан бери гоҳ «ш», гоҳида эса «с» билан талаффуз этиб келинган. Зеро, «с//ш» товушларининг ўзаро ўрин алмашиши ҳозирги ўзбек тилига ҳам хос бўлган фонетик ҳодисадир. Масалан, *шунурги* – *сунурги*, *шувоқ* – *сувоқ*, *ширач* – *сирач* каби. Қадимги ёзма ёдгорликлар тилида ҳам бу товуш ўзгариши ҳодисаси кузатилишига асосланиб, ўтмишда айрим қабилалар баъзи сўзларни сирғалувчи «ш» ундоши билан, бошқалари бўлса худди ўша сўзни «с» билан талаффуз қилишган бўлса керак, деб тахмин қилиш мумкин. Назаримда, милоддан аввалги даврларда айрим қabila ёки уруғ бирлашмалари «шақ» деб, баъзи бирлари эса «сақ» деб аталганга ўхшайди.

Агарда ана шу илмий далилларга асосланадиган бўлсак, назаримда проф. К. В. Тревернинг юнон тилида сирғалувчи ундошлар бўлмаганлиги учун қадимги муаррихлар «шақ» атамасини «s» фонемаси билан «*saq*», яъни «*сақ*» тарзида ёзганлар, деган мулоҳазаси¹ баҳсталаб эканлиги маълум бўлади.

Шу ўринда «шақ» атамасининг охириги фонемаси хусусида ҳам тўхталиб ўтмоқ керак. Ўйлашимча, бу сўзнинг сўнгги товуши аслида «к» сифатида эмас, балки чуқур тил орқа «қ» тарзида талаффуз қилинган. Бу атама, аслида, қандай талаффуз этилишини аниқлашда Ёқут Ҳамавийнинг бир маълумоти, айниқса, муҳим илмий қимматга эга. Ёқут ўзининг «Муъжам-ул булдон» асарига: «Аршақ – бошида «а» (фатҳали), «р» сукунли, нуқтали «ш» фатҳали ва охирида қоф», – деб ёзган.²

(1951 йил) ва ЎзР ФА Тарих ва археология институти илмий кенгашида (1952 йил 24 июнь) қилган маърузаларида баён қилинган эди.

¹ Қаранг: История народов Узбекистана. Т. I. – С. 61.

² Ёқут. Муъжам-ул булдон. 1-жилд. – 192-бет.

Ана шу маълумотнинг ўзи Муғондаги тоғ номи маъносида қўлланилган «Аршақ» атамаси ўрта асрларда (XII аср) «Аршақ» тарзида, яъни сўзнинг учинчи фонемаси сирғалувчи «ш» ундоши ва охирги ҳарфи чукур тил орқа «қ» товуши билан талаффуз этилганлигидан далолат беради. Чунки Ёкут бу ўринда «қ» ҳарфи нукта билан ёзилишини алоҳида қайд қилади.

Шуниси эътиборга моликки, бу атама ўзбек халқ бахшилари репертуаридаги дostonларда ҳам учрайди. Хусусан, «Хиромон» дostonидаги мифологик қаҳрамонлардан бирининг номи «Аршақ» деб аталади.¹

Ўзбек халқ бахшиларидан ёзиб олинган «Хиромон» дostonидаги эпик образ номи – «Аршақ» шакли ўрта аср олими Ёкут асарида келтирилган Озарбайжондаги тоғ атамаси ҳамда нисбатан кўхна ёзма обидаларда қайд қилинган «Аршақ» терминига уйқашлиги, менимча, тасодифий эмасга ўхшайди. Бунинг устига «шақ» деган уруғ номи милoddан бурунги I минг йилликнинг ўрталарида санскрит тилида яратилган қадимги ҳинд эпоси «Маҳабхарата»да «шақа» тарзида қўлланилган.² Ана шу далилларнинг барчаси ўрганилаётган қабила номини «сак» эмас, «шақ» деб ёзиш ўринли эканлигини кўрсатади.³

Энди «Аршақ» атамасининг биринчи қисми, яъни «ар» сўзининг маъноси хусусидаги илмий-назарий фараз ва мулоҳазаларимизни баён қилиб ўтсак.

Менимча, «ар» сўзи ва унинг «эр» шаклида талаффуз қилинган фонетик варианты қадим замонлардан бери «эр», «эркак

¹ «Равшан» дostonидаги эпик қаҳрамонлардан бирининг номи – «Эрсак» атамаси, назаримда, бошқа маънога эга. Шу боис, уни «Аршақ» атамаси таҳлилига жалб қилмадик.

² Қаранг: Махабхарата. Древнеиндийский эпос. – М. –Л., Изд. АН, 1950. – С. 449, 648, 666.

³ Кейинги йилларда олиб борилган изланишлар натижасида «сак»//«шақ» этнонимининг этимологияси хусусида бир неча хил талқинлар юзага келди. Хусусан, озарбайжон олими М. Сейидовнинг фикрича, «сак» қадимги туркийлар тилидаги «ёй» маъносини англлатувчи «са»//«саг» сўздан келиб чикқан бўлиб, ёкут миллатининг номи «саха» атамаси ҳам ана шу лексемага боғланади. Бу ҳақда қаранг: Сейдов М. Гъзил дојушчунун сој-етник талеји һаггында // Улдуз. – Бақы, 1981. – № 8. – 45–46-бетлар (Маколани таржима қилиб, нашрга тайёрлаган М. Жўраевнинг изохи).

киши», «жасур», «баходир», «мард», «қахрамон» каби маъноларда қўлланилиб келган.

Ўрта Осиёда яратилган ёзма ёдгорликларда «эр» сўзи кўп учрайди. Бу сўз кўпинча шахс отини билдирувчи сўзлардан олдин ёки кейин қўлланилиши кузатилади. Хусусан, Маҳмуд Кошғарийнинг «Девону луғотит турк» асарида келтирилган «*Алп эр Тоға өлдіму*» мисраси билан бошланадиган қўшиқда ҳам «Тўн-га» исмига «эр» сўзи қўшиб ёзилган.¹

«Артунга» атамаси «ар + тўнга» сўзларидан ташкил топган. Маҳмуд Кошғарийнинг сўзларига қараганда, «тўнгра – йўлбарс жинсидан бўлган бир хил ҳайвон. У фил кушандаси. Бу сўзнинг асосий маъноси шу. Лекин бу сўз туркларда маъноси ўзгарган ҳолда қўлланади. Бу сўз кўпинча одамларга лақаб ўрнида ишлатилади. Чунончи, *Тоғохон, Тоға тэгин* ва шунинг кабилар».²

XI аср шоири Юсуф хос Ҳожибнинг «Қутадғу билиғ» асарида ёзилишича, Артўнга ёки Тўға алп эр сак эпосида тилга олинган бир қахрамон номи бўлиб, тожиклар уни Афросиёб деб аташаркан.

*Бу турк бэгларида ати бэлгулуг,
Тўға алп эр эрди қути бэлгулуг,
Тажиклар айур эди Афрасийаб,
Бу Афрасийаб тутти эллар талаб.*

Маҳмуд Кошғарий эса бу ҳақда қуйидагиларни ёзади: «Туркларнинг улуғ хони Афросиёбни Тоға алп эр деб атар эдилар. Йўлбарс каби кучли, баходир одам демақдир».³

«Девону луғотит турк»да келтирилган қадимги туркий қўшиқлардан бирида «Ўтар» номли шахс оти қайд қилинган:

*Тоқиш ічрә урїштім,
Улуғ бірла қарїштім,*

¹ Маҳмуд Кошғарий. Девону луғотит турк. 1-том. – Тошкент: Фан, 1960. – 77-бет.

² Маҳмуд Кошғарий. Девону луғотит турк. 3-том. – Тошкент: Фан, 1963. – 379-бет.

³ Ўша манба. – 379-бет.

*Төкүш атін жаріштім,
Алдім эмді ал ұтар.*

Яъни, «Жангда жамоанинг каттаси билан кашка отда урушдим. Унга ўқ отдим ва унга: «Мендан буни ол, эй Ўтар» – дедим».¹

Менимча, Ўтар киши исми, яъни антропоним бўлиб, «ўт + ар» сўзларининг бирикувидан ҳосил бўлган ва «ўтдек жасур баҳодир», «ўтботир», «ўтюрак» маъноларини англатади.² Бу сўз ҳозирги ўзбек тилидаги «ўт йигит» иборасига маънодошдир.

Ўрхун-Енисей ёдномаларида ҳам «ар» сўзи «қаҳрамон» маъносида қўлланилган. Бу жиҳатдан Кемчик-Жирғак дарёси соҳилидан топилган Енисей ёдгорлигидаги «*ар атым јок учун*», яъни «қаҳрамон деган исмим бўлмаганлиги учун» ибораси диққатга сазовордир. Қадимги туркий тошбитикларидан олинган «*Ар атым јарук тәгін*» (менинг қаҳрамонона отим Ярук тегин), «*Ар атым јола*» (менинг қаҳрамонлик исмим Йола), «*Ар атым Арән-улуғ*» (менинг қаҳрамонлик отим Эрен улуғ) каби мисолларни³ келтириб ўтиш фойдадан холи эмас.

«Ар»//«эр» сўзи билаи боғлиқ юқоридаги мисолларнинг бари қадимги туркий ёзма ёдгорликлардан олинганлигини ҳам назардан соқит қилмаслик керак. Шақлар эса, олимларнинг тадқиқотларига қараганда, туркий тилда сўзлашмаганлар. Шақ қабила бирлашмаси таркибида туркийзабон уруғлар бўлган ёки бўлмаганлиги ҳам ҳозирча маълум эмас. Шу боис, бизнинг «*Аршақ*» атамаси таркибидаги «ар» элементи қадимги туркий қавмлар тилидаги «ар»//«эр» сўзига алоқадор бўлиши мумкинлиги хусусидаги фаразий мулоҳазаларимиз ҳар томонлама асосланган, қатъий илмий

¹ Маҳмуд Кошғарий. Девону луғотит турк. 1-том. – Тошкент: Фан, 1960. – 349-бет.

² «Ўтар» атамасининг шахс оти эканлигини Маҳмуд Кошғарийнинг ўзи ҳам эътироф этади. У «Ўтар – киши исми», – деб ёзади («Девон», 1, 349-бет.). Ўзбекларда ўғил болаларга «Ўтар» исмининг берилишини ХХ аср бошида яшаб ижод қилган хоразмлик шоир Аваз Ўтар ўғли исми шарифидан ҳам билса бўлади.

³ Малов М. Е. Енисейская письменность тюрков. – М. –Л., 1925. – С. 38, 56, 73, 74, 78.

хулоса сифатида қабул қилинмаслиги керак. Табиийки, бу ўринда келтирилган мисоллар шунчаки тасодифий ўхшашлик аломати ҳам бўлиши мумкин, албатта. Сирасини айтганда, «ар» сўзининг тарихига доир юқорида баён қилинган мулоҳазаларимиз шу мавзуда қалам тебратган олимларнинг талқинлари тўғри ёки тўғри эмаслигини текшириб кўриш, ўрни келганда улар билан баҳслашиш, фикр алмашишга қаратилган эди.

Ўрганилаётган масалани янада чуқурроқ ёритиш мақсадида баъзи бир қадимий атамаларни, масалан, скиф тилидаги «*арвант*» сўзи ва унинг турли хил фонетик кўринишларини таҳлил қилиш лозим деб ҳисоблаймиз. Манбаларда кўрсатилишича, бу сўз «Авесто»да «*аур-вант*» шаклида ёзилган бўлиб, «қаҳрамон», «шижоаткор», «жасур» маъноларини билдирган. Мен қадим замонларда Ўрта Осиёда яшаган қабилалар тилини ўрганувчи мутахассис, қолаверса, умуман тилшунос эмасман. Шу боис юқорида келтирилган мисоллар ёки шунга ўхшаш лисоний материалларни изчил тадқиқ этишни тилшунос олимларимизга ҳавола қиламан. Шундай бўлса-да, «қаҳрамон», «жасур» маъноларини англатувчи «*арвант*» ва «*аурвант*» сўзларининг асосий компоненти «ар» элементи эканлиги тилшунос бўлмаган кишига ҳам аён бўлиб турибди.

«Авесто» матнларида қайд қилинган «*аршан*» сўзи ҳам «эркак киши» маъносини билдирар экан. Қадимшуносларнинг аниқлашларича, «*арша*» лексемаси «Авесто»да қўлланилган «*аршан*» сўзининг скифлар тилидаги маънодош фонетик вариантидир.

«Ар»//«эр» сўзлари билан биргаликда кўҳна ёзма обидаларда «*аран*»//«*эран*» лексемалари ҳам ишлатилган. Бу сўз Маҳмуд Кошғарий «Девони»даги «*эрән била найзашиди*»¹ иборасида мавжуддир.

XII асрда яшаб ижод қилган аллома Замахшарийнинг «Муқаддимат ул-адаб» асарида форсча «мард» сўзининг «эр», «мардон» сўзининг эса «эран» сингари ўзбекча муқобиллари берилган.²

¹ Маҳмуд Кошғарий. Девону луғотит турк. 3-том. – Тошкент: Фан, 1963. – 291-бет.

² ЎзР ФА Адабиёт музейи Қўлёзмалар фонди. Инв. № А–11, 6 б варақ.

Буларнинг барчаси «ар» сўзи қадим замонларданоқ «жасур», «шижоатли», «қўркмас», «ботир», «қаҳрамон», «эркак киши» маъноларида қўлланилган дея хулоса чиқаришимизга асос бўла олади. Бу сўз ҳозир ҳам ўзбек тилининг айрим шеваларида худди шу маънода ишлатилади. Хусусан, «ар» фонетик варианты Хоразм шеvasи ва туркман тилида мавжудлиги маълум.

«Ар» сўзининг бошқа шеваларда оммалашган «эр» шакли эса умумўзбек тили учун муштарак лексема саналади. Эрхубби, Эрбўта, Эртой, Эртоғин, Эрали, Эрўғли, Эрдона каби атоқли отлар таркибида «эр» сўзи қўлланилишининг мантикий асоси ҳам бу қадимий лисоний бирликнинг анъанавий маъноси моҳиятига алоқадордир.

Халқ «эр» сўзига ҳамиша алоҳида аҳамият бериб келган. Ўз юртининг озодлиги, мустақиллик йўлида мардонавор курашган жасур фарзандларнинг қаҳрамонона жасоратлари эл қалбида абадий муҳрланиб қолган. Асрлар бўйи номи одамлар тилидан тушмаган, шуҳрати элларга дoston бўлган жасур қаҳрамонларни халқнинг ўзи вояга етказган. Ўзининг мардонаворлиги билан жамият ривожига муҳим ҳисса қўшган халқ қаҳрамонларининг бетакрор образлари ҳам яратилган. Ижодкор халқимиз ботир қаҳрамон сиймосида ҳамиша ўзининг умумлашма қиёфасини, энг эзгу орзу-истакларини амалга ошира оладиган қудратли куч соҳиби образини мужассамлаштирган. Ота-боболаримиз ўз фарзандларини ақлли, эл олқишига сазовор бўладиган, ҳалол ва меҳнатсевар, она юрт ва улус равнақи йўлида фидокорона меҳнат қиладиган киши қилиб тарбиялашни фарз деб билганлар. Эл дардига малҳам бўлиб, олқиш олиш учун эса одам, аввало, эр бўлиши керак.

Эр йигит образининг моҳияти пурмаъно ҳикматларга айланган ўзбек халқ мақолларида ҳам ўз ифодасини топган: «*Ё эр бўл, бўлмаса эрнинг хизматида бўл*», «*Тортишган – эр, тортишмаган – қаро ер*», «*Эр йигитнинг қадрини оғаси эмас, эл билур*», «*Эр қаноти – от*» каби.

Бундай мақолларни кўплаб келтириш мумкин. Эр йигит, элнинг қаҳрамон, ботир фарзандлари хусусидаги айрим мақол ва ҳикматли сўзлар минг йиллар давомида деярли ўзгаришсиз халқ хотирасида сақланиб қолган. Масалан, «*Эм билса, эр ўл*

мас», «*Эр сўзи бир*» каби мақоллар XI асрда ҳам қўлланилган.¹ Маҳмуд Кошғарий томонидан халқ оғзидан ёзиб олинган бу мақоллар XI асрда қандай шаклда қайд қилинган бўлса, шундайлигича бизгача етиб келган экан. Аслида «ар» образи билан алоқадор бу мақоллар «Девон» муаллифи яшаган даврдан илгари-мунча аввалроқ яратилмаганмикин, деган ҳақли савол тугилади. Бинобарин, қуйида келтириладиган бир тарихий лавҳа биз кўриб ўтган халқ мақоллари шақ қахрамонларининг шонли саргузаштлари асосида яратилганлигидан далолат беради:

Сўғда олиб борилган қонли жанглардан кейин Александр Македонский ўз кўшинини Сирдарёдан ўтказиб, шақлар ўлкасига ҳужум қилишга ҳозирлик кўра бошлайди. Шунда Александрнинг ҳузурига шақ қабиласи элчилари кириб келишади ва унга қараб: «Нега бизнинг еримизга оёқ босдинг? Сен кимсан, қаердан келдинг? Биз сенга хизмат қилишни, эгилишни хоҳламаймиз. Бизга хўкиз, омоч, қилич, ёй ва қозон-товоқ бўлса бас. Биз бу нарсаларни дўстларимиз билан ўзаро баҳам кўрамыз ва биргаликда душманга қарши курашамиз. Хўкиз ва омоч билан ер ҳайдаб, ҳосил оламиз. Товоқда дўстлар билан вино ичамиз. Ёйда узоқдаги душманни қирамыз, қиличда эса яқиндагисини. Биз шундай қилиб Сурия, кейин эса Эрон ва Индей шоҳларини енгиб келганмиз.

Сен Лидия, Сурия ва Эронни забт этдинг, бақтрияликларни бўйсундирдинг, энди эса бизнинг чорвамизга кўз тикаяпсанми? Аммо Бақтрия атрофида айланиб юришинг бефойда. Агар ишонмасанг, Танаис (Сирдарё – Х.З.)дан ўтиб кўр, скифлар диёри нечоғлик бепоён эканлигига, сен ҳеч қачон унинг поёнига етолмаслигинга амин бўласан».²

Шақ элчилари ўз сардорларининг Александрга мурожаатини шундай баён қилганлар. Курц Руф томонидан нақл қилинган бу ҳикояда шақ қавмлари эрк, озодлик, юрт мустақиллиги, ватанпарварлик, қахрамонлик, душманга шафқатсизликни барча

¹ Маҳмуд Кошғарий. Девону луғотит турк. 1-том. – Тошкент: Фан, 1960. – 38-бет; 2-том. – 266-бет.

² Древние авторы о Средней Азии. – с. 68.

туйгулардан юқори қўйганлиги яққол намоён бўлиб турибди. Ана шундай жасур қабила бирлашмасининг сардори Аршақ турли-туман уруғларнинг элим деб, юртим деб ёниб яшайдиган ботир йигитларини ўз атрофига тўплаган. Аршақ ана шу элпарвар, ватанпарвар қабила фарзандларининг йўлбошчиси, чинакам халқ қаҳрамони эди.

Юқорида таҳлил қилинган тарихий, этнографик, фольклористик, лисоний ва топонимик далиллар Н. Я. Маррнинг «Аршақ» тўғрисидаги мулоҳазалари нотўғрилигини кўрсатади ҳамда бу образ Арманистонда яшаган қадимги қавмлар тарихи билан алоқадор деган қарашларни тамомила рад этади. Аршақ ҳеч қандай тотемистик образ ёки тангри номи эмас. У ҳаётда ҳақиқатан ҳам яшаб ўтган реал шахс, мард ва жасур жангчи. Ўз юртининг озодлиги, мустақиллиги йўлида мардонавор курашган халқ қаҳрамонидир. Зеро, тарихий манбаларда ҳам у худди шундай тасвирланган.¹

¹ Ушбу мақола атоқли олим Ҳ. Зарифов томонидан 1966 йилда рус тилида ёзилган бўлиб, биринчи марта 1995 йилда М. Жўраев томонидан ўзбек тилига таржима қилиниб, «Ўзбек тили ва адабиёти» журналида «Аршақ – халқ қаҳрамони» номи билан «Фольклоршунослар меросидан» рукнида (1995 йил, 1-сон, 54–63-бетлар) босилган.

Буюк
КАРИМИЙ
(1906—1945)



Буюк Каримий 1906 йил Тошкент шаҳрида туғилган. Ўзбек билим юрти (1926), Самарқанд педагогика техникумида (1930), Маданий қурилиш илмий-текишириш институти аспирантурасида (1933) ўқиган. У 1934 йилдан ЎЗР ФА Тил, адабиёт ва тарих институти (ҳозирги Алишер Навоий номидаги Тил ва адабиёт институти)да илмий ходим сифатида ишлай бошлаган. Олимнинг «Мақоллар ва ҳикматли сўзлар» (1939), «Канал ҳақида қўшиқ» (1940), «Мардлар майдони» (1942) китоблари ва «Фозил баҳиши» (1935), «Ўзбек фольклори» (1939), «Ўзбек халқининг оғзаки ижоди» (1939), «Гўрўғлининг туғилиши» ҳақида» (1939), «Тошкент канали қурилишида тўпланган фольклор материаллари ҳақида» (1969), «Ўзбек халқ эртақларининг баъзи бир хусусиятлари» (1995) каби тадқиқотлари чоп этилган. У «Гўрўғлининг туғилиши» (1941), «Балогардон» (1941), «Тулак ботир» (1941) «Зулфизар ва Авазхон» (1942), «Гўрўғли» (1942) сингари халқ достонларини ҳамда Лутфийнинг «Девон»и ва Гулханийнинг «Зарбулмасал»ини наишрга тайёрлаган. Буюк Каримий 1945 йил 10 мартда Тошкентда вафот этган.

ЎЗБЕК ХАЛҚ ЭРТАҚЛАРИНИНГ БАЪЗИ БИР ХУСУСИЯТЛАРИ

«Эртақ» термини узоқ замонларнинг мевасидир. Лекин қайси замонлардан бери «эртақ» шаклида ишлатила бошлагани ҳақида

катъий бир нарса дейишга ҳали қийналамиз. Аммо илгарилар «эртак» шаклида ишлатилгани бизга маълум. Луғатларга му-рожаат этганимизда «эртаки» сўзининг қадимий сўз, афсона, хикоят, қисса, ҳатто, дoston маъноларини ўз ичига олганини кўрамиз. Демак, «эртаки» сўзи «эрта», «эртанг» сўзларидан бў-либ, «эртаги, қадимги, аввалги» маъноларини беради.

[...]¹ Эртаклар ҳам ўтмиш кунлар, аввалги воқеалар, қадимги ишлар сифатида баён этиладиларким, шу «эртаки» маъноси би-лан боғлиқдир. Ҳатто ҳозирги кунларда ҳам, айниқса, чол ва қарияларимиз оғзидан баъзан «эртак» сўзи ўрнида «эртаки» тер-минини эшитамиз. Бу эса халқ ўртасида ҳар икки шаклнинг ҳам учрашига далилдир. Ҳақиқатан ҳам «эртаки» сўзи тилдаги баъ-зи товушларнинг йўқолиш қонуниятига кўра қисқарган, кейин-ги «и» товушининг йўқолғон шаклидир. Айниқса, [...] эртаклар устида сўз очиб, халқ эртакларини кенг омма ўртасида тарқата бошлаганимиздан кейин ва айни замонда экспедицияларимиз таъсири остида бу «эртак» термини ҳамма ерда баробар томир ёйди. Яъни демакчимизким, баъзи ерларда «эртак», бошқа ер-ларда «чўпчак» ёки «матал» ишлатиб келинган экан, энди бу тер-минларнинг ҳаммаси деярли ўз ўрнини «эртак» терминига топ-ширди ва «эртак» термини умумлашди. Лекин шундай бўлса-да, «чўпчак» термини устида ҳам тўхташга тўғри келади. Халқ ўр-тасида «эртак» термини вазифасини кўп ерда ҳали ҳам «чўпчак» адо қилиб келади. Бу «чўпчак» сўзини ҳам «эртак» сўзи каби текшириб кўрсак, тахминий бўлса ҳам шундай хулосага келиш мумкин бўлади:

«Чўпчак» эмас, балки «чўрчэк» сўзининг – афсона, эртак, ма-сал маъноларини тошиб юрганлигини луғатлар орқали топиши-миз мумкин.² Шунингдек, Алишер Навоийда ҳам «чўрчак» сўзи-ни шу маъноларда учратамиз:

¹ Буюк Каримий рисоласини мақола сифатида нашрга тайёрлаш чоғида қисқартирилган ўринларда [...] белгиси қўйиб борилади (нашрга тайёрловчи М. Жўраев изоҳи).

² Будагов Л. Сравнительный словарь турецко-татарских наречий. Т. 2. – СПб. – М., 1869. – стр. 493.

*Ҳабибим ҳусни васфнинг ўйла муҳлик онглаким, бўлгай,
Қошида қиссайи Юсуф бир уйқу келтурур чўрчак.*

Ҳагто олтой халқларида ҳам шу термин аини маънода ишлатилган экан. Шу «чўрчак» сўзининг кейинги кичрайтиш кўшимчаси **-чакни** олиб ташласак, колғон «**чўр**» сўзи «ингичка – кичик чўпчалар», «хас-хашак» маъносини беради. Демак, «чўр» сўзи «чўп» сўзининг шу маънодаги функциясини адо этган. «Чўп» сўздан эса «чўпчумак» шакли ҳам борким, чўпчаларни йиғиш, тўплаш маъносини тошийди. «Чўпчинак», «чўпчимак» «чўпчак териш» бўлиб чиқадиким, бу халқнинг «офтоб чиқди оламга, югуриб бордим холамга, холам чўпчак тер деди. Чўпчак тердим бир кучок, нон ёпти ўчоқ-ўчоқ» деган мавсум ашуласидаги чўп теришдир. Ҳамон «чўпчак» майда-чуйда чўпчалар бўлса, «эртак» маъносида ишлатилган «чўпчак» сўзи ҳам, шу маънонинг муқояса этилган сифатидаги майда новеллачалар демак, эмасмикин? Чунки халқ, жуда кичик парчалар бўлгани учун, ҳам топиш-излаш маъноси бўлгани учун бўлса керак, «топишмоқ», «чистонлар»ни ҳам «чўпчак»ка боғлаб «топар чўпчак» деб атайди. Бу ҳам юқоридаги фикримизга бир қадар асос бўлади.

Бу масаланинг бир томони. Иккинчи томони эса, «чўр» сўздан «чўрчак» сўзи ясалиб «эртак» маъносини тошиса, тубда бир маъно тошиган «чўрчак» билан «чўпчак»нинг лингвистик жиҳатдан, товушларнинг алмашилишлари ва бошқа тил ҳодисалари билан боғлаб, ҳар иккисини бир илдиздан дейиш мумкин эмасмикин?

М. Павет Қасор Тайлнинг¹ «Аллуғотун-Навоия вальпстиш-ходатул-чиғатоия» деган ва «Абушқа» номи билан машхур «Аллуғотун навоия» номли луғатларнинг маълумотларига кўра, «чўп» сўзининг «тўғри, рост, ҳақиқат» маънолари ҳам борким, агар биз шунга биноан «чўп» сўзининг охирига кичрайтиш кўшимчаси «чак»ни қўшсак, «чўпчак» сўзи ясалади. Демак, бундан маълум бўладики, «чўпчак», кичик (оз) бўлса ҳам ростликка, ҳақиқатчаларга эга бўлган нарса дейилган бўлади. Бу, албат-

¹ Бу ўринда М. Павет Де Гасуртеилле назарда тутилмоқда (нашрга тайёрловчи М. Жўраев изоҳи).

та, ҳақиқатдир. Шундай бўлгач, бу масалани ё бу томон билан боғлашга тўғри келармикан? Ҳар ҳолда бу масала тор лингвистик хусусиятга эга бўлганлигидан, текширувчиларимизнинг хулосаларини эшитиш иштиёқида қолиб туриб, мавзуимизнинг бўлак қисмига кўчамиз.

Ўзбек эртакларининг бир қадар бўлса-да, ўзига хос хусусиятларини текширмакчи бўлар эканмиз, албатта, эртакларимизнинг классификацияси масаласига йўлуқмай иложимиз йўқ. Аммо бу тўғрида ҳали биз ҳеч иш қилганимиз йўқ десак бўлади. Шунинг учун биз бу текширишимизда ўзбек эртакларини классификация қилишни устимизга ололмасак ҳам, лекин марҳум фин олими фольклорист Анте Аарненинг «Эртаклар турларининг кўрсатмаси»¹ деган машҳур асарига суяниб, уни рус эртакларига

¹ Эртакшуносликдаги «тарихий-географик метод»нинг асосчиси, фин фольклоршунослик мактабининг йирик намояндаси Антти Амагус Аарне (1867–1925)нинг бу асари, аслида, «Verzeichnis der Marchentypen», яъни «Эртак типларининг кўрсаткичи» деб номланган бўлиб, 1910 йилда нашр этилган. Бу асардаги назарий қарашлар 1913 йилда чиқарилган «Қиёсий эртакшунослик асослари» («Leitfaden der vergleichenden Marchenforshung») номли йирик тадқиқотда янада такомиллаштирилган. А. Аарне дунё халқлари эртакларини «мотивлар силсиласидан ташкил топган сюжет»лар бўйича таснифлаган ва типларга ажратган. Бу асар ҳозирга қадар фольклоршуносликда эпик сюжетлар ва мотивларни системалаштиришнинг илмий-назарий асоси сифатида фойдаланиб келинмоқда.

А. Аарненинг «Кўрсаткичи», асосан, Европа халқлари эртаклари асосида тузилган бўлиб, унда эртаклар қуйидагича таснифланган: I. Ҳайвонлар ҳақидаги эртаклар; II. Соф эртаклар: а) сеҳрли эртаклар; б) афсонавий эртаклар; в) новеллистик эртаклар; г) аҳмоқ шайтон (ёки «великан») ҳақидаги эртаклар; III. Латифалар. Бу гуруҳларга мансуб эртаклар мавзу типлари бўйича тавсифланган бўлиб, ҳар бир эртак ўзининг алоҳида тартиб рақамига эга. «Ҳайвонлар ҳақидаги эртаклар» 1–299, «Соф эртаклар» 300–1199, «Латифалар» 1200–1999 рақамлари билан белгиланувчи мавзу типларига бўлиб таснифланган.

«Тарихий-географик методи»ни давом эттирган С. Томпсон 1946 йилда Индиана университети (АҚШ) ҳузурида Фольклор институтини ташкил этди ва фольклоршуносликдаги «антропологик мактаб» вакилларининг бахсмунозараларига карамай, А. Аарне «Кўрсаткичи»ни Полинезия ва Микронезия, Европа мамлакатлари ва Америка халқлари эртакларининг материаллари билан бойитиб, 1955 йилда «Мотивлар кўрсаткичи»ни тузди. Бу кўрсаткич «Европа фольклоршунослар жамияти» (EFC) томонидан 1961 йилда Хелсинкида нашр этирилди, изоҳлар, тузатишлар ва аниқликлар киритилгандан

уйдириб бир қадар тўлдиришлар киритган Н. П. Андреевнинг «Эртақлар сюжетининг кўрсаткичи»¹ номли асарига кўра, биз ҳам ўзбек эртақлари ҳақида баъзи мулоҳазаларимизни баён этишимиз мумкин. Н. П. Андреев рус эртақларини шундай асосий гуруҳларга бўлиб чиқади: 1. Ҳайвонлар ҳақидаги эртақлар. 2. Фангастик эртақлар. 3. Анекдотлар. Буларнинг ичида энг мураккаби иккинчисидир. Н. П. Андреев буни Анте Аарне асосида яна тўртга бўлади: а) сеҳрли эртақлар; б) афсона-эртақлар (сказки-легенды); в) новелла эртақлар; г) аҳмоқ шайтон ҳақидаги эртақлар. Бу бўлинишда эртақларнинг сюжетлари ҳар гуруҳ ва бўлимлар ичида тематик жиҳатдан яна айрим типларга ажратилади. Бир-бирига яқин бўлган сюжетлар кетма-кет гуруҳланиб кела беради. Ҳар қайси гуруҳ ёки типларга ажралган эртақларнинг ўз номерлари билан бирга, жуда қисқа, лекин аниқ мазмунлари кўрсатилади.

Бу классификация асосида жуда кўп халқ эртақларини тасниф қилиб чиқдилар. Ҳақиқатан ҳам бу классификацияни ҳамма халқларнинг ҳам эртақлари учун, асосан, мос келадиган бир классификация дейиш мумкиндир. Албатта, ҳар халқнинг ўз эртаги ўзига хос белгилари билан фарқ қилиши турган гап. Лекин, барибир, шу классификация асосига солиш демак, унинг айрим гуруҳ ёки типларининг ўзгаришига монелик кўрсатмайди. Биз ҳам шу классификацияга асосланиб, ўз эртақларимизни шунга муқояса қилиб кўриш тилагида, Ю. М. Соколовнинг бу ҳақдаги изоҳларига² суяниб туриб, муҳокама юритмоқчимиз.

кейин 1964, 1973 йилларда қайта чоп этилди ва «Аарне-Томпсон кўрсаткичи» номи билан аталди (нашрга тайёрловчи М. Жўраев изоҳи).

¹ Рус олими В. Н. Андреев А. Аарне «Кўрсаткичи»ни рус тилига таржима қилди ва уни 1929 йилгача ёзиб олиниб, нашр этилган ҳамда илмий манбаларда таҳлилга тортилган рус халқ эртақлари сюжет тизимига оид материаллар билан тўлдириб, «Эртақ сюжетларининг Аарне ситемаси бўйича кўрсаткичи» (1929) номи билан нашр эттирди. Шу тариха рус фольклоршунослигида эртақ сюжетларини илмий тавсифлаш ва таснифлашда юқоридаги нашрни асос қилиб олиш ҳамда ҳар бир сюжет типини «АА» белгиси остида гуруҳлаштириш аънаанага айланди (нашрга тайёрловчи М. Жўраев изоҳи).

² Бу ўринда Ю. М. Соколовнинг эпик сюжетлар генезиси ва уларнинг миграцияси, «сайёр сюжетлар» хусусидаги илмий қарашлари назарда тутилмоқда. Қаранг: Соколов Ю. Русский фольклор. — М.: 1941. — С. 63–64 (нашрга тайёрловчи М. Жўраев изоҳи).

I. Ҳайвонлар ҳақидаги эртақлар. Бу эртақларда сўз, воқеа, асосан, ҳайвонлар ҳақида боради. Лекин ҳайвонлар ҳақидаги эртақлар устида тўхтаганда, шуни эслаш керак бўладиким, кишилиқ жамиятининг биринчи даврларида инсон билан ҳайвонлар ўрта-сида жуда катта муносабат-боғланиш бор эди. Инсон ижод этиш, яратиш қобилиятига эга бўлганига қадар, ҳайвонлар билан бирга умр кечирган бўлган. Қачонки, инсон ижод этиш хислатларига эга бўлиб, қурол ясар экан, олов ихтиро этар экан, у энди шундан сўнг ҳайвонлардан ажралади [...]. Шундан сўнг унинг табиатга, шунингдек, ҳайвонларга бўлган муносабати ўзгарди. У ўзига фойдали ва унга зарар етказадирган ҳайвонларга кўра турлича муносабатда бўлди. Инсонда ўз ҳаёти, яшаши учун фойдаси тегадиган ҳайвонларга нисбатан симпатия майдонга келди, унинг меҳнати, кунига яраган ҳайвонларни инсон ўзи билан бирга тутди. Бундан ташқари, инсонларнинг уруғ-уруғ бўлиб яшай бошлаган даврларини олсак, бутун бир уруғ қандай бўлмасин кўпроқ бирор ҳайвон, ўсимлик ёки табиатнинг бирор ҳодисаси – қуёш, момақалди роқ ва бошқалар билан зич боғланган бўлганларким, бунда ҳам биз инсоннинг ҳайвонлар билан бўлган яқин муносабатларини учратамиз. Яъни, демакчи бўламизким, ҳайвонлар қадим кишиларнинг тотемлари – «ота-боболари» эдилар, ҳатто ҳайвонлар маълум давр – қабила бошлиқлари сифатида ҳам ўрин тутар эдилар. Бу ҳоллар эса ҳайвонлар ҳақидаги эртақлар билан боғланган эдиларки, шунинг учун ҳайвонлар ҳақидаги эртақлар, одамни ҳайвонлардан ажратмайди, балки бирга кўради. Ҳатто Н. П. Андреев айтганидай, эртақлар ҳайвонларни ҳам гапга тушунадиган, одам каби гапирадиган сифатда тасвир этадилар ҳамда ҳайвонлар улар билан бирга умумий ҳаётда яшайдилар. Бу тўғрида ўзбек эртақларидан жуда кўп мисол олиш мумкин. Масалан, «Эгри ва Тўғри» эртагидаги Тўғрининг ўрмонда айиқ, тулки, бўри, қуён ва бошқаларнинг гапларини тушуниши ва ёки, аксинча, уларнинг одам тушунадиган тилда гапиришлари; шунингдек, «Дўст бўри» эртагидаги дўст бўрининг пошшовачча билан суҳбатлари ва «Бўри билан тулки» эртагидаги бўри ва тулки билан ер ҳайдаб турган деҳқоннинг гаплашиши ва бошқалар юқоридаги фикрларга асос бўла олади. Бунда энг кўп учрайди-

ган ҳайвонлар ҳақидаги эртақлар: «Бўри билан тулки», «Қарға билан кўзи» ёки «Қарға билан тулки», «Тулки билан хўроз», «Айиқ билан қиз», «Дўст бўри», «Чўлоқ бўри», «Полвон захча» ёки «Захча» ва ҳ.к. Шуларнинг қисқача сюжетига кирсак, ҳамма шакт тулки ҳийлакор-айёр бўлади, унинг қаршисида бўри унинг ҳийлаларига алданади. Бўри тулки қаршисида содда, тўғри, тенгак, аҳмоқ бўлади. Тулки хўрозни дарахтдан тушириб емакчи бўлади. Кал ёки Етим бола кўлидаги захчаси тилидан гапириб бойни алдайди ва бошқалар...

Бу эртақлар ҳамма халқларда ҳам бордирким, рус эртақлари классификациясида кўрсатилган ҳайвонлар ҳақидаги эртақларнинг рус халқига хос хусусиятлари ёки ўзбеклар ҳаёти-турмуши, урф-одати, ҳайвонларнинг тур-жинслари ва умуман, ўзинга хос характерларини ҳисобга олмаганда, айти эртақлар дейиш мумкин дир. Масалан, русларнинг «Эчки билан бўри» деган эртаги айнан деярли бизда машҳур дир. Худди рус вариантыда учраганидай, бизда ҳам бўри товушини эчкининг товушига ўхшатиб, «Эшикни оч, оғзимда сув келтирдим, маммада сут келтирдим» деб алдаб, эшикни очиб, эчкининг болаларини еб кетади. Улардан бири ўчоқ (рус эртақларида печка) ичига бекиниб қолган бўлади. Лекин шу айти сюжетдаги ҳамма халқда деярли учрайдиган бу эртақнинг айрим хусусиятларига диққат қилсангиз, фарқли ерлари чиқади. Масалан, бизда ҳам бир неча вариантга эга бўлган шу эртақнинг тугаши, биздаги вариантлари шундай: охири эчки воқеадан хабардор бўлгач, бўрига уруш эълон қилади. Бўри устага бориб тишини қайратиб келмоқчи бўлади. Уста эса тулки бўлади. Бўрига «Сенинг тишларингни пўлатдан қилиб бераман» деб бўрининг тишларини суғуриб олиб, ўрнига чигитдан тиш қўяди. Эчкининг шохларини эса қайраб қўяди. Эчки ўткир шохлари билан бўрининг қорнини ёриб юборади, эчкининг болалари қутулуб чиқади лар. Мана бунда учраган эчки болаларининг «ўчоқда бўлиши», тишининг «чигитдан» қўйилиши, эчки болаларининг ҳар қайсиларин «олу-болу» каби номлари бўлиши ва ҳ.к. ўзбек вариантларига хос хусусиятлардандир. Бу каби фактларни жуда кўп келтириш мумкин дир.

Умуман олганда, Аарне – Андреевларнинг ҳайвонлар ҳақидаги эртақлар классификацияси асосида, албатта, баъзи гуруҳларнинг тушиб қолиши ва орттирилиши билан, бизда ҳам айна ҳолларни, айна гуруҳларни кўриш мумкин бўлади.

II. **Фантастик-сеҳрли эртақлар.** Сеҳрли эртақлар бизда, худди Ю. М. Соколов айтанидек, турли «сеҳрлар» билан боғланган бўлади. Бу сеҳрли эртақларнинг қаҳрамонлари – персонажлари эса сеҳрли, «сюжет» билан боғланган кишилар бўладилар, ҳам доим «сеҳрли ишларга», «сеҳрли жойларга», «сеҳрли нарсаларга» йўлиқадилар. Катта-катта қўрқинчли ва дахшатли тилсимларни очадилар. Бундай сеҳрли эртақларнинг қаҳрамонларига ёрдам кўрсатувчилар эса сеҳрли нарсалар бўлади. Сеҳрли эртақларнинг қаҳрамонлари ўз душманлари ёки ўз бошларига тушган кулфатлардан турли ғайритабиий йўллар билан қутуладилар.

Бу хилдаги ўзбек эртақларида, кўпинча қаҳрамонларнинг ёрдамчилари – от, бўри, Семурғ қуш, лайлак ва бошқалар бўлади. Қаҳрамоннинг бошига жуда оғир иш тушганда ёки жуда узоқ масофали ва қўлга туширилиши қийин бўлган нарсаларни келтириш топширилганда, бирор муносабат топилиб, бўри қаҳрамонга йўлиқтирилади. У бу қийин ишларни осонлик билан ҳал бўлиш йўлини кўрсатади, ҳам унга ёрдам беради.

«Ур тўқмоқ» эртагида лайлак кал ёки камбағал чолга ёрдам беради. Унга «ур тўқмоқ», «очил дастурхон», «пишти палов» каби асбоблар тақдим этади. «Уч оғайни» эртагида қаҳрамонга чумолилар ёрдам бериб, сочилган донларни йиғиб берадилар. «Бадал Қорачи» эртагида Бадал Қорачига отлар ёрдам берадилар. Ёки гавҳар тухум қилиб берадиган қушлар ўз тухумлари билан камбағал ўтинчи-чўпонларни бой қиладилар ва ҳ.к. Ёки, шунингдек, қаҳрамоннинг олдида жуда катта-катта вазифалар, узоқ йўллар борким, уни бажариш амримаҳол. Ёки қаҳрамон акалари, ё душмани орқали ер остига – қудуққа ташланган, ер юзига чиқиш йўли йўқ. Шундай пайтларда қаҳрамонга, албатта, Семурғ қушнинг уяси кўринади. Илон келиб унинг болаларига заҳар солмоқчи бўлиб турганда, қаҳрамон илонни ўлдириб, Семурғ болаларини ўлимдан асрайди. Бунинг учун Семурғ қуш

қахрамонга дўст бўлади. Уни устига миндириб, бормоқчи бўлган ерга ёки ер юзига чиқариб қўяди.

Шунингдек, бу хилдаги эртақларнинг салбий образлари эса, тасоман бошқача характерга эга бўлган кишилар бўлиб, улардан характерлилари ялмоғиз кампир, дев, аждарҳо, илон, жодугар-сеҳргарлар (гоҳ чол, гоҳ кампир), баъзан парилар ва бошқалар. Сеҳрли эртақлардаги асбоблар, нарсалар ҳам ҳаракат этадилар, эртақнинг бориши – фабуласини ўстиришда катта рол ўйнайдилар. Масалан, «Очил дастурхон», «Ур тўқмоқ», «Ур калтак-сур калтак», «Учадиган гилам» ёки пўстак, ойнайи жаҳоннамо, суви ичирилса ўликни тирилтирадиган жом, ичса тириладиган обиҳаётлар (ҳаёт сувлари), эса яшартирадиган олмалар. Ҳар қадамда, керак бўлса турли шакл ва нарсаларга айланиб қолувчи узуклар. Ялмоғиз кампирнинг ойнаси – ташласа дарё пайдо бўлади, унинг тароғи – ташласа чангалзор пайдо бўлади, унинг қайроғи – ташласа тоғ пайдо бўлади. Ёки ойнайи жаҳоннамо орқали подшонинг қизини ёки бир парининг ўлганини кўрадилар. Гиламда ёки ўнг қулоғини бураса осмонга чиқадиган, чап қулоғини бураса ерга тушадиган ёғоч отга миниб учадилар, бориб жомдан сув берадилар, тирилади. Шунингдек, «Ур тўқмоқ, қовоқлар» – қахрамоннинг душманларини енгишга ёрдам этадилар. «Очил қовоғим» деса, қовоқнинг оғзи очилиб, қовоқарилар чиқади, бутун аскарларни чақиб, шишириб қочиради. Ёки «Ур тўқмоғим» деса, бир чеккадан уриб кета беради. Илонлар қизга муҳаббат боғлайдилар, ошиқ бўладилар, қизга ўйланадилар. Масалан, «Илон оға» эртагини олайлик.

Илон чолнинг энг кичик қизига уйланади. Тўй кечаси гўшангага илон – куёв келади. Эшикларни ёптириб, ниқобини олгач, чиройли йигит бўлади. Ниқобига тегмасликни шарт қилиб қўяди. «Агар менинг ниқобим йўқолса, мендан ажрайсан, менгача бориш амримаҳол, учун темирдан ковуш, чўяндан ҳасса, пўлатдан паранжи қилиб оласан. Ковушинг, паранжинг пиёзнинг пўстидай бўлганда, ҳассанг едирилиб нинадай бўлганда менга етиб боришинг мумкин», – дейди. Хотинларнинг зўри билан бир кун ниқоб йўқотилади. Илон оға йўқ бўлади. Қиз ҳалиги тарзда кийиниб топиб боради. Илон оға ялмоғиз кампирнинг ўғли бўла-

ди. Сўнг уни ўлдириб кочиб келадилар». Айни шу сюжетдаги русларнинг машҳур «Василиса прекрасная» эртагидаги ялмоғиз кампир (ведьма)нинг ўғли Змей Горинични ҳам биламизким, ўзбек эртагига хос хусусиятларни олиб ташлаганимизда, асосан, бир сюжет ва бир мотивдаги эртақлардир. Шунингдек, илонлар қизни қурбон қилишни талаб қиладилар. «Уч оғайни» ва бошқа шунга ўхшаш эртақларимиздаги подшо қизини бир қўй билан илонга ем қилиб қўйишлар, сўнг қахрамоннинг қутқазishi, «Ёрилтош», «Очил қамиш» каби эртақларда ўз укасининг эчки ёки кийикка айланиши каби одам осонлик билан ҳайвонга ёки тескарича ҳайвон одамга айлана олади. Каптар одамга, одам каптар (пари)га айланади. Хуллас, табиатдаги бутун нарсалар эртақларда иштирок этадилар, улар эртақларда худди одам ҳаётидай ҳаётда яшайдилар. Одамлар билан бирга ҳаракат этиб, бирга юрадилар. Бундан шуни англаш керакким, эртақлар ҳаётда тунашни – ўлимни билмайдилар, ўлимни инкор этадилар. Айниқса, сеҳрли эртақларда эртақ қахрамонлари бордию, бирор жодугар томонидан ўлдирилса ёки бошқа бирор сабаб билан ўлиб қолгудек бўлса, турли йўллар билан уни яна тирилтирадилар. Бу каби сеҳрли эртақларнинг мисолини жуда кўп келтириш мумкин. Масалан, биздаги «Қиличқора» ёки «Уч оғайни» ва бошқа шунга ўхшаш эртақларни олсак, шундай мисол топамиз: ҳар учала ога-ини ҳар қайсилари ўзларига хос бирор хусусиятга эга бўладилар. Масалан, катгаси «Юлдузсанар» номида юради, чунки у кишиларнинг юлдузларини билади – танийди.¹ Ўрганчаси «Дарёбоғлар» номи билан юради, энг кичиги эса «Қиличботир» номи билан юрадирким, унинг жони ёнидаги қиличида бўлади. Акаларидан тинчиб, уларни подшо қизларига уйлантириб, ўзи бир ёққа кетган Қиличботир бир қанча вақтдан сўнг акаларининг эсига тушади. Юлдузсанар укаси Қиличботирнинг юлдузини кўрай деса, унинг юлдузи ўчган, демак, унга бир ҳодиса бўлган,

¹ Шуни эсга солиб ўтамизким, бизда ҳар бир кишининг юлдузи бўлади, қачон у киши ўлса, унинг юлдузи ҳам кўкдан ўчади, деган эътиқод бор. Шунинг учун кўкда юлдуз учганини кўрсалар, дарров биров ўлди, дейдилар. Шунга асосланган астрологлар бор эдиларки, бизда уларни «мунажжимлар» деб атардилар. Улар кишиларнинг тақдирини юлдузига қараб белгилар эдилар.

балки ўлган. Ҳар иккала оға-ини Қиличботирни кидириб кетадилар. Йўлларида катта дарё чиқади. Дарёдан ўтиш керак. Шунда Дарёбоғлар дарёнинг сувини боғлайди. Дарёдан ўтиб кетаётганларида Қиличботирнинг икки бўлиниб синиб ётган қиличини кўриб қоладилар. «Э, укамиз ўлган экан», деб қилични тузатиб, Қиличботирнинг ўлигини бир хужрадан топиб, қиличини бошига кўйишлари билан Қиличботир акса уриб тиради. Сўнг ҳар учалари душманларидан ўчларини олиб, мурод-мақсадларига етадилар. Демак, эртақлар ҳеч қачон қаҳрамонларининг ўлимларини истамайдилар. Шунинг учун улар ўлмайдилар ва эртақ охирида мурод-мақсадларига етадилар. Сеҳрли эртақлар ҳам оддий ҳаётдан – турмушдан олинган, ундан ташқари яратилган нарсалар эмас. Балки одамни ўраб олган табиат ва турмуш, ҳаёт кечиришидаги бутун ҳодисалар, нарсаларнинг аксидир. Бу эса дунё тушунишдаги одам тушунчасининг хулосасидир.

III. *Маиший-новеллистик эртақлар* эса, ўз хусусиятлари, услуби ва қаҳрамонлари, уларнинг олдларига қўйган мақсадлари билан сеҳрли эртақлардан фарқ қиладилар, ажраладилар. Бу тип эртақларнинг асосида ижтимоий тенгсизликка қарши кураш ғояси ётади. Бойлик – камбағаллик масалалари, бахт – бахтсизлик, яхшилик – ёмонлик, ақллилик – ақлсизлик, тўғрилиқ – эгрилик қарама-қарши қўйилади. Бу хил эртақларимиз, кўпроқ эртақ қаҳрамонининг уйланиш воқеалари, никоҳ масалалари, ақли ўғил-қизлар, тақдир ҳам бахт, қароқчи-ўғрилар, тўғрилиқ, алдамчилик каби турмушда – ҳаётда учраб турган ҳодисаларнинг акси ва бу соҳадаги курашларнинг ифодаси сифатида тасвирланади.

Маиший-новеллистик эртақларнинг қаҳрамонлари сеҳрли эртақларнинг қаҳрамонларидай катта мушкул ишларни бажармайдилар, тилсимлар очмайдилар. Ёки девлар, ялмоғизлар билан курашмайдилар, балки реал турмушда ва ҳаёт кечиришдаги тенгсизликлар билан кураш олиб борадилар. Ақл ва тадбирлари орқали социал душманлари билаи курашадилар.¹ Гарчи кўп эртақлар ўз манбаларини жамият тараққийсининг энг қадимги даврларидан олсалар-да, лекин бу билан эртақ ўз яратилган дав-

¹ Соколов Ю. М. Русский фольклор. – М., 1930. – С. 339.

рининггина маҳсули, ўз даврининггина аксидан иборат бўлиб қолмайди. Биз биламизки, умуман фольклор, шунингдек, эртаклар ҳам ҳар бир даврнинг унга бағишланган ҳодисаларини, таъсирларини, жамият ҳаётини ўзида гавдалантиради ва шундай қилиб қатор қатламлар яратади. Синфий жамиятга қадарли эртакларнинг диний-мифологик аҳамияти бор экан, синфий жамиятга ўтгач, у, албатта, ижтимоий-синфий характер касб этади. У ўзини ўраб олган ҳаётни акс эттирар экан, эски мифологик эртаклар ўзига янги ранглар олади, янги мотивлар яратади.

[...] Реалистик эртакларимизда донишманд дехқонлар, чўпонлар, косиблар образи ҳам алоҳида ўринга эга. Улар халқнинг кураши, турмуш тажрибаси асосида ўсган фикр, ақл бойлигини ўзларида гавдалантирадилар. Ўзбек эртакларида кўп учрайдиган, худди рус ва бошқа халқларнинг эртакларидаги «Иванушка дурачок» образи каби «кал», етим, гўл образлари ҳам диққатни тортади. Булар аҳмоқ, овсар, гўл ҳисоблансалар-да, аслида, улар ўзларини ақлли, доно деб тушунган кишилардан ҳам ақл томонидан юқори турадилар ва ўша «доно»ларни енгиб, шарманда-сини чиқарадилар. Бу тур эртакларда салбий образлар ҳар вақт халқнинг бахт-саодатини кўра олмовчи, одамларнинг эзгу, энг яхши интилишларига тўсқин бўлувчи кишилардир. Булар хонлик, бевурдлик, очкўзлик, иккиюзламалик, қаллоблик сингари энг ярамас сифатлар эгасидир. Эртакларда уларнинг шу сифатлари фош этилади, кулги остига олинади. Халқнинг уларга қарши ўткир нафрати жуда уста иборалар, сўз ўйинлари билан ифодаланади [...].

Халқ эртаклари ўз қаҳрамонларини яратди. Халқ ижодида киши образи, типлар мукамал, бадий чуқур ишланган, кишининг кўзи олдига яққол келиб турадиган жонли образлардир. Эртакларимизда қаҳрамон типларининг қабариб турганлиги, образли гавдаланиши, кишининг кўз олдидан йўқолмас бир суратда чизилганлиги унинг реаллигидандир. Тўлғоной, Маликаи Хуснобод, Камбағал қиз, Озодачехра ёки Хуршидой образлари орқали дадил, ботир, уддабурон аёлларнинг реал характерлари берилади.

IV. *Анекдот эртаклар* ҳам шу маиший-реалистик эртакларнинг бир тури бўлиб, бундай эртакларда юмор-сатира муҳим

ўрин тутади. Бундаги муболағалар, воқеани орттириб кулгига сабаб бўлувчи ҳолларнинг киритилиши бу тур эртақларнинг характерларидир. Лекин бундай эртақлар ҳам ўз мавзуларини, юқорида айтганимиздек, ҳаёт-умр кечириш ҳодисалари билан боғланган воқеалардан оладилар. Эрк, ҳаёт, кураш ҳодисаларини кескин, ўткир юмористик лавҳаларда ечадилар. Масалан, шундай тип эртақларга кирадиган «Қирқ ёлғон» ёки «Қирқ ўтирик», «Уч ёлғон», «Эрксиз полчи» ёки «Авом полчи»ни эсга келтириш мумкиндир. Масалан, «Уч ёлғондан қирқ ёлғон» эртагини таҳлил этсак, шундай мотивни кўраимизки, бунда меҳнаткаш халқнинг ўзи қилган меҳнатларининг самарасини кўрмаганлиги, мулкдорлар томонидан кўрган жабрларини, ниҳоят уларнинг ақлсиз, дунёпараст кишилар эканликларини жуда усталик ва кулги элементлари билан «ёлғон» сарлавҳаси остида ифодалайди. Бу эртақнинг қаҳрамони «кал» подшо қизининг шартини бажариш учун уч ёлғон ичида қирқтадан ёлғон гапириб, муродига етади. Лекин «кал»нинг бу ёлғонлари остида ҳақиқат ётади.

Кал хўрозини йўқотиб, уни ахтарганини айтиб, дейди: «Хўрозимни топиб олдим, бир бойникида деҳқончилик қилиб юрган экан, кўришиб, омонлашиб, ҳол-аҳвол сўрасам, олти ой ишлаган иш ҳақиси битта жуводиз бўпти». Шу «кал» ўз онаси билан учрашганини ҳам гапиради: «Онам мени йўқотиб, бировникида чўрилик қилиб юрган экан. Уч йилда ишлаган ҳақи уч ойлик ризқи бўпти» дейди. «Кал» яна бир муносабат билан онаси ёнига қайтиб келганини айтади: «Борсам уч ойи битган экан, хўжайинидан ҳақини талаб қилса, хўжайини «Сенга ҳам ҳақми?» – деб, уриб ўлдириб кўйибди» деб ёлғон гапирган бўлиб, ҳақиқат гапларни ўртага ташлайди ва бунга турли муболағалар киритиб, кулги тусини берадиким, бу кейинги хислат, анекдот эртақларнинг хусусиятларига киради. Бу тур эртақлар бошқа халқларда ҳам учрайди. Масалан, русларда ҳам шундай ёлғон сарлавҳали эртақлар кўп бўлиб, уларда ҳам шу эртақнинг қаҳрамони дарахт орқали осмонга чиқади. Ундан қайиш орқали ерга тушади. Бизда эса ҳалиги «кал» эшакнинг яғирига ёнғоқ куйдириб босганида эшакнинг яғиридан ёнғоқ дарахти ўсиб кетиб, мева тугади, пун-

да «кал» ёнғоқни кесаклаб қоқади. На ёнғоқ ва на отган кесагидан дарак бўлмагач, ўзи халиги ёнғоқ устига чиқади. Қарайди, кўрсаки, отган кесагидан шудгор пайдо бўлибти. Дарров тарвуз экади ва бошқалар. Мана бу каби ҳақиқатан бўлиши мумкин бўлмаган нарсаларни бирма-бир қаторлаб, кулдириб, буларнинг орасида юқорида келтирганимиз ҳақиқатларни гапириб олади. Албатта, эртақнинг бу тарзда тўқилиши ҳам шу кейинги ҳақиқатни гапириш учундир. Шу тип эртақларга кирувчи «Эркисиз фолчи» ёки «Авом фолчи» эртақлари ҳам характерлидир.

Биз бунгача айтганларимиздан шундай хулоса чиқаришимиз мумкин. Демак, ўзбек эртақларини ҳам, Анте Аарне ва Н. П. Андреев классификациялари асосида худди ўшандай уч муҳим гуруҳга: 1) ҳайвонлар ҳақидаги эртақлар; 2) фантастик эртақлар; 3) анекдотларга бўлиш мумкин. Лекин проф. Н. П. Андреевнинг фантастик эртақларни тўрт қисмга бўлишидай гуруҳлашида бизда шундай бўлиб чиқади. Фантастик эртақлар: а) сеҳрли эртақлар; б) маиший-новелла эртақлар; в) афсона-тарихий эртақлар. Бундан ортик қисмга бўлиш учун қўлимиздаги материаллар бизни қаноатлантирмади. Бу билан Анте Аарне ва Н. П. Андреев классификацияларини ислоҳ қилган бўлмаймиз, балки аксинча, ундаги хусусиятлар ўзбек эртақларида ҳам борлигини кўрсатиб, фақат баъзи ички бўлинишлардаги аталишларни бошқачароқ номладик. Масалан, юқорида айтганимиздек, тарихий воқеалар билан боғланган эртақларнинг ҳаммасини ҳам «легенда» дебгина қўяқолмай, ёки аксинча, «легенда-эртақлар»нинг ҳам ҳаммасини «тарихий эртақлар» дейишдан қочиб, эҳтиётлик билан «афсона-тарихий эртақлар» деб номлаймиз.¹

¹ Бу ўринда «легенда» (афсона) жанрини эртақнинг бир кўриниши деб баҳолаш, аслида, тўғри эмас. Чунки ушбу мақола ёзилган давр фольклоршунослигида «афсона»ларни эртақ таркибига киритиб юбориш ҳоллари, шунингдек, «тарихий эртақлар», «афсонавий эртақлар» сингари атамалар фаол қўлланилар эди. Халқ насрини тасниф қилиш борасида олиб борилган кейинги тадқиқотлар, жумладан, фольклоршуносларнинг 1964 йилда Будапешт шаҳрида бўлиб ўтган халқаро конгрессида эртақ, афсона, ривоят, оғзаки ҳикоя, нақл жанрларининг ўзига хос хусусиятлари ойдинлаштирилди. Ўзбек фольклоршунослигида ҳам халқ насри жанрларининг мукамал таснифи яратилган (нашрга тайёрловчи М. Жўраев изоҳи).

Шуни, албатта, эсга солиш керакки, эртакларни бу хилда бўлиш, классификация қилиш эртаклар орасига девор қўйиш, уларни бир-биридан чегаралаш эмас. Чунки ҳайвонлар ҳақидаги эртаклар ичида сеҳрли эртакларнинг белгилари ёхуд сеҳрли эртаклар ичида ҳайвонлар образи бўлиши турган гап. Бу иш эртакларни текшириш, уларни вариантлари билан ўрганиш, хулосаларга келишда ёрдам берадиган шартли ўлароқ бир гуруҳлашдир.

Биз шу муносабат билан гарчи ўзбек эртақларининг ўз ичига олган бутун хусусиятлари, унда ҳал қилиниши керак бўлган бутун проблемаларни ечмаган бўлсак-да, ҳар ҳолда қўлимиздаги эртақларимизга асосланиб туриб ўқувчиларимизни ўзбек эртақларининг баъзи хусусиятлари билан таништириб чикдик, деб ўйлаймиз.¹

¹ Ушбу мақола қуйидаги манба асосида берилмоқда: Буюк Каримий. Ўзбек халқ эртақларининг баъзи бир хусусиятлари // Ўзбек тили ва адабиёти. – Тошкент, 1995. 1-сон, 59–65-бетлар; 5–6-сонлар, 57–62-бетлар (нашрга тайёрловчи: М. Жўраев).

Музайяна
АЛАВИЯ
(1909–1988)



Музайяна Алавия Акмалхон қизи 1909 йил 26 майида Тошкент вилояти Пискент туманида таваллуд топган. Филология фанлари номзоди (1959). Тошкент давлат педагогика институтининг филология факультетида ўқиган (1934–38). ЎзР ФА Тил ва адабиёт институтида кичик илмий ходим (1944–57), катта илмий ходим (1957–78) лавозимларида ишлаган. Унинг «Ўзбек халқ маросим қўшиқлари» монографияси (1974), «Янги қўшиқлар» (1951), «Ўзбек фольклоридан намуналар» (1955), «Ўзбек халқ қўшиқлари» (1959) сингари китоблари нашр этилган. Музайяна Алавия ўзбек халқ қўшиқларидан тузилган «Оқ олма қизил олма» (1979), «Халқ қўшиқлари» (1983) тўпламларини, шунингдек, Фозил Йўлдош ўглининг «Интизор» достонини нашрга тайёрлаган. Унга ўзбек фольклорини тўплаш ва тадқиқ этишидаги самарали хизматлари учун «Ўзбекистонда хизмат кўрсатган маданият ходими» унвони берилган (1973). Музайяна Алавия 1988 йилда Тошкент шаҳрида вафот этган.

ЎЗБЕК ФОЛЬКЛОРИДА ЎЛАН ЖАНРИ

Қишлоқ хўжалиги билан шуғулланувчи деҳқон, айникса, кўчманчи, ярим кўчманчи чорвадор хўжаликлар орасида кенг тарқалган кўшиқнинг бир тури ўландир. Ўлан, одатда, қизлар

бир томон, йигитлар бир томон бўлиб диалог шаклида айтилади. Ўланда чорвачилик учун муҳим бўлган тоғ-тош, қир, сой, яйлов, йилқи, қўй-қўзи, турли ўсимликлар, ов қуши ва сайроки қушларнинг номлари кўп келади. Бу хусусият мазмуннинг бойишига, образнинг ёрқинлигига, қўшиқнинг таъсирчанлигига хизмат қилади, чунки халқнинг турмуши, тирикчилик шароити, меҳнати кўз ўнгимизга келиб туради. Шу билан бирга, халқ оmmasидаги ишонч, эътиқод, орзу-армон, қайғу ва шодлик ўланга хос бир йўсинда акс эттирилади. Аҳолининг турмушга, одамга, меҳнатга бўлган муносабати ҳар бир бадий асардагидай кўриниб туради. Аммо ўланнинг бошқа қўшиқлардан мазмунда фарқи шуки, оху фиғон, ҳасрат, ҳижрон аламлари, жудолик, шахсий тутқунлик, изтироблар оз бўлиб, нисбатан фикрий эркинлик бор. Кўпчилик олдида кўнгилда борини очик, тўғридан-тўғри ифода-лайверади [...].

Ўлан айтишнинг маълум расм-русумлари ва тартиби бўлади. Масалан, Оҳангарон дарёси бўйларида, Қурама тоғлари этакларидаги қишлоқларда яшовчи аҳолида бир одат бор. Тўй бошида қизнинг янгаларидан ёшроғи сочига сочпопук, бўйнига маржон, тумор каби турли тақинчоқлар тақиб, бошига желак ёпиниб, юзи очик ҳолда ясатилган отга миниб, орқасига 13–14 ёшлардаги болани мингаштириб «Ўланга!» – деб уйма-уй юриб хабар қилади. Шунда «*Фалон кун, кунбеткайдаги уйга ўланга боринлар!*» – деб айтса, орқасидаги бола тўй қилаётган кишининг отини атаб «*Қози тўпидан Бозорбой отанинг уйига!*» – деб хабарни тўлдиради. Чунки янга қиз томоннинг келини бўлгани учун қайната, қайнана, қайин-бўйин, ҳатто қайин юртдаги қўшниларининг отини айтмайди, агар айтса, катта ҳурматсизлик бўлади. Эрининг номини ҳам айтмайди. «*Бойим*», «*болаларнинг отаси*» ёки боласининг исми билан чақиради. Қайнатани *ота*, қайнанани *эна*, бошқаларни *қайним*, *қайнагам* деб атайди. Улар эрининг синглиси, ҳатто қайин юртнинг қизларини болали бўлиб кетган бўлса ҳам *қиз* деб атайди.

Одатда, қишлоқ, овулларда кимникида тўй, маърака бўлишига кўз-қулоқ бўлиб билиб турадилар. Шунинг учун хабар қилувчиларни тез таниб, қаерда ўлан борлигини билиб, тушуниб

оладилар. Ўланга хабар қилса-қилмаса ёшлар томошага келаверади. Ўлан айтишда ном қозонганлар, албатта, тақлиф қилинади.

Маълумки, ҳар ким ўланчи, қўшиқчи бўлавермайди, кўп қишлоқларда чечан ўланчилар бўлади. Масалан, Тошкент вилоятининг Оҳангарон туманидаги Қорабоғ қишлоғида яшовчи Холжуман Умар ўгли жуда уста ўланчи бўлган. Умтой (Умидой) деган қиз унинг ҳарпдоши (тарафи) бўлиб, уларни Облик, Самарчуқ, Қорабоғ, Гулбоғ, Очамайли каби ён-атрофдаги қишлоқ тўйларига айтганлар. Улар қатнашган тўйлар жуда қизиган. Шунинг каби Наманган вилоятининг Поп туманидаги Уйғур қишлоқ фуқаролар йиғинига қарашли Чоркесар қишлоғида яшовчи Тўйчи Юсуфов каби ўланчилар кўп бўлган. Ҳар жойда мана шундай ўланни кўп биладиган чечанлар бўлган.¹

[...] Кўп жойларда ўланни қизлар том(уй)нинг ёки ўтовнинг ичида, йигитлар дала(ташқари)да айтади. Очиқликда, маълум жойда юзлари очиқ айтсалар ҳам, қизларнинг ўрилган сочлари, юзлари кўриниб турса ҳам, желак ёки рўмоллари кулги вақтида огизларини беркитишга, бошларининг очилиб қолмаслигига ёрдам беради. Очиқ чехралари, лабларидаги табассум кўриниб туради. Ўланчилар томошабинларга нисбатан яна эркинроқ, яна шўхроқ кўринадилар.

Одатда, ўланни эрлар бошлайди. Ўланда ҳам аниқ мисралар бўлади. Бутунлай янги ўлан ҳам айтилади. Баъзи ўланлар борки, Ўзбекистоннинг қайси бурчагига борманг, шу ўланни билишади. Масалан, қуйидаги ўланлар бир-биридан узоқ туманлардан бир неча вариантларда ёзиб олинган:

*Қайрағочни кесганда мўлтоқ бўлар,
Бедананинг қўйруғи чўлтоқ бўлар,
Киши ёри бировга ёр бўлмайди,
Тўйхонадан кетганча ўртоқ бўлар.²*

¹ Ҳозир ўлан учун алоҳида тайёргарлик кўрилиб, махсус вақт ажратиб, ўланчи чақирилган ўлан тантанаси оз кўринса ҳам, тўйларда қўшиқ, ўйин, қизиқчилик орасида ўлан ҳам айтилади.

² Оқ олма, қизил олма. Ўзбек халқ қўшиқлари. Тўплаб, нашрга тайёрловчи: М. Алавия. – Тошкент: Адабиёт ва санъат нашриёти, 1972. – 177-бет.

Лекин кейинги байтда баъзан ўзгариш бўлиб туради. Бошқа бир сўз ёки таъбирни қўллаш билан бутунлай янги мазмун касб этади:

*Тенг ўсганлар қолди дема, ҳарпдошим,
Яхши бўлсанг, куёвинг ҳам ўртоқ бўлар.*

Диалог шаклида эрлар бир томон, қизлар бир томон, яъни куёв томон йигитлар (куёв навкарлар) қиз томоннинг аёллари билан айтганда, «ёр-ёр» радифи қўшилса ҳам «ёр-ёр айтдик» демай, «ўлан айтдик» дейишади, шунинг учун биз ҳам бундай намуналарни «ўлан» деб бердик. Сирдарё вилоятининг Зомин туманидаги Қарапчи қишлоқлик Ёрлақаб шоир Бекназар ўғлидан Темур Очилов ёзиб олган ўланлардан намуналар келтирамиз:

Йигит:

*Серкаларнинг бошида шохи бордир, ёр-ёр,
Ҳар бозорнинг ўзининг нархи бордир, ёр-ёр,
Қиз боланинг барисин бирдай дема, ёр-ёр,
Қиз бола билан қиз бола фарқи бордир, ёр-ёр.*

Қиз:

*Саратонда тоғдаги қордай бўлар, ёр-ёр,
Ярашиқли қаторда нордай бўлар, ёр-ёр,
Синчи бўлсанг айтиб бер, охун ога, ёр-ёр,
Яхши, ёмон фарқлари қандай бўлар, ёр-ёр.*

Йигит:

*Тошкентнинг бир бозори ўймоқ бозор, ёр-ёр,
Йигитлик жўмард элга қўй боқтирар, ёр-ёр,
Қиз боланинг яхшиси тушиб қолса, ёр-ёр,
Отинг бойлаб олдингда ўйнаб турар, ёр-ёр.*

*Йилқи ичида минганим жийрон чубар, ёр-ёр,
Қаёқдаги шумликлар бийдан чиқар, ёр-ёр,
Қиз боланинг яхшиси тушиб қолса, ёр-ёр,
Тол чивикдай буралиб уйдан чиқар, ёр-ёр.¹*

¹ Ўша китоб. – 161-бет.

«Ёр-ёр» билан айтилса, аксарият қўлга дўмбира ёки чилдирма олиб жўр килиб айтадилар. «Ёр-ёр»сиз айтилса, ўланни чолғусиз айтадилар. Халқ шоирлари ўланни ҳам дўмбира чертиб айтадилар, агар тарафма-тараф айтилса, чолғусиз бўлади. Савол-жавобли юқоридаги каби ўланларда кўпчиликнинг диди, завқи, оила қуришдаги қарашлари, муҳаббат кечинмалари, йигит, қизнинг бир-бирига бўлган майл ва хоҳишлари ифодаланади. Қизиғи шундаки, йигит-қизлар муҳаббатлари, орзу-интилишларини кўпчилик олдида ўлан билан изҳор қилсалар ҳам, ҳеч ким халақит қилмайди. Аммо ўлан одобини бузганларни четлаштирадилар.

Қиз:

*Сув бўйида қўқарган толдай бўпман,
Қўланкаси қийма олчин жардай бўпман.
Сиз кўрганда кичкина бола бўлсам,
Охун ака, шу вақтда қандай бўпман?*

Йигит:

*Овулингнинг оқсоқоли Эшим ориқ,
Тонг отарда ёруғ юлдуз, пешин бориб.
Мен кўрганда кичкина бола эдинг,
Қўш аноринг чиқипти тушинг ёриб.¹*

Ҳарпдош қиз уялиб, қизариб ўлан айтмай кўяди. Шунда янгалардан бири чиқиб ўланни бошқа ёққа буриб чалғитади:

*Ориқ қулун деганда, ориқ қулун,
Тевараги молга жой Балиқлининг.
Кўрмаганимга бўпти беш-олти йил,
Эсон-омон юрибсизми, ёруқлигим?*

Ўз ҳаддини билмай, одобдан ташқари чиқиб кетса, ўлан билан тергаб, қарғаб турадилар. Номуносиблик кўп вақт йигитлар томонидан содир бўлади. Бўза, мусаллас ичиб ўланга қўшилиб қолган баъзи бирлари ҳам бўлган:

¹ Ўша китоб. – 161-бет.

*Уят ўлан айтганнинг оти ўчсин,
Ўтқир қайчи тилининг учин кессин.
Бизга ёмон сўз айтган ўнгмай ўлар,
Қуруқ ёгочни қучоқлаб умри ўтсин.*

Ўлан айтувчи томонлар бир-бирига ҳарпдош бўлади, ҳар икки томон бир-бирига ҳарба қилувчидир. Улар бир-бирларига *ҳарпдошим!* деб мурожаат этадилар. Хитоб, нидо, савол, жавоб билан ўлан айтадилар. Ўлан билан ҳол-аҳволларини сўрашиб, изҳор қилиб, ўз табиатларидаги кайфиятни ифодалайдилар. Бу хусусият кўпчиликка хос ва кўпларга тегишли бўлади:

*Йўнгичқа йўл устида бор экан-да,
Ёрнинг бели ингичка тор экан-да.
Олдингизга келган йигит кетолмайди,
Сизларда бирор ҳикмат бор экан-да.¹*

Бу ўланда ёрнинг бели ингичкалиги, хусни, лекин унда шундай жозиба борки, келган одам олдидан кетолмайди. Бир қараганда бу содда бир иборадай кўринади. Лекин севаман, ўламан, гўзалсан каби иборалардан кўра таъсирлидир. Ўлан нима учун айтилади, ким айтади, ким енгиб, ким енгилади, айтилган ўлан халққа маъқул бўладими? Мана шундай андишалар билан ўланчилар ўлан сўзини тўртликка қўшиб турадилар:

*Қўлимдаги беш бармоқ бирови тоқ,
Охунликдир элнинг кўнглини хушламоқ.
Авваллари тўйда ўлан айтганим йўқ,
Энди айтиб келаман не дейди халқ?*

«Айтган ўланам халққа манзур бўладими, йўқми?» – деб ўйлаган ўланчи мақсад эл кўнглини хушламоқ экан, бу нарсани уддалай олиш-олмаслигидан ҳадиксирайди, ҳарпдошига бундай мулоҳазаларини ўлан билан ифодалайди. Қўшиққа хос параллелизм юқоридаги ўланда ҳам борки, қўлдаги бармоқнинг ҳаммаси

¹ Ўша китоб. – 167-бет.

жуфт бўлмай, битгаси тоқ бўлганидай ўлан ҳам, ўланчи ҳам камчиликсиз бўлмайди, деганда ҳарпдошнинг (ўлан айтувчининг) узри англашилади ва авваллари ўлан айтиб, машқини ололмаганини сабаб қилиб кўрсатади. Умуман, «ўлан» сўзи тўртликка қиритилаверади:

*Кўкан келди деганда, кўкан келди,
Хўрозларнинг ичида дакан келди.
Қизиқ ўланингдан айт, эй охун қиз,
Тараф бўлиб айтмоққа аканг келди.*

Қиз дархол жавоб қайтаради:

*Булбулларнинг қўнгани гул бўлади,
Оламдаги бор сўзни тил билади.
Тараф бўлиб айтмоққа сиз келибсиз,
Охунлигинг бу ерда ким билади?*

Одат бўйича тўйлаб, қутлаб келишгани ва ўлан эшитиш учун келганликлари ўланга кўшилади. Бунда ҳам баъзи дастурлар акс эттирилади:

*Тўй-тўй бугун, тўй бугун, тўйлай келдик,
Қўша рўмол қўлга олиб ўйнай келдик.
Тўйингизга келармидик, келмасмидик,
Ширин-ширин ўланлар тинглай келдик.¹*

Тўйга атаб тикилган рўмолчалардан ўлан айтган йигитга берадилар. Ўлан баҳонаси билан йигит-қизларнинг бир-бирларига муносабатлари ва бу муносабатлардаги ҳурмат, муҳаббатлари изҳор этилади. Қизнинг ҳам, йигитнинг ҳам бир неча талаблари қўйилади. Қиз томон тез ўлан билан жавоб беравермаса, йигит томон бир канча ўланни қатор айтади:

*Айт деганда ўланни охун айтар,
Айтганда ҳам охун йигит маъқул айтар.*

¹ Ўша китоб. – 182-бет.

*Билайн охунлигинг, Умидойим,
Ўланга бўлсанг охун қарши қайтар.¹*

Одатда, ўлан йигит томондан бошланганда, қизлардан жавоб қайтариш талаб қилинади. Кўп ичидан Умидой чиқиб кўпинча жавоб қайтарар экан:

*Кун исиса, сув бўйида салқинлайман,
Бетим ювсам, ойдай бўлиб ярқиллайман.
Кўмакайда ўлан деган кўп бўлади,
Мен ўланчи сиз чечанга яқинлайман.*

Шунда Холжуман ўланчи унга мана бундай жавоб берар экан:

*Қанғиллаб учади қўлларнинг гози,
Йигитни куйдирар қизларнинг нози.
Болдай тотли эшитилар қулоққа,
Умидойнинг ўлан айтган овози.*

Мана шу тариқа ўлан давом этаверади. Йигитлар айтганда, қиз таърифини келтириб, ўзининг яширин сақлаган муҳаббат сири-ни, умуман, кўнглида борини ифодалайди. «Шундай қиз туккан, ўстирган онага «балли» дейди:

*Мен ўланни айтаман бундай қилиб,
Тегирмондан чиқарган ундай қилиб.
Сенинг тукқан онанга баракалла,
Бетинг ойдай, белингни қилдай қилиб.²*

Ҳар бир ўлан кимга қарата, қандай талаб билан айтилаётгани-га қарайди.

*Қарши олдимда ўстирган Камол терак,
Бўйинг мунча ўсади шохсиз терак.*

¹ Ўша китоб. – 178-бет.

² Ўша китоб. – 181-бет.

*Шохсиз терак бўйингени кераги йўк,
Ипак бўлиб эшилган сўзинг керак.¹*

Бундай талаб қиз томондан ҳам, йигит томондан ҳам қўйилиши мумкин. Тўйда ўйин, кулги, вақтичоғлик ҳокимлик қилади. Шу туфайли хушкомат ёшларнинг ўйинга тушишларидан баҳра олиб яратилган ўланлар ҳам бор:

*Ёз бўлса, қовун пишар тўр олишиб,
Палаги палагига ўралашиб.
Келин, қизлар ўйнайди тўй бўлганда,
Беллари тол чивикдай буралшиб.²*

Тошкент вилоятининг Пскент туманида ҳар йили ҳайитнинг учинчи кунда бўладиган Қурамасайил намозгоҳига йиғилиб, Қураманинг йигит, қизлари ўлан айтишган. 1920 йили Қурамасайил умуман кизимаган. Чунки Пскент атроф қишлоқларда Эргаш қўрбошининг галалари кезиб, деҳқонлар бошига мусибат, кулфат ёғдириб турган вақт эди. Лекин номозгоҳнинг теракзорлари ичида икки-уч жойда ўлан айтилган. Эвалак қишлоқлик Анорбой ота Кенжаев шундай дейди: «Ёшлик чоғимиз, йигитлик даври эди. [...] Қурамасайил куни аташтирилган қизлар ўртоқлари, янгалари билан Пскентга бориб, йигитлар ҳам ўртоқлари билан бирга келиб, қайлиғининг миёнчасини бериб ўлан айтишди».

Одатда, сайилларда, наврўз кунлари қиз бирор йигитга унаштирилгандан кейин куёв томон йигитлари билан қизнинг янгалари, ўртоқлари маслаҳатни бир жойга қўйиб, ўртага дастурхон ёзиб, миёнча қўйиб ўлан айтишган, баъзи жойларда лапар ҳам айтишган. Анорбой ота Кенжаев ўша вақтларда айтиб юрган ўланларимдан деб қуйидагиларни айтиб берди:

*Қишининг боши қирғияк, уч ой тўқсон,
Сувнинг музи сўлқиллар болта сўқсам.*

¹ Ўша китоб. – 182-бет.

² Ўша китоб. – 183-бет.

*Қошу кўзинг қийилган бир санамсан,
Сўрасам отанг бермас, олиб қочсам.*

*Айтасанми ўланни, қайтасанми,
Ёпинмасдан совуқда қотасанми?
Тўйда айтмаган ўлайни уйда айтиб,
Кўзи, улоққа баҳолаб сотасанми?*

*Айт, эй жоним, айт, жоним, ўлан билсанг,
Дунёда не кўрмайсан ўлмай юрсанг.
Бу дунёдан беармон ўтар эдим,
Қулоқлари тўрт эллик тулпор минсам.¹*

Умуман, қиз йигитга унаштирилгандан кейин янгалар куёвнинг ўртоқлари билан кенгашиб, қаерда ўлан бўлса, қизни олиб бориб ўланга иштирок эттиришга ҳаракат қилган ва кўпинча бунга муваффақ бўлган.

Ўрта Чирчиқ туманининг Галаботир кишлоғида бефарзанд, ўғил, қизнинг тўйини кўрмай ўтган бир хотин касал бўлганда: «Шу дардимдан тuzалсам, элга тўй бериб, куёв-қайликларни чақириб, ўлан айттирайин!» – деб ният қилиб, чақалоқ туғилган чиллалик уйда доялардан фотиҳа олган. Пскент яқинидаги Қоракечув кишлоғида яшаган Қодирбой: «Ўғил кўрсам юртга тўй бериб, мен ҳам келин кўрай, деб ният қилиб куёв-келинларни чақириб, ўртага миёнча қўйиб ўлан айттириб кўнгил хушлиқ қиламан!» – деган. Демак, ўлан айтиш маросими одамнинг орзуси, эзгу тилаги, яхши ниятининг маҳсули сифатида ҳам одатга айланган.

Ўлан айтишдан мақсад кўпнинг кўнглини олиш, тўйни қизитиш, кўнгилдагиларни изҳор этиб, дунёнинг иссиқ-совуғи, аччиқ-чучуғи билан ёшларни таништириш экан, тўйга келиб ўлан айтмасликнинг яхши эмаслиги айтилиб, ўланга хос турли-туман йўллар билан танқид қилинади. Бир ўланда тўйга келиб, ўлан айтмай ўтирган ҳарпдошга тилинг билан жағингни бойлаб ташлагандай ўтирибсан, келиб нима қилардинг, ёр-

¹ Ўша китоб. – 183-бет.

мангни ичиб уйда ёта қолсанг бўлмас эдими, дейилади. Бу ерда қўшиққа ёрма ошни қўшиш билан овқат учун келгансан, демокчи ўланчи. Гуё ҳарпдошига қарата айтилган бу ўланда кимдир назарда тугилмоқдаки, ўшани ўйлаб, ўша ҳақида айтаётганини тўйдагилар тушуниб туради. Қўшиқ-ўландан мақсад дил дардини кўпчилик олдида ошкор қилмоқ, шу йўл билан ҳам дардга малҳам топмоқ, оғирни енгиллаштирадиган сўз эшитмоқдир. Яшириниб ётган севгидан барча хабардор бўлиб, кўпчилик буларнинг тақдирига қизиқиб қолади. Ҳар ким ўзининг қисмати тўғрисида ҳам ўйлаб кўради. Тошкент вилоятининг Бўка туманидаги Очамайли қишлоқлик Абдулла деган йигит билан Қорасайроқ қишлоғилик Олтин деган қиз бир-бирларини севганлар. Абдулла қалин молини топиб беролмагач, отаси Олтинни Жалойир қишлоғига узатиб юборган. Қаерда ўлан бўлса Абдулла билан Олтин бориб ўлан орқали гаплашиб юрган:

*Манов тоғнинг бошида овлар ўтган,
Бу овларни мерган отса қулаб кетган.
Сен эсимга тушганда, ҳарпдошим,
Сени кўриб мен ўзим йиғлаб кетган.¹*

Ўланда кўпинча сўз сирасига риоя қилинмай, олдинма-кетин келаверади. Лекин мазмунга қараб ҳар ким айтилмоқчи бўлган гапни, баёндаги фикрни тушунаверади. Юқоридаги ўланнинг охирги мисрасида мантиқ ҳам, сўз ҳам ўринли эмас. Бу хусусият қўшиқнинг ўлан турида кўп учрайди.

Мана Олтиннинг Абдуллага қарата айтган ўланида ҳам сўз сирасининг ўринли эмаслигини кўраимиз:

*Қарга дейман,
Қарга уя солади жарга дейман.
Кун ойни кўрмаганга ўзи бўлди,
Сўрайман ўланман, ҳорма! дейман.²*

¹ Ўша китоб. – 166-бет.

² Ўша китоб. – 170-бет.

Бу ҳол, одатда, кейинги байтда ҳам кўринади. «Кун ойни кўрмаганга ўзи бўлди» деса ҳам кўришганимизга анча ой, анча кун бўлди, демоқчи бўлгани англашилади. Аммо аксарият ўланларда сўз ҳам, мантиқ ҳам ўрнида бўлади.

*Далада қўй боқаман, оққина қўй,
Чайқалган қуйруқлари чоққина қўй.
Бизлар билан ўланни айтиб-айтиб,
Эрта бориб янганга мақтаниб қўй.¹*

Мана бундай ўланларнинг юқоридаги биринчи байти ўзгармай, кейинги мисраларнинг баъзи сўзлари бирор сабаб билан ўзгариши мумкин. Тошкент вилоятининг Оҳангарон туманидаги Нишбоши қишлоғида турувчи Қорабош Тўёқовдан ёзиб олинган вариантда қуйидагича ўзгариш кўзга ташланади:

*Далада қўй боқаман, оққина қўй,
Чайқалган қуйруқлари чоққина қўй.
Бизни енгган Ойсулувим энди бориб,
Чечанлигинг энанга мақтаниб қўй.*

Шу туманнинг Қорабоғ қишлоғида яшовчи Холжуман бободан ёзиб олинган ўланнинг кейинги байти эса қуйидагича:

*Бизлар билан ўлан айтиб, Умид ойим,
Олганинга ўзинг бориб мақтаниб қўй.*

Қизлар йигитга «сизлаб», йигитлар эса қизларни «сенлаб» муурожаат қилади:

*Ўрик-ўрик,
Ўртанаман, қўяман сизни кўриб.
Жийдали мозор тагида жийда териб,
Сиз кетибсиз бировга кўнгил бериб.²*

¹ Ўша китоб. – 170-бет.

² Ўша китоб. – 173-бет.

Йигитлар «сиз» ўрнига «сен» деб қўллайдилар. Бу тўртликда «Жийдали мазор» жой номи бўлиб, одатда, тунда ёлғиз жийдали, ёки ёнғокли жойдан ўтиш яхши эмас, деб тушунтирадилар. Ўланларда яхши хотин қандай бўлиши кераклиги, эрга ва бошқаларга ёқимли кўриниш учун нима қилиши лозимлиги ҳам қуйланади:

*Тошканинг бир бозори узук турар,
Ўланни шоир йигит қизиқтирар.
Эр йигитнинг олгани бўлса яхши,
Қошин қоқиб, кўзини сузиб турар.¹*

Бундай тегажаклик, ҳазил кўпроқ эрлар томонидан айтиладиган ўланлардадир. Қизларни уялтириб, шу йўл билан енгмоқчи ҳам бўладилар. Бундай ҳолларда қизлар ҳаё, ибo билан ўзларини ўландан тортадилар.

Ўз ҳаддини билмай, ҳаддидан ошган бундай ўланчини «*айниди*», «*тилидан тойди*», деб бошқа ўланчи танбеҳ мазмунидаги ўландан айтиб, тартибга чакиради:

*Абулқосим,
Айт, ўланнинг қолипи бузилмасин.
Ўланни кўтариб айт, охун бўлсанг,
Билган билиб, билмаганлар ҳайрон қолсин.²*

Аммо бу мазмундаги ўланлар ҳеч кимга қаттиқ ботмайди. Ҳатто диалогда қиз «сен» деб хитоб қилса ҳам йигит оғринмайди. Бундай кулгили, ҳазил ўланлар тўй маросимининг кўтаринки руҳда, тантанали ўтишида муҳим роль ўйнайди.

Ўлан якка ҳолда, йўлда борганда, ёлғиз колганда, кўпчилик илтимоси билан ҳам айтилаверади. Аммо тўйга бориб ўланга катнашганда тарафма-тараф бўлиб айтиш ўланнинг ўзига хос хусусиятидир. Демак, ўлан ҳам қўшиқнинг қадимий тури бўлиб, асосан, қишлоқ хўжалиги билан шуғулланувчи аҳоли орасида кенг тарқалган.

¹ Ўша китоб. – 176-бет.

² Ўша китоб. – 170-бет.

Ўланда деҳқончилик ва чорвачиликка оид сўзларнинг кўп келиши, ўхшатиш, сифатлаш, табиат манзараси ҳам ўлан ижодчилари ҳаётдан олинганлиги унинг асосий хусусиятларидан биридир. Уларга баъзан «ёр-ёр» рафи қўшилиб, нақарот ўрнида такрорланиб куйланиши мумкин, лекин биринчи мисра бирикки сўздан ташкил топган ўланлар охирига сира ҳам «ёр-ёр» қўшилмайди:

*Ўрик, ўрик,
Ўртанаман, куяман сизни кўриб...*

ёки:

*Ўринбойди,
Шолиси захоб ерди кўринмайди, –*

деб бошланадиган ўланлар қофияси уйқаш бўлмаса ҳам, куйланганда оҳангдош бўлиб кетади.

Ўлан қиз узатар кечада айтилмайди, никоҳдан аввалги кечаларда ташкил қилинади. Чунки ўланнинг табиати осойишта, хотиржам, кўпчиликнинг эътибори ўлан томонда бўлишини талаб қилади. Сир сақланган муҳаббат кечинмалари тўйдаги ўлан айтиш маросимида айтилганда ҳамма кизиқади.

Кўп жойларда қиз узатарда ўланга деб алоҳида чақириб, махсус тайёргарлик билан ўланчилар йиғилиб тарафма-тароф бўлиб айтилмай, «ёр-ёр»га ўхшатиб, лекин «ёр-ёр»ни қўшмай ўлан қилиб, бир киши, баъзан кўпчилик бўлиб ижро этилади. Бу ўланда узатилаётган қиз, унинг яқин қариндош ва ўртоқларининг руҳий кечинмалари, ҳатто тўй жараёнининг баъзи бир томонлари акс эттирилади:

*Ўлан айтиб тўйингда уялмадим,
Йиғлаганда кўз ёшим тиёлмадим.
Кетар эдим сен билан, айналайин,
Уйда қолган онамни қиёлмадим.¹*

¹ Алавия М. Ўзбек халқ маросим қўшиқлари. – Тошкент, 1959. – 292-бет.

Демак, ўлан қишлоқ хўжалиги билан шуғулланувчи, кўпроқ «желовчи» ўзбеклар орасида тарқалган, аксарияти диалог шаклида айтиладиган, баъзан савол-жавобли кўшиқларни «ўлан» деб атаганлар. Ўланда ёмон хислатлар ҳақида фикр юритилар экан, одамларнинг билим даражаси, тажрибада кўрганлари, эшитган, билганлари атрофида ёндашилади ва дунёқарашлари асосида акс эттирилади. Унда ишқ-муҳаббат асосий ўринни эгаллайди.

Ўлан, лапар, «ёр-ёр» қадимда бир бўлган. Кейинги вақтларда турли тўй маросимлари, ҳар жойдаги кишиларнинг яшаш шароитлари билан боғлиқ равишда улар орасидаги тафовутлар кучайган. Уларнинг ҳар бири тўй маросимининг маълум босқичи билан боғланиб қолган ва мустақил кўшиқ турига айланган.¹

¹ Ушбу мақола М. Алавиянинг «Ўзбек халқ маросим кўшиқлари» (Тошкент: Фан, 1974) номли монографиясидаги «ўлан» жанри таҳлилига бағишланган фасли (161–184-бетлар) асосида тайёрланди.

Мансур
АФЗАЛОВ
(1910–1973)



Мансур Афзалов 1910 йилда Тошкент шаҳрида тугилган. Филология фанлари номзоди (1950). Наримонов номли педагогика билим юртида (1924–29), ЎзР ФА Тил ва адабиёт институти аспирантурасида (1934–37) ўқиган. ЎзР ФА Тил ва адабиёт институтида кичик илмий ходим (1937–50), катта илмий ходим (1950–1972), бўлим мудири лавозимларида ишлаган. Мансур Афзаловнинг «Ўзбек халқ эртаклари ҳақида» (1964) номли монографияси, «Ўзбек фольклоридан намуналар» (1938), «Эргаш Жуманбулбул ўгли ижоди» (1950) китоблари, «Ислоҳ шоир Назар ўгли» (1939), «Бекмурод эсирова ҳақида» (1844), «Бекмурод шоир» (1946), «Талантли халқ куйчиси» (1951), «Алпомиш» достонининг вариантлари ҳақида» (1956), «Мамадрайим баҳши» (1960), «Ислоҳ шоир ва унинг «Орзигул» достони ҳақида» (1961), «Ўзбек фольклористикасининг асосчиси» (1966), «Халқ эртаклари таснифи» (1967), «Пўлкан» (1976) каби тадқиқотлари чоп этилган. Беруний номидаги Давлат мукофоти билан тақдирланган (1973). Мансур Афзалов 1973 йили Тошкент шаҳрида вафот этган.

ХАЙВОНЛАР ҲАҚИДАГИ ЭРТАКЛАР

Хайвонлар ҳақидаги эртакларнинг юзага келиши узоқ ўтмишга бориб тақалади ва кишилик жамиятининг ибтидоий давридаги ҳаёти ва меҳнати билан боғланади. Бу турдаги эртакларнинг

бир канчасида ибтидоий инсоннинг ҳаёти, меҳнати, дунёқараши, тушунчаси ифодаланган. Буларда, айниқса, кўзга ташланадиган хусусият табиат ҳодисалари ва турли ҳайвонларга тотемистик ва анимистик қарашдир. «Тотемизм одамнинг кўпинча қандайдир бир ҳайвон ёки ўсимлик билан, баъзан жонсиз нарса билан ёки, ҳатто, табиат ҳодисалари билан алоқаси борлиги ҳақидаги ишонч-эътиқоддир».¹

Бу турдаги эртаклар узоқ асрлар давомида юзага келиб, жамият тараққиётининг кейинги босқичларида анча ўзгаришларга учраган [...]. Инсоннинг ижод этиш ва қурол ишлатиш қобилияти, табиатга муносабати, тирикчилиги борган сари ривожланади. Қурол ясаш, оловни ихтиро этиш ва ундан фойдаланиш натижасида инсон ҳайвонлардан тубдан ажралади.

Энг қадимги даврда юзага келган халқ ижоди асарлари, жумладан, эртакларда ҳам ўша даврдаги овчилик, балиқчилик ва бошқа касб билан шуғулланувчи инсонларнинг қарашлари, ишончлари, эътиқодлари ифодаланган. Улар ҳайвонларни инсонлар каби гапирадиган, фикрлайдиган қобилиятга эга деб тушунганлар. Юзага келган эртак ва афсоналар наслдан-наслга, асрдан-асрга ўтиб, бир қисми бизгача етиб келган.

Демак, ўша даврдаги инсоннинг жонли табиатга болаларча содда муносабати унинг эртагида ифодаланди. Бу ҳақда Э. Тайлорнинг «Ибтидоий маданият» асарида кўплаб мисоллар келтирилган. Бу муаллифнинг текширишига кўра, «ибтидоий одам ўз атрофини ўраб олган табиатда яшаган ҳайвон ва қушларнинг товушини инсонларнинг товуши ва хатти-ҳаракатларига ўхшатади; ҳайвон ва қушлар ҳам, ибтидоий инсон тушунчасига кўра, инсон каби сўзлашади, уришади, дўстлашади, бир-бирларини севади, инсонлар каби психологик кечинмаларни ўз бошларидан кечиради. Ҳаёт, ўлим, ирода, фикрлаш қобилияти, туш кўриш каби руҳий ҳолатлар бор деб ўйлаганлар».² Мана шу йўллар билан қадимги инсон тушунчасида турли ҳайвонлар, қушлар ҳақида мифлар, эртаклар, масаллар юзага келган. Орадан кўп

¹ Косвен М.О. Ибтидоий маданият тарихидан очерклар. – Тошкент: Фан, 1060. – 159-б.

² Тайлор Э. Первобытная культура. – М., 1939. – с. 285.

асрлар, йиллар ўтиши билан ўтмишда яратилган бу эртақлар ўзгариб, ўша даврдаги инсон тушунчасининг қолдиғи сифатида бизгача етиб келган. Бу турдаги эртақларда табиатга тотемистик¹ қарашлар ҳам ифодаланган. Ҳайвонларнинг баъзи бирларини илоҳийлаштириш, уларга эътиқод қилиш, ўзларининг ота-боболарини ўша маълум бир Ҳайвондан келиб чиққан деб талқин этиш каби ҳоллар бошқа халқлар эртақларида бўлгани каби ўзбек халқ эртақлари, айниқса, унинг Ҳайвонлар ҳақидаги турида кўзга яққол ташланади.

Овчилик билан шуғулланувчи кўчманчи қабилалар тушунчасидаги тотемистик қарашлар, кейинги даврларда чорвадорлар, деҳқонлар орасида ҳам давом этади. Шунинг натижаси бўлса керак, Ўрта Осиё халқлари, жумладан, ўзбеклар орасида ҳам Ҳайвонлар, қушлар тўғрисида жуда кўп эртақлар юзага келган. Ўзбек халқи орасида ҳам бошқа туркий халқлардаги каби турмуши ва ижтимоий ҳаётида тотемистик тасаввурлар, эътиқодлар учрайди. Масалан: ўзбеклар ва бошқа туркий халқлар – мўғуллар орасида бўрига бўлган тотем мавжуддир. Тотемлар ўз даврининг диний тушунчаси, инсон ҳали табиат қуллигида яшаган даврда ёвуз кучлардан ўзини сақлаш, ҳимоя қилиш йўллари-ни ахтариб, турли урф-одатлар, иримлар, тасаввурлар яратган чоғларида юзага келган. Улар ўзларига бўрини энг яқин Ҳайвон, деб эътиқод боғлаганлар. Бир неча уруғ қабилалари ўзларининг келиб чиқишларини бўрига боғлаганлар, баъзилари, ҳатто, ўз тарбияловчиларини бўри деб ўйлаганлар. «Чунки бўри образи баъзи бир туркий халқларда, жумладан, ўзбек уруғларининг бир қанчасида ижобий, ҳатто, муқаддас саналганки, бу тушунча уларнинг бир замонлар бўрига эътиқод қилганликлари, уни тотем сифатида муқаддас тутганликлари билан боғлиқдир».²

Бўрига бўлган эътиқодни акс эттирувчи бир неча эртақлар ҳали ҳам халқ орасида яшаб келади. Масалан, «Чўлоқ бўри»³

¹ Тотем – қадимги замонларда баъзи халқларнинг назарида қабиллага асос солувчи деб ҳисобланган Ҳайвон ёки ўсимлик.

² Ҳоди Зариф. Фольклор ва археология материалларини киёсий ўрганиш масаласига доир // Ўзбек тили ва адабиёти масалалари. – Тошкент, 1958. – 1-сон. – 29–30-бетлар.

³ Ўзбек халқ эртақлари. I том. – Тошкент: Ўзадабийнашр, 1960. – 579-бет.

ва «Бўри»¹ номли эртақларни олайлик. «Чўлоқ бўри» эртагида чўлоқ бўри ўз устига шахзодани миндириб қушни, қизни, тулпор отни олиб келишга ёрдам беради. «Бўри» эртагида эса бир қанча бўрилар подшонинг қўй ва қорамолларини еб, кўп зарар келтиради. Подшо ҳар қандай куч билан ҳам буларни енга олмайди. Бўрилар хужум қилиб, подшо аскарларини ҳалок этади. Улар подшо шахрини эгаллаб, уни ўлдириб, ўрнига бир ўтинчи чолни подшо қилиб кўтаради ва ўзларини озиқ-овқат билан таъмин этиб туришни чолнинг олдига шарт қилиб қўяди. Чол кўрққанидан бу шартларни қабул этади ва бўриларни овқат билан таъмин этиб туради. Кейинги даврларда бўри эртақларда салбий образ ҳолида келади. Чунки бўри инсонга кўп зарар келтиради, чорва молларини қиради.

Бўрига бўлган эътиқод, иримлар акс этган эртақлардан бошқа яна айиқ билан боғлиқ бўлган эртақлар ҳам учрайди. Айиққа нисбатан қадимги инсоннинг тушунчаси, эътиқоди «Айиқ полвон» эртагида ўз ифодасини топган. Бу эртақда бахт қидириб сафарга чиққан қиз ўрмонга келиб, адашиб қолади. Айиқ билан бирга ҳаёт кечириб, ярми айиқ, ярми одам қиёфасида бир ўғил туғади. «Хирсиддин полвон» эртаги ҳам шу типдаги эртақлардандир. «Қуёш ерининг паҳлавони» эртагида бой зулмидан тоққа набираси Рустам билан қочиб борган ямоқчи чол айиқ қўлига тушади. Она айиқ Рустамни ўз боласи каби тарбиялайди, дўстлашади. Шаҳар ҳокими ва бойлар чолни тутиш учун келганларида айиқ тош отиб, душманларга катта талафот етказиши. Чол билан Рустамнинг мурод-мақсадларига етишишида айиқ ёрдам беради.

Ўзбек халқ эртақлари орасида илон образи билан боғлиқ бўлган бир қанча эртақлар бор. Булардан бири «Илон оға»² эртагидир. Эртақда чолнинг қизи Илон оғага тегади. Илон – қуёв

¹ Алишер Навоий номидаги Тошкент давлат ўзбек тили ва адабиёти университети ҳузуридаги Ўзбек тили ва адабиёти илмий-тадқиқот институти Фольклор архиви. Инв. № 1345. Бу эртақни Зоҳир Қўчқоров Шаҳрисабз туманидан 1957 йилда ёзиб юборган.

² Алишер Навоий номидаги Тошкент давлат ўзбек тили ва адабиёти университети ҳузуридаги Ўзбек тили ва адабиёти илмий-тадқиқот институти Фольклор архиви. Инв. №741. Айтувчи: София Азимова. Ёзиб олувчи: Буюк Каримов. Қўқон тумани, Урганжи қишлоғи, 1935 йил.

ниқобини олса, инсонга айланади. Қиз илоннинг ниқобини куйдириб юборса, у каптар бўлиб, учиб кетади. Илон оғанинг онаси ва холаси ялмоғиз кампир бўлади. Улар Илон оға билан кизга кўп тўсқинлик қиладилар. Лекин Илон оға ва киз ўз тадбирлари орқали ялмоғиз кампирни енгиб, мурод-мақсадларига етадилар.

Яна бир мисол: «Самарқанд подшосининг ўғли Рум подшосининг кизини олгани»¹ ҳақидаги эртақда илон маликага ошиқ бўлади. «Бу кизга бир қорабош оқ илон ошиқ эди. Кеча-кундуз бу кизнинг жамолини томоша қилиб, маст бўлиб ётар эди. Қайси одам бу кизнинг олдига кириб бориши билан захар солар эди. Ҳар нима бўлса, у одамни ўлдирмай қўймас эди, оқшом бўлса бу илон кизнинг қўйнига кириб ётар эди».²

Эртақларда тасвирланишича, инсон боласи илонни ўлимдан қутқаради. Шунинг учун илон ҳам инсон боласига сеҳрли буюмлар бериб, уни мақсадига етказди. Бу турдаги эртақларнинг вариантлари жуда кўп. Ўзбек, тожик халқ эртақларида, афсоналарида айтилишича, агарда инсон илон гўштини еса, ёки шўрвасини ичса, у вақтда илон инсонга яқин дўст, кўмакчи бўлар эмиш. Масалан, «Ибн Сино билан Ибн Хорис» эртагида Ибн Сино гор ичида пишиб турган илон шўрвасини ичган ва бемалол ғор ичига, илонлар подшоси Шохиморон олдига кираверган эмиш. Шохиморон бу бола ўз жинсимиздан деб, зарар етказмабди. Бу тушунчаларнинг ҳаммаси ўтмишдаги инсоннинг илонга нисбатан қандайдир «сеҳрли куч»га эга деб қарашининг эртақлардаги қолдиғидир.

Илон билан боғлиқ бўлган эртақларнинг кўпчилиги сеҳрли-фантастик эртақларда учрайди. Бироқ илонлар бундай ўринларда «сеҳрли кўмакчи» образи сифатида келади.

От образи билан боғлиқ бўлган эртақлар ҳам кенг тарқалган. Олтин қанотли учар отлар, осмонга учувчи самовий отлар ўзбек халқ эртақларида қахрамоннинг асосий ёрдамчиси сифатида келади. От ҳақидаги афсоналар ҳам анчагина. Отга бўлган

¹ Алишер Навоий номидаги Тошкент давлат ўзбек тили ва адабиёти университети хузуридаги Ўзбек тили ва адабиёти илмий-тадқиқот институти Фольклор архиви. Инв. № 284.

² Ўша манба. 15-бет.

эътиқоднинг зўрлигидан, баъзи бир географик жойларнинг номлари ҳам от афсонаси билан боғланади. Масалан: «Ҳазорасп»¹ афсонасини олайлик: «Учар минг отни тутиб олиш учун Сулаймон пайғамбар булоққа беҳуш қиладиган дори солиб қўяди. Шу хийла билан учиб келган отларни тутадилар. Қанотларини қирқадилар, инсон хизматига қаратадилар», – дейилади афсонада. Отнинг инсон ҳаётида, меҳнатида тутган ўрни ниҳоятда юқори бўлгани учун эртақларда унинг ролини бадиий равишда бўрттириб ифодалядилар.

Ўзбек халқ эртақлари орасида ҳайвонлар ҳақида яратилган эртақлар анчагина ўринни ташкил этади, буларда ҳам ҳайвонлар, қушлар, ўсимликлар инсон каби гаплашади, тортишади, дўстлашади, дўстни душмандан, яхшини ёмондан ажратади [...]. Масалан: «Сусамбил» эртагида уй ҳайвонлари, паррандалар бирлашиб, яхши, фаровон, тинч жой ахтариб Сусамбил мамлакатига етиб борадилар. Ҳайвонлар тилидан меҳнаткаш халқнинг турмуши ифодаланади. Сусамбилга кетишда эшак ариларга шундай дейди: «Эй укалар, сизлар ҳам бизга ўхшаб оч қолиб, қийналганга ўхшайсизлар. Бизнинг танамизда шира қолгани йўқ. Сўрганларинг билан ҳеч нарса чиқмайди. Ширамизни хўжайинларимиз сўриб олган. Агар овқат керак бўлса, биз билан юраверинглар!»² Сусамбилга эга бўлиш учун ваҳший ҳайвонлар (шер, йўлбарс, бўри ва бошқалар) хужум қилганларида, инсонга яқин бўлиб, у билан боғланган уй ҳайвонлари – эшак ханграйди, хўкиз сузади, ари чақади, хўроз қичқиради. Хуллас, ҳаммалари бир жон, бир тан бўлиб, ваҳший ҳайвонларни енгадилар ва «ўтнинг қуюғи, сувнинг тиниғи, унда жуда эркинлик, азоб-уқубат йўқ» Сусамбилга эга бўладилар.

Бу эртақда ўтмишда меҳнаткаш халқ оммасининг яхши, тинч, фаровон, адолатли ҳаёт кечириш орзуси ифодаланган.

«Овчи, Кўкча ва Доно»³ эртагида турли жинсдан иборат бўлган ҳайвон ва паррандалар (каптар, сичкон, қурбака, тошбака, қарға

¹ Бу афсона 1962 йилда Хоразм вилоятининг Ҳазорасп туманидан ёзиб олинган.

² Ўзбек халқ эртақлари. I том. – 52-бет.

³ Ўша манба. – 13–16-бетлар.

ва кийик) дўстлик, аҳиллик натижасида ҳар бир ҳайвоннинг бошига оғир кун тушганда, улар кўпчилик бўлишиб, бир-бирларига кўмаклашиб, ўлим хавфидан қутуладилар. Бу эртақ меҳнаткаш оммани бирлашиб, кўпчилик бўлиб, бир-бири билан аҳил бўлиб яшашга чақиради. Эртақдан чиқадиган дидактик хулоса, куч бирликда, агар кўпчилик бирлашиб, аҳил бўлиб яшаса, ҳар қандай душман ҳам буларни енга олмайди, қийинчиликларни бартараф қилиш мумкин, – дейилади.

Инсон ўзининг меҳнати, иш қуролларига бўлган муносабати, ихтиро этиш қобилиятига кўра ҳайвонлардан фарқ қилади. Кейинги даврларда одамнинг табиат ва унинг ўзгаришларига, турли ҳайвонларга бўлган муносабати ҳам ўзгаради. Инсон ҳайвонларнинг ўзига фойда келтирадиганларини ижобий, зарар келтирадиганларини салбий образларга ажратади. Эртақларда ҳам бундай қараш акс этади [...]. Шунинг натижасида бўлса керак, бошқа халқлардаги каби биздаги эртақларда ҳам кўпинча тулки, бўри, шер, йўлбарс, илон ва бошқалар салбий образлар бўлиб, ит, от, мушук, сичқон, қўй, қўзи, эчки, кийик ва бошқалар ижобий образларни ташкил этади.

Тулки бошқа халқларнинг эртақларидаги каби бизда ҳам айёр, олғир, ёлғончи киши образидир. Шунинг учун ҳам халқ орасида айёр одамга нисбатан «тулки» лақаби берилади. Бўри эса энг очкўз, муғомбир, аҳмоқ, гўл сифатида тасвирланади. Масалан, «Бўри билан тулки»¹ эртагида ҳар иккисининг ички қиёфаси очиб ташланади. Бўри тулкига: – Мени бир жойга олиб бор ва қорнимни тўйғизиб, хурсанд қилиб келгин, – дейди, иккинчи кун бўри тулкига: – Ўртоқ, кеча мени жуда хурсанд қилиб юбординг, энди бугун сал хафа қилиб қўйгин, – дейди. Бу илтимосларнинг ҳаммасини тулки бажаради. Тулки узумзор боғда икки ғужум узумни бурнига суқиб, бўрига: – Қорним тўйганидан бурнимдан булоқ бўлди, – дейди. Гўл-аҳмоқ бўри ҳам тулкининг бу сўзига ишониб, ўлгунча узум ейди ва боғдан чиқиб, қочиб кетолмай, богбон калтагига дучор бўлиб, еган узумлари бурнидан булоқ бўлади. Бўри яна тулкининг сўзига кириб, карт думба ёғ қўйилган қопқонга илинади ва энг охири отни ейман деб, от тепкисидан ўлади».

¹ Ўзбек халқ эртақлари. I том. – 37–41-бетлар.

Тулкининг лайлак билан дўст бўлиб, унинг болаларини алдаб, еб кетиши эса аввал дўст бўлиб, кейин душман ишнини қилувчиларнинг қилмишларига тўғри келади. Тулкига ўхшаш сиртдан «дўст» бўлиб кўриниб, ичдан душман ишини қилувчиларга нисбатан халқ «Ишонмагин дўстингга, сомон тикар пўстингга» деган мақолни бекорга айтмаган, албатта [...].

Ҳайвонлар ҳақидаги эртақлар бошқа турдаги эртақларга қараганда композиция жиҳатидан оддий, улар кўпинча қисқа ва маълум бир дидактик хулосани кўзда тутлади. Масалан: «Дурадгор билан маймун» эртагини олайлик. Бунда дурадгорнинг тахтани ишлаб, арралаб турганини кўрган маймун ҳам инсон қилаётган ишни бажармоқчи бўлади-ю, бироқ унинг думи тахта орасига қисилиб қолиб, азоб беради. «Дод!» дейди маймун. Бундан чиқадиган дидактик, ахлоқий хулоса «Ҳар ким ўзи билган ишни қилиши керак. Билмаган ишнинг уддасидан чиқа олмай, маймунга ўхшаб шарманда бўлиб қолмаслиги керак» демакдир.

Инсонлар билан ҳайвонлар ўртасидаги муносабатни акс эттирган эртақлардан бири «Эгри ва тўғри» эртагидир. Бу эртақда Тўғривой тўғри, содда, зийрак бўлгани, бировга хиёнат қилмагани учун мақсадига етади. Эгривой эса дўстига хиёнат қилиб, нотўғри йўл билан боргани учун жазосини тортади. Бу эртақдан мақсад кишиларни тўғри, софдил, дўстга меҳрибон, хиёнат қилмаслик каби ижобий ахлоқ нормалари асосида тарбиялашдир.

«Яхшиликка яхшилик эр кишининг ишидир» ёки «Илоннинг иши заҳар солмоқ»¹ эртақларида инсон бир-бирига дўст, меҳрибон, бошига оғир кун тушганда ёрдамлашувчи образ холида тасвирланади.

Чўпон илонни олов ичидан қутқариб олади. Илон бу яхшилик эвазига инсонни чақаман дейди. Чунки «менинг ишим заҳар солмоқ» дейди. Инсон тулкининг кўрсатган йўли туфайли илон заҳридан қутулиб, омон қолади. Бу эртақ «Калила ва Димна»да² ҳам бор. Демак, бу китобдан эртақчи репертуарига ўтган. Баъзи бир ўзгаришлар билан ёзиб олинган бу эртақдан чиқадиган хулоса шуки,

¹ Ўзбек халқ эртақлари. I том. – 42-бет.

² Калила ва Димна. – Тошкент: Ўрта ва олий мактаб давлат нашриёти, 1961. – 43-бет.

инсон инсонга дўст, бир-бирига ёрдам кўрсатиши лозим. Агар бир киши сенга яхшилик қилар экан, сен ҳам ундан яхшилигингни аяма, деган фикр англашилади. Ҳайвонлар, қушлар ҳақида яратилган эртақ ва масалларда доимо кишилик жамиятида рўй берган воқеалар, курашлар, хатти-ҳаракатлар акс этади. Очкўзлик, айёрлик, золимлик, хиёнат, адолатсизлик, хасислик, зулмат, нодонлик, ёмонлик одатлари фош этилади ва сатира ўти билан куйдирилади. Ҳайвонлар ҳақидаги эртақларнинг кўпчилиги бошқа халқлардаги эртақларнинг сюжет ва образларига ўхшаса-да, бироқ, бу эртақлар ўзбек халқининг ўз турмуши, урф-одатлари, психологияси ва бошқа миллий анъаналари билан боғлиқ ҳолда юзага келган ва тарқалган. Шунинг учун ҳайвонлар ҳақидаги эртақларнинг баъзи бирларини бошқа халқлардаги вариантлари билан қиёсий текширганимизда асосий эътиборни образларнинг талқин этилишига, бадиий хусусиятларига, тилига қаратишимиз лозим.

Ҳайвонлар ҳақидаги эртақларни, асосан, болалар эртагига қўшишимиз мумкин. Чунки уларда болаларнинг маънавий ва эстетик талабларига жавоб берадиган хусусиятлар кўпдир. Буларнинг композицияси унча мураккаб эмас. Буларда ҳаракат тез ва диалог ҳам анчагина учрайди.

«Қарға билан кўзи»¹ эртаги мактабгача ёшдаги болаларнинг энг мароқли эртақларидан биридир. Бу эртақда кўзи қарғани сувга, кулолга, тупроққа, кийикка ва бошқаларга юборади. Бир хил сажли сўзлар, диалоглар қайтарилади:

– «Кўмирчи ака, кўмирчи ака, беринг кўмир, қилсин ўроқ, ўрай ўроқ, есин сигир, берсин сут, ичсин този, қувсин кийик, ташла-син шох, қазий тупроқ, қилсин кўза, олай сув, чайқай тумшук, семиз, аъло ейман кўзи», дебди қарга. «Чивинбой» эртагида ҳам воқеалар шу тарзда ривожланади. Бу содда, тушунарли иборалар болалар хотирасида яхши сақланади.

Ҳайвонлар ҳақидаги эртақларда диалоглар кўп учрайди. Диалоглар йўли билан улар ўз мақсадларини бир-бирларига англа-тадилар.

Ўзининг бадиий образлари билан, сюжетининг мўъжазлиги, бадиий ифоданинг ўткирлиги жиҳатидан бу турдаги эртақлар

¹ Ўзбек халқ эртақлари. I том. – 29–32-бетлар.

халқ латифалари ва масалларига анча яқин туради. Ҳайвонлар тўғрисидаги эртақларда шеъринг парчалар ҳам учрайди. Бу шеъринг парчаларни профессионал эртақчилар куй билан айтадилар (шеърнинг куй билан ўқилиши фольклорнинг ўзига хос хусусиятдир), бу эса тингловчилар хотирасида узоқ вақт сақланишига ва эртақнинг бадиий жиҳатдан мароқли чиқишига ёрдам беради. Масалан: «Бўри билан мерган»¹ эртагида оч бўри ўз бошидан кечирган кунларини ўзига-ўзи шундай деб арз қилади:

*Кўрдинги кўзи,
Термулади икки кўзи,
Сенга ким қўйибди,
Кўзини тузлаб ейишни, ув, ув.²*

Болалар учун тарбиявий аҳамияти бўлган ва бадиий жиҳатдан пухта ишланган эртақлардан биз «Қумурсқа», «Чивинбой», «Қарға билан кўзи», «Эчкининг ўч олиши», «Бўри билан тулки», «Овчи, кўкча ва доно» ва бошқа эртақларни кўрсатиб ўтамиз. Буларнинг деярли кўпчилигида ҳайвонлар, қушлар иштирок этади. Бу ҳайвонлар образи орқали жамиятдаги кишилар характеридаги ёмон ва қолоқ иллатлар очиб ташланади. Бошқа тур эртақларда эса одамлар билаи ҳайвонлар ўртасидаги муносабат ифодаланганда, бу хилдаги эртақларда, албатта, инсон ҳайвонлардан ҳар жиҳатдан ғолиб чиқади. Ҳайвонлар, қушлар ҳақидаги эртақларда сюжет тез ривожлана боради, образлар серҳаракат бўлиб, қулгили моментлар ҳам анчагина учрайди. Бу хусусиятлар болаларнинг сезги-ҳисларини ўстиради [...].

Ҳайвонлар ҳақидаги эртақлардан тингловчилар, ўқувчилар яхшини ёмондан, тўғрини эгрідан, соддани айёрдан, ялқовни ишчандан, очкўзни сахийдан, аҳмоқ, нодонни ақлйдан, мардни номарддан ажратишни ўрганадилар.³

¹ Ўзбек халқ эртақлари. I том. – 20–24-бетлар.

² Ўша манба. – 57–61-бетлар.

³ Ушбу мақола таниқли ўзбек фольклоршуноси Мансур Афзаловнинг 1964 йилда «Фан» нашриётида чоп этирилган «Ўзбек халқ эртақлари ҳақида» номли китобидан олинди.

Расул
МУҲАММАДИЕВ
(1911–1971)

Расул Муҳаммадиев 1911 йил Қўқон шаҳрида туғилган. «Ўзбекистонда хизмат кўрсатган маданият ходими» (1971). Меҳнат фаолиятини «Янги Фарғона» газетасида мухбирликдан бошлаган (1929). Кейин «Чирчиқ қурилиши» газетасида ходим, «Қизил Ўзбекистон» (ҳозирги «Ўзбекистон овози») газетасида бўлим мудури, масъул котиб (1937–38) бўлиб хизмат қилган. Иккинчи жаҳон уруши жангоҳларида жангчи-мухбир сифатида иштирок этган. Сўнг турли матбуот нашрларида муҳаррир, мухбир бўлиб ишлаган (1946–56). Тошкент давлат университети (ҳозирги ЎзМУ)нинг журналистика факультетида ўқитувчи (1957–59), доцент (1959–71) вазифаларида ишлаган. «Ўзбек халқ ижоди» сериясида «Аския» мажмуасини чоп эттирган (1970). 1971 йил Тошкент шаҳрида вафот этган.

**АСКИЯ ЖАНРИ ВА УНИНГ
ТИЛ ХУСУСИЯТЛАРИ**

Аския ўзбек халқи оғзаки ижодиётининг энг демократик, серзавқ, ҳаётий ва тургун жанридир.

«Аския» сўзи, аслида, зукколик, донолик, ҳозиржавоблик маъноларини англатади, бироқ у шодон кулги билан сугорилган ўзига хос услубдаги сўз мусобақаси, сўз ўйинларидан иборат зўр бир санъатдир. Аския кўп замонлардан бери кўпчилик орасида кенг

тарқалган бўлиб, ўзбек халқининг миллий анъанаси сифатида асрлар оша янги мазмун ва шакллarda жилоланиб, халқ ижодиётининг бошқа жанрлари билан узвий боғланган ҳолда улғайди.

Халқ ижодининг бошқа жанрлари каби аския ҳам ўтмишда меҳнаткаш табақаларнинг орзу-тилакларини, озодлик, инсонпарварлик, меҳнатсеварлик ҳис-туйғуларини ифодалаб келди. Меҳнаткаш халқ орасидан чиққан сўз усталари – аскиячилар тил шамширининг ўткир тиғи – сўз ўйинлари, иборали чатишмалар, чандиш, ўхшатиш, муболағалар орқали текинхўр баъзи одамларнинг, фирибгар қози-эшонларнинг, ўғри-қаллобларнинг қора ниётларини омонсиз фош қилиб, улар устидан заҳархандалик билан кулдилар, жамият иллатларини кўпчилик ўртасида қаттиқ танқид қилдилар, оғир кун кечирган меҳнаткашларни кулдириб, уларга маънавий озик бердилар.

Аския ҳозирги фаровон кунларимизгача сақланиб келди. У эндиликда сўз санъати, сатира-юморнинг серзавқ жанри, танқид қуроли, бадий-эстетик тарбия воситаси сифатида янги мазмун ва шакллarda юксалмоғи керак. Биз ушбу мақолада аскиянинг жанр хусусиятларига, тил жиҳатларигагина тўхтаимиз, қолган талай масалалар эса келгусининг вазифасидир.

Аскиянинг бадий услубини аниқлайдиган белгилар, хусусиятлар, бизнингча, асосан, куйидагилардан иборат:

Аския, одатда халқ тўпланган йиғинларда, сайилларда, боғ-роғларда, тўй-томоша ва меҳмондорчиликларда айтилади. Икки киши ёки бир неча киши кенг даврада маълум мавзу устида тарафма-тароф бўлиб баҳслашади. Соф фикрлар курашидан иборат бўлган бу айтишувда бадий воситалар – сўз ўйинлари, иборали чатишмалар, чандиш, қочирик, ўхшатиш, муболага ва бошқалар моҳирлик билан ишлатилади. Аскиячи ўз «рақибининг» фикрига нисбатан чистон, оригинал, чуқур маъноли фикрларни шу ондаёқ баён қилиш билан устун чиқишга уринади, яъни фикрлашда импровизация юз беради. Қаттиқ, лекин беғараз кулгилар билан суғорилган баҳслашув бир тарафнинг ғалабаси билан тугайди.

Ҳозиржавоблик – аскиянинг энг муҳим шарти, чунки бирор тараф ўз вақтида маъноли ва устун жавоб қайтара олмаса (па-

уза бўлса), кулгининг авжи тўхтайди, демак, ракиб фикрининг оқимида кучсизлик аломати сезилиб қолади. Ҳозиржавоблик оғзига келган гапни гапиравериш эмас, албатта, балки бу фикр, зехн, идрок ҳозиржавоблигидир, яъни тема устида яшин тезлигида фикрлаш, зехнини тез ишлатиш, тўсатдан идрок этиш, лутф билан фараз ва тасаввур этишдир.

Гўёлик – бир неча маънони англаувчи, кўчирма маънолар берувчи сўзларни ишлатиб, сўз ўйинлари қилишдир. Сўзлар қанчалик зарбли бўлса, тема мазмуни эшитувчиларга шунчалик тез етади, пайров шунча узоқ давом этади.

Закийлик – аския мазмунига, воқеаларга, фактларга оид бевосита фикрларни дарҳол айтишдир, «рақиби»га ва даврадаги ишқибозлар дидига монанд келадиган қочириқлар, чандишлар, ўхшатишлар, тўқималар топа билишдир.

Аскиянинг муҳим хусусияти инсонни кулдириш, сўз воситасида кулги чиқаришдир. Аскияда кулги чиқариш учун бирмунча элементлардан фойдаланилади. Масалан, аския темасини ечишда ёки англантишда абстракция катта рол ўйнайди, яъни нутқда кўпчилик сўзлар ўзининг асл маъноларида эмас, кўчма маъноларда қўлланади. Материядан холи маънолар ҳам, предметлар ҳам омоним хусусиятларига эгадир. Тилимизнинг бу хусусияти сўз ўйинлари қилиб, кулги чақиритишга кенг имкон беради (масалан, «Шагал тўқиб юрибмиз – кулишиб юрибмиз», «Қовун туширибсизми? – Бирор ёмон иш қилиб қўйдингизми?» ва ҳ.к.).

Жанрни тўлдирувчи компонентлар хилма-хилдир. Кишилarning характерини, қиёфасини очиш учун, яъни уларни сифатлаш учун турли лақаблар берилади. Лақаб, қўпинча, одамдаги жисмоний нуқсонлар, феъл-атвордаги характерли белгиларга мослаб қўйилади ва булар воситасида сўз ўйинлари қилинади (масалан, «Шўр пешона» – «кал» лақабининг кўчма маъноси). Новча одамга кўпинча «лайлак» лақаби берилади ва лайлакдаги белгилар одамга таққослантирилиб, кулги чақирилади. «Амманнинг бузоғига ўхшайди-я!» деган иборада кишининг лавангилиги тасаввур этилади. «Сичқоннинг ини минг танга» деган ибора муболағани англатади. Жанрни тўлдирувчилардан яна нисбат бериш, фразеологик чатишмалар, халқ иборалари, жаргон сўзлар

(«ишлар беш», «киптини келтирди», «бир чўқишда қочиради» ва бошқалар) кулги воситалари саналади. Гапирганда интонация, урғулар маънони кучайтиради, гапдаги муҳим нукталарни таъкидлайди, кўчирма маънолар келтириб чиқаради. Аскияда аскиячи образга кирмайди. Аскиячилар жиддий киёфали, одобли, доно кишилар бўлиб, фақат сўз дурларинигина тўкадилар. Демак, аския қизиқчилик ва масхарабозлик жанридан ажралади, у сўз санъатидан иборат мустақил жанрдир.

«Бизда кўп одамлар, аскиячи билан қизиқчи бир хилда вазифани бажарувчи киши, деб тушунадилар, – деб ёзган эди ўз мақоласида Ш. Ризо, – бу – янглиш фикр. Аския қадим ўзбек томоша санъатининг алоҳида бир формаси бўлиб, бунда, албатта, икки киши ёки бир неча киши қатнашади. Ҳар биридаги маълум бир шахсий камчилик асосида унга лақаб бериб, бир-бирини чандиш бошланади. Аския мавзуи борган сари кенгайиб боради, унга воқеликдаги ҳодисалар киради, бунда қайси аскиячининг тушунчаси кенг, билими бой бўлса, ўша енгади. Қизиқчилик эса аскиячилик эмас, у маълум репертуарга эга бўлган ва кулги асосига қурилган сахна санъатининг ўзгинасидир. Қизиқчилар чин маъноси билан артист, фақат ўзларининг маълум бир базалари йўқ, ҳар қайси ролга керак бўлган кийимларни кўтариб, кўчиб юрадиган артистлардир»¹.

Биз юқориди аскиянинг негизи кулги деган эдик. Ҳақиқатан, кулги инсон қалбининг инъикосидир, аммо ҳаётда икки хил кулги бўлади: бири – жамиятнинг ривожланишига қарши бўлган, илғор, сиёсий, ижтимоий, эстетик ғояларга зид, уларни амалга оширишга ҳалақит берадиган барча нарсалар ва шахсларни қаттиқ фош қилиш, уларнинг устидан ғазабли кулишдир, бу – сатира ҳисобланади. Иккинчи кулги эса – беғараз, беихтиёр шодон кулгидир – юмористик кулгидир. Бизнингча, ҳозирги кунларимизда аския юморга хос бўлиб, махсус жанр сифатида ривожланмоғи керак.

Аския жанри ранго-ранг шакллarga (усулларга) бойдир.

Аскиянинг ҳозирча бизга маълум бўлган йигирмадан ортиқ усуллари бордир. «Пайров» аскиянинг энг юксак усулидир,

¹ Шариф Ризо. Халқ санъаткорлари // «Гулистон» журнали. – Тошкент, 1940. – №4 – 25-бет.

«Бўласизми?», «Ўхшатдим», «Гулмисиз, райҳонмисиз, жамбилмисиз?», каби шакллари унинг ибтидоий усулларидадир. «Қофия», «Радиф» аскиянинг шеърӣй усулидир. Шунингдек, аскиянинг «Тутал», «Афсона», «Сафсата», «Раббия» ва бошқа шакллари ҳам бўлиб, илгари вақтларда айтилиб келинади, ҳозир бу усуллар жуда кам қўлланилади. Биз куйида аскиянинг асосий шаклларига тавсиф берамиз.

Пайров изчил фикрлар оқими бўлиб, аскиянинг мукаммаллашган усулидир. Пайров усули маълум бир теманинг маъноси-ни бошдан-охиригача ечиб беради, аскиячилар танлаб олинган тема доирасидан чиқмайдилар. Ҳар икки томон (аскиячилар) бир-бирларига ҳозиржавоблик қилганларда, фикрлар мазмуни бир-бириникидан устун келиши, яъни ривожланиши шарт. Кульминация нуқтаси эса мазкур теманинг энг чуқур мазмунини ифодалашдир, яъни фикр галабасидир. Аския ишқибозларининг қаттиқ ва узоқ давом этадиган кулгиси фикр ғалабасининг тантанасидир. Демак, пайровда тема ҳар жиҳатдан ечилиши, чала-чулпа бўлиб қолмаслиги шарт. Шу жиҳатдан қараганда пайров сюжетли бир бадиий асар ҳисобланади. Мисол учун 1960 йил 7 ноябрь кuni Қўконда бўлган катта бир аския кечасида ёзиб олинган «Бедана пайрови»ни таҳлил қилайлик. Қодиржон ака Халилов билан Турсунбува Аминов ўртасида бўлган «Бедана пайрови» икки жиҳатдан характерли: бир жиҳатдан, беданага хос хусусиятлар – бедананинг вавақлиги, қўрқоқлиги, урушқоқлиги ва бошқа хусусиятлари пахта тераётган баъзи дангасаларнинг образини, қиёфасини кўрсатиш учун ишлатилган. Беданаларнинг сайраш оҳангларига мослаб топилган сўзлар эса воқеани англатиш учун фойдаланилган. Иккинчи жиҳатдан, умуман бедана ҳақида гапирилса-да, бироқ гап мазмуни бошқача: гап теримдаги нуқсонларни танқид қилиш, нуқсонларни беғараз кулги билан тузатиш, ғалабани нишонлаш устида борапти.

Пайровда сюжет, фикр изчиллиги бўлиши билан бирга, воқеликни, предмет ва ҳодисаларни бутун деталларигача очиб, кўрсатиб берилиши ҳам керак. Тўлақонли адабий асарда, масалан, табиат манзаралари, кишиларнинг образи ва уларнинг

ҳаётга муносабатлари – карашлари, воқеаларнинг ривожланиши ва тугалланиши, ғоя ва ҳаракатни тўлдирувчи «майда-чуйда» деталлар тасвир этилганидай, пайровда ҳам бу талаблар амалга оширилиши шарт, акс ҳолда у «чала», «хом» бўлиб қолади.

Аскиянинг «Ўхшатдим», «Бўласизми», «Гулмисиз, рай-ҳонмисиз, жамбилмисиз?» шакллари аскиянинг кичик шакллар ёки ибтидоий шакллари дейиш мумкин. Ҳар учала шаклида ҳам аскиячи ўз «рақибини» бирор шахсга ёки шахснинг хатти-ҳаракатини бирор воқеа-ҳодисага тенглаштиради, нисбат беради, сифатлайди. Ҳар икки томон юқоридаги иборалар воситаси билан навбатма-навбат савол-жавоб қилишади ва мақсадни очишади. Бу усулларнинг энг муҳим томони шундаки, ҳар икки томоннинг (икки аскиячининг) бир сафарги савол-жавоби билан исталган бошқа темада (сюжет) ечилади, иккинчи сафарги савол-жавобда исталган бошқа темада гаплашавериш мумкин. Аммо бу шаклларнинг пайровга яқинлиги, узвий боғлиқлиги ҳам бор. Масалан, деҳқончилик, иморат, мева ёки бошқа бирор тема атрофида аския қилинганда, шу темадан бошқа темага кўчмаслик мумкин, ҳамма деталлари очилиши шарт эмас. Шунингдек, воқеа ва унинг ривожланиш жараёнларидаги прогресс тартибини сақлаш шарт эмас. Масалан, деҳқончиликда гап кузги ер ҳайдашдан бошланса, орадаги бирмунча процесслардан кейин ҳосил йиғиб олинади. Аскиянинг кичик усулларида эса шу темага хос ўринлардан гаплашавериш мумкин.

Аскиянинг «Тутал» усулини кўпроқ Марғилон аскиячилари қўллаганлар. Аскиянинг бу усули ҳақида фикр баён қилишдан аввал шуни қайд қилиш керакка, умуман, аскияни закийлик, донолик, зеҳн ўткирлиги деб таъриф этар эканмиз, аския вақтларида баъзан ахлоқ доирасидан чиқиб кетиш ҳоллари юз беришини ҳам унутмаслигимиз лозим. Аскиянинг «Тутал» усулида келтирилган жумла ёки шеърий сатр кишига дафъатан порнографияни англади, бироқ кейинги айтиладиган жумла ёки сатрда гап бошқа томонга буриб юборилади ва бу сўз ўйинлари ўткир маъноли, гўзал лутфли бўлиб чиқади.

Аскиянинг «Қофия» усули шеъриятга яқин туради. Бунда сатрлар бевосита аскиячилар томонидан тузилади.

Аскиянинг «Раббия», «Саъж», «Кабиху малих», «Сафсата» ва бошқа шу каби яна кўпгина шакллари ҳам борки, буларнинг даярли ҳаммаси ё бир-бирига шаклан яқин туради, ё ўхшаб кетади. Аскиянинг бундан бошқа яна кўп шакллари ҳам мавжуд бўлиб, халқ орасида айтилиб келинмоқда.

Аскиянинг жанрлик хусусиятларини белгиловчи омиллардан бири унинг тилидир. Аския тили жонли тил, оғзаки нутқдир. Аскиянинг демократик характерга эгаллиги, унинг кўпчилик олдида ижро этилиши ва шу каби бошқа хусусиятлари аския тилининг оғзаки нутқ асосига қурилганлигини кўрсатади.

Оғзаки нутқда сўзларнинг маъно турлари ва талаффуз хусусиятлари тўла сақланади. Шунингдек, аскиянинг маънони англатиш учун ишлатган айрим товушлари, чатишмали иборалари, диалог вақтидаги ҳис ва ҳаяжонлари, ўзига хос акцент ва шевалари оғзаки нутқда тўла равишда акс этади.

Аскияни кўпчиликка, узоқ масофага етказиш, шунингдек, узоқ давр сақлаш учун ҳозирги тараққиётимизда ҳамма техника имкониятлари мавжуддир (масалан, магнитофон ленталарига ёзиб олиб, овоз кучайтиргич мосламалар, радио ва телевидение орқали эшиттириш ва кўрсатиш, грамофон, патефон пластинкаларига кўчириш ва ҳ.к.).

Аскиянинг тил хусусиятлари жиҳатидан ҳозирги ўзбек маҳаллий диалектларининг биринчи группасига, яъни «о» ловчи группага киради. Территория жиҳатидан ўзбек диалектлари уч группага бўлиниб, аския диалекти, асосан, марказий диалект группасига киради (Ўрта Ўзбекистоннинг марказий шаҳарлари – Қўқон, Марғилон, Андижон, Тошкент, Жиззах шевалари). Шунингдек, Фарғона водийсидаги қишлоқларда яшовчи кишилар ҳам шу шевада аския қилишади. Этник жиҳатдан эса аския чиғатой диалектига киради (ўрта ўзбек диалекти).

Тошкент давлат университетининг илмий экспедицияси Фарғона водийсида ва Тошкент шаҳрида аскиячиларнинг бир неча учрашувларини ўтказиб, қирқдан ошиқ аския пайровларини магнитофонга ёзиб олди. Автор аскиянинг диалект ва шеваларини шу пайров материаллари асосида ўрганиб чиқди ва юқоридаги хулосаларга келди.

Аския сўзининг асл маъноси абстракциялашади, бу аскиянинг сўз ўйинлари хусусиятидан келиб чиқади. Аскияда сўзлар кўпинча асл маъноларидан бошка маънога кўчирилган ҳолда ишлатилади, янги-янги маънолар вужудга келтиради.

«Бедана пайрови» аскиясидан парча келтирайлик:

Турсунбува – Пахта териш нормангизни нега бажара олмай-сиз десам, эски «вавағ» экансиз-да (вавағ – лапашанг, укувсиз, иш билмас).

Қодиржон ака – Ўзлари қора тахтани кўнаққа айлантириб олибдилар-у, яна бизга туллаклик қиладилар (туллаклик – айёрлик, қийиқлик).

Турсунбува – Терганлари паллага келмайди-ю, яна биз билан пашшалашадилар (пашша беданага хос, аслда эса: гап талашдилар, менга осиладилар).

Қодиржон ака – Ўзим ҳам ҳайронман, ваъдасини бажармайдиган қанақа қочиққа учраб колдим?! (Қочиқ – дангаса, ишёқмас).

Аскияда омонимлардан фойдаланиш муҳим шартлардан бири ҳисобланади. Аскиячилар омонимлар воситаси билан сўз ўйинлари қиладилар. Аскияда омонимлар турли урғу, ундовлар воситаси билан ҳам англантилади.

Мисол: «Мева пайрови» аскиясидан:

Мамарозиқ ака – Ғойиб ака, у куни Риштонга бориб, «қандай ўрик» еб келдингиз? («Қандай ўрик» – ўрикнинг номи. Аслида, «қанддай ўрик», талаффузда «қандай ўрик»).

Ғойиб ака – Қандай ўрик ейман, ахир, сиз боғнинг ўртасида туриб: олма, олма; олма, олма, дейсиз-у! (Олма – мева, олмани олма – буйрук).

Аскияда синонимлардан омонимларга нисбатан кам фойдаланилади, чунки аскиянинг импровизация хусусияти кенг, чуқур тасвири талаб қилмайди. Аммо аскияда тасвир, образни очиш, муболаға элементлари мавжуд бўлгани учун бу компонентлар ишлатилганда синоним сўзлардан фойдаланиш мумкин. Шунингдек, аскиянинг лақаб кўшиладиган пайровларида кишилар сифатини, паррандалар ҳаракатини, табиат манзараларини тасвир қилганда синонимлардан фойдаланиш мумкин.

Фразеологик чатишмалар аскияда асосий ўринда туради ва кулги чақириш объектларидан – компонентларидан бири

хисобланади. Сўз бирикмалари мураккаб бир тушунчани ифодаловчи тил бирлигидир. Составли терминлардан конкрет, тўғри маъно келиб чикса, йиғма маъноли фразеологик бутунликлардан умумлашган маъно – кўчма маъно англашилади. Демак, фразеологик чатишмадан англашиладиган маъно унинг таркибидаги сўзларнинг маъноларига боғлиқ эмас, иборанинг маъноси билан таркибидаги сўзларнинг маънолари орасида тенг боғланиш ҳам йўқ. Шунингдек, фразеологик чатишмаларни сўзма-сўз тушуниб бўлмайди ва бошқа тилга таржима қилганда маъноси сира англашилмайди. Аския бунга, айниқса, мисол бўла олади.

Масалан, «Иморат пайрови» аскиясидан:

Эргаиш лочин – Саркор, кўшним эгов қилса-қилаверсин, бир кун тарвузи қўлтиғидан тушар, мен иморатни бошлайвераман, бирорга дурадгор уста топиб берсанг-чи (тарвузи қўлтиғидан тушар – қилмишидан пушаймон бўлар).

Олим саркор – уста Иброҳим рўпарангизда девордай бўлиб турибдилар-ку, гаплаша қолинг, бунақа ишларга суяклари йўқ! (Суяклари йўқ – бажонидил қиладилар, йўқ демайдилар).

Фразеологияда фразеологик чатишмалар, фразеологик кўшилмалар (сўзларни мажозий қўллаш), идиоматик сўзлар (тўғри маънода қўлланилмай, фақат кўчма маънодагина ишлатиладиган сўзлар) категориялари борки, буларнинг ҳаммаси аскияда муваффақиятли ишлатилади ва кулги чақириш объекти бўлиб хизмат қилади. Биз кўчма маъноли иборалардан тузилган бир неча аския диалогларини келтирамиз.

Иброҳимжон – Арпангизни хом ўрдикми, очикроқ гаплашаверинг-да, отдан тушсангиз ҳам, узангидан тушмайсиз-а!

Ғойиб ака – Оғзингизга қараб гапиринг, гапингизнинг тузи қочяпти.

Иброҳимжон – Қани, ошдан олинг, ўтирасизми, аммамнинг бузоғига ўхшаб.

Ғойиб ака – Қани, ўзлари ҳам олсинлар, жуда қаймоқли гапирдилар... ва хоказо.

Аскиячи кулги чақириш мақсадида нутқ товушлари воситаси билан сўзларнинг асл маъносидан кўчма маънолар ясайди, бир сўзни иккинчи сўзга айлантириб юборади, «рақиби»га қочириқ-

лар қилади. Бу вақтда унга сўз урғуси иш беради. Масалан, Беш-терак қишлоқлик «кал» лақабли Обилжон ака Норматов билан шу қишлоқлик Шоқир ота Тўйчиев ўртасида бўлган бир аскияда сўз урғуси воситаси билан ажойиб сўз ўйинлари қилинди.

Шоқир ота – Обилжон, сизга тарокнинг нима кераги бор, сочингиз калта-ку! («к» дан кейинги «а» унлисига урғу берилади).

Шунингдек, жонли тилда баъзи товушлар сирғалиб чиқади. Фонетикада бу ҳол аския нутқида сўз ўйинлари қилиш, кўчма маъно чиқариш учун қулайлик туғдиради.

Аскиячилар сўзлари кўчма маънолар излаб ҳижолашга, пай-ров мазмуни ва оқимига қараб янги сўзлар тўқишга уринадики, бу аскиячининг юксак маҳоратини кўрсатади.

Мисол. С. Абдулланинг «Парранда пайрови» аския текстидан:

Салимов – Сен кенгашда «то вуқ» демасанг, мен билан ҳеч кимнинг иши ҳам йўқ эди. Менинг ишим колхозда махта-лади, инкубатордаги паррандаларнинг ҳамма «си мурғ»лар, қолганларининг «туси товук»қа ўхшайди.

Аскиянинг ижодий хусусиятларидан бири аския давомида янги сўзлар ясаш билан луғат фондимизни бойитишга ҳисса қўшишдир. Маълумки, ўзбек тилида сўзлар морфологик йўл билан (аффиксация) ва синтактик йўл билан (сўз қўшиш, ўзак-ларни қўшиш) ясалади. Бу йўллар оғзаки нутқда ҳам, ёзма нутқда ҳам бир хил қоидага бўйсунди. Бироқ аскияда кул-ги чақириш, ўйноқи маънолар вужудга келтириш учун айрим вақтларда товушларни бузиб чиқариш, баъзи сўз ва ҳарфларни ташлаб кетиш ва тилда сирғалиш ҳолларига атайлаб йўл қўйилади.

Мисол. «Кул» сўзидан ясалган сўз ва иборалар:

Уста Акбар – Олимжон акам, ҳеч нарсдан ҳеч нарса йўқ, уй эшигидан мени чақириб: кул, кул, дейдилар.

Олимжон ака – Озиб-ёзиб кулбангизга келганимда кулинг, қани?!

Шоқир ота – Уста Акбар, дарров Олимжонни уйга олиб кириб, олдига иккита патир синдирмайсизми, кулчалик қадри йўқми?

Комил қори – Шунақа қилсангиз нимангиз кетарди, уста Акбар, ловуллаб турган чўғ эдингиз, мана кулки бўлдингиз...

Турсунбува – Йўқ, унақа деманглар, икки оғиз гап билан уста Акбарни кул-кул қилиб юборманглар, ўртоғингизни кига тўғри кириб боравермаган Олимжоннинг ўзи мушкул!

Қодир ака – Айб Олимжон акада, бўлмаса кул-куллаб турган одамнинг олдига бориб: кул парча қилиб юбораман, дейиши тўғрими?

Раҳматиллаев – Мўйсафидларимизга қойил: културний гап-лашишади!

Аскияда ундов кўпинча модал маъно (нуткнинг борлиққа муносабати)ни ифодалаш учун хизмат қилади. Аскиячи пайров мазмунини ўз ҳис-ҳаяжонлари билан ҳам очишга уринади. Сўзлар, гаплар орасида: ўхў, ҳа, ҳаҳ, эҳе, бе ва бошқа ҳис-ҳаяжон ундовлари фикрни конкретлаштиришга хизмат қилади.

Мисол. «Гул пайрови»дан:

Раҳматқул – Ўхў, Иброҳимжон, шунақа денг ҳали, майли, Раъногулга ўхшаб, бизни куйдирганингиз қолади.

Иброҳимжон – Оббо, сиз ҳам бизни мунча куйдирдингиз, Гул-сарага ўхшаб.

Товушга тақлид, тасвирий сўзлар – мимемалар аскияда кўп учрайди. Масалан, «Бедана пайрови» аскиясида бедананинг турли оҳангдаги сайраши моҳирлик билан тақлид қилинган:

Турсунбува – Мана, Қодиржон ҳам мажбуриятини бажарди, кўрмайсизми, тили чиқиб: «бит-билиқ, бит-билиқ» деб қолади.

Аскияда сўроқ гап ва ундов гап кўпроқ ишлатилади. Воқеани баён қилувчи гап кўп ишлатилса, аскиянинг суръати сусайиб кетади. Шунингдек, сўроқ гап ва ундов гап ишлатилган пайровларда «рақиб»лар китиклаб қўйилади.

Кулги чақириш, маънони чуқурроқ англатиш мақсадида аскиячи ўз нутқидаги энг муҳим сўзларни зарб билан айтади. Бу мантиқий урғу аскиячи ҳис-ҳаяжон билан гапираётганида, айникса, унга қўл келади. Агар аския нутқида мантиқий урғуга эътибор берилмаса, аския нутқи оддий гап нутқиға тушиб қолади, кизиги бўлмайди.

Аския нутқида содда гап кам учрайди. Бунинг сабаби шуки, аскиядаги бир диалог пайров маъносини очиб бериши керак,

содда гап тузилиши баъзан бунга имкон бермайди. Ёйиқ кўшма гапларда эса фикрни кенг ифодалаш, сўз ўйинлари қилиш имкони бор. Шунингдек, кўп аскиячилар маънони бевосита англа-тувчи гаплар орасига кириш сўзлари ҳам киритадилар. Масалан: «Тўғри айтасиз», «Омон бўлгур», «Ҳа, шунақа» ва ҳоказолар. Баъзан нутқда кесим олдинда, эга охирида ҳам келаб қолади.

Аския нутқи халқ мақоллари, маталлари, образли ибораларга бойдир. Моҳир аскиячилар бу ибораларни усталик билан ишлатиб, маънони чуқурроқ очишга, кулги чақиришга ҳаракат қиладилар.

Мисол. «Мақоллар пайровидан»:

Аскиячи – Тоға, олий ўқув юртларини битирган ёшлардан баъзилари тайинланган жойга ишга боришмайди, «Узоқнинг буғдойидан яқиннинг сомони яхши эмиш»!

Муштум – Улар, ҳатто, мутахассисликларидан ҳам воз кечиб, бошқа иш топиб олишади, «Така бўлса ҳам, сути бўлсин» деб.

Биз юқорида аския тилининг баъзи бир хусусиятларинигина кўрсатиб ўтдик. Аскияни текстга солиш, ёзма шаклини яратиш, уни ўрганиш муҳим аҳамиятга эга ва бу фольклоршунослик соҳасидаги келгуси вазифадир.¹

¹ Мақола қуйидаги манба асосида тайёрлаб, чоп этилмоқда: Муҳаммадиев Р. Аския жанри ва унинг тил хусусиятлари // Ўзбек тили ва адабиёти масалалари. – Тошкент, 1962. – 1-сон. – 15–22-бетлар.

Жуманиёз
ҚОБУЛНИЁЗОВ
(1919–1974)



Жуманиёз Қобулниёзов 1919 йил 21 декабрда Урганч шаҳрида туғилган. У Тошкентдаги икки йиллик педагог кадрлар тайёрлаш курсида (1934–36), Тошкент тиббиёт билим юртида ўқиган (1936–39). Маориф соҳасида хизмат қилган (1945–49). Тошкент давлат педагогика институти (ҳозирги Тошкент давлат педагогика институти) нинг Тил ва адабиёт факультетида (1949–53), Москва давлат университетининг аспирантурасида таҳсил олган (1953–57). ЎзР ФА Тил ва адабиёт институтида кичик илмий ходим, катта илмий ходим бўлиб ишлаган (1957–74). «Ўзбек фольклорининг шаклланиши ва тараққиёт йўллари» мавзусида докторлик диссертациясини ёқлаган (1973). «Хоразм халқ қўшиқлари» (1965) тўпламини нашр эттирган. Бола бахши Абдуллаевдан «Бозиргон», «Авазхон», «Ошиқ Маҳмуд», Маҳмуд Юсуповдан «Ошиқ Маҳмуд», «Сайёдхон ва Ҳамро» дostonларини ёзиб олиб, 1966–70 йилларда чоп эттирган. «Ўзбек фольклорининг ривожланиш йўллари» (1969) номли монография муаллифи. 1974 йил 18 январда Тошкент шаҳрида вафот этган.

«ОШИҚ МАҲМУД» ДОСТОНИ

«Ошиқ Маҳмуд» Хоразм халқ дostonлари туркумига мансуб бўлиб, ўзбек, озарбайжон, туркман, қорақалпоқ халқлари орасида кенг тарзда оммалашган жозибador асарлардандир.

Ўзбекистон Фанлар академияси Алишер Навоий номидаги Тил ва адабиёт институтининг Фольклор бўлими архивида дostonнинг 1427, 1431-сонли инвентарь бўйича бўйича қайд этилган вариантлари, магнитофон лентасига ёзиб олинган нусхаси ҳам мавжуд бўлиб, улар биз эътиборингизни қаратган нусхага¹ нисбатан ғоявий-бадий жиҳатдан анча тарқоқ ва суздир.

Бундан ташқари, ЎзР ФА Беруний номидаги Шарқшунослик институти қўлёзмалар фондида шу дostonнинг 5341-сон инвентарь бўйича сақланаётган китобий нусхаси ҳам мавжуд бўлиб, унда ҳам дostonга давр тақозоси ва ўтмишдаги авлодларнинг дунёқарашларида мавжуд бўлган айрим қарама-қаршиликлар таъсирига кириб қолган диний мотив, чекланган ўринлар тез-тез учраб туради.

Дарҳақиқат, бу нусха ўзининг ҳажм эътибори жиҳатидан юқорида зикр этилган нусхалардан тўлалиги, бадий тасвир воситаларининг силлиқлиги, диний мотивларнинг бошқа нусхалардагига қараганда анча чекланганлиги, тасвирнинг содда ва халқчиллиги, композицион яхлитлиги билан ажралиб туради. Бу ҳолат дoston китобий нусха бўлмай, халқ варианты эканлиги билан изоҳланмоғи мумкин. Зотан, китобий нусхалар асар кўчирилган даврдаги дин аҳиллари ва кўчирувчилар, уларнинг дунёқараш ва савиялари таъсирида маълум ўзгаришларга учраган бўлишлари табиийдир. Аксинча, халқ вариантларида эса халқнинг диди, завқи, психологияси учун ёт бўлган ўринларнинг дostonчилар томонидан тушурилиб қолдирилиши, унга халқ ғояси, фикри, эътиқодини ифодаловчи моментлар кўшилиши, образларнинг пишиб, такомиллашиб бориши, бадий тасвир воситалари сайқаллашиб, мукамаллашиб, жилоланмоғи мумкин.

Масалан, «Ошиқ Маҳмуд» дostonининг юқорида зикр этилган 1427-сонли инвентарда сақланаётган варианты китобий нусха бўлиб, унда бош қаҳрамон қийинчиликларга учраши билан

¹ «Ошиқ Маҳмуд» дostonининг мазкур варианты Хоразм вилояти Янгиарик туманида яшовчи Маҳмуджон Юсуповдан 1966 йилда Ж. Қобулниёзов томонидан ёзиб олинган. Ҳажми 42 машинка қоғоз.

гайритабий афсонавий кучларни – пайғамбарлар, авлиёлар, пирлар ва шунга ўхшашларни ёд этади, мақсадига етишишни улардан илтижо қилиб сўрайди. Натижада улар ёрдамга келиб, қахрамонга қийинчиликларни бартараф этишга кўмаклашишади. Тўғри, пирлар ушбу вариантда ҳам қатнашади, улар айрим ҳолларда қахрамоннинг оғирини енгил қилади, унга маслаҳат, йўл-йўриқлар кўрсатади. Қахрамон ана шу йўл-йўриқлар асосида фаол ҳаракатга кириб, мушкулини осон қилишга муваффақ бўлади. Аммо ҳеч қаерда қахрамон уларга сиғиниб, илтижо қилиб ёлбормайди. Уларнинг ўзлари қахрамондан хабардор бўлиб юрадилар. Қисқаси, ҳар икки вариантда ҳам диний-фантастик мотивлар мавжуд бўлиб, китобийсида анча кучли ва кенг, халқ вариантыда эса анча сўнган ва камайган ҳолда учрайди.

«Ошиқ Маҳмуд» достони ишқий-романтик дostonлар туркумига мансуб бўлиб, ундаги асосий ғоявий-бадий хусусиятлар икки ёшнинг самимий, жўшқин ва эҳтиросли севгиси фонида очила боради.

Дostonнинг муқаддимаси кўпчилик халқлар эпоси учун характерли бўлган зурёдсизлик мотиви билан бошланади. Яъни Ганжа Қорабоғ вилоятининг подшоси Ганжабой анча кексайиб қолган бўлишига қарамай, фарзандсизлик ўтида ёна бошлайди, кўзига ёруғ жаҳон қоронғу кўриниб, подшоликдан воз кечади. Бориб бир авлиёникида тунайди. У ерда кўрган тушида унинг ўғил фарзанди бўлишини айтадилар. Ниҳоят, фарзанд туғилади. У барча дostonларнинг асосий бош қахрамонларидек тез ва ақли бўлиб ўсади.

Меҳнат аҳли азалдан эркин севги, ёшларнинг бир-бирларини кўриб, билиб, ўрганиб турмуш қуришларини орзу қилиб келганлар. Бинобарин, ота-боболаримиз томонидан ижод этилиб, бизгача етиб келган кўпчилик дostonларда ана шу озод севги мотиви асосий сюжет чизиғини ташкил қилади. «Ошиқ Маҳмуд» дostonидаги асосий мазмун ва мундарижа ҳам ана шу севги масаласидан иборат.

Асарнинг бош қахрамонлари Маҳмуджон билан Нигорхон бир-бирларини тушда кўриб ошиқи беқарор бўладилар. Висолга эришиш учун кўп машаққатлар, жабру жафолар, тўсиқларга

дуч келадилар. Хатто орзуга етишиш йўлида ўлимдан ҳам кўркмайдилар. Соф севги ва садоқат учун жонларини қурбон қилишга тайёр эканликларини сўз билан эмас, иш билан, фидокорлик билан кўрсатадилар. Масалан, Нигорхонга ғойибона ошиқ бўлиб, чўлу биёбонлар ошиб кетаётган Маҳмуджонга йўлда икки гўзал учраб уни Нигорхондан айнитиб ўзларига мойил этишга уринганларида Маҳмуджон уларга: «*Ўткинчи ҳавас бирлан ҳуснингни хароб этма, Ишқ бошқа, ҳавас бошқа, Бу йўлда хато кетма*», – дейди. Сўнг «*Нигорхоннинг босиб ўтган изини сизлардек ўн қизга алишмайман*», – деб қатъий жавоб қайтаради. Худди шунга ўхшаб Нигорхон ҳам рақиблар томонидан дарёга ташланиб ғарқ бўлаётган ошиги – Маҳмуджонни қутқизиш кўлидан келмагач, «Сенсиз менга бу ёруғ жаҳон нимага керак?!» деб ўзини дарёда оқиб бораётган Маҳмуджон томонга отади. Ана шу соф ва беғубор севги, бу севгига бўлган садоқат, мақсадга интилишдаги ирода ва матонат севишганларнинг мушкулларини осон қилади, қийинчиликлар гирдобидан қутқазиб, мурод ва мақсадларига етказди.

Демак, «Ошиқ Маҳмуд» достонида меҳнат аҳлининг севмак ва севилмак энг олижаноб хислат эканлиги ҳақидаги юксак идеали бадий умуллашган.

«Ошиқ Маҳмуд» достонида кўзга яққол ташланиб турадиган энг асосий мотивлардан яна бири дўстликдир. Халқ достонларининг кўпчилиги учун характерли бўлган бу хусусият достонда Маҳмуджон билан Қамбаржон орасида туғилган самимий муносабат ҳаракат ва эпизодларда жозибали тасвирланган.

Бу ердаги дўстликнинг характерли хусусияти шундаки, Маҳмуджон подшонинг ўғли, Қамбаржон эса «...бир қашшоқ ўғлон, ҳар кимларнинг тандирига ўт ёқиб, бир нон, икки нон топиб кун кечириб юрган йигит». Шундай бўлишига қарамасдан, бу икки хил ижтимоий табақадан чиққан ёш ниҳоллар бир-бирини қаттиқ ҳурмат қилади. Ўзаро кенгашиб, маслаҳатлашиб иш тутадилар. Бирлари фалокатга учраса, иккинчилари уни қутқизиш йўлини ахтаради. Достонда ана шу дўстга содиқлик Қамбаржоннинг ҳаракатларида, унинг Маҳмуджонга кўрсатган ёрдамида бадий умуллаштирилган.

Жумладан, дўстлашишларининг бошланишида «...ҳар балога ўзим қалқон бўлайин», дея ўзаро аҳдлашиб, йўлга равона бўлган бу икки дўстнинг бириси – Маҳмуджон душманлар томонидан калтакланиб, дарёга окизилишидан хабар топган Қамбаржон фарёд кўтаради, дўстини тинмай қидиради.

Нихоят, дўстини ўлик ҳолда кўргач, хуши бошидан учиб, тўрт томонга ўзини уриб: «Маҳмуджоннинг юзини очиб, икки юзидан навбатма-навбат ўпиб, зор-зор чун абри навбаҳор йиглаб, мени ёлғиз ташлаб, кўзимга дунёни зиндон этиб қайга кетдин», – деб нола қилади.

Кўриниб турибдики, дostonдаги дўстлик ота-боболаримизнинг шу масала юзасидан асрлар оша қилиб келган орзулари, «Дўстинг учун заҳар ют», «Тирик бўлсак бир ерда, ўлик бўлмак бир гўрда», «Дўстсиз бошим – тузсиз ошим» сингари кўпгина мақол ва ҳикматли сўзларида илгари сурган ғоя ва орзулари тарзида бадийий умумлаштириб тасвирланган. Бу ерда камбағал табақа билан кибор синф фарзандларининг бир-бирларига ҳамдард, кўмакдош, манфаатдор бўлишлари, айниқса, меҳнаткашнинг қашшок фарзанди Қамбаржон Маҳмуджонга нисбатан моддий жиҳатдан тенг кела олмаса ҳам, маънавий жиҳатдан ундан анча устун – унга маслаҳат бера олувчи тарзида тасвирланиши дostonдаги диққатга сазовор ўринлардандир. Чунки меҳнат аҳли ўз фарзандини қодир ва қобиллиги, меҳр ва вафодорлиги, виждоний поклигини шу билан қайд қилмоқчи бўлганлиги яққол сезилиб туради.

Халқимиз ифвогар ва ғийбатчини, ҳасадчи ва мунофиқни азалдан ёмон кўриб келган, ундан жирканган, уни фош этган ва қоралаган. Меҳнат аҳлининг газабига учраган ана шундай салбий персонажларга бу дostonда ҳам етарли ўрин берилган. Улар дostonнинг конфликт тугунини ҳосил қилишда қатнашиб, соф севги эгаларининг мақсадга эришувларида тўсқинлик қиладилар. Подшо ҳузурида ўз мавқеларини сақлаб қолиш учун иғво ва бўҳтон уюштириб Маҳмуджоннинг ўлимга ҳукм этилишига эришадилар. Лекин на иғво ва на фитна соф севги оқ кўнгил севишганлар йўлини тўса олмайди. Бинобарин, иғвогарлик фош этилиб, фитначилар қўлга тушиб эл ва юртнинг қаҳру

газабига учраши, вақтинча эгалланган ўз мавкеларидан абдий ажралиб жазога тортилиши муқаррар эди. Достонда ҳам бу қора ниятли гуруҳ намояндалари худди шундай тарзда тасвирларган.

Кўпчилик Хоразм халқ достонларига ўхшаб «Ошиқ Маҳмуд» достонининг ҳам энг яхши фазилатларидан яна бири унинг ўта мусиқийлиги, ундаги шеърларнинг ўйноқи ва кучли эҳтирос билан ижод этилганлигидир. Шунинг учун ҳам достон хоразмлик бахшилар, достончилар орасида куйланиб келаётир. Унинг айрим парчалари Хоразмнинг атоқли санъаткорлари Комилжон Отаниёзов, Султонпошша Раҳимова, Назира Юсуповаларнинг репертуарларида ҳам маълум ўрин эгаллаган.

Хуллас, «Ошиқ Маҳмуд» достони ўзининг юқорида қисқа тарзда характерлаб ўтилган барча фазилатлари билан ўтмиш авлодларимиз руҳи ва идеали, орзу ва истагини ўз даври демократик ғоялари, интилишлари, дунёкарашлари асосида тасвирлаб берган чинакам халқчил асарлардан биридир. Бинобарин, «Ошиқ Маҳмуд» достонининг ёшларимизни соф севги, севгига садоқат, дўстлик, хайрли мақсад йўлида дадиллик ва қатъийлик руҳида тарбиялашда маълум аҳамиятга эгаллиги шубҳасиздир.¹

¹ Мазкур мақола фольклоршунос олим Ж. Қобулниёзовнинг 1970 йилда «Фан» нашриётида чоп этилган «Ошиқ Маҳмуд. Авазхон» китобига ёзган сўзбошиси асосида тайёрланди.

Хошимжон
РАЗЗОҚОВ
(1916–1982)



Хошимжон Раззоқов 1916 йил 20 апрелда Андижон вилояти Андижон тумани Кўнчи қишлоғида туғилган. Андижон шаҳридаги ишчи факультетида (1933–36), Фарғона давлат педагогика институти (1936–37) ҳамда Тошкент Давлат педагогика институтида (1937–41) ўқиган. ЎзР ФА Тил ва адабиёт институтининг аспирантурасида таҳсил олган (1949–53). Андижондаги педагогика билим юртида ўқитувчи (1941–43), илмий ишлар бўйича директор муовини (1948–49), Андижон давлат педагогика институти (ҳозирги Андижон давлат университети)да ўқитувчи, кафедра мудури вазифаларида ишлаган (1952–82). «Ўзбек халқ оғзаки ижодида сатира ва юмор» мавзуда докторлик диссертациясини ёқлаган (1965). «Ўзбек халқ оғзаки ижодида сатира ва юмор» (1965) номли монографияси, «Латифалар» (1965), «Гулёр» (Фарғона халқ қўшиқлари, 1967) каби китоблари босилган. «Ўзбек халқ оғзаки поэтик ижоди» (1980) дарслигининг муаллифларидан бири. 1982 йили Андижон шаҳрида вафот этган.

**ЭПИК ИЖОДДА САТИРА, ЮМОР ВА
КОМИК ҚАҲРАМОН**

Ўзбек халқ оғзаки ижодидаги эпик турни дoston, эртақ, ҳажвий ҳикоя, масал, латифа, аския-пайров каби жанрларга бўлиб ўрганиш мумкин.

Достонлар ўзбек халқи орасида қадим замонлардан бери қуйланиб келинаётган, кенг тарқалган энг сеvimли жанрлардан биридир.

Ўзбек халқ достонларининг деярли ҳаммасида ватанпарварлик, халқпарварлик ғоялари талабларидан келиб чиқадиган мардлик, қаҳрамонлик, дўстлик, чин севги-муҳаббат, вафодорлик каби олижаноб инсоний фазилатлар тараннум этилади. Ўзбек халқ достонларида халқимизнинг тарихий тараққиёти, ички ва ташқи душманларга қарши олиб борган курашлари, бахтли турмуш ҳақидаги орзу-умидлари акс этгандир. Шунинг учун ҳам уларда зулм, золимлик, хиёнат, хоинлик, мунофиқлик, номардлик, қўрқоқлик, хасислик, очкўзлик, мактанчоқлик каби инсон шаънига доғ туширадиган салбий характер ва ҳодисалар сатира, юмор объекти қилиб олинган.

XIX асрнинг II ярмида Фарғона вилояти Россияга қўшиб олиниши натижасида бу ерда шаҳар ҳаёти Бухоро, Хива хонликларига нисбатан тез ўсди. Достончилик традицияси ўрнини қўшиқ, ашула, рақс, қизиқчилик, масхарабозлик, халқ цирки, аския-пайров, латифагўйлик, эртақчилик каби ўйин-кулги воситалари кўпроқ эгаллай бошлади.

Эртақларда инсоннинг ҳаёт ва ҳодисалар ҳақидаги билим, тушунча ва тасавури, кураши, бахтли турмуш ҳақидаги орзу-умидлари акс этгандир.

Эртақларда халқнинг руҳи акс этади. Халқ жабр-зулм устидан-адолат ва инсоф, зулмат устидан – ёруғлик, жаҳолат ва нодонлик устидан – ақл ва идрок, қуллик устидан – озодликнинг қачонлардир ғалаба қилиши ҳақидаги ишончи, орзу-умидларини ўз эртақларида ифодалайди.

Халқ эртақларида кишилар ёвуз кучлар, даҳшатли стихиялар олдида тиз чўкмайди. Эртақ қаҳрамонлари халқнинг чексиз моддий, маънавий куч-қудратини ўзида мужассамлаганликлари учун кўп сонли душманлар, даҳшатли ёвуз кучларга қарши мардоналик билан жанг қилади, одамхўр ялмоғизлар, девлар, кўп бошли аждарларни янчиб ташлайди. Золим подшоларни жазолайди, унинг ўрнига одил, кўркмас, олижаноб кишиларни қўяди. Улар хасис бой, очкўз савдогарлар, алдамчи, мунофиқ руҳонийларни қилмишига яраша жазолайди.

Эртактлар инсон фантазияси кучининг энг ёрқин, типик кўзгусидирки, бу фантазиясиз адабий ижод бўлиши мумкин эмас. Улар орқали ўтмишдаги ҳаёт, кураш, орзу-умидлар билан яқиндан танишиш мумкин.

Эртактлар жуда узоқ замонларда яратилган бўлиб, улар асрлар давомида тўлдирилиб, ўзгартирилиб, мукамаллашиб авлоддан-авлодга ўтиб келмоқда. Меҳнатга муҳаббат, касб-ҳунар, илмга ҳурмат, яхши одоб-ахлоқ, адолат-инсофни улуғлаш, умуман, ёмонликка қарши яхшилик идеалини тасдиқлаш сатира, юмор характеридаги эртактлар ғоявий мазмунида ўз ифодасини топган...

Тўпланган эртактлар Ўзбекистон Фанлар академияси Тил ва адабиёт институти илмий ходимлари М. Афзалов, Х. Расулов, З. Хусайновалар тузган икки томлик «Ўзбек халқ эртактлари» китобида нашр этилди.

Икки томликка кирган ўзбек халқ эртактларининг турлари, хусусият, ғоявий мазмуни, тематик ранг-баранглиги М. Афзалов томонидан ёзилган сўзбошида тўла таҳлил этиб кўрсатилган. Бу икки томлик аввалги тўпламларда учраган нуқсонлар қисман бартараф қилинган бўлса-да, аммо буларда ҳам афсонавий ва реалистик эртактлар, сатира, юмор характеридаги ҳажвий эртактларни жойлаштиришда изчиллик сақланмаган.

Икки томликка кирган «Носир кал», «Золим подшо», «Кал билан подшо», «Бахтли кал», «Олтмиш огиз ёлгон гап», «Қирқ ёлгон», «Уч ёлгондан қирқ ёлгон» каби ҳажвий эртактларнинг комик қаҳрамони удабурон, эпчил, ҳар ишга қодир каллар ва бошқа дурадгор дехқон, косиб, ҳунароманд, сартарошлар бўлиб, улар донолик билан иш кўрадилар, иш-ҳаракати билан подшо, хон, беклар зулмини масхаралаб, уларни эл-юрт олдида фош этадилар.

«Носир кал» эртагидаги кал ўзининг ажойиб кулгили ҳунари билан, «Уч ёлгондан қирқ ёлгон» ва бошқа эртактлардаги меҳнаткаш халқ вакиллари бўлган каллар сўзга чечанлиги, турмуш ва унинг ҳодисалари ҳақидаги кенг билими, тушунча, мулоҳазалари, нутқларидаги чуқур мазмун нодонлик, жаҳолат, порахўрлик, хасислик, очкўзлик каби иллатлар, тур-

мушдаги ҳурматсизлик, вафосизлик, оилавий тотувсизлик, бир-бирини кўра олмаслик, фитна-фасод, ахлоқий ва маиший бузилиш мазах қилинади.

Оғир меҳнат, очлик, қашшоқлик қийинчиликларга чидай олма-май, гиёҳвандликка берилиб кетган иродасиз кишиларни икки томондаги «Уч кўкнор», «Кўкнори хаёл», «Нашанинг хислати» эртакларида кулги остига олинган.

Ҳажвий ҳикоялардаги комик қаҳрамонлар нутқида ўзбек тилининг ранг-баранг лексик бойликлари, таъсирий воситалари, ундаги ҳазил-мутойиба, қочирим каби жозибали сўз ўйинларида намоён бўлиб, ғоявийлик, бадийлик касб этади.

«Тақсир, мен камбағал, қашшоқ етимман. Отадан битта эдим, ўла-ўла учта қолдик. Уччала оға-ини биров-бировимизни билмас эканмиз. Бир кун топишиб, сўрашиб қолдик. Бундай қарасам, биримизнинг ёкамиз йўқ, биримизнинг енгимиз йўқ, биримизнинг этагимиз йўқ».

Бу мисолда фольклорга хос гўзал содда киноя, муболага бўлиб, оға-иниларнинг таърифидаги сўзларнинг деярли ҳаммаси қочирим йўли билан бирдан ортиқ маъно ифодаламоқда. Ҳажвий эртаклар, масалларда унинг сатира, юмор характери-ни бошланишидаёқ кўрсатиб турадиган доимий эпитет, бадий при-ёмлар ҳам мавжуддир.

*Бор эканда, йўқ экан,
Оч эканда, тўқ экан.
Бўри баковул экан,
Тулки ясовул экан.
Қарға қақимчи экан,
Чумчуқ чақимчи экан.
Ғоз карнайчи экан,
Ўрдак сурнайчи экан.
Лайлак ногорачи экан,
Товуқ тогорачи экан.
Илон танобчи экан,
Тошбақа тарозугар экан,
Қурбақадан қарздор экан.*

Бу мисол паррандалардаги баъзи хусусият, феъл-атвор турли касб-хунар, мансаб эгаларининг урф-одати, характерининг баъзи хусусиятларига қиёс этилиб, оригинал ўхшатиш, метафоралар билан кулгили ҳолат юзага келтирилмоқда.

*Эртақларим эр экан,
Бориб музга минар экан.
– Муз сен нега кучли деса,
Офтоб чиқиб эритар экан.
– Офтоб нега кучли деса,
Булут юзини тўсар экан.
Булут нега кучли деса,
Ёмғир тешиб ўтар экан.
Ёмғир нега кучли деса,
Ерга тушиб парчалар экан.
– Ер сен нега кучли деса,
Майса тешиб чиқар экан.
– Майса нега кучли деса,
Бой кўзиси ер экан.
Кўзи нега кучли деса,
Бўри тортиб кетар экан.
Бўри нега кучли деса,
Чумоли тишлаб тортар экан.
– Чумоли нега кучли деса,
– Меҳнатимнинг кўплигидан каллам катта,
Симоби белбогим ингичка, ўзим кучли, –*

деб жавоб берибди.

Ҳажвий эртақлардаги комик қаҳрамон – «кал»лар ва бошқа ижобий образлар портрети, нутқи ва бошқа хусусиятлари кўпинча бир хил тасвирланади.

Баъзи салбий образлар портрети шундай чизилганки, «ранг кўр, ҳол сўр» дейилганидек, улар орқали унинг ички дунёси, ёвуз мақсадини билиб олиш мумкин:

«...Лаблари шафтоли қоқидек буришган, юзлари ёғланмаган айбаки тановардек тиришган, эски ковушдай бурни енгчадай ияги

билан уришган, кулоклари супрадай, кўзлари ўйилган гўрдай, бўйи минордай, оғзи ғордай, қорни қанордай, тишлари «куракдай, оёклари моховларнинг шотисидай, панжалари бешилиқдай, этагини турмушлаган, оркасига бир мушлаган кампир ўтирибди».

Ёки:

«Ўрадек оғзида тиш тугул от боғлайдиган козиқ ҳам йўқ, ўт оғиз, ўроқ тишли, бели камалак, юзи сумалак, боши гувалак, бетига бир қоп маккажўхори сепиб юборсанг, бирор донаси ерга тушмайдиган ари уядай чўтир, ғўра қовоқ, бетлари хом ошқовоқ хотинни олиб бердилар».

Юқоридаги мисолларда икки хил аёл портрети чизилган бўлса, бир бой қиёфаси бундай кўрсатилади:

«Худди боқма тўнғиздек хўппа семиз, егани барра кабобу ичгани қимиз. Юришлари ғоздай, ранги хўроздай, қорни қовоқдай, бетлари товоқдай, соқол-мўйлаби бурган супурги, бир сўзи куйдирги, биткўз, хамак бурун бой лапанглаб чиқиб келди».

Бу портретлар салбий характерни индивидуаллаштириш билан бирга, эртақдаги масхарали кулгини кучайтирадиган элементлардан бири бўлиб ҳам хизмат қилади.

Ҳажвий эртақлардаги каллар, кичкина одамчалар, камбағал чўпонлар, сўзлари пурҳикмат қариялар, донишманд оқила хотин-қизлар каби ижобий образлар орқали меҳнаткаш омма уларни масхаралаб кулди, улардан ўч олди. Келгуси авлодини уларга қарши нафрат-ғазаб руҳида тарбияламоқчи бўлди.

Сатира, юмор-характеридаги ҳажвий эртақларнинг кичик ҳажмдагилари тобора ишланиб, ихчамланиши нагижасида бора-бора латифа жанрига айланиб кетганидек, улардаги эпик комик қаҳрамон каллар ҳам Алдарқўса, Машраб, Насриддин Афанди образларининг такомиллашиб, бадий тип даражасига кўтарилиши учун ёрдам берди.

Сатира, юмор характеридаги эртақларнинг кичик ҳажмдагиларини шартли равишда ҳажвий ҳикоялар деб юритамиз. Чунки булар Алдарқўса саргузаштларига яқин, латифаларга нисбатан эса ҳажм жиҳатидан каттароқ, воқеа-ҳодисаларга бойдир.

Алдарқўса саргузаштлари, латифалардан бу эпик жанрнинг фарқи шуки, уларда бир хил стандартлашган эпик қаҳрамон

(Алдаркўса, Машраб, Насриддин Афанди каби) йўқ. Ҳажвий ҳикояларни ижро қилувчи қизиқчи, масҳарабознинг ўзи кўпинча комик образ сифатида гавдаланиб, унинг мазмуни мазкур қизиқчининг саргузаштига ўхшаш баён қилинади.

Масҳарабоз ва қизиқчиликлар театрининг бир актёр томонидан ижро этилувчи бошқа шакллари ҳам бўлган.

Халқ орасида яшаб келаётган бир гуруҳ кулгули ҳикоялар борки, улар ўз характери ва қурилиши билан оддий оғзаки драмадан унча фарқ қилмайди. Унда драмага хос бутун қонуниятлар мавжуд бўлиб, диалог, монолог асосий ўрнини эгаллайди. Бундай ҳикояларининг халқ драмасидан фарқи шуки, онда-сонда ҳикоячи аралашиб туради ва кўпинча махсус кийимсиз, гримсиз кўрсатилади. Шунини алоҳида уқтириб ўтиш керакки, бу кулгули ҳикоялар, асосан, қизиқчи ёки масҳарабознинг юксак маҳорати туфайли театр даражасига кўтарилди олади. Чунки мазкур асарларни ижро этаётганда қизиқчи ёки масҳарабоз бир ўзи барча қаҳрамонларнинг ва ҳикоячининг ёрқин сахна образини вужудга келтириб, ўзига хос оригинал спектакл яратади.

Эртактлар ҳар бир хонадон, меҳмонхона, улфатчилик ўлтиришларидагина ижро қилинса, ҳажвий ҳикоялар, асосан, сайил-томошалар, базм, катта тўй-тўкинларда малакали кишилар – қизиқчилар, масҳарабозлар томонидан ижро этилади.

Шунинг учун ҳам унда кулги воситалари кучлидир. Бу ҳажвий ҳикояларда ижрочи худди драматик актёрнинг худди ўзи қиёфасига кириб, ҳар бир ҳаракати, нутқини тақлид, импровизация йўли билан ҳикояда иштирок этаётган персонажлар характери, воқеа, ҳодисалар мазмуннинг ривожланишига мослаштиради.

Ҳикояни ижро қилувчи қизиқчи, масҳарабоз гапга уста, чечан бўлиб, нутқида қочирим, сўз ўйинлари, аския-пайров, баъзан чандиш элементларини қанчалик кўп ишлатса, ҳикоясининг комиклик кучи, кулги чиқариш эффект шунчалик кучли бўлади.

«Ўзбек халқ эртактлари»нинг I–II томларига кирган ҳажвий ҳикоялар тематик жиҳатдан бой ва хилма-хилдир. «Ўпка қишлоқ», «Қози билан камбағал», «Етти аҳмоқ», «Қуйган чол» (биздаги нусхада «Қайсар чол билан кампир»), «Қирқ ёлгон», «Икки аҳмоқ», «Икки мулла», «Ботмон», «Андижонлик ҳикояси» (биз-

даги нусхада «Қайсар бола»), «Лопчи», «Уч ёлғондан қирк ёлғон», «Икки хунарманд» (биздаги нусхада «Ўғри ва кисавур») кабиларни, қўлимиздаги «Ақл ва дунё», «Ношуд куёв», «Қўқонга саёҳат», «Қўқнори хаёл», «Банги», «Сехргар шогирди», «Касал кўриш», «Ширгуруч», «Эчки сўйган кампир», «Қироат» ҳикояларини авлоддан-авлодга ўтиб келган традицион сюжетлар дейиш мумкин. Қизиқчи масхарабозлар томонида сайил-томошалар базм-меҳмонхоналарнинг савияси, дид-завқи, руҳий кайфиятига қараб, ўша ўтиришларнинг ўзида ҳам жуда кўп ҳажвий ҳикоялар яратилган.

«Сартарош», «Паровоз», «Зилзила», «Таробеҳ ўқиш», «Чўлдаги намоз», «Дангасалар», «Ичувчи», «Отарчилар», «Ошхона», «Қўқнори хаёл», «Атеист лектор», «Сумалак», «Даллол», «Сурма ичган хўроз», «Чайқовчи», «Паловхўр улфатлар», «Эрка кампир» каби ҳикоялар бизнинг замонамизда яратилган.

Ўтмиш темасидаги ҳажвий ҳикояларда эртақлардаги га ўхшаш ҳукмрон эксплуататор синф вакилларининг зулми, руҳонийларнинг мунофиқлиги оилавий можаролар асосий кулги объектидир. Бу жиҳатдан мажозий маънодаги «Ақл ва дунё» ҳикояси характерли бўлгани учун қисқача мазмунини келтирамиз.

«Ақл билан дунё бахслашиб қолдилар-да:

– Инсон учун энг зарур нарсa мен, сенинг ортиқча керагинг йўқ! – деди дунё.

– Мақтанма ғоз, хунаринг оз. Сен одамларни йўлдан оздириб ҳалокат чоҳига етаклайсан. Инсоннинг оғир кунидa мен асқотаман, – жавоб берди ақл.

– Пул бўлса, чангалда шўрва, – мағрурланди дунё, менинг кучим билан баланд тўлар паст бўлади, ўтқир қиличлар темиртакка айланади, анҳор, сой сувлари тесқари оқади. Оқни қора қиламан, қораларни оқ... ночор қолган одамлар тўнғизни тоға дейишга мажбур бўладилар.

– Кел, «мақтанган қиз тўйда ўсал бўлади» мақолига амал қилайлик, сафсата сотишгунча, кадр-қиммат, куч-қувватимизни турмушда синаб кўрайлик, – деди ақл.

Бу маслаҳат иккаласига маъқул тушиб, жўнаб кетдилар. Аввал дунё ўз хунарини кўрсатмоқчи бўлиб бир подачи етим калнинг

бошига қўнди. У тез орада бойиб кетди. Дунёнинг мастлиги билан у ҳеч нарсани кўрмас, билмас, эшитмас эди. У подшо қизига уйланди. Келинчакни чимилдикдан куёв ёнига олиб келганларида, у бир уриб, маликанинг тўртта тишини тўкиб қўйди.

Буни эшитган подшо кални ўлимга буюрди. Тўйхона азага айланиб, кални дор тагига етакладилар...

Шу вақтда ақл етиб келиб дунёга қараб бундай деди:

– Бу кал, гарчи чўпон бўлса ҳам, бир парча ҳалол нонини, ташвишсиз топиб еб юрган эди, нима қилиб қўйдинг?!

– Қўлимдан келгани шу бўлди. Агар уни ўлимдан олиб қолсанг, сенга таслим бўламан! – деди дунё.

Шу чоғ калнинг бошида ақл пайдо бўлиб, жаллодларга деди:

– Ўлим олдида қайин отамга икки оғиз арзим бор!..

Уни подшо ҳузурига олиб боришгач, кал сўради:

– Шохим, одам ўлдириш осон, аммо бир йигит қирқ йилда дунёга келади. Нима сабабдан мени ўлдирмоқчи бўлганингиз сабабини билсам?

– Аҳмоқ кал, сенинг мол-дунёнгни ҳурматлаб, қизимни берсаму, уни ўлдирмоқчи бўлдингми, кўрнамак!

– Малика гўзалликда тенги йўқ, бироқ курак тиши сўйлоқ экан. Бу маликанинг хуснига доғ эди. Мен уни синдириб, ўрнига тилла, жавоҳиротдан тиш қўйдирмоқчи бўлдим. Агар шу айбим ҳукми кушни талаб қилса, ўлимимга розиман! – деди кал.

Калнинг жавоби подшога маъқул бўлиб, уни озод қилди. Шундан кейин дунё ақлга тамоман бўйсуниб, таслим бўлган экан. Эл орасида «Ақлдан ортиқ бойлик йўқ», «Ақл бозорда сотилмайди», «Ақл – дунёнинг кўзи» деган мақоллар вужудга келган экан».

Бу ҳикояда масхарали кулгига нишон бўлаётган нарса такаб-бурлик, манманлик, ўзини жамият аъзоларидан юқори тутиш хусусиятлари бўлиб, у эксплуататор синф вакилларига хос характерлардир, шунинг учун ҳам у дунё қиёфасида кўрсатилиб, меҳнаткаш омма маъқуллайдиган ва амал қиладиган донишманд, камтарин ақлдан паст қўйилган...

Ҳажвий ҳикояларнинг жуда кўпчилиги латифага ҳам айланиб кетган. Ҳозирги кунда қайси бир жанрга тааллуқли эканини ажратиб бўлмайдиган ҳажвий ҳикоялар ҳам кўп учрай-

ди. «Етти аҳмоқ», «Қайсар чол билан камшир», «Тўрт гаранг», «Икки аҳмоқ», «Лопчи» ана шу категориядаги асарлардандир. Бу ҳикояларда инсон характеридаги қайсарлик, худбинлик туфайли вужудга келган нуқсонлар эрмак қилинади.

Ҳажвий ҳикоялар фақат қизиқчи, масхарабозлар репертуарларидаги жанрлардир. Аммо халқ орасидаги таклидга уста, сўзга чечан талантли кишилар томонидан ҳам ижро қилина беради.

Сатира, юмор характеридаги эпик тур жанрларидан яна бири ҳайвонлар ва бошқа предметлар ҳақида яратилган масаллардир.

«Эпик поэзияга аналог, масал қиради, буларда ҳаёт икир-чикири... шоирона шаклга солинади... Крилов сиймосида халқ масалларнинг ҳақиқий гениал ижодчисига эга бўлди, унинг масалларида практик ақл, туйғунлик, рус халқининг афтидан соддадил, лекин узиб олувчи пичингги тўла равишда ифодаланган». Рус танқидчиси Белинскийнинг бу фикри ўзбек масалларига ҳам тўла тааллуқлидир.

Масаллар ҳаёт ва унинг ҳодисалари, ижтимоий турмуш муносабатларини эпик тарзда бадиий ижод этиш усулларидан биридир...

Масалларнинг гоёвий мазмуни, образлари кинояли, мажозий маъно ифодалаганлиги учун уларда антагонистик зиддият жуда пардали қочирим йўллари билан ифодаланади; меҳнаткаш табақа вакиллари фирибгар ва алдамчилар, ростгўй ва соддадил кишилар ўрнида ҳар хил ҳайвонлар ва бошқа предметлар образи қўлланиб, улар инсонларга хос характерда тасвирланади.

Масаллар эртақларнинг дастлабки, тўнгич турларидан бўлиб, жамиятда антагонистик зиддият эндигина бошланган даврда, бу ҳолатни ҳали ошқора, реал бадиий образларда кўрсатиш тажрибаси етишмаган ёки унга имкон бўлмаган чоғларда майдонга келган дейиш мумкин. Бу жанрнинг кўпинча ёшлар, болалар адабиётига хос хусусиятлари ҳам шундан далолат беради.

Масаллар халқ орасида кўп тарқалган бўлиб, қадимий жанрлардан биридир. Масалларда реал ҳаёт ва унинг ҳодисалари, меҳнаткаш омманинг аянчли турмуши ифодаланган. Эрамиздан олдин яшаган Эзоп деган машҳур масалчи қул бўлган. Унинг масалчилик фаолияти қуллик машаққатлари остида шаклланган.

Масаллар дунёдаги ҳамма халқлар фольклори ва ёзма адабиётида мавжуд. У жаҳон масалчилик традициясида асосан одоб, ахлоқ тарғиботининг энг мақбул мажозий киноявий йўллари билан бириkdir. Баъзан масалларда мантиқий хулосалар одоб, ахлоқ доирасидан чиқиб, улар реал ҳаёт ҳамда унинг ҳодисаларини масхара, мазах этади ва сатира, юмор даражасига кўтарилади.

Масал жанрининг ички тузилишини аниқлайдиган асосий белги шуки, унда кам, онда-сонда учрайдиган айрим воқеа-ҳодисалар кенг маънода умумлаштирилиб, типиклаштирилиб берилди. Аммо масал жанридаги типиклаштириш реалистик образлардаги принциплардан фарқ қилади. Масалларда турмуш ҳодисалари, кишилардаги нуқсон, иллатлар киноя, ишора, мажоз йўли билан кўрсатилиб, ундан муайян ижтимоий муносабатларга хос мантиқий хулосалар чиқарилади.

А. А. Потебня масалнинг туғилиши, яшаш шароити ва ҳаётий бадиий мукамаллигини «масал ифодалаган образнинг жуда содда ва аниқлигида» деб кўрсатган эди.

Н. Л. Степановнинг фикрича, масал сюжети аниқ гавдалантирилган образда мавжуд; фикр, тушунча, ахлоқ, одоб маъноси – унинг бадиий мукамаллик шарти. Шу билан бир вақтда, масал образлари ўзининг ҳаётийлигини сақлайди, турмуш шароити, ҳодисалар ўзгариши билан унинг мазмуни, талқин этилиши ҳам ўзгаради. Масал ҳикояси мавҳум эмас, конкретлилик тусини олади.

Гегель ҳам ўзининг эстетикага оид лекцияларида масал жанрини таърифлаган ва унинг ғоявий-бадиий қиммати турмуш, воқелик билан алоқадор эканлигини уқтириб ёзган эди:

«...Масаллар ўзида жонли ва жонсиз табиатнинг бирор ҳолати ёки ҳайвонот дунёсидаги тўғри кузатиш натижасида воқеликка мос келадиган, шу билан бирга, инсоннинг яшаш шароити учун панд-насихат, ибрат бўладиган ёки, аниқроқ айтганда, турмуш тажрибасида қўлланадиган, доно, ақллилик, одоб-ахлоққа тарғиб қиладиган ҳодисаларни тасвирлаб кўрсатади.

Масалларга бўладиган биринчи талабимиз шундан иборатки, ундаги аниқ ҳодиса ҳаёт ва унинг ҳақиқий шароити, кўриниши ва характериға тескари уйдирма бўлмай, бизга одоб, ахлоқ, панд-

насихат бериши керак. Иккинчи талаб – ундаги ҳикоя умумий тарзда бўлмай бу воқеа шунга ўхшаш ҳамма ҳодисаларнинг ички реаллигига ўхшаш ҳолат эканлигини аниқ, батафсил кўрсатиши керак».

Худди ўша «ҳодиса»нинг типиклиги масалнинг ғоявий мазмуни, кадр-қимматидир.

Кишилиқ жамиятининг тарихий тараққиёти, адабий процесининг ўсиб, ривожланиши билан масаллар алоҳида тарихий-адабий традиция сифатида адабиётдан муносиб ўрин олди ҳамда давом етиб келмоқда.

Масалларнинг ҳаммаси деярли сатира, юмор характеридадир. Уларда йиртқич ҳайвонлар, уй ҳайвонлари, қушлар, ҳашаротлар, дарахтлар, уй, дарвоза ва бошқа предметлар турли ижтимоий гуруҳ вакиллари образини ифодалайди.

Масалларда ҳайвонлар, предметлар образи орқали жамиятдаги мураккаб ижтимоий ҳодисалар, муносабатлар ифодаланади. Антагонистик зиддият асосий конфликтни ташкил этган масалларда меҳнаткаш омма манфаати биринчи ўринга қўйилиб, унда адолат, инсоф, ростгўйлик, ҳалоллик доим зулм-ҳақсизлик, ёлғончилик, ҳаромхўрлик устидан ғалаба қилади.

Масалларда от, ит, сигирлар инсоннинг энг яхши дўсти, вафодор, ожизларга ёрдам берувчи нажоткор бўлиб гавдаланади. Шунингдек, кийик, балиқлар ҳам асосан ижобий образлар бўлади.

Шер, арслон, бўри, тулки баъзан ижобий, баъзан эса зулм, зўравонлик тимсоли бўлган салбий образлардир. Тулки – муғомбир, хийлагар бўлса, қуён кўрқоқлик симболи.

Бу ижобий ва салбий образлар тўқнашувидаги зулм, ҳақсизлик, очкўзлик, хасислик, айёрилик, алдамчилик каби салбий характерлар устидан ақл-идроқ билан қурилган тadbир натижасида адолат, инсоф, тўғрилиқ, сахийлик, ростгўйликнинг тантана қилиши сатира, юмор характеридаги кулгига объект бўлади. Ҳайвонлар иштирок этган фантастик эртақлардан ташқари, ҳозиргача жуда кўп масаллар босилиб чиқди.

Шунингдек, бизнинг қўлёзма фондимида ҳам юздан ортиқ масал бўлиб, уларнинг кўпчилиги босилиб чиққан масалларнинг бошқача нусхаси, вариант деса бўлади.

«Шум тулки», «Уч тулки», «Бўри билан тулки», «Думтак тулкилар», «Тулки билан турна», «Пуф, сассик», «Бир коса заҳар», «Тулки билан товус» «Ҳийлагар бедана», «Тулкивой», «Тулки билан бўри», «Тулки ва йўлбарс» масалларида мунофиқона хушомадгўйлик, тилёгламалик, иккиюзламачилик, ҳийлагарлик каби салбий хусусиятлар тулки образида мужассамланиб, бу иллат, нуқсонларининг фош этилиши масхарали кулги билан ифодаланади.

«Шум тулки» масалида айик, бўри – ҳукмдор тулки золим, товуклар эса жафокаш мазлумлардир. Айик билан бўри тулки зулмини даф қилиш ўрнига порага олган юмшоқ пар ёстиклар эвазига тулки тарафини олади. Чунки золим ҳукмдорлар учун «Отнинг ўлими, итнинг байрами» эди. Охири товуклар арзи-додини мўйноқ – вафодор ит эшитиб, тулкиларнинг таъзирини беради ва чўлга ҳайдаб чиқариб юборади.

«Бўри билан тулки», «Тулки билан бўри» масалларида ҳар иккала образ ҳам салбий бўлиб, унда анқов, лапашанг, фаросатсиз, аклсиз, нодон, фақат ўз кучигагина ишонган бўри билан ҳийлагар, тадбирли, муғомбир тулкининг тўқнашуви, бўрининг тулки қаршисида масхара бўлиб қолиши асосий кулги воситасидир.

«Оч бўри», «Ботир эчки», «Эчкининг ўч олиши» масалларида «Манманга завол бор, олғирга чуқур» мақоли мазмунида қонхўр, золим бўрининг шармандаларча жазоланишидан нафрат-ғазаб кулгиси ҳосил бўлади.

Масал-эртақларнинг ҳаммасида мажозий образлар орқали синфий тенгсизлик қораланади, очкўзлик, хасислик, ялқовлик каби ёмон сифатлар масхараланиб, унга қарши: тенглик, саҳийлик, олижаноблик, ишчанлик, ростгўйлик, тўғрилик, ботирлик каби яхши ижобий хислатлар тараннум этилади. Шунинг учун масалларнинг таълимий-ахлоқий аҳамияти каттадир.

Жуда кўп масаллар темаси, сюжети халқ орасида тобора ихчамлашуви натижасида латифаларга айланиб кетганки, улардаги ғоявий мазмун, бадий воситалар образлар, сатира, юмор характеридаги кулги комик қаҳрамонлар образининг мукамаллашувида муҳим роль ўйнаган.¹

¹ Мазкур мақола қуйидаги манбадан олиб тайёрланди: Раззоқов Х. Ўзбек халқ оғзаки ижодида сатира ва юмор. – Тошкент: Фан, 1965.

Зубайда
ХУСАИНОВА
(1918–2002)



Зубайда Хусаинова 1918 йил 9 декабрда Оренбург шаҳрида туғилган. Тошкент кечки педагогика институтининг Тил ва адабиёт факультетини тамомлаган (1950). Тошкент кечки педагогика институтида (1937–38), ЎзР ФА Тил ва адабиёт институтида стенографист-котиба (1938–40), фольклор бўлимида лаборант (1940–44), катта лаборант (1944–57), кичик илмий ходим (1958–68), катта илмий ходим (1969–2002) сифатида хизмат қилган. «Ўзбек топшимоқларининг асосий хусусияти ва замини» мавзуида номзодлик диссертациясини ёқлаган (1967). «Малика айёр», «Холбека» (1946), «Зандигор» (1949), «Алпомиш», «Майда савдогар», «Алпомиш», «Юсуф ва Аҳмад», «Қорақум» каби дostonларни ёзиб олган. «Ўзбек халқ эртаклари» 2 жилдлиги ҳамда «Ўзбек халқ мақоллари»нинг 2 жилдли академик нашрини тайёрлаида иштирок этган. «Ошиқ Ғариб ва Шохсанам (1958), «Холбека» (1968), «Алибек ва Болибек» (1973), «Тўлганой» (1974), «Авазхоннинг ўлимга ҳукм этилиши» (1976), «Маширқо» (1988) дostonларини, М. Саидов билан ҳамкорликда «Гулнор пари» (1965), «Гулшанбоғ» (1966), «Авазхон» (1967), «Чамбил қамали» (1978) дostonларини нашрга тайёрлаган. «Кулса – гул, йиғласа – дур» (ҳамк.), «Луқмони ҳаким» (ҳамк.) эртақлар тўпламини, «Олтин олма», «Сув қизи», «Ойжамол», «Ҳасанхон», «Топшимоқлар» тўпламларини нашр эттирган. Беруний номидаги Давлат мукофотига сазовор бўлган (1973). «Ўзбек топшимоқлари» (1966) номли монографияси муаллифи. 2002 йил 26 мартда Тошкент шаҳрида вафот этган.

ТОПИШМОҚ ТЕРМИНЛАРИ

Ўзбек фольклорида ҳозиргача бирор жанрнинг термини, шу жумладан, топишмоқ термини ҳақида ҳам тўлароқ бир иш қилинмаган. Текшириш натижасида ўзбекларда топишмоқ термини ниҳоят даражада кўп эканлиги маълум бўлдики, биз ана шу терминларни эслатиб, ўз мулоҳазаларимизни айтиб ўтмоқчимиз.

Топишмоқ фольклорнинг энг қадимий ва узоқ яшовчи, ҳаётий жанрларидан биридир. Топишмоққа табиатдаги жонли-жонсиз мавжудот, бирор ҳодисани бирор нарсага, унинг ҳолатига ўхшатиш, ё ҳодисага таққослаш орқали яшириб гавдалантирилади.

Ҳар бир топишмоқнинг ичида яширинган ҳолда *ким? нима?* деган сўроқ ётади. Тингловчидан ёки топишмоқ айтишишда қатнашганлардан жавоб талаб этилади. Топилиши лозим бўлган нарсаларнинг ўхшатма белгиси, бир томондан, жуда эркин танланган бўлгани учун, иккинчидан, кўпинча сингишиб қолган бадий адабиёт нормаларидан фарқ қилгани учун жавобини топиш кишини анча ўйлашга, топишмоқдаги белгиларнинг кўчма маъноларини ахтаришга мажбур этади. Шунинг учун ҳам фольклорнинг бу жанри барча халқларда, унинг специфик хусусиятларига мос терминлар билан номланган. Масалан, руслар ва украинларда *загадка*, тожик, форс, афғон, урду ва бошқа, шунингдек, эроний тилларда сўзлашувчи қатор халқларда *у нима?* маъносидаги *чистон*, арабларда эса *яширин*, *махфий* маъносидаги *луғз* қўлланилади.¹

Ўзбекларда бу жанрни кўрсатувчи терминлар бошқа туркий ва туркий бўлмаган бир неча халқларга нисбатан кўпроқдир: *топишмоқ*, *топишмачоқ*, *топмача*, *топар чўпчак*, *топ-топ*, *топ-топ чўпчак*, *топ-топ матал*, *чўпчак*, *жумбоқ* (*жуммоқ*, *жумоқ*), *матал*, *масала*, *чистон*, *луғз*. Луғз ва чистон ўзбекларда фақат ўтмиш давр ёзма адабиётида ишлатилган бўлиб, ўзбек фольклорида бу икки термин топишмоқ учун ишлатилмайди. Ҳолбуки, арабларда – луғз, тожик, форс ва афғонларда – чистон фольклорнинг шу жанри учун ҳам ишлатилади. Бу жанр учун

¹ Немис, француз ва бошқа тилларда ҳам шу маънони ифодаловчи терминлар қўлланилади: немисча *ratsel*, французча *enigme*, инглизча *riddli* ва х.к.

Ўзбекларда ишлатилган терминларнинг бир нечасини, айнан ёки бирор фонетик ўзгариш билан, туркий халқларнинг жуда кўпчилигида учратиш мумкин.

Биз ўзбек фольклоридаги *топишмоқ* терминлари устида фикр юритамиз. Бошқа туркий ва туркий бўлмаган халқлардаги ўхшаш ва ёки бизникига яқин терминлардан муқояса учун фойдаланамиз.

Текшириш шуни кўрсатадики, жанрнинг кенгрок тарқалган термини кўпчилик туркий халқларда ё *топмоқ* сўзидан, ёки *юммоқ* сўзидан олинган.

Туркий тилларнинг кўпчилигида адабий тилда ҳозирги кунда *топишмоқ* термини кўпроқ қўлланилади. *Топишмоқ* термини шу жанрнинг матнида ҳам учрайди: «*Топишмоқнинг ўзи қора, топмаганнинг юзи қора*» (қозон).

Топишмоқ, топмача, топар чўпчак, топ-топ сўзлари, озарбайжонликлар ва турклардаги *тапмажа*, туркманлардаги *тапмача*, олтойликлардаги *табишқоқ*, бурятлардаги *табари*, мўғуллардаги *табари* сўзларининг ҳаммаси топмоқ феълидандир.

Топишмоқ сўзи *топ* ўзагига *-иш* + *моқ* мураккаб аффикслари қўшилиб ясалган. *-иш* аффикси билан ясалган *топ* + *иш* сўзи ҳаракатнинг икки ёки бир неча шахс томонидан биргаликда бажарилишини, бирор нарсани биргаликда излаш, қидириш кераклигини билдиради; бунга *-моқ* инфинитив аффикси қўшилиши билан ўша ҳаракат номи юзага келган, кейинчалик бу сўз – *топишмоқ* фольклорда бир жанр термини сифатида қабул этилиб умумлашган. Шу жиҳатдан *топишмоқ* термини бу жанр хусусиятига мос тушган ва шунинг учун ўзбекларда *топишмоқ*, қорақалпоқларда *табыспак*, қирғизларда *табишмақ*, татар ва бошқирларда *табышмақ*, озарбайжонликларда *тапишмак*, олтойликларда *табишқоқ*, уйғурларда *тепишмақ* шаклларида, ҳар қайси халқнинг ўз тил хусусиятига хос равишда, илмий ва адабий термин сифатида оммалашган.

Топ + *ма* + *ча*. *Топ* ўзагига от ясовчи *-ма* ҳам кичрайтиш белгиси – *-ча* қўшилиши билан *топмача* термини ҳосил бўлган. «*Топмачамнинг ўза қора, топмаганнинг юзи қора*» (қозон). Худди шу термин айна формада туркманларда *тапмача*, озарбайжонликлар ва туркларда *тапмажа* шаклида учрайди [...].

Топиш + ма + чоқ топишмоқ феълидан *топиш* ўзагига от ясовчи *-ма* суффикси кўшилиши билан *топишма* ва унга навбатма-навбат биргаликдаги ҳаракатни билдирувчи *-чоқ* суффикси кўшилиб ясалган. Дарҳақиқат, топишмоқда гоҳ у тараф, гоҳ бу тараф бир-бирига топишмоқ айтиб, жавоб талаб қилади. Худди шу формада киз тўйидаги **тортишмачоқ** термини бор. *Бекинмоқ* сўзидан болалар ўйинидан бирининг оти **бекинмачоқ** термини ясалган.

Топ-топ. Бу термин кенг тарқалмаган, уни республикамизнинг баъзи туманларида (масалан, Самарқанд областининг Булунгур туманидаги Гулбулоқ қишлоғида, Ургут туманининг Терсак қишлоғида) айрим шевалардагина учратиш мумкин.

Кўриниб турибдики, бу термин *топмоқ* феълининг буйруқ шаклини икки марта қайтариш билан **топ-топ** термини вужудга келган. Уни баъзан топишмоқлар матнида ҳам учратамиз. *Топ-топ топишмоқ, оёққа ёпишмоқ* (лой).

Биринчи қараганда, гўё буйруқ сифатида келаётган **топ-топ**-нинг отга айланганини куйидаги матнда очикроқ кўриш мумкин:

*Топ-топ – лагалак,
Тобони йўқ лагалак,
Сувдан ўтган лагалак,
Суюги йўқ лагалак (капалак).*

Топ-топ шаклини ўзбеклардан бошқа халқларда ҳозирча учратмадик.

Жумбоқ ўзбекларда, асосан, кичик группасига кирган шеваларнинг кўпчилигида умумий термин сифатида ишлатилган ва ҳозир ҳам ишлатилади. Бу терминни Шайх Сулаймоннинг лугатида ҳам учратамиз. Унинг изоҳига кўра, «жумбоқ – билмажа, муаммо, луғз, чистон маъноларидадир».¹ Жумбоқни бизда илмий термин сифатида оммалаштириш тенденцияси бўлганлиги ҳам сезилади. Масалан, 1916–17 йилларда Қўқонда тошбосмада нашр этилган 156 топишмоқ тўпламига «Жумбоқ мажмуаси» деб ном қўйилган. XX аср бошларидаги мактаб дарсликлари-

¹ Шайх Сулаймон. Луғати чиғатойи ва турки усмоний. – Истамбул, 1295. – 109-бет.

да топишмоқ намунаси берилганда сарлавҳада «Жумбоқ» сўзи ёзилган. Лекин ҳозирги замон ўзбек адабий тилида жумбоқ ва чистон ўзбек фольклори терминлари сифатида умумлашмади.

Ўзбекларда жумбоқ (вариантлари: жуммоқ, жумоқ) термини топишмоқнинг ўзида ҳам кўп учрайди: «*Жумбогим жутилди, товга қараб қутилди*»¹ (қуюн). **Жумбоқ** термини туркий халқларнинг ҳам бир қанчасида бор бўлиб, козоқ ва қирғизларда *жумбак*, татарларда *жомак*, *жомох*, бошқирдларда *йомақ*, чувашларда *сутмалли юмах* дейилади. Лекин татар адабий тилида *жомох* термини қўлланилмайди, шевада ҳам кам учрайди. Бу тўғрида татар топишмоқлари тўпламининг сўзбошисида шундай дейилади: «Атама сўз булу ягыннан килгэндә, «табишмак» сузе белән бер рэттән, бездә «жомак» һәм «жомох» дигән суздә учраштыргалый... Татарстанда куп райанларда инде «жомох» сузен белмийләр».² Татарларда ҳозирги кунда **табишмак** термини қўлланилади.

*Эче куыш, тышы таш,
Табышмагем орчык баш (печка).*

Бошқирдлар эса бунинг акси, яъни уларда **топишмоқ** термини ишлатилмайди. Бошқирд фольклорининг мутахассиси, филология фанлари номзоди А. Н. Киреевнинг бизнинг илтимосимизга кўра лутфан ёзиб юборган мактубидаги маълумотга қараганда, ҳозирги замон бошқирд адабий тилида **йомақ** шаклида ишлатилган бу терминни турли даврларда турлича ёзганлар ва турлича талаффуз этганлар: **йомак**, **йоммақ**, **йомбак**.³

*Йомақ, йомақ, йом қара,
Йомақ эсе дем қара (қозон).*

Туркман адабиётшуноси ва фольклористи филология фанлари доктори Баймуҳаммад Қарриевнинг маълумотича, туркманлар-

¹ Айтувчи: Абдуғани Турдимов. Самарқанд вилояти, Нурота тумани, Қўш-тамағали кишлоғи, 1958 йил.

² Исәнбэт Н. Табышмақлар. – Қазан, 1941. – 4–5-бетлар.

³ Менинг топишмоқ термини ҳақида маълумот сўраб ёзган хатимга А. Н. Киреевнинг жавоб хатидан. 1958 йил 28 ноябрь.

да *топишмоқ* ўрнида *матал* термини ишлатилади. Бу термин топишмоқ текстида ҳам учрайди:

*Маталим гызыл матал,
Дилдан отуп, додага етар* (қалампир).
*Маталим матти,
Икки гулагы ятды,
Ере гирип гум атди* (фил).¹

Туркманларда ҳам *жумақ*, *юмақ* термини бор. Лекин бу термин уларда топишмоқнинг эквиваленти бўлмай, фольклорнинг аскияга ўхшаш жанрини ифодалайди. Б. Қарриевнинг маълумотига кўра, «Бунда икки сўз устаси, одатда, бу тўйларда бўлади – бадий ўхшатишлар орқали мусобақалашадилар». Кўринадикки, бу термин фақат туркманларда фольклорнинг бошқа жанри учун ишлатилади Аммо ўзбек, қозоқ, қирғиз, қорақалпоқ, татар, бошқирд, озарбайжонликлар ва чувашларда *жумбоқ*, *жумоқ* терминларининг, ҳар қайси тилнинг ўз хусусияти доирасида, турли шаклларда топишмоқ жанри учун ишлатилиши ёки баъзиларида илгари ишлатилган бўлиши, унинг туркий халқларда кенг тарқалганидан далолат бериши билан бирга айни ўзақдан ва айни шаклда ясалганини кўрсатиб туради.

Туркий тилларда қўлланилган бу *жумбоқ* термини *жуммоқ*, *юммоқ* сўзидан бўлиб, *яшириш*, *бекитиш* маъносида. Зотан «Жупми – тоқ» ўйинида ҳам бир ёки бир неча дона нарсани кафт ва панжа орасига олиб, яшириб тоқ ёки жуфт эканлигини топиш талаб қилинади. Шунга ўхшаш, жумбоқда ҳар бир нарса иккинчи бир нарса ёки бирор ҳодиса орқали алмаштирилиб, ё таққослаш орқали бекитиб, яшириб айтилади.

А. Н. Киреев бошқирдча *йомақ*, *йомбақ*, *йоммақ* термини *йомақ* (юмук) – беркитилган сўзидан келиб чиққанлигини таҳмин қиладики, бу ҳам фикримизни қувватлайди.

Матал. Бир қанча халқларда топишмоқнинг яна бир термини маталга дуч келади. Ўзбек, туркман, озарбайжонликларда *матал* ва курдларда *метел* шаклида. Юқоридаги бир мисолда,

¹ Туркман халқ маталлари. – Ашгабад, 1948. – 49, 132-бетлар.

туркманча топишмоқ матнида учраган бу термин ўзбекча текстларда ҳам тез-тез йўликиб туради:

*Маталим матти,
Қулоғи қатти,
Қозонга солсам,
Тикрайиб ётди (чучвара).¹*

*Матал, матал, малики,
Тирноқлари ўн икки.
Хувидай, хувидай,
Овузлари кувидай.
Товдан ошар, моли бор,
Қуйруғида холи бор (қашқир).²*

Ўзбекларда **матал** термини эртақ, мақол, ва русча поговорка ўрнида ҳам қўлланилади. Лекин бу терминнинг этимологияси аниқланмасдан туриб, унинг, аслида, қайси жанрга хос бўлганини ҳозирча айтиб бўлмайди.

Хивада топишмоқнинг эквиваленти **матал** термини билан бир қаторда **масала**³ термини ҳам бор.

*Масала мастики,
Дирноқлари ўн икки,
Ҳали галса гўрарсиз,
Гула-гула ўларсиз (маймун).⁴*

Бу топишмоқнинг биринчи байти юқорида келтирилган топишмоқдаги биринчи байтнинг айна ўзидир, орадаги фарқ фақат «матал» сўзи ўрнига «масала» ишлатилганлигидадир.

¹ Хоразм вилоятининг Хива шаҳридан ёзиб олинган.

² Нурота туманининг Қоракиса қишлоғидан ёзиб олинган.

³ «Масала» терминини Ҳ. Т. Зарифовнинг 1930 йилда Хивада ёзиб олган материаллари ҳамда Б. Каримовнинг Хоразмда 1938 йил ёзиб олган фольклор материалларида очиқ кўриш мумкин. Алишер Навоий номидаги Тошкент давлат ўзбек тили ва адабиёти университети ҳузуридаги Ўзбек тили ва адабиёти илмий-тадқиқот институти Фольклор архиви. Инв. № 603.

⁴ Хоразм вилоятининг Хива шаҳридан ёзиб олинган.

«*Масала*» арабча *масъала* – ҳал қилиниши лозим бўлган, жавоб талаб қилган сўроқ ёки бир мушкилотдир.

Масал термини ҳам арабча бўлиб, турк луғатшуноси Шамсиддин Сомийнинг изоҳига кўра: 1) бир умумий қоидага намуна бўлиш учун айтилган сўз; 2) ташқи маъноси назарда тутилмай, зимдан ва киноя билан бошқа бир нарсага далолат этмоқ учун ясалган сўздир.¹

Маъно жиҳатдан *масала* ва *масал* сўзларининг топишмоқ ўрнида ишлатилишига асос бор. Лекин *матал* билан *масал* ўртасида лингвистик бирлик борми, яъни бу иккала сўздаги *т* билан *с* товушлари ўртасида фонетик ҳодиса рўй бериб, «*с*» фонемаси «*т*»га кўчганми, йўқми, бу ҳақда биз қатъий бир фикр айта олмаймиз. Буни тилшуносларимиз ҳал қилиб берурлар, деган умиддамиз.

Худди шунингдек, *чўпчак* терминининг ҳам этимологиясини аниқлаш керак. Ана шунда халқимиз орасида қўлланиб келаётган *топар чўпчак*, *топ-топ чўпчак* терминларини кенг тушуниш ва тўғри изоҳлаш мумкин бўлади.

Топишмоқнинг жавоби учун ҳар жойда ҳар хил сўз ишлатилади: «жавоби», «ечуви», «очувчи». Бошқирдларда «*ачыу, сисеу*», баъзан «*табыу*», козоқларда эса «*шешуи*»² дейилади. Бизнинг адабий тилимизда «жавоби» умумлашган. Озарбайжонликлар ва татарларда ҳам *жавобидир*. Тожиқлар ҳам *жавоб* сўзини ишлатадилар.

Ўзбек фольклорида топишмоқ учун ишлатилган терминлар жуда кўп. Бу терминларнинг ҳар бири шевадарда ҳозир ҳам ишлатилади. Аммо тилимизда умумлашгани *топишмоқ* термини бўлиб, бу ўзбек фольклористикасида ҳам илмий термин сифатида қабул этилган. Терминнинг бошқа эквивалентлари эса фақат диалектлар доирасида қаралмоғи керак. Шулардан *жумбок* термини адабий тилимизга кириб, оммалашган бўлса ҳам, адабий тилда фольклорнинг бир жанрини билдирмайди, балки умуман муаммо маъносини ифодалайди.³

¹ Шамсиддин Сомий. Қомуси туркий. – Истамбул, 1289.

² Ғабдуллин М. Қазак халқынын ауыз адебияты. – Алматы, 1958. – 83-бет.

³ Ўзбек халқ топишмоқларининг заҳматкаш тадқиқотчиси Зубайда Хусаинованинг мазкур мақоласи «Ўзбек тили ва адабиёти масалалари» журналининг 1960 йил 3-сонидан (28–33-бетлар) олиб босилди.

Охунжон
СОБИРОВ
(1920–1982)



Охунжон Собиров 1920 йили Тошкент шаҳрида туғилган. Филология фанлари номзоди (1955). Тошкентдаги Покровский номидаги ишчилар факультетининг кечки бўлимида (1934–37), Тошкент ўқитувчилар институтининг филология факультетида ўқиган (1937–42). Тошкент шаҳридаги 35-ўрта мактабда ўқитувчи (1938–40), «Фан» нашриётида мусахҳих (1948–50), Тошкентдаги 11-, 16-ўрта мактабларда ўқитувчи (1950–52), Қарши давлат педагогика институти Ўзбек тили ва адабиёти кафедрасининг мудири (1952–57), ЎзР ФА Тил ва адабиёт институтининг Фольклор бўлимида катта илмий ходим (1959 йилдан). «Келиной қўшиқлари» мажмуасини нашр эттирган (1981). «Бахтиёр авлодлар» (1951), «Нигорхон ва Кал Замон» (1950), «Алпомиш» (1956) дostonини ва бир қанча термаларни ёзиб олган. «Хасан Чопсон», «Нигор ва Замон», «Ёзи билан Зебо», «Зулфизар ва Аваз» дostonларини нашрга тайёрлаган. «Ислом шоир Назар ўғли» (1967), «Бахшилар сардори» (1976), «Умр шоир Сафаров» (1982) каби илмий рисоалари нашр қилинган. «Саодат ва садоқат тароналари» (1967), «Яшин ва халқ оғзаки ижоди» (1972), «Сарчашма адиб ижодида» (1975), «Ойбек ижодида фольклор» (1975), «Фольклор аънаналари ва ўзбек адабиётида халқчиллик» (1978), «Ўзбек реалистик прозаси ва фольклор» (1979), «Халқ ижоди хазинаси» (1986) каби китоблар муаллифи. 1982 йили Тошкент шаҳрида вафот этган.

«МАХТУМҚУЛИ ВА ЎЗБЕК БАХШИЛАРИ»

Ўз ижодий камолотида ўзбек классик адабиётининг ҳам бой хазинасидан баҳраманд бўлган туркман халқининг улкан шоири Махтумқулининг ижодий фаолияти, адабий мероси қардош халқлар адабиётига, жумладан, ўзбек адабиёти ва фольклорига ижобий таъсир кўрсатди. Унинг халқчил, элга манзур қўшиқлари бир-биридан гўзал, содда, мазмундор. Туркман адабиётининг атоқли намоёндаси Берди Кербобоев айтганидек: «Махтумқулининг шеърлари халқни хаёл отига миндириб, унга қаҳрамонлик қиличини ушлатган шеърлардир. Туркман адабиётининг улуғ классиги Махтумқули туркман халқининг тақдири, унинг зулмдан озод бўлиши ва бирлашуви учун кечакундуз тинмай фикр қилди. Амирлар, шоҳлар, беклар, хонлар, эшонлар ва пирларга қарши заҳарлар сочди. Туркман халқининг дардларига малҳам бўлди»¹.

Махтумқули шеърлари ўзбек халқига ҳам жуда қадрдон эди. Чунки у яхшиликни, одамгарчиликни, гуманистик ғояларни улуғлади, золимларни, адолатсизликни, пасткашликни, жаҳолатни, номардликни қаттиқ қоралади. Одоб, ахлоқ, иноқлик, дўстлик, меҳр-муҳаббат, вафо, садоқат, қадр-қиммат, олижаноблик ҳақида, инсон бахт-саодати, тақдири, эрки тўғрисида куйиниб ўғит-насихат қилди. Шу сабабдан Махтумқули шеърлари қорақалпоқ ва ўзбек халқининг профессионал халқ шоирлари репертуаридан муносиб ўрин олди, севилиб куйланиб келди ва куйланмоқда.

Шу нуқтаи назардан Махтумқули шеърларининг ўзбеклар орасида тарқалишига доир айрим материалларни баён қилмоқчимиз. Хоразмлик Қурбонназар Абдуллаев – Бола бахши, Амударё туман «Манғит» жамоа хўжалигида яшовчи халқ шоири Худойберган Ўтаганов, Самарқанд вилоят Нурота туманида Бекмурод Жўрабой ўғли, машҳур қорақалпоқ халқ шоири Қурбонбой жиров Тожибоев, Гурлан туман Навоий номли жамоа хўжалигида Жумабой Худойберганов ва бошқалар Махтумқули

¹ «Ўзбекистон адабиёти ва санъати» журнали. – Тошкент, 1940, № 5, 82–83-бетлар.

шеърларини завк билан айтиб келадилар. Қорақалпоғистон ва Ўзбекистонда жуда кўп санъаткорлар унинг шеърларини ўз миллий куйларида ижро этадилар. Айниқса, Хоразмда бу улуғ сўз устасининг қўшиқларини эшитмаган, севмаган, билмаган бирон киши йўқ десак, муболаға қилмаган бўламиз. Худди шунингдек, бу ерда Махтумқули ижодий мактабидан руҳланмаган шоир ҳам йўқ. Умуман, шу нарса диққатга сазоворки, Ўзбекистоннинг Туркменистонга туташ туманларида яшовчи аҳоли орасида тўй-маросимларда, ҳатто одатдаги зиёфат ва йиғинларда Махтумқули асарларини ижро этиш традицияга айланиб қолган. А. С. Пушкин номидаги Тил ва адабиёт институти¹ фольклор сектори илмий ходимларининг 1960 йил май ойида Бухоро вилояти бўйича уюштирган экспедициясида бу фикрнинг тўғрилиги аниқланди. Қорақўл тумани Қораун жамоа хўжалигида яшовчи Абдусаттор ака ва яна бир неча ёшлар Махтумқулининг кўпгина асарларини қўшиқ қилиб айтадилар. Бундай ижрочилар Қорақўл, Томди туманлари қишлоқларида кўпчилиқни ташкил қилади.

Ўзбек халқи орасида авлоддан-авлодга, оғиздан-оғизга кўчиш орқали бизгача етиб келган Махтумқули шеърлари кўпинча унинг қисқарган вариантга ўхшайди. Буни Абдусаттор акадан ёзиб олинган «Бўлар», «Яхши», «Борадир» сарлавҳали шеърлар мисолида кўриш мумкин. Бу шеърлар Махтумқули «Танланган асарлар»нинг 139-, 316-саҳифаларида берилгандир. Бу шеърларни Абдусаттор ака отаси Шомурод бахшидан ёшлиқ вақтида ўрганиб олганлигини айтади. Шу нарса характерлики, Абдусаттор Шомуродов юқоридаги шеърларни туркман акценти билан ижро этади.

Тарихий фактлар шуни тасдиқлайдики, машҳур халқ шоирлари қардош халқ шоирларини яхши билган, улардан ўрганган, дўст тутинган, улар билан ҳамфикр бўлган. Маслақдошлиқ, тақдирнинг бирлиги, бир хил ижтимоий позиция, дунёқараш уларни яқин, қадрдон қилиб қўйган. Натижада халқлар ўртасидаги адабий-маданий ҳамкорлик ҳар қандай тўсик, низо, золимларнинг адовати,

¹ Ҳозирги ЎзР ФА Ўзбек тили, адабиёти ва фольклор институти (масъул муҳаррир изоҳи).

босқинчиларнинг зулмига қарамай, тобора ривожланиб борган. Бу хусусда Ислом шоир Назар ўғлининг 1917 йил инқилобидан олдин Махтумқули шеърларини эл орасида айтиб юрганлиги характерли бир ҳолдир. «Тахминан, 24 ёшларимда, – деб эслайди Ислом ота, – она қариндошларимникига – Бухоро вилоятининг Қоракўл туманига (Сайёд кишлоғи) борганимда туркман халқ шоири Отаниёз билан танишдим. У билан биринчи марта Қоракўлда бир тўйда учрашган эдик. Отаниёз шоир Чоржўйнинг Хўжақалъа деган еридан экан. Биз бир-биримиз билан жуда яқин алоқада бўлдик. Унинг менга дутор билан термалар айтиши жуда ёққан эди. Отаниёз мени Қоракўлдан Чоржўйга бошлаб борди. Мен у билан қилган бир ойча саёҳатларимда туркман халқининг тирикчилиги билан танишдим. Мен ундан Махтумқулининг бир неча шеърларини ўрганиб олдим»¹. Махтумқули – Фироғийнинг «Кўринг», «Бўлма», «Ярашмас» сарлавҳали шеърларини Ислом шоирдан 1951 йили ёзиб олдик. Бу шеърларни Махтумқулининг 1940 йили Туркменистон Давлат нашриёти томонидан нашр этилган «Сайланма асарлар»ига солиштирдик. Халқ шоирлари учун бошқа шоирларнинг асарларини ўз майлларига қараб ўзгартириш характерлидир. Улар шеърни ўзлари яшаган муҳитга, кундалик ҳаётга ҳодисаларга мослаб ўзгартиришлари мумкин. Махтумқулининг юқоридаги шеърлари Ислом шоир ижросида қисқарган, ўзгарган. Масалан, унинг «Кўринг» шеъри ўн банддан иборат бўлиб, Ислом шоир бунинг фақат олти бандини ўзбек тилида дўмбира билан куйлаган. Махтумқули:

*Биров билан ошна бўлай десангиз,
Азал иқроринда туришин кўринг, –*

деса, бу сатрларни Ислом шоир:

*Бу мард билан ошна бўлай десангиз,
Авал ваъдасида туришин кўринг, –*

деб ўзгартирган.

¹ ЎзР ФА Ўзбек тили, адабиёти ва фольклор институти Фольклор архиви. Инв. № 1167.

Ёки шу шеърида Махтумқули:

*Қадрдон, қардошдан узоқ дош бўлиб,
Қадрсиз ёт билан қариндош бўлиб,
Махтумқули носозлара дуч бўлиб
Хўжанинг, саиднинг юришин кўринг, —*

деган бўлса, Ислом шоир бу сатрларнинг куйидагича ўзгартирган:

*Махтумқули ахир ҳолинг на кечар,
Ёмон чақирсанг-ку мажлисдан қочар,
Энди бўлиб номардларга сен дучор,
Хўжаи саиднинг юришин кўринг.*

Махтумқулининг «Бўлма» сарлавҳали шеъри, аслида, 22 банддан иборат бўлиб, Ислом шоир бунинг 9 бандини ўзлаштириб олган экан. Бу бандларда ҳам айрим ўзгартишлар учрайди.

1956 йил апрель-май ойларида Қашқадарё вилоят Деҳқонобод туманлик Умир шоир Сафаровдан «Алпомиш» достони билан бирга бир қанча термаларни ёзиб олдик. Мана шу термалар ичида Махтумқулининг «Танланган асарлар»ида берилган «Ой-қунингиз ботмоққа...» шеъридаги икки тўртликка жуда ўхшаган терма ҳам учрайди. Қизиғи шундаки, Умир шоир бу термани Махтумқули шеъридан эканлигини билмас ва ўз устозидан ўрганганлигини айтган эди. Умир шоир ижросида Махтумқулининг шеъридаги айрим сатрлари тушиб қолган бўлса ҳам, терма мазмун эътибори билан ўқувчини чуқур ўйлантиради, символик характердаги фикр уни тегишли хулосалар чиқаришга ундайди ва бу хулосаларни ижтимоий ҳаёт ҳодисаларига татбиқ этишга чақиради. Махтумқулининг бу шеъри етти банддан иборат бўлиб, унинг куйидаги бандлари Умир шоир куйлаган термада келтирилади:

*Олтмиш яшаб, етмиш кирган сўфилар,
Оз қолибдир ой-қунингиз ботмоққа.
Чўл ерларда ит кўрмаган тулкилар,
Хаёл қилар ётган шерни этмоққа.
...Калтакесак кунин қаргаб қишу ёз,*

*Дам чекади аждаҳони ютмоққа,
Оқсоқ кийик юз бўрсиққа етқизмас,
Шер боласи минг тулкига тутқизмас,
Ўлик илон минг келпонга ютқизмас,
Ақл керак бу ишларга етмоққа¹.*

Умир шоир ижросидаги терма куйидагича:

*Тоққа чиқиб кийик овлаган мерган,
Дам айлайди шер боласин отмоққа.
Якка тулки биёбонда шер бўлар,
У дам айлайди кийикка етмоққа.
Қумда ётган калбозонлар ўшқирар,
У ҳам дам айлайди илонни ютмоққа.*

*Кўриниб қолса шер боласи юз мерганга отқизмас,
Якка кийик тулкига ўзини сира етқизмас,
Калбозонга илон ўзини ҳеч вақт ютқизмас,
Фикр керак бу сўзларнинг маъносини чақмоққа.*

Махтумкули шеърлари фақат радиода, телевизорда, концерт-дагина эмас, балки халқимизнинг тўй маросимларида ҳам завқ билан қўшиқ қилиб айтилади. Севимли шоирнинг элимизга манзур бўлган асарларини моҳир санъаткорларимиздан тортиб ҳаваскор ашулачиларимиз ижросида ҳам эшитиш мумкин. Бу ашула ва қўшиқларнинг хилма-хил куйларини, асосан, ўзбек халқи яратган. Бу куйларда чуқур лиризм, самимийлик, инсонни улуғловчи оҳанг барқ уриб туради. Ёқимли, жозибадор куйлар Махтумкули қўшиқларига қанот, жон, ҳаёт бағишлагандек туйилади. Халқ шоирлари унинг шеърларини дўмбира ёки дутор билан куйлайдилар. Бунда ижро этиш маҳоратидан ташқари, куйнинг ўзи бир-биридан кескин фарқ қилади. Айрим ҳолларда Махтумкули шеърлари тўй-маросимларда, йиғинларда мусиқа асбобисиз маълум оҳангда ижро этилади. Мусиқа асбобисиз халқ поэзияси асарларини ижро этиш традицияси бизда кўпдан

¹ Махтумкули, Танланган асарлар, Тошкент, Ўзадабийнашр, 1960, 74-бет.

бери давом этиб келади. Масалан, «Майда» кўшиқлари ёки «Ёзи билан Зебо» номли дoston шундай айтилади. Худди шунингдек, Қашқадарё вилоят Бешкент туман Қамаши қишлоқлик Авазов Берди (1909 йилда туғилган) Махтумқули шеърларини созсиз баланд овоз билан ижро этарди. 1961 йил 25 апрелда ундан ёзиб олинган Махтумқули шеърларининг («Келар», «Сани», «Бўлар», «Бўлмаса») ижро этиш оҳанги, куйи бирига жуда яқин. Бу кўшиқларни Авазов Берди ўттиз йилдан кўпроқ вақтдан бери тўйларда, эл орасида куйлаб келганини айтиди. Бу кўшиқларнинг баъзиларини Махтумқули шеърларининг ўзбек тилидаги таржималарига солиштирдик. Бунда ҳам, бир томондан, шоир шеърини ўзбекчалаштириш, қисман туркман тили акцентининг сақлаб қолиниши ва қисқартириш ҳолатлари кўзга ташланади.

Масалан, Берди шоир ижросида «Бўлар» радифли Махтумқули шеърини биз қуйидагича ёзиб олдик:

*Муҳаммад уммати молсиз бўлмасин,
Молсиз бўлса қавму қардош ёт бўлар.
Ака-укасида бўлмас хоотири,
Ишонган, қувонган дўсти ёт бўлар.*

*Сидқи билан ҳеч ким мураббий этмас,
Бир тилак айласа муюмни битмас,
Маъракага айтган сўзи жойи тутмас,
Тингламаслар, айтган гапи мот бўлар.*

*Оёгинда чориқ кандир белбоғдир,
Бир даврага борса жойи ошоқдир,
Бедават от минса, билинг, эшакдир,
Давлатлилар эшак минса от бўлар.*

*Кураш бир обрўйдир, уруш бир дастур,
Кишини камситган одам нокасдир,
Ҳаволанма, кўнглим, кел энди басдир,
Ғийбатчининг йиғнагани ўт бўлар.*

*Махтумқули, шукур қилгин худога,
Баробардир ўлим шоҳу гадога,
Бесабрлар тез йўлиқар балога,
Сабрли қул тура-тура шод бўлар.*

Бу шеър Махтумқули «Танланган асарлар»нинг 67-бетида берилгандир.

Шуни айтиш керакки, факат Махтумқули шеърлари эмас, балки туркман халқ эпосининг айрим намуналари ўзбек халқ шоирларининг репертуарида бўлганлиги диққатга сазовордир. Буни тасодифий ҳол деб бўлмайди. Эҳтимолки, ўзбек эпосининг айрим асарлари туркман ёки бошқа халқ талантларининг репертуарида бордир. Бу, бизнингча, табиий бир ҳол бўлиб, халқларимиз ўртасидаги қадимий маданий-адабий ҳамкорликнинг, дўстлик, қардошлик муносабатларининг бадиий ижоддаги кўринишидир.

Фикрни баён этиш формаси, одоб-ахлоқ ҳақидаги панду насиҳатларнинг образли ифодаланишида Махтумқули шеърлари билан ўзбек халқ шоирлари термалари ва халқ кўшиқлари мазмун ва формаси ўртасидаги яқинлик, умумийлик сезилиб туради. Бу ҳолат, бизнингча, Махтумқули асарлари халқ оғзаки ижоди, халқ поэзияси, айниқса, унинг бой тили, услуби, поэтикаси асосида ижод қилинганлигидан гувоҳлик беради. Шу сабабдан ва Махтумқули асарларида меҳнаткаш халқ оммасининг руҳи, психологияси, ижтимоий муносабатлари ёрқин акс этганидан, шоирнинг мазлумларга, камбағалларга бўлган чуқур ҳурмат ва самимият ҳисси ғоят таъсирли ифодаланганлигидан унинг шеърлари ҳар бир халқнинг ўз ижоди каби тез тарқалди ва шуҳрат топди. Махтумқули ижоди билан ўзбек адабиёти ва фольклорининг ўзаро муносабати масаласи адабиётшунослигимизда ўрганилмаган соҳадир. Шунга қарамай, юқорида келтирилган фактлар жаҳон халқлари, жумладан, туркий халқлар ўртасидаги дўстлик, адабий-маданий ҳамкорлик қадимий, чуқур ҳаётий илдизга эга бўлганлигини кўрсатади. Жаҳон адабиётининг ёрқин сиймоларидан бири бўлган Махтумқули ижоди юксак баҳоланди, ҳақиқий қийматини топди ва халқнинг бойлиги бўлиб қолди.

Шожибой
ҒОЗИБОВ
(1924–1988)



Шожибой Ғозибоев 1924 йил 3 январь куни Наманган вилоятининг Чортоқ туманидаги Ойқирон қишлоғида туғилган. «Ўзбекистонда хизмат кўрсатган ўқитувчи» (1974). Тошкентдаги Енгил саноат техникумида ўқиган (1939–40). Низомий номидаги Тошкент давлат педагогика институти (1940–44)да таълим олган. Наманган давлат педагогика университетида (1944–55) ўқитувчи, доцент (1956 йилдан), кейинчалик ўқув ишлари бўйича проректор, тарих-филология факультетининг декани, «Ўзбек тили ва адабиёти», «Ўзбек адабиёти» кафедраларининг мудури вазифаларида ишлаган. «Фозил Йўлдош ўғлининг ижоди» мавзусида номзодлик диссертациясини ёқлаган (1954). «Фозил Йўлдош ўғли ижоди» (1955), «Фозил Йўлдош ўғли» (1968) каби китоблари, «Ёзи билан Зебо» достонининг Наманган вариантлари» (1964), «Алпомиш» достонининг Наманган вариантлари» (1967) «Наманган халқ достончилари» (1975) сингари илмий асарлари чоп этилган. Тўплаган фольклор материаллари асосида «Гулпар. Наманган эртаклари» мажмуасини нашр эттирган (1968). Бундан ташқари, «Уч ога-ини» эртагини ўрганиши» (1992, ҳамж.), «Наманган халқ оғзаки бадиий ижоди намуналари» (1993), «Наманган эртаклари» мажмуаси (1998 ҳаммуаллиф) каби китоблари босилган. 1988 йили вафот этган.

«ЁЗИ БИЛАН ЗЕБО» ДОСТОНИНИНГ НАМАНГАН ВАРИАНТЛАРИ

Маълумки, халкимиз орасида кенг тарқалган «Ёзи билан Зебо» достони шу пайтга қадар фольклорист олимларимизнинг диққат-эътиборидан четда қолиб келди. Бу достоннинг вариантларини ёзиб олиш ва тўплаш, уларни ўрганиш иши билан деярли ҳеч ким шуғулланмади. Кейинги йилларда қисқа муддатда «Ёзи билан Зебо» достонининг кўпгина вариантлари ёзиб олинди ва тўпланди.

«Ёзи билан Зебо» достони биринчи марта 1926 йил 25 февралда Наманган шаҳарлик шоир ва журналист Рафиқ Мўмин томонидан Андижон вилоятининг Избоскан туманидаги Пойтук қишлоғида яшовчи Ёрмат бобо оғзидан «Зевак» («Зебихон») номи билан ёзиб олинган. У ҳозир Ўзбекистон Фанлар академиясининг Тил ва адабиёт институти фольклор сектори архивида сақланади.¹ Ўзбек фольклорист олимлари орасида «Ёзи билан Зебо» достони вариантларини тўплаш ва ёзиб олиш иши билан кейинги вақтларда кўпроқ филология фанлари номзоди О. Собиров шуғуллана бошлади. У «Ёзи билан Зебо» достонининг кўпгина вариантларини Бухоро ва Сурхондарё вилоятларида юриб ёзиб олди ва тўлади. У «Ёзи билан Зебо» достонининг ўз қўлидаги айрим вариантлари асосида достоннинг йиғма матнини 1957 йилда нашрга тайёрлади ва «Шарқ юлдузи» журналида нашр қилдирди.² Ўртоқ Собиров 1962 йилда «Ёзи билан Зебо» достонининг кейинги даврларда ёзиб олинган ва фольклор секторида сақланаётган вариантларини ўрганиб чиқиб, достоннинг йиғма матнини нашрга тайёрлади ва бу матнни қисқартирилган ҳолда алоҳида китобча қилиб ҳам чиқарди.³

¹ «Зевак» («Зебихон») достони. Ёзиб олувчи Рафиқ Мўмин, 1926 йил, инв. № 725.

² «Ёзи билан Зебо» // Шарқ юлдузи. – Тошкент, 1957. – 4-сон, 1957 йил, 93–120-бетлар. Шу журналда кўрсатилишича, бу матн О. Собиров томонидан достоннинг Ўроқ Расулов, Мамашариф Эшмуродов ва Худойкул шоир Яхшиевлардан ёзиб олинган вариантлари асосида нашрга тайёрланган.

³ «Ёзи билан Зебо» (достон). Ёзиб олувчи ва ишлаб нашрга тайёрловчи Охунжон Собиров. – Тошкент: «Ёш гвардия» нашриёти, 1962.

Шу сатрлар муаллифи «Ёзи билан Зебо» достонининг, айниқса, Хўжашўркент ва Бекобод, Ёрқўрғон ва Файзиобод ҳамда Ўнҳаят қишлоқлари (Янгиқўрғон тумани)да, шунингдек, Хонобод ва Тошбулоқ қишлоқлари (Наманган тумани)да кенг тарқалганини аниқлади ва унинг томонидан «Ёзи билан Зебо» достонининг бир неча Наманган вариантлари ёзиб олинди.¹

Янгиқўрғон туманининг Хўжашўркент қишлоғидан етишиб чиққан машҳур ўланчи ва достончи шоир Олим Сойиббоев ва Файзиобод қишлоғидан етишиб чиққан моҳир «ёзичи» шоирларнинг айтувчи, «Ёзи билан Зебо» достонини кўп достончилар Ёрқўрғон қишлоғилик Маманазар ёзичидан ўрганганлар. Олимжон Сойиббоевнинг айтувчи, у «Ёзи билан Зебо»ни ўз тоғаси Маҳмудбой Исабой ўғлидан ўрганган. Маҳмудбой Исабой ўғли эса Маманазар акадан ўрганган. Маманазар ака «Маманазар ёзичи» номи билан Уйчи ва Янгиқўрғон томонларда шуҳрат топган. Маманазар ёзичи бу достонни Сайдали акадан ўрганган. Маманазар ёзичини ҳозир ҳам уйчиликлар энг яхши «ёзичи» бахши сифатида эслайдилар. Ёрқўрғонлик кексаларнинг айтувчига қараганда, Маманазар ёзичи қизиқчи, қўшчи деҳқон бўлган, Сирдарё лабида қўрғон қилиб, ўша ерда яшаган. Унинг ўғли Тўхтабой ҳам қизиқчилик қилган, «Ёзи билан Зебо»ни айтган. Маманазар ёзичининг ўлганига 40 йил бўлган (1962 йил апрель

¹ «Ёзи билан Зебо» (айтувчи Ҳожиакбар Кўчумов, Бирлашган қишлоқ фуқаролар йиғинининг Бекобод қишлоғидан), 1961 йил, март; б) «Ёзи билан Зебо» (айтувчи Олимбой Сойиббоев, Бирлашган қишлоқ фуқаролар йиғинининг Хўжашўркент қишлоғидан), 1961 йил, апрель; в) «Ёзи билан Зебо» (айтувчи Абдулла қори Худоёров, Ўнҳаят қишлоқ фуқаролар йиғинининг Файзиобод қишлоғидан), 1962 йил, апрель; г) «Ёзи билан Зебо» (айтувчи Ёқуббой ака, Ёрқўрғон қишлоғидан, ёзиб олувчи Ёқуббоев Икромжон), 1962 йил; д) «Ёзи билан Зебо» (айтувчи Адаш полвон, Ёрқўрғон қишлоғидан), 1962 йил, апрель; е) «Ёзи билан Зебо» (айтувчи Холмирза Худойберганов, Ёрқўрғон қишлоғидаги 80-мактаб қоровули), 1962 йил, апрель; ж) «Ёзи билан Зебо» (айтувчи Шерзода (Деҳқонбой Баҳромов), Ўнҳаят қишлоғидан), 1963 йил, май; з) «Ёзи билан Зебо» (айтувчи Отавали Усмонов, Наманган туманидаги Хонобод қишлоғидан), 1962–63 йиллар; и) «Ёзибува» (айтувчи Маманазар Исроилов, Наманган туманидаги Катта Тошбулоқ қишлоғидан, 1963 йил июль) ва бошқалар.

ойида). Бунга қараганда, Маманазар ёзичи 1922–1923-йилларда вафот этган бўлиб чиқади.

Ёрқўрғонлик ва файзиободлик кекса «ёзичи»ларнинг айтувича, бу қишлоқда Бувамирза, Ортиқ ҳофиз, Эргаш кал Узоқ кал ўғли деган чўпон, Турдибой деган қарол, Отаполвон Бўтабой ўғли, Эргаш ота Сатторов, Исомиддин Гадойбоев, Набижон Фуломов, Норматқўр, Ҳайдар ҳофиз, Ражаббой ака, Қозоқча ака (Сагим полвоннинг устози), Олим ёзичи, Маматали Алиматов, Холмирза Дадабоев, Тургун мерган Узоқов, Мамадали ака, Уста Тусмамат Болтабоев каби моҳир «ёзичи» бахшилар бўлган. Ҳозир ҳам бу икки қишлоқнинг ўзида ўндан ортиқ «ёзичи»лар топилади. Лекин уларнинг кўпчилиги дostonнинг кўп қисмини унутиб юборган бўлиб, ундан айрим эпизодлар, шеър-қўшиқларни биледи, холос. Ҳозирги «ёзичи»лар орасида Абдулла қори Худоёров ва Соли қори «Ёзи билан Зебо» дostonини тўла билишлари билан ажралиб турадилар.¹ «Ёзи билан Зебо» дostonини хотинқизлар ҳам яхши билган. Ана шундай аёл бахшилардан бири Шарофатхон Каримова Ўнҳаят қишлоғининг Эчки маҳалласида истиқомат қилади.

Юқорида кўрсатиб ўтганимиздек, «Ёзи билан Зебо» дostonни, айниқса, Наманган туманининг Хонобод, Катта Тошбулоқ ва Кичик Тошбулоқ қишлоқларида кенг тарқалган. Хонободликлар орасида, хусусан, Отавали Усмонов дostonни тўлароқ билиши билан ажралиб туради. Тошбулоқлик кексаларнинг айтувича, бу қишлоқда ўтмишда «Ёзи билан Зебо»ни биладиган кўп бахшилар бўлган.² Чунончи, Нурматёзи (бундан 40 йилча илгари вафот этган) деган бахши ўтган бўлиб, унинг ўғли Эрмат ҳам «Ёзи билан Зебо»ни куйлаган, шунинг учун уни халқ «Эрмат ёзи» деб атаган.

Шу кичиктошбулоқлик Жўрабой бува ҳам «Ёзи билан Зебо»ни куйлаб юрган, ҳозир эса кексалиги туфайли унутиб юборган

¹ Абдулла қори 1904 йилда туғилган бўлиб, «Ёзи ва Зебо»ни Эргаш ёзичидан ўрганган. Ўзининг айтувича, у «қуймақулоқ» бўлгани учун, дostonни тезда ёдлаб олган ва ҳозир ҳам тўла биледи.

² Тошбулоқликлар Кичик Тошбулоқ билан Катта Тошбулоқ ўртасидаги булоқни (катта йўл бўйида) Ёзи буванинг булоғи, деб атайдилар. Гўёки, Ёзи Тошбулоққа қовун экиб, уни суғориш учун шу ердан ҳозирги булоқни қовлаб сув чиқарган экан.

(ҳозир у 73 ёшда). Жўрабой буванинг айтувича, Абдухалил сўфи (ҳозир ҳаёт) ҳам кўйлаб юрган. Абдухалил сўфи эса Абдурахмон сўфидан ўрганган. Шу кишлоқлик Ҳожимамаат Пирматов эса дostonни ҳаммадан яхши билади, чунки у кўймақулоқ. Абдухалил сўфининг айтувича, Кичик Тошбулоқда Йўлдош ёзи деган киши ўтган бўлиб, у «Ёзи билан Зебо»ни жуда кийкириб айтаркан. Каттатошбулоқ ва кичиктошбулоқликлар орасида «Ёзи билан Зебо»ни тўла биладиган бахши топилмади. Улардан Маманазар Исроилов (сувчи бўлиб ишлайди, ҳозир 64 ёшда)дангина дostonнинг қисқача сюжети ва унинг хотирасида қолган ўринлари ёзиб олинди.¹

«Ёзи билан Зебо» дostonининг кўлимизда мавжуд бўлган Наманган вариантлари орасида, айниқса, янгиқўрғонлик Олимбой Сойиббоев, Ҳожиакбар Кўчумов ва Шерзода (Дехқонбой Баҳромов)лардан ёзиб олинган вариантлари тўла ва мукамаллиги ҳамда характерли хусусиятлари билан ажралиб туради. Шунинг учун дostonнинг шу вариантлари устида кўпроқ тўхтаб ўтишни лозим топдик.

Олимбой Сойиббоев Янгиқўрғон туманининг Бирлашган кишлоқ фуқаролар йиғинидаги Хўжашўркент кишлоғида 1897 йилда камбағал дехқон оиласида туғилган. Ҳозир у шу кишлоқда яшайди. Олим шоир ўз ҳамкишлоқлари орасида уста «ёзичи» бахши сифатидагина эмас, уста ўланчи шоир сифатида ҳам машҳур. Унинг айтувига қараганда, «Ёзи билан Зебо»ни ўз тоғаси Маҳмудбой Исабой ўғлидан ўрганган. Ўланларни эса ҳамкишлоқ ўланчилардан ва кўшни қирғизистонлик шоирлардан ўрганган.

Ҳожиакбар Кўчумов эса 1899 йилда Янгиқўрғон туманининг Бирлашган кишлоқ фуқаролар йиғинидаги Бекобод кишлоғида камбағал дехқон оиласида туғилган, жамоа хўжалиги раҳбар ходимларидан бўлиб, ҳосилот, фуқаролар йиғинининг раиси ва мироб бўлиб ишлаган, ҳозир эса боғбондир. Ҳожиакбар ака «Ёзи билан Зебо»ни бекободлик Карим оксоқолдан ўрганган.

¹ Маманазар Исроилов «Ёзи билан Зебо»дан ташқари «Алпомиш»ни ва «Гўрўғли» циклидаги айрим дostonларни ҳам билади, аммо уларнинг шеърый қисмини билмайди. Уларни эртатка ўхшатиб айтади, дўмбира чертишни билмайди, бирмунча саводсиз.

Карим оксоқол Ҳожиакбар аканинг айтувича, «байтнинг (эртакнинг) уяси» ҳам бўлган. Карим оксоқол эса «Ёзи билан Зебо»ни Мамалатифбойдан ўрганган. Мамалатифбой ҳам бекободлик бўлган. Ҳожиакбар аканинг маълумотига қараганда, Бекободнинг ўзида бир неча авлоддан «ёзичи»лар етишиб чиққан.

«Ёзи билан Зебо» достонини тўла билувчи халқ шоирларидан яна бири Шерзода (Деҳқонбой Баҳромов) 1903 йилда Янгикўрғон туманининг Ўнҳаят қишлоғида туғилган, саводи бор. У «Ёзи билан Зебо» достонидан ташқари кўпгина халқ эртакларини ва латифаларини ҳам билади.

Шу нарса характерлики, Бекобод ва Хўжашўркентга жуда яқин бўлган қўшни қишлоқларнинг бирортасида ҳам «Ёзи билан Зебо»ни биладиган халқ ижодчиси топилмади. Масалан, шу икки қишлоққа яқин Ғовозон қишлоғида анчагина машҳур достончи Ҳайдар санновчи ва бир неча ўланчи шоирлар яшайди. Ҳайдар санновчи ўндан ортиқ халқ достонларини ва кўпгина халқ эртакларини билади, аммо «Ёзи билан Зебо»ни билмайди. «Ёзи билан Зебо» достонини куйловчи «ёзичи» достончилар эса, Ҳайдар санновчи куйлайдиган «Алпомиш», «Гўрўғли», «Рустамхон», «Юсуф-Аҳмад» каби қаҳрамонлик характеридаги достонларни бутунлай билмайдилар.

Яна бир характерли факт шундан иборатки, «Ёзи билан Зебо»ни куйлайдиган кишилар баланд ва юксак овозга эга бўлишлари, уларнинг овози бир қишлоқдан иккинчи қишлоққа етиб борадиган даражада бўлиши, халқ ибораси билан айтганда «жуда қийқириб айтадиган» бўлишлари керак. Бундан ташқари, кучли хотирага ҳам эга бўлишлари зарур. Чунки «Ёзи билан Зебо» бошқа халқ достонлари сингари дўмбира ёки бирор мусиқа асбоби жўрлиги остида айтилмайди. Маълумки, мусиқа асбоби ва куй достон куйлашда жуда катта роль ўйнайди, у куйланаётган достон руҳини, унда олға сурилган ғоя ва фикрларни ифодалашда бахшига катта ёрдам бериш билан бирга, куйланаётган достоннинг эпизод ва мисраларини изчил равишда хотирага туширишда ҳам бахшига катта ёрдам беради.

Яна шу нарса характерлики, достонлар ва эртаklar, умуман, халқ ижоди асарлари ишдан кейин, ёзги дала ишлари тугаган

пайтларда, кўпинча киш оқшомларида, тўй-томошаларда, турли йиғин-маросимларда ижро этилади. «Ёзи билан Зебо» достони эса Фарғона водийсининг бу дoston тарқалган туманларида иш вақтида, кўпроқ шоли ўтоғи даврида, кейинчалик эса Катта Фарғона канали ва Шимолий Фарғона канали каби халқ иншоотлари қурилишларида ҳам меҳнатни енгиллаштириш мақсадида бевосита меҳнат жараёни давом этаётган даврда ижро этилган.

Филология фанлари номзоди О. Собировнинг кўрсатувида, «Ёзи билан Зебо» достони Қашқадарё ва Сурхондарё томонларида эса, кўш ҳайдаган паллада ёки ғалла ўриш даврида ижро этилган. Бу асарни ижро этувчиларнинг гувоҳлик беришларига қараганда, бир киши отга миниб, бугдой ўраётган ўроқчиларнинг олдига тушиб олади ва баланд овоз билан ҳеч қандай мусиқа асбобисиз маълум бир оҳангда куйлайди.¹ «Ёзи билан Зебо» достонининг бундай тарзда ижро этилиши халқ ижоди асарларининг меҳнаткаш халқ ҳаёти билан, унинг ҳатто меҳнат қилиш жараёни билан чамбарчас боғланганини кўрсатади.

Ўзимиз томонимиздан тўпланган ва ёзиб олинган «Ёзи билан Зебо» достонининг вариантлари, шунингдек Ўзбекистон Фанлар академияси Тил ва адабиёт институтининг фольклор сектори архивида сақланаётган «Ёзи билан Зебо» достонининг вариантлари шуни кўрсатадики, «Ёзи билан Зебо» достони маълум бир туманлардагина эмас, балки Ўзбекистоннинг турли жойларида тарқалган. Бу дoston кўпроқ Сурхондарё вилоятида, Бухоро ва Андижон вилоятининг айрим туманларида, шунингдек, кўшни Қирғизистоннинг Ўш вилоятидаги ўзбеклар яшаб турган ҳудудларда ҳозирга қадар сақланиб қолган [...].

«Ёзи билан Зебо» ўзбек халқининг ишқий дostonларидан саналади. Шунинг учун ҳам Ёзи билан Зебонинг бир-бирига чин ва самимий муҳаббати, садоқати ва фидокорликларини ҳикоя қилиш дostonда асосий ўринни эгаллайди. Дostonнинг бизга маълум бўлган ҳамма вариантларида Ёзи камбағал, етим чўпон йигит, тул хотиннинг ўғли сифатида берилади. Ёзининг ёшлик ва болалик йиллари мулла Ортиқнинг кўйларини боқиш билан ўтади. Очлик

¹ Собиров О. «Ёзи билан Зебо» достони ҳақида // Ёзи билан Зебо. – Тошкент: «Ёш гвардия» нашриёти, 1962. – 5-бет.

ва хору зорлик билан ўсади. Шунга қарамай, Ёзи жуда чиройли, Ўнҳаят вариантида кўрсатилганидек, куёшдай гўзал, арслондек кучли йигит бўлиб етишади. Достоннинг ҳамма вариантларида ҳам Ёзининг тилла кокил билан туғилган ғоят чиройли йигит эканлиги, аммо онаси кўзикиб кетмасин, деб унинг бошига кўй қорнини кийгизиб, Ёзини кал қиёфасига киритиб қўйганлиги айтилади.

Ёзининг Зебога бўлган чинакам меҳр-муҳаббати достонда характерли эпизодлар орқали ажойиб равишда ифодаланган. Ёзи Зебо учун қуриб-қақраб ётган Тошбулоқнинг тошини битталаб териб ташлаб, Сариқ чашма бўйига сув чиқаради ва қовун экади. Қовунни пишириб Зебо ёрига тайёрлаб кўяди ва унинг келишини кутиб турар экан, «Қовун-палагига тушган шудринг сувини икки кун қовун косага қокиб қуйиб қўйган экан, Зебо ёрим келса, қўлларини ювади деб».¹

Ёзининг Зебога бўлган ҳақиқий ишқ-муҳаббати унинг Зебога айтган қуйидаги юрак сўзлари орқали ҳам моҳирона ифодаланган:

*Дарёнинг ул юзида кўрдим сизни,
Муҳаббат ишқи билан севдим сизни.
Муҳаббат ишқи билан севмай нетай,
Кичкинамда кўз очиб кўрдим сизни.²*

Ёзи образи орқали кишининг қадру қиммати унинг ҳақиқий инсоний сифатлари ифодаланган. Ёзи чўпон йигит, қашшоқ тул хотиннинг ўғли бўла туриб, бой мулла Ортикнинг қизи бўлмиш Зебони севгани учун таҳқирланади, унинг бошига йўқчилик туфайли кўп кулфатлар тушади [...].

«Ёзи билан Зебо» достонида Ёзи ҳақиқий ошиқ йигит сифатидагина эмас, балки ақлли ва доно йигит, ажойиб импровизатор шоир-суханбоз йигит сифатида ҳам тасвирланади. Ёзи кўрган-кузатган киши, ҳодиса ва нарсалар ҳақида дарҳол шеър тўкиб юборади: «Ёзи Зебонинг лабидаги анорнинг донасидай холига қараб бир сўз деди:

¹ «Ёзи билан Зебо» (айтувчи Холмирза Худойберганов), 16-бет.

² «Ёзи билан Зебо» (айтувчи Олим Сойиббоев), 37-бет.

*Кулоч ёздим отгинангнинг ёлига,
Кўзим тушиди лабгинангнинг холига.
Сотар бўлсанг, айтгин холинг баҳосин,
Сотиб олай Бадахшоннинг молига.¹*

Ёки:

*Оқ юзинг, қизил юзингдир беназир,
Икки юзинг мисли олмадай қизил.
Қараб турсам бари ҳуснинг жобажой,
Тишгинанг султону, лабгинанг вазир.²*

Ёзи беозор ва раҳмдил инсон, олиҳиммат киши ва баҳодир йигит сифатида ҳам тасвир этилади: «Олтита йигит... Ёзининг Зебоникига кирганини кўриб: – Энди бу йигит Зебохонни олар экан-да, биз шу ерда туриб қуруқ қолар эканмиз-да, бу йигитни ўлдирмасак, бўлмас экан, деб Ёзининг орқасидан босмачилик қилиб пойлаб келган экан. Улар Ёзи ётган ерга бостириб кириб, Ёзининг устига чиқиб олди. Ёзи ётган ерида: – Йигитлар, бу ҳазилингизми, чинингизми? – деди. Йигитлар айтди: – Сени ўлдириб, Зебохонни олиб кетгани келдик. Ёзи олтита йигитни бир қавзам қилиб босди, ўрнидан турди. Шунда йигитларни бир қўлида босиб туриб, – Ҳеч киши қочиб қутулмайди Ёзининг чангидан (чангалидан), деб уларни қўйиб юборди. Йигитларни от ечишга ҳам дармони қолмабди».³

Шундай қилиб, Ёзи образи орқали самимий севги, меҳнатсеварлик, баҳодирлик каби энг яхши инсоний фазилатлар ҳамда дўстлик ғояси олға сурилган. Зебо образи орқали эса аёлларга хос бўлган энг яхши инсоний хислат-фазилатлар куйланади. Зебохон, бошқа дostonларимиздаги аёллар сингари, аввало, ғоятда гўзал, тенги йўқ чиройли қиз сифатида тасвир этилади [...]. Зебонинг ҳусни дostonнинг бир вариантыда: «Ой деса юзи бор, кун деса кўзи бор, тишлари дурдона, қошлари қалам, кўз-

¹ «Ёзи билан Зебо» (айтувчи Олим Сойиббоев), 35-бет.

² «Ёзи билан Зебо» (айтувчи Олим Сойиббоев), 32-бет.

³ «Ёзи билан Зебо» (айтувчи Олим Сойиббоев), 49-50-бетлар.

лари эса шамчирокка ўхшайди»¹ деб таърифланади. Достоннинг бошқа бир вариантыда эса Зебонинг чиройи муболағавий тарзда: «Зебижонни булбул кўриб, беш минут хушидан кетиб колди: «Одам ҳам шундай чиройли бўладими?»² деб тасвир этилади. Яна бир вариантыда эса «Қиз кўп чиройли экан, уни етти қават парда ичида онаси тарбиялар экан»,³ деб таъриф қилинади [...].

Зебо образининг характерли томони шундаки, у садоқатли ва вафодор маъшуқа бўлиш билан бирга, ўз севгиси ва бахти учун мардона курашувчи жасур қиз образи ҳамдир. У Ёзижоннинг дорга осилиши ҳақидаги шум хабарни эшитар экан, йиғлаб-сиқтаб, паст толедан нолиб ўтирмайди. Дарҳол эркак либосини, отасининг чакмоқ телпагини кийиб, саман йўрғага миниб, севимли ёрини дордан кутқаргани ўзи жўнайди.⁴ Зебонинг вафодор ва фидокор ёр эканлиги достоннинг Ўнҳаят вариантыда яна ҳам кучли ифодаланади. Зебожон отаси таклиф қилган шоҳ Аббосга эрга чиқишга унамагани ва:

*Севганим асли бир ёр, ўзга бир ёр демасман,
Унинг учун бошим қурбон, яна дилдор демасман.
Ҳар ким топган ўзига, у менга кор демасман,
Ёрим олдимда ҳозир, мен бошқа ёр демасман,⁵ –*

дегани учун уни Ёзи билан бирга чўл-биёбонга ҳайдаб юборадилар. Шунда ҳам Зебо Ёзига бўлган севгисидан воз кечмайди. Ранжу машаққатларни у билан бирга баб-баравар тортишади. Ҳатто шоҳ Аббос бир тул хотин қўли билан Ёзини захарлаб ўлдиргач, Зебо ҳам Ёзи ичган захар солинган сутни ичиб, ўша куни ўлади ва бу билан ўзининг Ёзига бўлган самимий муҳаббати ҳамда садоқатини намоёиш қилади. Бу жиҳатдан Зебо образи ўзбек халқи яратган Ойбарчин, Интизор, Далли, Холбека каби образларга, шунингдек, улуг ўзбек шоири Алишер Навоий ярат-

¹ «Ёзи билан Зебо» (айтувчи Шерзода), 5-бет.

² «Ёзи билан Зебо» (айтувчи Холмирза Худойберганов), 5-бет.

³ «Ёзи билан Зебо» (айтувчи Ҳожиакбар Кўчумов), 3-бет

⁴ «Ёзи билан Зебо» (айтувчи Шерзода), 26-28-бетлар.

⁵ «Ёзи билан Зебо» (айтувчи Шерзода), 44-бет.

ган Ширин ва Лайли образларига жуда яқин туради, тўғрироғи, шу ажойиб образлар қаторига киради.

«Ёзи билан Зебо» достони ўз образларининг пухта ва пишиқ ишланиши билангина эмас, балки бадий содда ва образли тилда ижод этилганлиги билан ҳам характерлидир. Достоннинг бадий ва образли тилда ижод этилганини, айниқса, унинг назмий қисми мисолида кўриш мумкин. Достонда олға сурилган ғоя ва фикрларни, шунингдек, тасвир этилган ҳаёт ва унинг картиналарини жонли ва образли қилиб тасвир этиб берувчи образлар, уларнинг ички дунёси ва маънавий қиёфасини, руҳий кечирмаларини, характер ва табиатини конкрет ҳис этадиган даражада ифодаланган. Зебонинг қадди-қомати келишган гўзал ва чиройли қиз эканлиги, яъни унинг бадий портрети ҳамда Ёзининг Зебога чексиз ва самимий муҳаббати эпитет, ўхшатиш ва метафора каби бадий тасвирлаш воситалари орқали образли қилиб шундай моҳирона тасвирлаб берилган:

«Зебонинг Ёзидан мундоқ қараса, Зебонинг мунчоқ-мунчоқ терлабдики, худди қизил гулга шабнам тушгандай бўп турибди. Ёзидан Зебонингга қараб бир сўз деб турибди:

*Қора зулфинг оқ юзингга беназир,
Икки юзинг мисли олмадай қизил.
Қараб турсам бари ҳуснинг жо-бажой,
Тишгинанг – султону, лабгинанг – вазир.⁶*

Достоннинг яна бир бошқа вариантида Зебонинг портрети эртақларга хос традицион бадий тасвирлар воситасида шундай чизилади: Зебонинг «Ой деса юзи бор, кун деса кўзи бор, тишлари дурдона, қошлари қалам, кўзлари эса шамчирокқа ўхшайди». Ёзининг бадий портрети орқали унинг гўзал ва чиройли йигит эканини кўрсатиш билан бирга, ақлли ва доно йигит, мард ва баҳодир йигит эканлиги ҳам ифодалаб берилган: Ёзи «пешонаси кенг, кўллари очик, сочлари кўнгирак, мисли арслонга ўхшайди.⁷ Ёзи билан Зебонинг ажойиб ҳусни-жамоли муболага воситасида

⁶ «Ёзи билан Зебо» (айтувчи Ҳожнақбар Кўчумов), 56-бет.

⁷ «Ёзи билан Зебо» (айтувчи Шерзода), 5-бет.

шундай тасвир этилади: «Бир-бирларига қараб ҳуснларини томоша қилиб ўтиришибди: Уларнинг ҳуснига уй ўн биринчи чирог ёритгандай ёруғ бўлиб турибди.¹

Достонда образлар характери ва руҳий ҳолатини кўрсатишда халқ ибораларидан фойдаланиб яратилган бадиий тасвирлаш воситалари ҳам анча топилади. Чунончи, «ўз уйига Абдуллахон келаётганини эшитган мулла Ортиқ тухумлайдиган товукдай патиллаб жой ҳозирлади.² Онанинг ўғли Ёзига бўлган оташин меҳр-муҳаббати ҳамда у билан фахрланиши ва қувончи куйидаги метафора воситасида жуда яхши ифодаланган: «Онаси Холбуви ўғлининг ҳолини кўриб. – Қўл-қанотим, азиз фарзандим, давлатим ва ҳаётим, яккаю ягонам ўзингсан», – деди.³ Ёзининг Зебони кўролмайдиган азорларини чекиши ҳам метафора орқали жуда яхши чизиб берилган: «Ёзижон... гамгин бўлиб, муҳаббат булоғи жўш уриб, касалланиб қолди».⁴ Достон тилининг образли ва поэтик тил эканлигини кўрсатувчи бундай мисолларни кўплаб келтириш мумкин.

«Ёзи билан Зебо» достони ҳам бошқа ўзбек халқ достонлари сингари наср ва назм билан ёзилган бўлиб, унинг, айниқса, назм қисми пухта ва пишиқ ишланган. Достондаги шеърини мисралар ўйноқи ва равонлиги, музикийлиги билан ажралиб туради:

*Зебожоннинг боғи бор, боғбони йўқ,
Зебожоннинг дарди бор, дармони йўқ.
Зебожоннинг боғига боғбон бўлай,
Зебожоннинг дардига дармон бўлай.⁵*

Ёки:

*Бўз кийик қайда юрар тоғ бўлмаса,
Қизил гул қайда битар боғ бўлмаса?
Мард йигит қайдан олур севганини,
Олдида ҳайдайдиган мол бўлмаса.⁶ [...].*

¹ «Ёзи билан Зебо» (айтувчи Олим Сойиббоев), 46-бет.

² «Ёзи билан Зебо» (айтувчи Ҳожиакбар Кўчумов), 40-бет.

³ «Ёзи билан Зебо» (айтувчи Шерзода), 17-бет.

⁴ «Ёзи билан Зебо» (айтувчи Шерзода), 17-бет.

⁵ «Ёзи билан Зебо» (айтувчи Ёқуббой ота), 15-бет.

⁶ «Ёзи билан Зебо» (айтувчи Ёқуббой ота), 19-бет.

Достоннинг шеърий қисми қофияларининг тўқ ва жарангдор бўлиши, мазмундор радифларга бой бўлиши билан ҳам диққатга сазовордирки, буни қуйидаги бир-икки банднинг ўзи яққол кўрсатиб беради:

*Бир пари кўрдимки, анвар дейдилар,
Хуснини моҳи мунаввар дейдилар.
Ётиб эдим Тоатиннинг сойида,
Нега ётдинг, ўтди дилбар дейдилар.¹*

Одатда, ўзбек халқ достонларининг назм қисми 7–8 ва 11 ҳижоли бармоқ вазнида тўқилади. «Ёзи билан Зебо» достони назм қисмининг барча мисралари эса 11 ҳижоли бармоқ вазнидагина айтилган бўлиб, 7–8 ҳижоли мисралар эса «Ёзи билан Зебо»нинг Наманган вариантларида бутунлай учрамайди.²

«Ёзи билан Зебо» достони учун асосий ва етакчи гоя самимий инсоний севги, севгида садоқат ва фидокорлик, мардлик ва меҳнатсеварликни улуғлашдир. Шунинг учун «Ёзи билан Зебо» достони ҳам «Алпомиш», «Гўрўғли», «Рустамхон», «Кунтуғмиш» ва «Орзигул» достонлари қаторида асрлар давомида халқимиз орасида яшаб келмоқда, унинг кўпгина шеърий бандлари йигит ва қизларимиз томонидан ҳозирги кунларда ҳам халқ қўшиқлари қаторида қуйланмоқда. «Ёзи билан Зебо» достони ҳам ижодкор халқимиз томонидан яратилган бой маданий мероснинг бошқа намуналари қаторида ўзининг зўр илмий-маърифий ва тарбиявий қийматини бундан кейин ҳам йўқотмайди, халқимизга маънавий куч бахш этади.³

¹ «Ёзи билан Зебо» (айтувчи Олим Сойиббоев), 30-бет.

² Шерзода оғзидан ёзиб олинган Ўнҳаят вариантининг мисралари эса кўпроқ 12 ҳижоли бармоқ вазнида тўқилган.

³ Мақола қуйидаги манба асосида чоп этилмоқда: Т. Ғозибоев. «Ёзи билан Зебо» достонининг Наманган вариантлари // Наманган давлат педагогика институтининг илмий асарлар тўплами. – Наманган, 1964, 110–121-бетлар.

Ғани
ЖАҲОНҒИРОВ
(1925–1995)



Ғани Ахрорович Жаҳонгиров 1925 йил 5 февралда Пржевалск шаҳрида туғилган. Ўрта Осиё давлат университетининг филология факультетида, Низомий номидаги Тошкент давлат педагогика институти аспирантурасида ўқиган. Ўзбек матбуоти соҳасида хизмат қилган (1946–61). Ўзбекистон Ёзувчилар уюшмасининг котиби, Телевидение ва радио эшиттиришлар Давлат қўмитаси раисининг ўринбосари, Алишер Навоий номидаги Адабиёт музейи директорининг муовини, Ёш томошабинлар театрининг директори, Адабиёт жамғармасининг бошлиғи (1961–75), ЎзР ФА Тил ва адабиёт институти Фольклор бўлимининг катта илмий ходими (1976–86), Абдулла Қаҳҳор уй-музейининг директори (1986–88). «Ўзбек болалар фольклори» мавзuida номзодлик диссертациясини ҳимоя қилган (1973). «Болалар эртаклари» (1972), «Ўзбек болалар фольклори» (1975), «Минг бир бола ўйини» (1978) каби китоблари чоп этилган. 3 жилдли «Ўзбек фольклори очерклари» (1988–89) ҳамда ўзбек халқ мақолларининг 2 жилдли академик нашрини (1988) тайёрлаида иштирок этган. 1995 йили Тошкентда вафот этган.

БОЛАЛАР ТОПИШМОҚЛАРИ

Топишмоқлар бола тақдирида муҳим ўрин тутган, боланинг интеллектуал ўсишида фаол иштирок этадиган, халқ педагоғи-

касининг кўшиқлар, эртақлар сингари, ўз хусусиятлари билан улардан фарқ қиладиган поэтик, ақлий машғулотларидан биридир.

Барча хилдаги қомуслар, луғатлар топишмоқларнинг фольклорнинг кенг тарқалган, энг оммавий жанрларидан эканлигини эътироф қиладилар.

Ўзбек халқи тарихида қадим замонлардан бери топишмоқ бор, бундан 900 йил илгари ёзилган Маҳмуд Кошғарийнинг «Девону луғотит турк» асарида ҳам топишмоқларнинг маҳаллий қабилалар орасида айтилиб юриши тилга олинади. Девонда топишмоқ «табзуғ» деб аталган¹. Ҳозирда эса топишмоқ сўзининг – тапишмачоқ, топмача, жумбоқ, чўпчак, топар чўпчак, топ-топ чўпчак, чистон, матал, топ-топ матал, муаммо, масала, ушук (шук), луғз² сингари сўзлар билан аталиши, асосан, бир маънода – маълум бир предметнинг, ҳодисанинг белгиси, сифатлари ва хусусиятларини иккинчи бир нарсага ишора, рамз орқали ўхшатилиши ва уни топиш, ечиб бериш маъноларини англатади. Одатда топишмоқ, жумбоқ терминлари – ўзбек халқ оғзаки ижодиётида, чистон, муаммо, мувашшаҳ деб аталиши эса ёзма адабиётда, хусусан, ўзбек мумтоз адабиётида қўлланиб келинади.

Ўзбек халқининг топишмоқлари шу халқнинг қадимий маданияти, тили, тарихи ва этнографиясини, кишиларнинг ўша даврдаги диди, дунёқарашларини ўзида акс эттирадилар. Топишмоқ айтишнинг қадимдан борлиги, халқнинг севимли машғулотларидан бири эканлиги сон-саноксиз эртақларда, қизларнинг йигитларга, шоҳларнинг чўпонларга топишмоқ айтиб жавоб кутишларида ҳам кўриниб туради. Халқимизнинг қаҳрамонлик ва ишқий-романтик дostonларида ҳам қаҳрамонлар топишмоқларга жавоб топиш билан, жумбоқларни ечиш билан мурод-мақсадларига етишадилар.

¹ Маҳмуд Кошғарий. Девону луғотит турк. Уч томлик. 1-том. – Тошкент, 1960. 429-бет.

² Ҳусаинова З. Ўзбек топишмоқлари. – Тошкент, 1966; Ҳотамов Н.Т. Адабиётшуносликдан қискача русча-ўзбекча терминологик луғат. – Тошкент, 1969. Адабиётшунослик терминлари луғати. Н. М. Маллаев таҳрири остида. – Тошкент, 1967.

Топишмоқлар кишилар, ейимлик – овкатлар, кийим-ке-чаклар, тураржойлар, уй-рўзғор ашёлари, қушлар, ҳайвонлар, ўсимликлар, Ер, Ой, Куюш ва юлдузлар, ёруғлик ва қоронғулик, иссиқлик ва совуқлик, кишиларнинг ҳунармандчилиги, табиат ҳодисалари ва бошқа турли хил ҳодисалар ҳақида бўлади. Топишмоқларда кишиларни қуршаб турган олам доимо ривожда, ҳаракатида бутун ранг-баранглиги билан намоён бўлади. Болалар топишмоқларни топишда катнашар экан, ўзини қуршаб турган оламни қузатишга, табиат ҳодисаларини билиб олишга, уларга бўлган ўз муносабатини билдиришга ўрганадилар. Топишмоқни топиш боладан анчагина билим талаб қилади. У буни кўпчилик билан, топишмоқнинг иккинчи қисмини – давомини ташкил қилган – жавобини топиш жараёнида ҳосил қилади. Топишмоқлар бола хотирасини мустаҳкамланишида, боланинг дидини ўстиришда, завклантиришда муҳим роль ўйнайди. Ҳар бир яратган топишмоқларни шу халқнинг урф-одагларини, у яшаган географик шароитларни, байрам ва маросимларини, иш қуроллари ва уларга муносабатларини, тили, эртақларини, поэзияси ва мақолларини билмай туриб тушуниш қийин. Топишмоқлар шакли ихчам, мазмунан теран, поэтик жиҳатдан гўзал бўладилар.

Ўзбек топишмоқчилигини ўрганиш учун қадим шарқ топишмоқчилигини, ақалли Осиё ва Европа топишмоқчилиги мактабларини яхши билмоқ керак. Қарийб юз эллик йиллик тарихий тажрибага эга бўлган рус фольклоршуносларининг илмий хулосалари бизга қимматли методологик ва назарий мактаб ҳисобланади. Рус болалар фольклорини ўрганувчилардан Г. С. Виноградов болалар топишмоқларини ёзиб олишнинг аҳамиятини, айниқса, топишмоқларнинг сўз ўйинларига асосланган жавобларини ҳам ёзиб олиш зарурлигини уқтиради. О. И. Капица топишмоқлар болаларга катталардан ўтади, деган эди. У топишмоқларга юксак баҳо бериб: «Топишмоқларнинг мазмуни жуда катта қўламдаги ҳам моддий, ҳам маънавий дунёни ўз ичига қамраб олади»¹, дейди.

Ўзбек халқининг топишмоқларини тўплаш ишлари ўтган асрнинг охирларида бошланган. Биринчи ўзбек фольклористлари –

¹ Капица О. П. Детский фольклор. – Л., 1928. с. 170–172.

Ғози Олим, Ҳоди Зарифовлар ўзбек халқ кўшиқлари, мақоллари, эртаклари, дostonлари қатори халқ топишмоқларини ҳам тўплашда, нашр қилдиришда раҳбарлик қилдилар. Кейинги йилларда бир неча топишмоқлар тўпламлари нашр қилинди. Бу ишда Ҳоди Зариф, Н. Розмуҳамедов, Ў. Холматов ва бошқа олимларнинг ишлари диққатга сазовордир. Топишмоқлар газета ва журналларда тез-тез босилиб турибди.

Фольклорист, филология фанлари номзоди Зубайда Ҳусаинова ўзининг ўзбек халқ топишмоқларининг асосий хусусиятлари ва манбалари соҳасидаги қимматли илмий ишида ва «Ўзбек топишмоқлари» номли китобида топишмоқларнинг тарихий тақдири, унинг турли баҳрларини чуқур назарий тадқиқотлар асосида очиб беради, топишмоқларни ўрганиш юзасидан қимматли методологик хулосалар чиқаради. Тадқиқотчи топишмоқларнинг асосий хусусиятларини қуйидагича белгилайди:

– баъзи бир топишмоқлар бир неча предметларни ўз ичига олади. Масалан, «Узун терак, ичи ковак» дейилганда кишилар камиш, милтиқ, мўри деб тушунишлари мумкин;

– айрим топишмоқлар бирлашиб бир предметли ёки кўп предметли бир бутун топишмоқ ҳосил қилади. Бунга соя ҳақидаги топишмоқлар мисол бўла олади;

– баъзан битта топишмоққа бирлашиб бир неча топишмоқ берилиши мумкин;

– фақат сўроқдан иборат топишмоқлар ҳам бор: «Дунёда тўртта нарса йўқ?» ва ҳоказо;

– баъзан топишмоқдаги сўроқ унинг объекти тилидан айтилади.

– топишмоқнинг сўроқ-жавобли – диалог шаклида тузилган хили ҳам бор. Одатда, буларнинг жавоблари ҳам шу формада айтилади;

– санок сонлар предметларнинг нормалари билан кўшилиб жумбоқланган топишмоқлар ҳам бор: «Бирим – билак, икким – элак...» каби;

– ниҳоят айрим топишмоқлар сонлари ҳисоблаш асосида тузилган бўлади. Бунга – «Бир тўда ғоз...» топишмоғи мисол келтирилади.

Бу қонуниятлар, умуман, ҳамма топишмоқларга хос. Биз бундан болаларнинг савиясига қараб, соддаликдан аста-секин мураккабликка чиқиш, кичик-кичик, эса олиб қолиш осон бўлган топишмоқларни, кам элементли топишмоқларни болаларга гақдим қилиш тарафдоримиз. Бунинг устига, топишмоқ бола назарида ўйин, бас шундай экан, ўйинга хос барча ритуалларга риоя қилиш, эртак олди, эртак охири сўзларга ўхшаш топишмоқларни ҳам алоҳида темпада, «сирли» қилиб, болаларнинг фикрини бир жойга тўплаб туриб айтиш керак. Бу қоидалар ичида, илгарилари тополмаган болаларнинг «шаҳар бериш» одатлари ҳам бор эди. Бу ибора, албатта, болаларга катталардан ўтган эди. Ҳозир унинг аҳамияти йўқолиб бормоқда. Аммо унинг ўрнини босадиган, топишмоқ топувчини рағбатлантирадиган, тополмагани «жазолайдиган» критериялар бизнинг вақтимизда турмушга кириб келмоқда. Бу кўпинча ўйин бошқарувчининг «ихтироси»га, «топоғонлиги»га қараб бўлади.

Иккинчи бир аҳамият берилиши керак бўлган масала, топишмоқларнинг мавзуйидир. Турган гап, халқларнинг яшаш шароитлари, уларнинг кун кечириш йўсинлари топишмоқларнинг тематикасига замин бўлиб келган эди. Рус халқларининг топишмоқларида кўпинча улар яшаб турган жойлардаги дарёлар, рус ўрмонлари, ўрмон ҳайвонлари ўз аксини топган. Ўрта Осиё, жумладан, ўзбек халқининг топишмоқларида эса шу халқларнинг касб-кори билан боғлиқ бўлган машгулотлар, улар етиштирган зироатлар, уларнинг ишлаб чиқариш қуроллари, уй ҳайвонлари, иссиқ юртларга хос паррандалар тез-тез учраб туради. Масалан, ўзбек халқининг асосий касби – пахтачилик билан боғланган ўнлаб топишмоқлар бор. Улар турли даврларда бир мавзунинг ўзига бир неча хил қарашлар ифодаланган топишмоқлар бўлиб жумбоқланганлар. Мисол тариқасида пахта ҳақидаги топишмоқлардан атиги иккитасини келтирамиз:

*1. Чин қушим, чинни қушим,
Чин дарахтга қўнди қушим.
Оёғига ҳасса қўйиб –
Томошани қилди қушим.*

*2. Оқ гулим – оппоқ гулим,
Ушлаб кўрсам, юмишқ гулим.
Териб хирмон қилган эдим,
Бўлиб кетди тоғ-тоғ гулим.*

Пахта ўзбек халқининг миллий ифтихори, узоқ замонлардан бери экиб ундириб келаётган техника экини. Пахтанинг толаси – кийим, чигити – ёғ, ғўзапояси ўтин бўлган. Бироқ, пахтачилик илмий асосларда олиб борилганда – поялари ингичка, говлаб кетган, шохларида битта-яримта кичик кўсаклар илиниб турган ўсимлик кўз олдига келарди. Биринчи мисолдаги пахта тафсилоти ўша – қашшоқ тушунчани ифодалайди. Иккинчи мисол эса, ўзбеклар диёрида пахтадан рекорд ҳосил етиштирилиб, пахтакорларимизнинг номи-шуҳрати дунёга ёйилган замонларда юзага келган. Унда пахта ўсимлигини таърифлашга энг илик сўзлар ишлатилган, унинг ҳосили ҳам тоғлар билан таққосланган. Кўриниб турибдики, замон, муҳит талаби билан топишмоқлар ҳам тез-тез ўзгариб туради, янги давр кишиларининг қарашини, нуқтаи назарини ифодалайди. Айни вақтда ўтган замон топишмоқлари янги замон талабига, дидига жавоб бера олмаган тақдирда шафқатсиз инкор қилинади.

Бу фактни кўз олдига келтириш учун икки тўпламни қўлга олдик. Бири – 1929 йилда нашр қилинган Исмоил Орифий тўплаган «Ўзбек топишмоқлари» тўплами. Уларнинг жавоби мана бундай: маймун, қўл дўконининг мокуси, чарх дугининг тўлиши, элак, ун, сичқоннинг ини, чиғириқ, чигит, сумалак, тарнов, хум, тандир, кўприк, курбақа, ток, токнинг барги, чучвара, пичоқ чини, эгар, чилим, қалампир, нонпар, пакки, устара, ловия, ғалвир, ўргамчи, тўқима қўл дўкони (дастгоҳ), маҳси, ҳўкиз шохи, нўхат, пахтанинг чигит билан чикқани, чодир, соя, сув тегирмони, куви, ерни ҳайдайдиган тиш, қора майиз, кўпкари, сандали, кўкнор, ўра, азон айтган домла, ангишвона, кишан, нағал мих...

Иккинчи китобнинг тузувчиси Зубайда Ҳусаинова бўлиб, ундаги 42 топишмоқнинг жавоби шундай бўлган: пахта терадиган машина, анор, чумоли, тарвуз, ари, лавлаги, типратикан, эчки, лайлак, қўй, ит, арча, тухум, самовар, қозон-товоқ, игна, ип, элак, кулф, нарвон, ёзув, соат, дутор... Бу китобнинг анчагина долзарб мавзулар асосига қурилганлиги кўриниб турибди.

Ҳар иккала китоб – икки даврнинг кўзгусидек жамиятдаги кишилар турмуши ва онгининг ўсишидаги ўзгаришларни топишмоқ доирасида бўлса ҳам, акс эттирган. Фақат мазмунда эмас, ҳатто форма жиҳатдан ҳам бундай ўзгаришларни куза-

тиш мумкин, гарчи – элак, пахта, сув, тухум, ғалвир, соя, йўл ҳақидаги топишмоқларнинг тематик ўхшашлиги бўлса ҳам, уларнинг жумбоқланиш формаларида фарқ бор, икки хил замонда бир предметга икки хил таъриф берилган. Масалан, элакни қадимдан: Тап-тап этар, тагидан карвон ўтар, дейилган бўлса, янги китобда: Бир ўзи, бир ўзида минг кўзи, дейилган варианты келтирилади. Бугунги болага кейинги вариантни айтиш педагогик нуқтаи назардан тўғри бўлади.

Фақат бадиий жиҳатдан юксак, фикран теран, савия жиҳатдан ўз кучини сақлаб қолган топишмоқларгина кишилар оғзида айтилаверади: «Қозиқ устида қор турмас», «Зар гилам, зар-зар гилам, кўтарай десам, огир гилам» топишмоқлари ана шундай классик мисоллардир. Бундай топишмоқлар ҳозиргача ўқиш китобларида, турли тўпламлар шаклида, суратлар билан безатилиб босилиб турибди. Аммо атиги ўн йил илгари айтилиб юрган, лекин келиб чиқиши жиҳатидан неча юз йилликларнинг гувоҳи бўлган топишмоқлар энди эскириб қолганини И. Орифийнинг китоби мисолида ҳозиргина тилга олдик. Негаки, у топишмоқларнинг объекти бўлган турмушдаги кўп предметларнинг ўзлари кишиларнинг уйдан, ҳозирги шаҳар ва қишлоқлардан чиқиб кетдилар. Масалан, чилим, жинчирок, чарх дугиси, тўқима қўл дўқони, сандали, кўкнор, ўра, азон айтган домла, кавш, қишанларнинг нималигини бугунги болалар билмайди. Бунинг устига аввалги топишмоқларнинг жумбоқланиш усули, танланган сўзларнинг архаиклиги, ўхшатиш, истиоралар, мажозий иборалар ҳозирги кишиларнинг, хусусан, болаларнинг дидига тўғри келмайди. Аксинча, улоқтириб юборилган предметлар, машғулотлар ўрнини турмушимизни безатиб кириб келаётган фан ва техника янгиликлари – электр лампочка, китоб, радио, телевизор, автомашина, поезд, самолёт, спутниклар эгалламоқда.

Масалан, ҳозирда шаҳар болаларини ҳам, қишлоқ болаларини ҳам қизиқтираётган ишлаб чиқариш қуроллари ҳақида топишмоқлар бор:

*Юрар текис эгатдан,
Бармоқлари пўлатдан.*

*Елкасида қопи бор,
Катта темир саватдан.*

(Пахта териш машинаси)

*Қат-қат қатлама,
Ақлинг бўлса ташлама.*

(Китоб)

*Оқ ер очдим,
Қора бугдой сочдим.*

(Китоб)

Бу каби топишмоқлар фақат мавзу жиҳатдан ва поэтик гўзалликдангина эмас, балки булар ҳақидаги халқнинг кўп узок даврдан бери маълум бўлган анъанавий фалсафаси асосида жумбоқлангани билан ҳам қимматлидир. Қарайлик-а: терим машинаси – отга ўхшатилади. От эса халқ таъбирида қадимдан кишининг яқин ёрдамчиси, дўсти («от – мурод» мақолини ёки афсонавий Гўрўғлининг Гироти таърифини эслаш кифоя), китоблар эса бир ўринда – қатламага, иккинчи ўринда – бугдойга нисбат берилади. Булар – нон, озуқа, кишиларнинг тириклиги эса нон билан. Демак, китоб маънавий озуқа, халқ таъбирида китоб нон даражасида. Бунинг тарбиявий жиҳатдан аҳамияти жуда буюқдир.

Топишмоқлар ҳам болалар ўйинининг бир тури ҳисобланади.

Бола ҳаётида тарбиясида иштирок этадиган барча машғулотлар, турмуш талаби ва болалар тарбияси учун зарур барча ўйинлар ўзининг ҳамма ранг-баранглиги билан бугунги мактаб дарсликларига киритилиши, бугунги ўқувчига етказилиши, уларни ҳам ақлий, ҳам жисмоний машғул қила олиши керак. Ўзбек болалар ўйинларининг бир тури бўлган топишмоқлар ҳам ана шу талабларнинг ҳаммасига жавоб бера оладиган болалар фольклорининг алоҳида бир қисмидир. Унинг репертуари қанчалик кенгайиб, кўпайиб борса, шунчалик замоннинг акс-садоси сифатида ҳам форма, ҳам мазмун жиҳатидан тобора янгилиниб туради ва бугунги куннинг вазифаларига хизмат қилади.¹

¹ Ушбу мақола куйидаги манбадан олинди: Ғ. Жаҳонгиров. Ўзбек болалар фольклори. – Тошкент: Ўқитувчи, 1975.

Шемир
ОЧИЛОВ
(1928–1983)



Шемир Очилов 1928 йил Самарқанд вилояти Булунгур тумани Лойқа қишлоғида тугилган. Самарқанд педагогика билим юртида (1947–51), Ўзбек давлат университети (ҳозирги Самарқанд давлат университети)нинг филология факультетида (1951–56), ЎзР ФА Тил ва адабиёт институти аспирантурасида (1960–63) ўқиган. Самарқанд вилоятининг Булунгур туманидаги 5-мактабда ўзбек тили ва адабиётидан дарс берган (1956–58). ЎзР ФА Тил ва адабиёт институти Фольклор бўлимида кичик илмий ходим (1958–61), Қўқон давлат педагогика институти Ўзбек тили ва адабиётини ўқитиш методикаси кафедрасининг доценти (1963–68), Самарқанд давлат педагогика институти доценти (1971–83) вазифаларида ишлаган. «Маматкарим полвон» достонининг тарихий асослари» мавзусида номзодлик диссертациясини ёқлаган (1965). «Фольклор практикасидан методик тавсиялар» (1981 й. ҳамк.) номли қўлланмаси нашр этилган. 1983 йили Самарқанд шаҳрида вафот этган.

**«МАМАТКАРИМ ПОЛВОН» ДОСТОНИНИНГ
ТАРИХИЙ АСОСЛАРИ**

«Маматкарим полвон» тарихий достон бўлиб, ўзбек халқ достончилигида янги ижодий бир босқичнинг бошланишидир. Тарихий достон намуналари ўзбек фольклорига узоқ асрлар-

дан бери яшаб келмоқда. Улардан «Эдига» ёки «Тулумбий» (XV аср), «Шайбонийхон» (XVI аср), «Тўлғоной», «Назар ва Оқбўтабек», «Музаффархон» (XIX аср) каби бир қанча намуналар жонли оғзаки аънада бизнинг давримизгача етиб келган. XX аср бошларида машхур Намоз ўғрининг хатти-ҳаракатлари, унинг чор ҳукумати, бой ва амалдорларга қарши исёнкорона ўч олиш кайфиятлари тасвирланган қўшиқларнинг ҳам бир қисми маълум. Аммо «Маматкарим полвон» достони ўзининг темаси билан эмас, балки конкрет тарихий шароитда ижтимоий юксалиш ва озодлик учун курашнинг моҳиятини меҳнаткаш халқ омаси манфаати нуқтаи назаридан куйлаган асар бўлганлиги билан ҳам характерлидир.

Шу сабабли бу асарнинг тарихий асосларини текшириш философлар, тарихчилар, адабиётшунослар ва фольклористлар учун катта аҳамиятга эга. Бу бир томондан, умуман эпос проблемасини атрофлича ҳал қилишга ёрдам берса, иккинчидан, тарихий мазмундаги дostonларнинг тарихий илдизларини очишга имкон туғдиради.

Тарихий мазмундаги дostonларнинг характерли хусусиятларидан бири шундаки, уларнинг темаси образлари, ташиган ғоялари конкрет тарихий шароитдаги курашлар билан боғлиқ. Гарчи бу тур асарларда ҳам бош қахрамон образини идеаллаштириш тенденцияси мавжуд бўлса-да, бу ҳол қахрамонлик ва ишқий-романик дostonларда бўлганидек, идеализация даражасига кўтарилмайди, балки ўз даврининг илғор бир курашчиси сифатида барча ижобий ва салбий томонлари билан намоён бўлади. «Маматкарим полвон» достонида ҳам айнаи ҳол, айнаи ижодий процесс яққол кўзга ташланади. Бирок, бу асар ўтмишдаги тарихий дostonлардан принципиал фарқ қилади. Асосий фарқ замонасининг ғоятда муҳим, кишилиқни куллиқдан, ҳақсизлик ва адолатсизликдан қутқизиш йўлидаги барча кураш ва тажрибаларининг эиг яхши томонларини янги тарихий шароитда ўсиб келаётган ижтимоий ва сиёсий онг доирасида талқин этишда курашчан туйғуларнинг куртакларини бир даражада сеза билган ҳолда ўз даврининг илғор тенденциясини ташувчи курашчи образини яратишга интилишдадир.

Ҳаётда ҳам, Фозил Йўлдош ўғлининг «Маматкарим полвон» достонида ҳам Маматкарим халққа қарши ёки авлиёлар типидagi мўъжизали бир киши эмас, балки оддий халқнинг манфаатини химоя қиладиган, ўз давридаги олижаноб бир шахсдир.

«Маматкарим полвон» достони 1937 йилда М. Зарифов томонидан ёзиб олинди, уни оммалаштириш ва ўрганиш ишлари 1941 йилдан кейингина бошланди. Бунда Ҳ. Т. Зарифовнинг хизматлари каттадир¹.

Шуни ҳам айтиб ўтиш керакки, текширувчилар ўртасида «Маматкарим полвон» достонининг яратилиш тарихи ҳақида турлича мулоҳазалар мавжуд. Жумладан, Ҳ. Т. Зарифов «1916 йил кўзғолони Фозилга кучли таъсир этган эди. Меҳнаткаш халқнинг ҳақиқат талаби бўлган бу кўзғолонга Фозил шоир қатнашмай туrolмас эди. Меҳнаткаш халқнинг бу кўзғолонини олқишлаб «Маматкарим полвон» ҳам «Жиззах кўзғолони» номи остида муҳим тарихий икки дoston яратиb, халқ ўртасида куйлаб юрди», – деб ёзади². Тожибой Ғозибоев эса, «Маматкарим полвон» достони 1914–1915 йилларда ижод этилган дейди ва далил учун 1949 йили Самарқанд вилоят Булунғур туманига бориb, унда Фозил шоирнинг ва айрим қишлоқ кексаларининг айтган сўзларига суянади³. Фольклорист Жуманиёз Қобулниёзов ўзининг 1959 йилда чиққан «Шўро даврида ўзбек халқ поэтик ижоди» ва 1969 йилда нашр этилган «Ўзбек фольклорининг ривожланиш йўллари» деган монографияларида дostonни янги давр халқ ижоди сифатида қарайди. Бизнингча, «Маматкарим полвон» достони то ёзиб олинган вақтга қадар шоир томонидан ишланган ва унинг бўш жойлари ҳаёт материаллари билан тўлдириб борилган, оғзаки ижро ва ижод процессида давр, шароит эътибори билан у ёки бу даражада айрим ўзгаришлар киритила борган. Худди шунингдек, дostonнинг энг сўнги бетларида «ўзгариш бошланиб» Маматкарим полвон

¹ Қаранг: «Ўзбек фольклори» (хрестоматия) 2-китоб. Тузувчи Ҳоди Зариф. – Тошкент, 1941. – 35–44-бетлар. Сўнги наشري: Дастагул, кўп томлик. – Тошкент, 1965. – 17–56-бетлар.

² Ўзбек фольклори. 2-китоб. – Тошкент, 1941, 149-бет.

³ Ғозибоев Т., Фозил Йўлдош ўғлининг шўро давридаги ижоди. – Тошкент, 1955, 41-бет.

ҳақидаги ишларнинг «жой-жойида қолиб» кетганлиги шоир томонидан кейинги вақтларда киритилган бўлиши мумкин. «Маматкарим полвон» достони илгари ижод этилган бўлса ҳам, уни автор оғзидан Маҳмуд Зарифов 1937 йилда ёзиб олган.

«Маматкарим полвон» достони Т. Ғоziбoев ўз ишида тўғри қайд қилганидек, 1914–1915 йилларда, яъни тарихий шахс Муҳаммадкарим полвон ҳақидаги воқеа ва ҳодисалар шоир тасаввурида тўлиқ ҳосил бўлгандан кейингина яратилган. Фозил Йўлдош ўғли ўзининг «Маматкарим полвон» достонини 1914 йилдан илгари яратиши мумкин эмас эди. Чунки асар қаҳрамони Муҳаммадкарим полвон, амакиси Усмон қози Исмоилов ва тоғаси Аҳмад мингбоши Пирмуҳаммедов томонидан 1914 йил кўклам пайти отиб ўлдирилган. Жомбойлик Муҳаммадкарим полвоннинг фожиали ўлиmidан кейин Фозил шоир ўзи кўрган, билган воқеа ва ҳодисаларни умумлаштириб, 1914–1915 йилларда ўзининг «Маматкарим полвон» достонини яратган бўлиши ҳақиқатга анча яқиндир. Чунки достонда шу йилларга қадар халқимиз ҳаётида рўй берган воқеа ва ҳодисалар тасвирланади.

Биринчи жаҳон уруши йилларида Маматкарим полвон сингари маҳаллий меҳнаткаш халқимиз орасидан чиққан курашчилар, полвонлар учраб турар эди. Фозил шоир ўзининг достонида ана шу курашчи полвонларнинг типик образини жомбойлик Маматкарим полвон сиймосида яратади. Бизнинг аниқлашимизга кўра, Фозил шоирнинг устози ва қайнотаси Йўлдош шоирнинг олтита қизи бўлиб, унинг ўртанча қизи Улжон Жомбой туман, Қуянчи қишлоқлик Дўстмамат деган мол жаллобга турмушга чиқади. Фозил Йўлдош ўғли ёшлигида қайинсинглиси Улжоннинг уйига бир неча марта бориб турган. Маматкарим полвоннинг энг яқин дўсти Суяр кўр ва достонда тасвир этилган қишлоқ бойларидан Эшмаматбой ҳам ана шу Қуянчи қишлоғидан бўлган. Маматкарим полвон Суяр кўр ўртоғи билан Қуянчи қишлоғига келиб, Фозил шоирнинг қўшиқларини ва достонларини мароқ билан тинглаган. Кейин шоирнинг ўзи ҳам Маматкарим полвоннинг чойхона ва бозорларда қилган хатти-ҳаракатларини ва достонга боис

бўлган ҳодисаларни шахсан кузатиб юриши натижасида кўп маълумотлар тўплаган. Натижада янги дoston учун типик воқеалар, қаҳрамон ва персонажлар топилади. Замонасининг муҳим ижтимоий ва сиёсий масалалари Фозил шоир қалбини тўлқинлантиргандан кейингина у ўзининг «Маматкарим полвон» достонини яратган.

Достонда тасвир этилган воқеа ва ҳодисалар ана шу воқеа ва ҳодисалар содир бўлган жуғрофий ҳам ҳақиқий ҳаётда мавжуд бўлиб, асарда иштирок этган асосий персонажлар ҳам шоирнинг ҳаётда кўрган-билган одамлари бўлган. Қишлоқ кексаларининг эсдаликлари буни тўлиқ тасдиқлайди. Шоир ўз асарида Маматкарим полвоннинг саргузаштларини материал қилиб олиш билан бирга асарнинг номини ҳам қаҳрамоннинг номи билан атаган. «Маматкарим полвон уруғи кўнғирот бўлиб, Жомбойда, Бекат қишлоғида туғилган эди»¹, – деб унинг туғилган жойи, ҳатто ўзбекнинг қайси уруғига мансублигини ҳам аниқ кўрсатади.

Ҳақиқатдан ҳам, Муҳаммадкарим полвон Абдурахим ўғли Самарқанд вилоят Жомбой тумани Жомбойтепа (кейинги номи Бекат) қишлоғида меҳнаткаш деҳқон оиласида туғилган. 1958 йил Ўзбекистон Фанлар академияси А. С. Пушкин номидаги Тил ва адабиёт институти фольклор экспедицияси даврида Х. Т. Зарифов Жомбой туманига бориб, Маматкарим полвоннинг қабрини топди ва қабр тошидаги ёзувни ўқиб, уни 1332 (1913–1914) йилда вафот этганлигини аниқлади. Биз Самарқанд вилоят Жомбой туманига бориб, Муҳаммадкарим полвоннинг қариндошлари ва уни яхши билган қишлоқ кексаларидан шуни аниқладикки, кўклам пайти отиб ўлдирилган. Бу вақтда полвон 38 ёшда бўлган, Ана шу аниқ маълумотларга кўра, полвоннинг отилган йили 1914 йил кўкламида бўлиб, туғилган йили эса 1876 йилга тўғри келади. Муҳаммадкарим полвонга хоинона террор уюштирганлар унинг ўз амакиси Усмон қози Исмоилов ва тоғаси Аҳмад мингбоши Пирмуҳаммедов бўлган. Ана шу хоин қариндошлари томонидан ёлланган Пирдон қишлоқлик Йўляхши, жомбойтепалик Муҳаммадсодиқ ва Абдулла тентаклар Жомбой бозоридан кечаси қайтиб келаётганда полвонни ваҳшийларча отиб ўлдири-

¹ Дастагул, 19-бет.

ганлар. Буни полвоннинг ҳамқишлоғи, кекса пенсионер Мирзахўжа Ўринхўжаев¹ ва қишлоқ кексалари тўла тасдиқлайди.

Маматкарим полвоннинг хоинлар қўлида қурбон бўлиши дostonда ҳам ўзининг реал ифодасини топган. Унда тасвирланишчи, Маматкарим полвон Жомбойдан уйига қайтиб келаётган вақтида амакиси Усмон қози ва тоғаси Аҳмад мингбоши томонидан ёлланган сотқин Абдулла тентак ва яна уч киши томонидан отиб ўлдирилган Маматкарим халойиққа сўз айтди:

*Эл ётар – хуфтонда Жомбойдан қайтди,
Бегам, яёв келаётган йўлида,
Тўрттови ҳам милтигини тиклатди,
Шу замонда милтигини бўшатди.
Яшиндай бўп ўқи Полвонга етди,
Ўқи бу Полвондан туйраб ўтди.
Армон билан энди йўлда йиқитди,
Ҳеч кимга кўринмай отган кишилар,
Булар ўз мазгилига қараб кетди².*

Қишлоқ кексаларининг айтишига кўра, Муҳаммадкарим полвон чиройли, бети қип-қизил, буғдойранг, кўзлари катта, соқол мўйлови қириқ, чорпанжа, зўр билак, кучли киши бўлган. Полвоннинг кучлилиги Самарқанд қамоқхонасида бўлган воқеалардан ҳам очиқ-ойдин кўринади. Усмон қозининг маслаҳати билан полвон устидан катта жиноятнома ёзилиб, Самарқанд ҳокимига жўнатилади. Самарқанд ҳокими буйруғи билан ўн нафар қуролли солдат уни Сиёбда қўлга тушириб, Самарқанд қамоқхонасига қамайдилар. Шу куни гуноҳсиз қамалганлардан бир гуруҳи қамоқхонани тешиб қочган. Полиция бошлиқлари бу кишиларни Муҳаммадкарим полвон қочирган, деб унга даъво қиладилар, топиб беришни талаб этадилар, акс ҳолда, отамиз, деб уни кўрқитмоқчи бўладилар. Бундай тухматлардан ғазабланган полвон қамоқхонанинг темир панжарасини қўли билан қайириб ташлайди. Жомбой ва Булунғур туманларидаги кўпчилик қишлоқ кексаларининг берган маълумотига қараганда,

¹ Уринхўжаев М., Унутилмас кунлар. – Тошкент, 1961.

² Дастағул, 56-бет.

Муҳаммадкарим полвоннинг қайирган темир панжараси Самарқанд қамоқхонасининг биринчи корпус, ўттиз иккинчи камерасида бўлганки, у кейинги вақтларгача сақланган.

Уста дostonчи Фозил Йўлдош ўғли ҳам ўзининг «Маматкарим полвон» дostonида Маматкарим полвоннинг «Уч кун мингбошининг ҳукми, беш кун приставнинг ҳукми, етти кун ҳокимнинг ҳукми, ҳаммаси йиғилиб, ўн беш кун»¹ Самарқанд қамоқхонасига қамалганлигини айтиш билан бирга, унинг полвонлигини, кучлилигини ҳам тасвирлар экан: «Тегирмон тошини бир қўли билан кўтариб турарди»², – дейди. Бу эса традицион халқ дostonлари учун характерли бўлган эпик идеализация эмас, балки Муҳаммадкарим ҳаётида бўлиб ўтган реал воқеа ва ҳодисаларнинг дostonда тўғри ва ҳаққоний равишда акс этишидир. Кексаларнинг айтишига кўра, ҳақиқатдан ҳам, Муҳаммадкарим ҳеч бир кишининг ёрдамисиз тегирмон тошини эски Жомбойдан Бекатга ёлғиз ўзи олиб келиб ташлаган. Бу эса халқ ўртасида гап бўлиб юрган. Фозил шоир эса бу ҳаётий детални қайта ишлаб, асар қаҳрамонининг биографиясига киритган.

Ўзбекистон Марказий давлат тарихий архиви материалларининг кўрсатишича, маҳаллий амалдорлар Муҳаммадкарим полвон сургундан ўз муддатини ўтаб қайтиб келгандан кейин ҳам уни хавфли киши сифатида Самарқанд қамоқхонасида сақлаганлар, ҳатто ҳол-аҳвол сўраш учун борган ошна-оғайниларига ҳам кўрсатмаганлар. Шундан кейин унинг онаси Хонбиби Пирмуҳаммедова Самарқанд ўлка судининг прокурорига ариза бериб, ўз ўғлини бўшатиб юборишни, ҳеч бўлмаганда вақтинча бўшатиб беришни талаб қилади³.

Фозил Йўлдош ўғли ҳам Муҳаммадкарим полвон ҳаётида бўлиб ўтган аниқ фактларни ўз ижодий лабораториясида қайта ишлаб, дostonнинг сюжетига киритган. Унинг тасдиқлашига кўра, Жомбойнинг Куянчи кишлоғидан бўлган Эшмаматбой Маматкаримни йўлда учратиб, унга «насиҳат» қилмоқчи бўлади, найранг ва алдаш йўли билан уни қўлга олишга ҳаракат қилади. Шу

¹ Дастағул, 32-бет.

² Дастағул, 19-бет.

³ Қаранг: ЦГИА УзССР, ф. 131, оп. 1, дело 1340, л. 21.

мақсадда Маматкарим полвонга пул, мол-дунё, ҳаттоки, миниб юриш учун битта от ҳам беришга ваъда қилиб, хусусан, ўз манфаати учун хизмат қилдирмоқчи бўлади.

Фозил Йўлдош ўғлининг «Маматкарим полвон» достонида тасвирланган маҳаллий амалдорлардан Туятортар мингбоши-си Мулла Рўзи Эрназарбоев ҳақида Ўзбекистон Марказий давлат тарихий архивида ҳам айрим материаллар сақланмоқдаки, уларда ҳам Мулла Рўзи Эрназарбоевнинг ўз мансабидан фойдаланиб, меҳнаткаш халқнинг устига оғир солиқлар солганлиги, ўз кўл остидаги маҳаллий меҳнаткаш халқдан турли хил йўллар билан пора олиб, уни ўз фойдасига ишлатиб юборганлиги тасдиқланади¹ [...].

Достонда тасвир этилишича, Аҳмад мингбоши ва унинг йигитлари дам олиш кунларининг бирида бозорга келган бева-бечораларнинг бор нарсасини тортиб олади. Шу вақтда Маматкарим полвон Суяр кўр ўртоғи билан иккита чўбирни миниб, Жомбой бозорига тушади. Маматкарим полвоннинг бозорга келганлигини билган мингбоши ва унинг йигитлари боғловли кишиларга ҳам қарамасдан қочиб кетади. Маматкарим полвон мингбошихона олдида боғлаб қўйилган камбағал деҳқонларни кўради. Бу ишлардан хабари бўлмаган Маматкарим полвон мингбоши ва йигитлари томонидан боғлаб қўйилган бева-бечораларга шундай дейди:

*Қандай одам сенга қилди зулмини,
Кенг бозорда ким бойлади қўлингни,
Ҳеч ким сўрамабди сенинг ҳолингни,
Отдан тушиб, мен чечайин қўлингни.
Бой ҳам мингбошилар элни жойлаган,
Камбағални шундай қилиб қийнаган,
Қамчи уриб, сенинг қўлинг бойлаган².*

Мингбоши ва унинг йигитлари томонидан хўрланган бечора камбағал деҳқонлар Маматкарим полвоннинг бу сўроғига жавоб берар экан, ўзларининг аянчли аҳволлари ҳақида ва оғабобосидан қолган озгина ерларида эртадан-кечгача тинмай

¹ ЦГИА УзССР, ф. 130, оп. 1, д. 5012, л. 1.

² Дастагул, 24-бет.

меҳнат қилиб, олган ҳосилнинг кўпчилигини турли хил олик-солиқларга тўлаганлигини айтади:

*Йилда топганимиз бизлар берамиз,
Сира қарздан қутулмайин борамиз.
Солиқ, ўлпон тўлаб ялангоч бўлдик,
Яна бизлар бундан жабр кўрамиз¹.*

Фозил Йўлдош ўғли томонидан тасвир этилган ана шу тўртликни диққат билан ўқисангиз, содда ва самимий мисралар замирида ҳаётий ҳақиқатнинг реал ифодаси ётганлигини дарҳол англаб оласиз. Бу фожиа ва ҳаққоний нолишлар Маматкаримнинг ғайратига ғайрат кўшади. Китобхонни ҳаяжонга соладиган ва узоқ вақтлар эсида қоладиган бу фожиали эпизод ўша замонда барча қишлоқларимизда рўй бериб турган аччиқ ҳақиқатнинг халқ шоири маҳорати билан умумлаштирилган реалистик картинасидан иборатдир [...].

Фозил шоир ҳақиқий ҳаётда прототипи маълум бўлган Туятортар бўлисининг мингбошиси Мулла Рўзи Эрназар ўғли ва Қобул бўлисининг мингбошиси Аҳмад чўроғаси Пирмуҳаммад ўғлининг бадиий образини тасвирлаганда ҳаётда улар қандай ҳаракат қилган бўлса, дostonда ҳам ўшандай шаклда айнан ифода этмаган. Ўтмишда уларнинг ҳақиқий ҳаётида рўй берган характерли воқеа ва ҳодисаларни танлаб олиб, уни умумлаштириб, типиклаштириб ўз асарининг сюжет тўқимасига киритган. Достоннинг аҳамиятли томони ҳам шундаки, асарда тасвир этилган тарихий шахсларнинг ҳаққонийлиги ва реаллиги сақланиб қолинган [...].

Бизга маълумки, тарихий дoston яратган шоир зиммасига тарихчидан кўра кўпроқ вазифа юкланади. Бунда шоир ўтмишнинг тарихий воқеа ва ҳодисаларини тарихчи сингари хронологик тарзда бирма-бир баён қилиб кетавермайди, балки у тарихий шахслар ҳаётида рўй берган воқеа ва ҳодисаларни танлаб олиб, ўз даври учун типик бўлган ажойиб образлар ва манзаралар яратади. «Тарих, – деб уқтирган эди В. Г. Белинский, – гарчи ўзининг ҳақиқий кўринишида адабий қонунларни ва мувофиқ зарурият-

¹ Дастагул, 25-бет.

ни кўрсатса ҳам, лекин кўринган вақтда унинг фактлари ўз-ўзини англашдан маҳрумдир, шунинг учун ташқи воқеалар шаклига эгадир, яна улар кундалик ҳаётнинг тасодифлари билан ҳамшиша чигаллашган, ўралган бўлади. Бадиий асар сифатида романнинг вазифаси кундалик ҳаётдан ва тарихий воқеалардан барча тасодифий нарсани олиб ташлаш, уларнинг яширин қалбига, жонли идеясига кириш, ташқи, тарқоқ воқеаларни руҳ ва ақл маскани қилишдир»¹.

Уста дostonчи Фозил шоир ҳам ўзининг бу дostonида тарихий шахс Муҳаммадкарим полвон фаолиятдан давр учун характерли бўлган фактларни танлаб олиб, унинг ҳаётида юз берган юқоридаги сингари тасодифий ва иккинчи даражали ҳодисаларни тушириб қолдиради.

Тарихий шахс Муҳаммадкарим полвон ҳаётида бўлиб ўтган юқоридаги тарихий фактлар эса дostonда ўз-ўзидан типик образни вужудга келтира олмайди. Тарихий шахслар ҳаётида учрайдиган факт билан адабий фактлар ўртасида муҳим фарқ бўлади. Адабий факт бу ҳаётий фактнинг ишланган, тўлдирилган ҳолда кўринишидир [...].

Фозил шоир ўз дostonида тарихий шахс Муҳаммадкарим полвоннинг ҳақиқий ҳаётда бўлиб ўтган прототипини типик образга бир ўзак қилиб, унга Муҳаммадкарим полвоннинг ўзи мансуб бўлган ўша вақтдаги ҳамма прогрессив деҳқонларнинг яхши хусусиятларини ҳам қўшиб тасвирлаган. Бунинг билан шоир ўз дostonида тарихий шахс Муҳаммадкарим полвоннинг реал ҳаётда бўлиб ўтган прототипидан кенг, ўша давр ижтимоий-сиёсий воқеалари билан узвий боғлиқ бўлган тўлақонли типик образини яратиб беришга муяссар бўлган.

Фозил шоир томонидан жомбойлик Муҳаммадкарим Абдурахим ўғлини дoston қаҳрамонининг прототипи қилиб танлаши катта изланиш ва ўзбек халқ дostonчилигида замона талабларига жавоб берадиган асар яратиш учун жиддий интилиш натижасидир. Бу интилиш чинакам халқ шоири Фозил Йўлдош ўғлининг дунёқарашида синфий онгнинг аста-секин ўса борганлиги, мамлакатда юз бериб турган ижтимоий-сиёсий масалаларни англай

¹ В. Г. Белинский, Танланган асарлар, Тошкент, 1955, 176-бет.

бошлагани билан изоҳланиши мумкин. У гарчи саводсиз оддий бир камбагал дехкон бўлса ҳам халқ дostonчиси сифатида элнинг ичида жуда кўп кезар, юзлаб қишлоқлардан ташқари Самарқанд, Жиззах, Каттақўрғон ва Хўжанд шаҳарларида ҳам кўп бўларди. Халқ билан доимо алоқада бўлиб, ҳаётни яхши ўрганган эди. Меҳнаткаш халқ ичидан чиққан ва эзилувчилар учун кайғурган ана шундай илғор халқ шоири замонасининг илғор тенденцияларидан четда қолмаган, албатта.

Юкорида келтирилган маълумотларнинг ўзи ҳам талантили халқ шоири Фозил Йўлдош ўғлининг ўз достони устида ишлаганида тарихий шахсларга, реал ҳаётда юз бериб турган муҳим ижтимоий воқеа ва ҳодисаларга қанчалик эътибор билан қарагани, уларни пухта ўрганиб, шу фактлар асосида ўз асарини ижод этгани аниқдир. Ҳ. Т. Зарифов айтганидек, Муҳаммадкарим полвоннинг қилмишлари, ҳаракатлари ва кечирмишларини тасвир этган бу дoston ўша замон фактларининг ойнаси¹ бўлиб қолади ва ўша давр ўзбек фольклорининг муҳим асарларидан бири сифатида хизмат қилади.

«Маматкарим полвон» достонида тасвир этилган айрим образлар ва бадиий воситалар ўтмишда меҳнаткаш халқимиз ўртасида машҳур бўлган халқ дostonларининг илғор традицияларини ўзлаштириш ва қайта ишлаш натижасида юзага келган. Масалан, Фозил шоир ўзининг бу достонида ўтмишда меҳнаткаш халқимиз ўртасида куйлаб юрган традицион халқ дostonларидан ижодий фойдаланиб, халқ қаҳрамони, тарихий шахс Маматкарим полвоннинг мардлик ва тўғри сўзлилиқ фазилатларини ҳаққоний равишда кўрсатиб бера олган. Маматкарим образи Фозил шоир достонида замонасининг оддий бир исёнкори сифатида кўзга ташланса ҳам, унинг мафҳумида катта ижтимоий ва сиёсий масалалар бўртиб туради [...].

«Маматкарим полвон» достонини ўрганар эканмиз, унинг бадиий воситаларида ҳам шоир томонидан традицион халқ дostonларидан озикланганлигини, пишиқ ва ранг-баранг бадиий воситалардан ижодий фойдаланиб, ўз даври учун типик бўлган

¹ Ҳ. Т. Зарифов, 1916 йил миллий-озодлик кўзғолонининг ўзбек фольклоридида акс этиши, Тошкент, «Шарқ юлдузи» журнали, 1946, 7-8-сон, 164-бет.

ажойиб бадий образлар яратганлигини яккол кўрамиз. Шоир ўз достонида ўхшатишлар, халқимизнинг узоқ асрлик ҳаёт тажрибаси асосида синалиб, авлодлар оша бир қолипга тушган доимий эпитетлар, ҳаётий муболағалар ва дostonга мусиқийлик бахш этувчи чиройли вазнлар, китобхон диққатини ўзига жалб қилувчи риторик сўроқ, хитоб, ундовлар ҳамда турли хил оҳангдош қофия ва радифлар яратганки, бу бадий воситалар китобни ўқиган ёки тинглаган ҳар бир кишининг кўз ўнгида ўзининг юксак бадийлиги билан намоён бўлади ва унинг онгида узоқ вақтларгача сақланиб қолади.

«Маматкарим полвон» дostonининг бадий тили ҳақида гапирар эканмиз, бу дostonнинг тили ҳам, асосан, шоир мансуб бўлган ўзбек қипчоқ диалекти доирасидадир. Ундаги бадий тил ўзи куйлаб юрган традицион халқ дostonларининг тилидан кам фарқ қилади. Тил жиҳатидан асар шоир яшаган адабий тилнинг даражасида эмас, балки шоирнинг тили, асосан, ўзбек халқ эпослари учун характерли бўлган бадий тил даражасидадир.

Маълумки, традицион халқ дostonларида автор тили билан персонажлар тили индивидуаллаштирилмайди. Фозил шоирнинг «Маматкарим полвон» дostonининг тилида ҳам, гарчи бу асар XX асрда яратилган бўлса ҳам, индивидуаллик кўринмайди. Бу фақат Фозил шоирнинг шу дostonи ёки бундан кейинги йилларда яратган «Жиззах кўзғолони», «Очилдов» дostonлари учунгина характерли бўлмай, балки Пўлкан шоир ва бошқа ўзбек дostonчиларининг асарлари учун ҳам характерлидир. Бунинг учун эса Пўлкан шоирнинг «Мардикор», «Ҳасан батрак» ва Холёр Абдукарим ўғлининг «Амир қочди» дostonларини эслатиш кифоядир. Бу ҳодиса шуни кўрсатадики, дostonчиларимиз мазкур асарларни яратган вақтларида кундалик муомалада ўз шеваларида сўзлашганлари каби, янги-янги асарлар яратганларида ҳам ўша шевани сақлаганлар. Бироқ халқ дostonларига хос традицион оғзаки бадий тил сифатида шоир мансуб шевадан анча кенг ва юқоридир.

Шоир дoston қахрамонларининг характерини очишда, воқеа ва ҳодисаларнинг моҳиятини кўрсатишда халқ мақолларидан ва ҳикматли сўзларидан жуда кўп фойдаланган. У халқ мақолларини ва ҳикматли сўзларини ўз асарининг мазмунига усталик билан

сингдириб юборган. Шоир дostonда халқ мақоллари ва ҳикматли сўзлари орқали асарда иштирок этган ҳар бир персонажнинг қайси социал гуруҳга мансублигини ва уларнинг дунёқарашларини очиб беришга ҳаракат қилади. Дostonда тасвир этилишича, Хўжанд мингбошиси унга қараб, қўлига қоғози тегмагунча кетиб қолмасликни, агар кетиб қолса сургун қилган бой ва амалдорлар қочиб келган, деб гумон қилишлигини айтганда, «Маматкарим ўз кўнглида айтди, улар мендан қўрқишлигидан бу ишни қилди, мен борганда менинг олдимга келиб, уларнинг қоғоз сўрайди-ган қуввати борми? «Туяни шамол учирса, эчкини осмонда кўр», – деб кўнглида кечириб турди», – деб шоир дostonда ўша вақтлардаги маҳаллий бой ва амалдорларнинг ҳолатини «туяни шамол учирса, эчкини осмонда кўр» деган халқ мақоли воситаси билан очиб беришга ҳаракат қилган. Бу ердаги халқ мақоли илгариги маҳаллий бой ва амалдорларнинг характериға, уларнинг хатти-ҳаракатларига жуда ҳам мос тушиб, шоир дostonда уларнинг қўрқоқлигини ва енгил табиатли кишилар эканлигини Маматкарим полвоннинг гаплари ва унинг ўй-хаёллари орқали тўғри кўрсатиб беришга интилган.

Ўзбек халқ шоирлари томонидан дostonларда ишлатилган халқ мақоллари ўз ўрнида воқеаларнинг борувиға кўра халқ чечанлиги билан едирилиб, фикрни қувватлаб берадилар ва дostonлар тилининг бойлиги, образлилиги, жозибадорлиги ҳамда бадий томонининг юксак ва равон бўлишини таъминлайдилар.

Асар бошдан охириға қадар реал тарихий фактларға асосланган, тарихий мазмун касб этган янги типдаги дoston бўлиб, ўзбек халқ дostonчилигида янги бир босқичнинг дастлабки намунасидир.

Фозил Йўлдош ўғлининг тарихий хизматлари ўтмишда халқимиз ўртасида машҳур бўлган традицион халқ дostonларини бизнинг давримизгача асраб келишдангина иборат эмас, балки ана шу традицион халқ дostonлари заминида янги-янги дostonлар ижод этувчи импровизатор шоир сифатида ҳам каттадир.¹

¹ Мақола куйидаги манба асосида чоп этилмоқда: Т. Очиллов. «Маматкарим полвон» дostonининг тарихий асослари // Фозил шоир. – Тошкент: Фан, 1973, 126–146-бетлар.

Муҳаммаднодир
САИДОВ
(1929–2001)



Муҳаммаднодир Собитович Саидов 1929 йил 20 сентябрда Тошкент шаҳрида тугилган. Ўрта Осиё давлат университетининг филология факультетини битирган (1953). «Ўзбекфильм» киностудиясида катта муҳаррир (1954–56), ЎзР ФА Тил ва адабиёт институти Фольклор бўлимида кичик илмий ходим (1956–61 йиллар), катта илмий ходим (1961–65), Тошкент давлат университети (ҳозирги ЎзМУ) нинг «Ўзбек адабиёти» кафедрасида ўқитувчи, доцент, профессор, кафедра мудири лавозимларида ишлаган (1965–86). «Малика Айёр» достони ҳақида» мавзуида номзодлик (1960), «Ўзбек халқ достончилигида бадий маҳорат масалалари» мавзуидаги докторлик (1976) диссертациясини ёқлаган. «Нурали», «Зулфизар», «Гулнор пари» (1965), «Авазхон», «Гўрўелининг тугилиши» (1967), «Мисқол пари», «Тоҳир ва Зухра», «Суманбар», «Зевархон», «Варқа билан Гулишоҳ», «Вомиқ ва Узро», «Балхувон», «Гулианбоғ» каби халқ достонларини нашрга тайёрлаб, чоп эттирган. «Малика Айёр» достони» (1964), «Ўзбек халқ достончилигида бадий маҳорат» (1969), «Халқ севган баҳши» (1972), «Ўрта мактабларда Эргаиш Жуманбулбул ўгли ҳаёти ва ижодини ўрганиши» (1988) каби китоблар муаллифи. 2001 йилда Тошкент шаҳрида вафот этган.

«МАЛИКА АЙЁР» ДОСТОНИНИНГ ЖАНР ХУСУСИЯТЛАРИ

Халқ ижодиёти битмас-туганмас ижод манбаидир. Бу манба бадий ижодиётнинг ажойиб қайнар булоғидирки, унинг ҳаётбахш сувлари кекса адабиётимиз тарихи намояндаларига ҳам, адабиётимиз тарихи вакилларига ҳам ўз ижодий йўналишларида прогрессив йўлни танлаб олишда, улар ижодининг ривожланишида етакчи роль ўйнаган ва ўз халқчилиги билан улар ижодини суғорган. Шу сабабдан ҳам халқ оғзаки ижодига мансуб бўлган бадий асарларнинг ғоявий ва бадий томонларини текшириш адабиётшуносликнинг зарур масалаларидан биридир.

«Малика Айёр» достони халқ оғзаки адабиётини пухта ишланган намуналаридан бири бўлиши билан, унинг ғоявий ва бадий йўналишларини текшириш умумий ишнинг бир томонини ташкил қилиши исбот талаб қилмайдиган ҳақиқатдир.

Адабиётшунослигимизда жанр масаласи энг қийин масала, дoston жанри ҳанузгача муаммоли масала бўлиб келмоқдаки, мана шу ҳол айрим олинган эпик асарни анализ қилиш ишини чигаллаштириб келмоқда.

Достон деганда, одатда, халқ оғзаки адабиётининг бир жанри тушунилади. Достон адабиётнинг бир жанри дейиш – бу умумий бир тушунча. Достон деб Алишер Навоийнинг «Хамса»си, Низомий Ганжавийнинг «Панж ганж»ига кирган эпик асарларни ҳам, ҳозирги ёзма адабиётимизда поэма деб аталган асарларни ҳам тушунаверамиз. Ҳолбуки, булар ўртасида фарқ бор. Бу фарқни очиш адабиётшунослигимизнинг муҳим вазифаларидандир. Бу гарчи бизнинг ишимиз вазифасига кирмаса ҳам «Малика Айёр» достонини текширганда ўзбек халқ оғзаки ижодиётида мавжуд бўлган дoston жанрининг хусусиятларини «Малика Айёр» асари материали асосида маълум даражада кўриб ўтишга ҳаракат қилдик.

Бу текшириш ҳам, ҳали умуман халқ дostonларининг жанр хусусияти ҳақида чуқур назарий маълумот беришни талаб қилмасдан фақат биргина дostonнинг хусусиятларини кўрсатиб беришдан иборат.

Аввало, дoston ўзи нима¹ дeган савол туғилади.

Достон, аввало, мураккаб санъат асаридир. Достонда халқ санъатининг турли томонлари намоён бўлади. Эпик асар достон бўлиши учун, биринчидан, адабий текст – адабий, бадиий манба бўлиши керак. Иккинчидан, достоннинг мусикаси бўлиши лозим (бу ўринда шуни аниқлаб олиш керакки, ҳар бир алоҳида олинган достон учун алоҳида йирик мусиқа асари бўлиши шарт эмас). Достон мусикаси ундаги шеърининг парчаларнинг вазн ўлчовига, унинг ритми ва мазмунига мос келадиган кўшиқлардан ташкил топган ва бир бутунликни ташкил этган асар бўлиши талаб қилинади. Учинчидан, достонни бир киши ижро этганлиги, куйловчи соз (дўмбира, қўбиз, дутор ва бошқалар)ни билиши зарур². Тўртинчидан, достонни куйлаётган бахши яхши овозга эга бўлиши ва кўшиқ айтиш маҳоратини эгаллаган бўлиши зарур. Мана шу шартларнинг бари мавжуд бўлган тақдирдагина тингловчилар том маънода достон эшитган бўладилар. Бу шартларнинг бирортаси бўлмаса, бундай достон тингловчига ўзининг эмоционал таъсирини қутилган даражада бера олмайди.

Достонда тугалланган адабий бадиий текст – эпик асар бўлмаса, ўз-ўзидан кўриниб турибдики, у достон эмас, балки куйланаётган кўшиқ ёки кўшиқлар мажмуаси бўлиб қолади. Агар достоннинг мусикаси бўлмаса, у яна том маънода достон бўлмайди, балки достоннинг эртак ёки афсона шаклида айтилиши бўлиб қолади ва бу ишни халқ ижодига қизиққан ҳар бир киши қила олиши мумкин. Бунда профессионал достончининг кераги бўлмай қолади. Мусиқа бўлмагандан кейин мусиқа асбоби: дўмбира, дутор, қўбиз ва ҳоказолар ўз-ўзидан тушиб қолади ва ижро этувчининг овозига бўлган талаб ҳам ўз-ўзидан йўқолади. Агар адабий манба – текст қисми ва мусиқа бўла туриб, чолғу асбоби бўлмаса, достонни узоқ куйлаш ҳам мумкин эмас; достоннинг

¹ Бу ерда сўз фақат халқ достончилари куйлаган йирик ва мураккаб эпик асар устида боради.

² Достонни мусиқа асбобисиз куйлаб айтувчилар ҳам бор. Бундай ижрочилар ўзларининг сoзни билмаганликларини нуқсон сифатида эътироф этадилар.

эмоционал таъсири ҳам юксак даражада бўлолмайди. Тасаввур килайлик, юқорида айтиб ўтилган учта талабнинг барчаси бўлиб, дostonчининг овози ёқимли бўлмаса ёки у алоҳида қўшиқларни моҳирлик билан ижро эта олмаса, шунингдек, ижро этилаётган дostonнинг айрим-айрим эпизодларига яраша дostonчининг хатти-ҳаракати ва мимикаси бўлмаса, бошқача қилиб айтганда, дostonчи яхши ҳофиз ва яхши актёр бўлмаса, ундай дostonчининг ижросига талаб кам бўлади, бинобарин, бу асар кенг маънода дoston бўлмайди.

Маълумки, дostonчи бахши дoston куйлаганда тингловчилар аудиториясига катта аҳамият беради. Дoston аудитория талабига кўра ўзгариб боради. Бир хил тоифа тингловчилар ўртасида куйланган муайян дoston иккинчи хил тингловчилар олдида ҳеч вақт айнан такрорланмайди. Бунда куйлаётган дostonчининг кайфияти ҳам катта роль ўйнайди. Бу ҳодиса дostonнинг бадиийлигини оширишда муҳим аҳамиятга молик бўлиб, умуман, дoston жанри учун жуда характерлидир.

Бизнинг ёзиб олган дostonларимиз бахши репертуаридаги у ёки бу асарнинг маълум бир вақтдаги кўриниши бўлиб, у текст айни дostonнинг ҳамма ерда куйланишини бутун тўлалиги билан акс эттира олмайди. Шу сабабли тажрибали фольклористлар (айниқса, Ҳ. Т. Зарифов) бирор дostonни ёзиб оларкан, ёзиб олиш процесси тугагандан кейин, уни дostonчига ўқиб берган ва дostonчининг киритмоқчи бўлган ўзгартишларини алоҳида ёзиб олган ҳамда бу дostonни нашрга тайёрлаш вақтида ана шу ўзгартишлардан фойдаланган. Демак, дoston бўлиши учун дostonчининг бўлиши шарт, дostonни дostonчидан айириш мумкин эмас, акс ҳолда, у мураккаб санъат асари бўла олмай қолади. Бизнинг ёзиб олиб, нашр эттираётган дostonларимиз, аслида, кенг маънодаги дostonнинг бадиий текст қисмидангина иборатдир.

Ҳозирги дostonга қўйилаётган талабни қўшиққа ҳам қўйса бўлади-ку, деган фикр туғилиши мумкин. Бу бир қадар тўғри фикр. Қўшиқ учун ҳам шеър, мусиқа, чолғу асбоби, овоз ва ижро маҳорати керак, лекин қатъий шарт эмас. Қўшиқни чолғу асбобисиз ҳам ижро этиш мумкин. Халқ қўшиқлари меҳнат жараёнида юзага келар экан, меҳнат қилиб қўшиқ яратаётган инсон чолғу

асбоби чалиб ўтириши мумкин эмас. Овоз ва ижро маҳоратига келганда шуни айтиш керакки, кўшиқ яратаётган шахс уни ҳиргойи қилиб айтар экан унинг овозига профессионал ашуланининг овозига қўйиладиган талаб қўйилмайди. Шунингдек, кўшиқ яратувчининг ижро маҳорати ҳам, профессионал ашуланиники сингари бўлиши шарт эмас. Демак, кўшиқни ижро этиш учун профессионаллик қатъий талаб қилиб қўйилмайди. Чунки унинг яратувчиси ҳам, куйловчиси ҳам бутун халқдир. «Халқ қайғули чоғида ҳам, шоду хуррам пайтларида ҳам кўшиқ ижод этиб, куйга солиб айтади. Ўзбек халқи орасида «Суйган ҳам кўшиқчи, куйган ҳам кўшиқчи» ёки «Суйган кўшиқчи бўлар, куйган ўланчи бўлар» деган таъбирлар мақол сифатида юритилади»¹.

Кўшиқни бир киши айтиши шарт эмас. Масалан, мавсум-маросим кўшиқларининг баъзилари кўпинча коллектив бўлиб ижро этилади. Шунинг учун ҳам кўшиқ халқ орасида жуда кенг тарқалган жанрдир. Кўшиқ ҳажм жиҳатидан кичик бўлганлиги туфайли унинг кенг халқ оммаси орасида тарқалиши осон.

Кўшиқ жанри мусиқа билан шеърнинг узвий боғлиқлигида юзага келади ва кўшиқнинг яшаш жараёнида шеър ва куй доимо биргаликда бўлади. Кўшиқда куй ва шеър ажралмас эгизакдир. Кўшиқни нисбий жиҳатдан ҳам дoston билан тенглаштириб бўлмайди.

Дostonнинг адабий қисми ҳажм жиҳатидан катта, кўп жанрлик хусусиятларига эга бўлиши ва композицион жиҳатдан мураккаб бўлишлиги билан халқ оғзаки ижодиётида мавжуд бўлган бошқа жанрлардан ажралиб туради.

«Малика Айёр» дostonи бошқа бир қатор дostonлар сингари поэзия ва прозадан ташкил топган бўлади.

Дostonда, одатда, прозага нисбатан поэзия ҳажм жиҳатидан устун туради. Аммо бундан дostonда прозанинг аҳамияти кам деган хулоса келиб чиқмайди, албатта. Зотан, ўзбек халқ оғзаки ижодиётида прозаик қисмлари бўлмаган, яъни фақат назмда яратилган дoston учрамайди. Фақат прозадан ташкил топган ва бизга ёзма ҳолда келиб етган халқ дostonлари, аслида, шеърый асарлар бўлган.

¹ Музайяна Алавия. Ўзбек халқ кўшиқлари. — Тошкент, 1959, 3-бет.

Достоннинг прозаик қисмлари ҳақида муфассал маълумот берувчи илмий ишларнинг йўқлиги туфайли достон прозаси ҳақида умумлаштирилган тугал бир фикр бериш учун кенг текширишлар олиб бориш зарур.

Достон ҳақида умумий гаплар билан чегараланган, ахён ахёнда учровчи ишларда ҳам достон прозаси ҳақида зарурий фикрлар қониқарли учрамайди. Ўзбек фольклористикасида кўзга кўринган асар – В. М. Жирмунский ва Ҳ. Т. Зарифовнинг «Ўзбек халқининг қахрамонлик эпоси» асарида ҳам бу ҳақда жуда кам тўхтаб ўтилган.

Достон шакл жиҳатдан, жуда кўп туркий халқлардаги каби ўзбекларда ҳам боғловчи прозаик парчалар билан алашинувчи шеърлардан ташкил топгандир¹. Шунингдек, достоннинг эртақдан фарқ қилиши ҳақида: «...достоннинг асосини шеър ташкил этади, проза эса фақат қисқача боғловчи қўшиқлар²» – дейилган.

Фольклористларимизнинг мана шу фикрлари юқорида айтганларимизнинг ёрқин далили бўла олади. Аmmo бу деган сўз ўзбек халқ достонларининг ҳаммасида ҳам проза ёрқинчи роль ўйнайди, деганимиз эмас, албатта. Ўзбек халқ оғзаки ижодиётида шундай достонлар ҳам борки, буларда проза жуда катта ўрин эгаллайди. Мана шундай достонларнинг бири «Малика Айёр» достонидир.

Бу достонда ҳам прозаик қисм персонажлар ўртасида монолог ўқилганда, автор ремаркаси ўрнида ишлатилганда, хақиқатан ҳам, боғловчи ҳалқа ролини ўйнайди, лекин ҳамма вақт унақанги пас сив қатнашчи эмас. «Малика Айёр» достонида прозаик қисмлар шеърый қисмлар билан бир ўринда туради. В. М. Жирмунский ва Ҳ. Т. Зарифовнинг юқорида айтилган китобиде: «Малика Айёр» достонининг поэзия ва прозаси ҳақида: «воқеаларнинг прозаик тасвири бу ерда катта роль ўйнайди, шеърый парчалар эса кўпинча лирик монологлардан иборат»³ дейилган.

¹ Жирмунский В. М., Зарифов Х. Т. Узбекский народный героический эпос. – М., 1947, стр. 24.

² Ўша жойда.

³ Ўша асар, 445-бет.

асбоби чалиб ўтириши мумкин эмас. Овоз ва ижро маҳоратига келганда шуни айтиш керакки, кўшиқ яратаётган шахс уни хиргойи қилиб айтар экан унинг овозига профессионал ашулачининг овозига қўйиладиган талаб қўйилмайди. Шунингдек, кўшиқ яратувчининг ижро маҳорати ҳам, профессионал ашулачиники сингари бўлиши шарт эмас. Демак, кўшиқни ижро этиш учун профессионаллик қатъий талаб қилиб қўйилмайди. Чунки унинг яратувчиси ҳам, куйловчиси ҳам бутун халқдир. «Халқ қайғули чоғида ҳам, шоду хуррам пайтларида ҳам кўшиқ ижод этиб, куйга солиб айтади. Ўзбек халқи орасида «Суйган ҳам кўшиқчи, куйган ҳам кўшиқчи» ёки «Суйган кўшиқчи бўлар, куйган ўланчи бўлар» деган таъбирлар мақол сифатида юритилади»¹.

Кўшиқни бир киши айтиши шарт эмас. Масалан, мавсум-маросим кўшиқларининг баъзилари кўпинча коллектив бўлиб ижро этилади. Шунинг учун ҳам кўшиқ халқ орасида жуда кенг тарқалган жанрдир. Кўшиқ ҳажм жиҳатидан кичик бўлганлиги туфайли унинг кенг халқ оммаси орасида тарқалиши осон.

Кўшиқ жанри мусиқа билан шеърнинг узвий боғлиқлигида юзага келади ва кўшиқнинг яшаш жараёнида шеър ва куй доимо биргаликда бўлади. Кўшиқда куй ва шеър ажралмас эгизакдир. Кўшиқни нисбий жиҳатдан ҳам дoston билан тенглаштириб бўлмайди.

Дostonнинг адабий қисми ҳажм жиҳатидан катта, кўп жанрлик хусусиятларига эга бўлиши ва композицион жиҳатдан мураккаб бўлишлиги билан халқ оғзаки ижодиётида мавжуд бўлган бошқа жанрлардан ажралиб туради.

«Малика Айёр» дostonи бошқа бир қатор дostonлар сингари поэзия ва прозадан ташкил топган бўлади.

Дostonда, одатда, прозага нисбатан поэзия ҳажм жиҳатидан устун туради. Аммо бундан дostonда прозанинг аҳамияти кам деган хулоса келиб чиқмайди, албатта. Зотан, ўзбек халқ оғзаки ижодиётида прозаик қисмлари бўлмаган, яъни фақат назмда яратилган дoston учрамайди. Фақат прозадан ташкил топган ва бизга ёзма ҳолда келиб етган халқ дostonлари, аслида, шеърый асарлар бўлган.

¹ Музайяна Алавия. Ўзбек халқ кўшиқлари. – Тошкент, 1959, 3-бет.

Достоннинг прозаик қисмлари ҳақида муфассал маълумот берувчи илмий ишларнинг йўқлиги туфайли достон прозаси ҳақида умумлаштирилган тугал бир фикр бериш учун кенг текширишлар олиб бориш зарур.

Достон ҳақида умумий гаплар билан чегараланган, ахён-ахёнда учровчи ишларда ҳам достон прозаси ҳақида зарурий фикрлар қониқарли учрамайди. Ўзбек фольклористикасида кўзга кўринган асар – В. М. Жирмунский ва Ҳ. Т. Зарифовнинг «Ўзбек халқининг қаҳрамонлик эпоси» асарида ҳам бу ҳақда жуда кам тўхтаб ўтилган.

Достон шакл жиҳатдан, жуда кўп туркий халқлардаги каби ўзбекларда ҳам боғловчи прозаик парчалар билан алмашинувчи шеърлардан ташкил топгандир¹. Шунингдек, достоннинг эртақдан фарқ қилиши ҳақида: «...достоннинг асосини шеър ташкил этади, проза эса фақат қисқача боғловчи қўшимчадир»² – дейилган.

Фольклористларимизнинг мана шу фикрлари юқорида айтганларимизнинг ёрқин далили бўла олади. Аммо бу деган сўз ўзбек халқ достонларининг ҳаммасида ҳам проза ёрдамчи роль ўйнайди, деганимиз эмас, албатта. Ўзбек халқ оғзаки ижодиётида шундай достонлар ҳам борки, буларда проза жуда катта ўрин эгаллайди. Мана шундай достонларнинг бири «Малика Айёр» достонидир.

Бу достонда ҳам прозаик қисм персонажлар ўртасида монолог ўқилганда, автор ремаркаси ўрнида ишлатилганда, ҳақиқатан ҳам, боғловчи халққа ролини ўйнайди, лекин ҳамма вақт унақанги пассив қатнашчи эмас. «Малика Айёр» достонида прозаик қисмлар шеърый қисмлар билан бир ўринда туради. В. М. Жирмунский ва Ҳ. Т. Зарифовнинг юқорида айtilган китобида: «Малика Айёр» достонининг поэзия ва прозаси ҳақида: «воқеаларнинг прозаик тасвири бу ерда катта роль ўйнайди, шеърый парчалар эса кўпинча лирик монологлардан иборат»³ дейилган.

¹ Жирмунский В. М., Зарифов Х. Т. Узбекский народный героический эпос. – М., 1947, стр. 24.

² Ўша жойда.

³ Ўша асар, 445-бет.

Айрим дostonларда шеър билан прозанинг ўрни, нисбати ва хусусиятларини кенгроқ ва аниқроқ белгилаш лозим бўлади. «Малика айёр» дostonида прозаик қисмлар шеърый қисмлар билан бир ўринда туради. Баъзан проза шеърый қисмларни бири-бирига боғласа, баъзан аксинча бўлиши ҳам мумкин. Яъни икки прозаик парчани шеърый қисм боғлаб келадиган ўринлар ҳам кўплаб учраб туради. Масалан, Аҳмад Сардорнинг ўз йигитларини йиғиб, Авазни ўлдириш ва Маликани олиб келишни буюриши ва Асад, Шодмон мерганларни бу топшириқни бажаришга жўнатишида худди шундай ҳодисани учратамиз¹.

Асад ва Шодмон мерган Аҳмад Сардордан топшириқ олиб, йўлга тушадилар. Воқеа прозада баён этилади. Бу ерда каттагина шеърый парча берилади. Бу шеърый парча ўз ҳолича воқеалар ривожини тасвирлай олмайди, балки икки прозаик парчани бири-бирига боғлаб, шу прозаик парчаларда олга сурилайётган фикр ва ривожлантирилайётган воқеани янада конкретлаштиришга хизмат этади. Бу шеърый парчада мерганларнинг йўлда кетаётган пайти майда деталлар билан ёритилади ва уни куйидаги тўртлик билан хулосаланади:

*Ҳавода бор ёруғ юлдуз,
Дарёда ўйнайди кундуз.
Мерганлар, қилди гайратни,
Йўл тортди уч кеча-кундуз².*

Мана шу хулосаловчи тўртликдан сўнг яна прозаик қисм бошланиб, олдинги прозаик парчада баён этилайётган воқеа давом эттирилади: «Уч кеча-кундуз йўл юриб Палапон тоғига етди. Тоғнинг белини мерганлар кўрди, Авазнинг оти ҳали бу ердан ўтгани йўқ экан»³ ва ҳоказо.

Демак, дostonда фақат прозаик қисмлар воқеаларни боғловчи ролини ўйнамасдан, аксинча, шеърый парчанинг боғловчи вазифасида келиши ҳам мумкин экан. Шу мисолнинг ўзидан кўриниб

¹ Малика Айёр. – Тошкент, 1941, 24–25-бетлар.

² Ўша асар, 25-бет.

³ Ўша асар, 25–26-бетлар.

турибдики, воқеа ривожланишида асосий вазифа шеърга эмас, прозага юклатилган. Бу ходиса дostonнинг асосий бадий формасини фақат шеър ташкил этмаслигини кўрсатади.

«Малика Айёр» дostonи материалларида шу нарса кўпроқ назарга ташланадики, бунда шеър ва проза аҳамият жиҳатидан тенг ҳукуклидир.

«Малика Айёр» дostonида Асад мерган билан Шодмон мерганнинг сўзлашувида шундай факт учрайди:

*Хабар беринг, Шодмон ака,
Энагарни отсаммикин?!
Устига минган мардини,
Дамба-дам сулатсаммикин?!
Остидаги Ғиркўкини,
Ўлжа қилиб кетсаммикин?!
Торкистонга етсаммикин,
Ойим Маликани олиб,
Бир куни Чамбилга келиб,
Гўрўғлига пешкаш қилиб,
Чамбил белда тортсаммикин?!*

Шодмон мерган айтди: «Икковимиз Авазни ўлдирамиз деб келганмиз, агар кўлингдан келиб Авазни ўлдирдинг-да, мен сенинг кўлингдан айириб олаётимманми? Ора тушиб олаётган одам йўқ»¹.

Мана шу характерли парчада Асад мерганнинг шеър билан мурожаати ва Шодмон мерганнинг прозадаги жавоби ўртасида ҳеч қандай келишмовчилик ёки қарама-қаршилиқ йўқ; прозаик парча бу ерда бадий жиҳатдан шеърий парчадан сира ҳам қолишмайди. Шодмон мерган Асад мерганнинг ноҳўя берган саволига киноя билан жавоб қайтараркан, бу асарнинг бадийлигини оширишда ўзига хос ўрин тутган.

Шеърий қисмлар воқеаларнинг бориши ҳақида ҳикоя қилиши кўп ўрин эгаллайди. Масалан:

¹ Ўша асар, 25-бет.

*Ғамли кунда тортар эди оҳу вой,
Шиқирлатиб қўлга олди парли ёй,
Ғап эшитинг мерганларнинг ишидан,
Чоқлади Авазнинг қордай тўшидан.
Жафо тиги букун жондан ўтади,
Айрилиқ ханжари бағрин йиртади,
Яшиндай бўп ёйнинг ўқи етади.
Кўринг, назаркарда бекнинг Ғироти,
Қирқ газ баланд ўқдан сачраб ўтади.*

Мана бу каби воқеалар тасвири шеърӣй парчада жуда содда ва рагон қилиб берилишини анча учратиш мумкин. Аммо прозанинг ҳам воқеани тасвирлашдаги ўзига хос аҳамиятини ва ҳажмини ҳамма вақт шеърӣй парчадан кам деб бўлмади. Прозаик қисмлар бу вазифани бажаришда дostonда актив роль ўйнайди.

«Малика Айёр» дostonида шеърӣй қисмлар кўпинча монолог шаклида ишлатилади. Аммо прозаик қисмларнинг монолог шаклида ишлатилиши деярли учрамайди.

Прозаик қисмларнинг «Малика Айёр» дostonида ва умуман Фозил шоир ижодида диалог шаклида ишлатилиши қандайдир бир қонуний тусга киргандай кўринади. Диалогларнинг шеърӣй йўлда тузилиши кам учрайди ва учраганда ҳам прозадаги сингари фикран чуқур, мазмунан кенг ва шакл томонидан жуда сикик эмас, яъни бир сўз билан айтганда, динамик диалоглар эмас. Диалогларнинг энг яхши намуналари прозада учрайди; шунингдек, дostonдаги юмористик элементлар кўпинча прозаик қисмда юзага чиқади.

Энг яхши диалогларнинг прозада бўлиши барча ўзбек дostonлари учун характерли эмас. Масалан, Эргаш Жуманбулбул ўғлидан ёзиб олинган «Равшан» дostonида диалогларнинг шеърӣда яратилган ажойиб намуналари бор.

Дostonнинг зачини, деярли ҳамма вақт, прозада айтилади. Бу проза ҳам улкан халқ шоирлари – классик ижрочилари куйлаган дostonларда сажъ билан яратилган.

«Чамбил элида Гўрўғли зўрабор, қирқ олти сардор, тўрт ярим лак бедовсувор, Соқибулбул деган сайиси бор, Гўрўғлининг зўр деб таърифи кетган, зарбаси тошдан ўтган, «ол Гўрўғли кел-

ди» деса йиғлаб ётган боласини юпатган, Исфиҳонда ишлатган қиличининг ишлови етган, теккан омон қолмасин деб захарнинг сувин ялатган, Чамбилда давронни суриб ётир Гўрўғли султон»¹.

Демак, «Малика Айёр» достонида шеър ва проза турли ўринларда бир хил вазифани адо этиб, бир хилда муваффақият билан ишлатилган дея оламиз.

Достонлар икки катта гуруҳга бўлинадилар – традицион достонлар ва «янги достонлар».

Традицион достонлар кўп асрлардан буён оғиздан-оғизга, наслдан-наслга ўтиб, халқимизнинг маънавий ҳаётида катта ўрин эгаллаши, эстетик талабларига жавоб бериб, халқимиз заковатининг юксак намуналари сифатида, ўтмиш асрларнинг маданий ёдгорлиги бўлиб бизнинг кунларимизгача етиб келган ажойиб санъат асарларидирлар.

«Малика Айёр» достони ҳам ана шундай традицион достонлар сирасидандир.

Традицион достонларни ўз навбатида бир неча турларга ажратиш мумкин. Булар: қаҳрамонлик достонлари, халқ романи типигадаги ишқ-муҳаббатни тараннум этувчи достонлар (булар романик достонлар дейилади) ва тарихий достонлардир.

Кўпгина олимлар қаҳрамонлик достонлари романик достонларга нисбатан илгари яратилган деган фикрни олға сурадилар. Бу фикрлар В. М. Жирмунский ва Ҳ. Т. Зарифовнинг «Ўзбек халқининг қаҳрамонлик эпоси» асарида, бир қатор фактларга суянган ҳолда, жуда яхши исботлаб берилган.

Модомики, қаҳрамонлик достонлари илгари юзага келган экан, романик достонларнинг ундан кейин яратилганлигини исботлашга ўрин ҳам қолмайди. Аммо романик достонларнинг қайси бири қайси даврнинг маҳсули?

Бундай саволларга қатъий жавоб бериш учун ҳали кўпгина илмий текшириш ишлари олиб бориш керак. Лекин шуни қатъий айтиш мумкинки, қаҳрамонлик достонларида романик элементлар ва романик достонларда қаҳрамонлик элементлари бўлади. Мана шу қаҳрамонлик ва романик йўналишлар мавжуд бўлган достонларнинг қайси гуруҳга мансуб эканлигини аниқлаш учун

¹ Ўша асар, 17-бет.

қахрамонлик ишқ-муҳаббат йўналишига бўйсундирилганми ёки аксинча, дostonда мавжуд бўлган ишқ-муҳаббат қахрамонлик йўналишига бўйсундирилганми, ана шуни аниқлаш зарур. Баъзан юзаки қаралганда бир хил бўлиб кўринган иккита дoston, аслида, икки турга мансуб бўлган дostonлар бўлиши мумкин. Масалан, Гўрўғли дostonлари циклига кирган «Малика Айёр», «Равшан» дostonларини олиб қаралганда, бу икки асар ўртасида принципиал фарқ борлиги кўринади.

«Малика Айёр» дostonида Малика билан учрашган Гўрўғли уни излаб бормоқчи бўлади. У дostonнинг бош қахрамони сифатида ажойиб баҳодирлик, мардлик ва шижоат кўрсатади. У девлар, шерлар ва бошқаларга қарши курашда зўр маҳорат кўрсатиб, улар устидан галаба қозонади. Маликани қўлга киритади ва уни Қалайи кўрғонда берган ваъдасига биноан Авазга беради. Дostonнинг Фозил шоир вариантыда масала мана шундай қўйилади.

Гўрўғлининг Малика билан учрашуви ва уни қўлга киритганга қадар оҳ-вой қилиши; қўлга киритгандан кейин Авазга бериши китобхон ёки тингловчига ғалати туюлиши мумкин. Бу туйғу, сўзсиз, асослидир. Зотан, Гўрўғли цикли дostonларида қизни ким қўлга киритган бўлса, шу киши у қизга уйланади. Бу одат тусига кириб қолган.

Аваз Мақотил ва Арботин кўшинларига қарши жангда қахрамонлик кўрсатди-ку. Шу сабабли Маликани Аваз олиши керак эмасми деган эътироз бўлиши мумкин. Лекин бундай эътирозга ўрин йўқ. Авазнинг юқорида эслатиб ўтганимиздек, кураши ватан мудофааси учун бўлган курашдир. Бу курашнинг Маликани олиб келиш билан ҳеч қандай алоқаси йўқ. Лекин шуни аниқлаб олиш керакки, «Малика Айёр» дostonида оилани мустаҳкамлаш масаласи туради. Бу асарда бир қатор романик дostonлардаги каби ишқ-муҳаббат масаласи йўқ.

Маълумки, Аваз Гўрўғлининг асранди ўғли, Чамбилнинг атоқли баҳодирларидандир. Лекин Гўрўғли билан ўша сафарда, Авазнинг ўрнига, Ҳасанхон ёки набираларидан бирови бўлганда ҳам Гўрўғли Маликани унга бериши мумкин эди. Асарнинг бутун мантиқий мазмуни шунга олиб келади. Гўрўғлининг оҳ-войлари эса фақат шакл учун, асар композицияси бутунлигини

мустаҳкам сақлаш учун, дostonда қўлланилган бадий приёмни мунтазам давом эттириш учун киритилган.

«Равшан» дostonида эса аҳвол бутунлай ўзгача. Равшан буви-си берган узукда Зулхуморнинг тасвирини кўради ва уни севиб қолиб, ахтариб кетади. Зулхумор ҳам Равшанни кўргандан кейин, уни севиб қолади. Малика эса, Гўрўғлини ҳам, Авазни ҳам севган эмас; у тақдирга тан беради, холос. Зулхумор бўлса Равшанга бўлган севгисига содиқ ҳолда ўз имкониятлари доирасида кураш олиб боради. «Равшан» дostonида қаҳрамонлик йўналиши мавжуд эса-да, бу йўналишда асосий ролни бош қаҳрамон – Равшан эмас, балки унинг отаси Ҳасанхон ўйнайди.

Демак, дostonда асосий мотивнинг қайси йўналишда эканлиги дostonнинг қайси гpуппага мансуб эканлигини белгилаб боради.

Ўзбек халқ оғзаки ижодиётида яна шунақанги дostonлар ҳам учрайдики, уларнинг қайси гуруҳга мансуб эканлигини қатъий айтиш қийин. Чунки бу хил дostonларда қаҳрамонлик йўналиши ҳам, ишқ-муҳаббат йўналиши ҳам бир хилда бўлиб, буларнинг иккаласи ҳам асосий йўналишни ташкил этади. Масалан, «Ширин билан Шакар» дostonи ана шундай дostonлар сирасидандир.

«Малика Айёр» дostonининг қайси гуруҳга мансуб эканлигини аниқлаш ҳам анча мушкул масала. Бу дoston «Алпомиш» каби бутун тўлалиги билан қаҳрамонлик дostonи эмас. Унда ишқ-муҳаббат жуда заиф. «Малика Айёр» дostonида, гарчи қаҳрамоннинг узок юртда яшовчи гўзални олиб келиши учун сафарга жўнаши асар сюжетининг асосида турса ҳам, дostonдаги қаҳрамонлик севги йўналишига бўйсундирилган эмас. Юқорида айтиб ўтганимиздек, бу ерда асосий мақсад оилани мустаҳкамлаш масаласидир. Мана шу оилани мустаҳкамлаш йўлида қаҳрамонлар зўр матонат кўрсатадилар. Машаққатли курашларда голиб чиқадилар. Демак, дostonнинг асосий ғояси қаҳрамонликни тараннум этишдир. Мана шунга суянган ҳолда «Малика Айёр» дostonини қаҳрамонлик дostonларининг бир тармоғига мансубдир, дея оламиз. Демак, бу дoston ўзбек халқ афсоналари асосида юзага келган фантастик-қаҳрамонлик дostonдир.¹

¹ Ушбу мақола М. Саидовнинг «Малика Айёр» номли монографияси (Тошкент: Фан, 1964)дан олинди.

Абдумўмин
ҚАҲҲОРОВ
(1927–1997)



Абдумўмин Қаҳқоров 1927 йил 10 майда Қашқадарё вилояти Қарши тумани Товаш қишлоғида туғилган. Самарқанд давлат университетининг филология факультетида (1946–52), Ўрта Осиё давлат университетининг аспирантурасида (1970–71) ўқиган. Қарши ўқитувчилар институти (ҳозирги Қарши давлат университети)да ўзбек тили ва адабиёти фани ўқитувчиси, бўлим мудири (1952–57), Қарши туманидаги 21-ўрта мактабда ўқитувчи ва илмий бўлим мудири, 11-ўрта мактаб директори (1957–58), Қарши туман «Пахтакор» газетасининг муҳаррири (1958–59) бўлиб ишлаган. Қарши давлат педагогика институтида ўқитувчи (1962–73), шу институт доценти (1979–97) вазифаларида меҳнат қилган. «Келиной» туркуми дostonларининг ўзига хос хусусиятлари мавзuidaги номзодлик диссертациясини ҳимоя қилган (1972). «Олий ўқув юртларида дostonларни ўрганиши» номли ўқув қўлланмаси (1984), «Янги дostonлар» монографияси (1985) нашр этилган. 1984 йилда унинг ўзи томонидан Қодир баҳши Раҳимовдан ёзиб олинган «Ойчинор» дostonи «Ўзбек халқ ижоди» кўпжилдлиги силсиласида нашр этилди. «Нуралининг банди бўлиши» (1993), Рўзи Қултўра ўғлининг «Соҳибқироннинг туғилиши» (1993), Қодир Раҳим ўғлининг «Оллоназар-Олчинбек» (2002) дostonларини нашрга тайёрлаб, чоп эттирган. 1997 йил Қарши шаҳрида вафот этган.

ДОСТОНЧИ ШЕРНА ҲАҚИДА

1945 йилда бир гуруҳ фольклоршунослар Қашқадарё ва Сурхондарё воҳасида фольклор экспедициясида бўладилар. А. Афзалов экспедиция материаллари асосида «Ўзбек халқ бахшилари» номли мақолисини ёзиб, фанда биринчи марта Шерна Бердиназар ўғли ҳақида: «Шерна ўз даврининг энг чечан, сўзга бой, санъаткор халқ шоирларидан бўлиб, шогирд етиштиришда ҳам Шернага тенглашадиган устоз бўлмаган. Шерназар шоир Сурхондарё ва Қашқадарё, ҳатто Туркменистоннинг айрим шаҳар ва туманларигача бориб дoston айтиб, тингловчиларни ҳайратда қолдирган. Шу билан халқ орасида ўз дostonлари билан маълум ва машҳур бўлган... таланти халқ шоирларини тарбиялаб етиштирган» – деб ахборот беради («Шарқ юлдузи» журнали, 1946 йил, 10–11-сон, 141-бет). Қарши давлат педагогика институти талаба ва ўқитувчиларнинг 1953–1980 йиллардаги олиб борган фольклор экспедицияларининг натижалари бу ахборотнинг тўғрилигини тасдиқлаб, Шернани чечан дostonчи сифатида ҳар томонлама баҳолашга имкон берди, унинг ҳаёт йўли, устоз ва шогирдлари ҳақида янги материаллар қўлга киритилди. Текширишлардан шу нарса маълум бўлдики, Шернанинг устози XIX асрнинг улкан дostonчиси Бобо шоирнинг шогирди Қосим шоир бўлган. Ўз навбатида, Шерна 18 шогирд тарбиялаган. Умуман, XIX–XX асрларда Қашқадарё ва Сурхон воҳасида 200 га яқин халқ дostonчилари етишиб чиққан Улар ижодкор халқимиз орасида етишиб чиққан қайнар булоқлар эди. Воҳада етишган халқ бахшиларининг пешволаридан бири Шерна шоирни фольклоршунослардан ҳеч бири кўрган ёки репертуаридаги асарларидан ёзиб олган эмас. Чунки у 1855 йилда туғилиб, 1915 йилда вафот этган. Унинг ҳаёт ва ижод йўли шогирдлари маълумотлари асосида тикланади.

Шерна ҳозиржавоб, ўта билагон, энг эътиборли шоирлардан бўлган. У 9–10 ёшлариданоқ куйлай бошлаган. Ниҳоят шерободлик Қосим шоирга шогирд тушган. Кейинчалик Шерободдагина эмас, Сурхондарё, Қашқадарё, ҳатто Тожикистон ва Туркма-

ДОСТОНЧИ ШЕРНА ҲАҚИДА

1945 йилда бир гуруҳ фольклоршунослар Қашқадарё ва Сурхондарё воҳасида фольклор экспедициясида бўладилар. А. Афзалов экспедиция материаллари асосида «Ўзбек халқ бахшилари» номли мақолисини ёзиб, фанда биринчи марта Шерна Бердиназар ўғли ҳақида: «Шерна ўз даврининг энг чечан, сўзга бой, санъаткор халқ шоирларидан бўлиб, шогирд етиштиришда ҳам Шернага тенглашадиган устоз бўлмаган. Шерназар шоир Сурхондарё ва Қашқадарё, ҳатто Туркменистоннинг айрим шаҳар ва туманларигача бориб дoston айтиб, тингловчиларни ҳайратда қолдирган. Шу билан халқ орасида ўз дostonлари билан маълум ва машҳур бўлган... таланти халқ шоирларини тарбиялаб етиштирган» – деб ахборот беради («Шарқ юлдузи» журнали, 1946 йил, 10–11-сон, 141-бет). Қарши давлат педагогика институти талаба ва ўқитувчиларнинг 1953–1980 йиллардаги олиб борган фольклор экспедицияларининг натижалари бу ахборотнинг тўғрилигини тасдиқлаб, Шернани чечан дostonчи сифатида ҳар томонлама баҳолашга имкон берди, унинг ҳаёт йўли, устоз ва шогирдлари ҳақида янги материаллар қўлга киритилди. Текширишлардан шу нарса маълум бўлдики, Шернанинг устози XIX асрнинг улкан дostonчиси Бобо шоирнинг шогирди Қосим шоир бўлган. Ўз навбатида, Шерна 18 шогирд тарбиялаган. Умуман, XIX–XX асрларда Қашқадарё ва Сурхон воҳасида 200 га яқин халқ дostonчилари етишиб чикқан Улар ижодкор халқимиз орасида етишиб чикқан қайнар булоқлар эди. Воҳада етишган халқ бахшиларининг пешволаридан бири Шерна шоирни фольклоршунослардан ҳеч бири кўрган ёки репертуаридаги асарларидан ёзиб олган эмас. Чунки у 1855 йилда туғилиб, 1915 йилда вафот этган. Унинг ҳаёт ва ижод йўли шогирдлари маълумотлари асосида тикланади.

Шерна ҳозиржавоб, ўта билагон, энг эътиборли шоирлардан бўлган. У 9–10 ёшлариданоқ куйлай бошлаган. Ниҳоят шерободлик Қосим шоирга шогирд тушган. Кейинчалик Шерободдагина эмас, Сурхондарё, Қашқадарё, ҳатто Тожикистон ва Туркменистоннинг жанубида яшовчи ўзбеклар орасида ҳам машҳур

бўлиб кетган. Биз Туркменистоннинг Чоршанғи, Тожикистоннинг Қўрғонтепа, Колхозобод, Қумсангил ва Шахритуз туманларида бўлганимизда, у ердаги кексалар, айникса, халқ бахшилари тўлиб-тошиб Шерназар Бердиназар ўғли ҳақида ҳикоя қиладилар, унинг дўмбира куйларини завқ билан чалиб берадилар. Достонларини «Шернаники» деб ижро этдилар.

Шерна достонни усталик билан ижро этиш, куйлаш ва кўп билиши билангина эмас, балки шогирд етиштиришда ҳам устоз даражасига кўтарилган. Жумладан, кашкадарёлик Умир шоир Сафар ўғли (Дехқонобод туманидаги Етимқудук кишлоғидан), Ражаб бахши Нормурод ўғли (шу туманнинг Тўдачарвоқ кишлоғидан) кабилар Шерна шоирнинг шогирди бўлган. Ҳатто, Омонниёз, Эрка Жўра каби лўли бахшилар ҳам ўзларини «Шернанинг шогирдиман» деб эътироф этадилар. Шерна бахшидан таълим олган деҳқонободлик Ражаб бахши: «Шернага ҳеч ким тенг келолмас эди», деб ҳикоя қилса, жарқўрғонлик Хушвақт Сафар ўғли: «Шерна тириклигида қирқ кеча қирқ достон айтган. Биронтасини ҳам қайтармаган», – дея таърифлайди.

Шерна ўзининг достон куйлаш санъати ва маҳорати билан тўй-маъракаларнинг гули, мажлис ва йиғинларнинг саркори бўлиб, эл орасида шуҳрат топган. Шунинг учун ҳам халқ ўзининг севимли бахшиси ҳақида ажойиб ривоятлар тўқиган. Ҳатто уларнинг айримлари афсонавийлашиб кетган. Қашкадарё ва Сурхондарё, ҳатто Тожикистон ва Туркменистоннинг жанубида яшовчи аҳоли унинг доно сўзларини, ибораларини, достонларини ўз қалбида сақлаб, бир-бирига ибрат этиб айтиб юрадилар.

*Бахшининг қадрини халқ билур,
Халқнинг қадрини мард билур, –*

каби мақол тарзидаги ибораларнинг эл орасида кенг ўрин олиши бежис эмас.

Бу ўринда Шернанинг туғилиши ҳақидаги афсона характерлидир. Шернанинг ота-онаси не-не умидлар билан топадилар.

Бироқ Шерна 7–8 ёшларга кирганда ниманидир гапириб, ўзидан ўзи қўшиқ айтиб юради. У эчки боқиб юрганида чўпни дўмбира қилиб, чалиб қолади-да, эчкилари одамларнинг экинларини еб кетади. Отаси эса балога қолади. Бу ҳолни кўрган отаси ўғлини табибга олиб бориб: «Мен бир ўғил кўрдим, у ҳам тентак чикди», – деб табибдан даво сўрайди. Табиб ўғлидан:

– Қаернинг оғрийди, нимага ҳамиша қўшиқ айтиб юрибсан? – деб сўраганда, Шерна:

– Мен етти ердан таом едим, лекин айтмасам, қорнимни бир нарса тирнаб қўймайди, – деб жавоб берибди. Шунда табиб дуо ўқиб, отасига:

– Ўғлингдан хафа бўлма, у шоир бўлади, – деб айтибди.

Шу-шу бўлибди-ю, Шерна ҳамма жойда қўшиқ айта бериб, элга танилган шоир бўлиб кетибди. Ҳатто йўлдан бозорчиларни ҳам ўтказмай қўйибди. У дўмбира чертиб қўшиқ айтса, нариги қирдаги туялар гулдираб ёнига келар экан. Йўлдан ўтаётган савдогарларнинг от, эшак ва туялари Шерна дўмбира чертиб қўшиқ айтганда, бир қадам нари жилмас экан.

Шернанинг бетида озгина чечак доғи бор экан. Шунинг учун ҳам ўзи:

*Шерназар дейди отимди,
Чечаклар бузди бетимди, –*

деб қўшиққа қўшиб айтар экан, дея ҳикоя қиладилар қариялар.

Тошмурад шоир яна шундай ҳикоя қилади: Шерна нима бўлди-ю, Тожикистон томонга бориб қолади. У ерда катта тўй бўлаётган бўлади. Ҳар тарафда ҳар хил кўнгил очар ўйинлар, кураш, пойгалар бўлиб ётади. Шу тўйга юзга яқин шогирди билан Тос номли шоир ҳам келади. У шогирдларини кўшхона (мехмонхона)ларга тақсимлаб юборади. Улар ўша йиғинда достон айтишиб, элнинг кўнглини шод қиладилар.

Бир мезбон Шернанинг ҳам мехмон эканлигини билиб, ўша ерлик бир кампирниқига юборади. Шерна чидаб туролмайди. Ахир бир дўмбира сўраб олади. Аввал куй чалади. Атрофдагиларни ва ўз аҳволини қўшиб терма айтади. Ниҳоят, дарёдай тошади. Бир

махал кўзини очиб атрофга қараса, тонг отиб, бутун халқ Шернани ўраб олибди. Кўпларнинг кўзида ёш, йиғлаб ётган эмиш. Яхшилаб қараса, ўзи келиб кирган қора уй ҳам йўқ эмиш. Чунки Шернанинг дoston айтаётганини эшитган одамлар кўпайиб, уйга сиғишмай, қора уйни кўтариб, бузиб ташлаган эканлар. Тос номли шоир ва унинг шогирдлари ёнида ҳеч ким ҳам қолмаган эмиш.

Оққўрғонлик Юсуф Ўтаган ўғлининг (у Шернанинг куёви ҳам жияни – Мардонкул шоирнинг синглисининг ўғли) айтишича: оққўрғонлик Маматкул бойвачча ўз шериклари билан кайфу сафо қилиб турганда, Шерна улар ёнида ўтиб қолибди. Улар Шернани тўхтади: «Агар сен бизларни йиғлатсанг, 500 танга берамиз», – дейишибди. Шерна шу заҳоти хуржунидан қўлига дўмбирасини олиб: «Мен ҳозир қишлоғингдан келяпман, отонанг дунёдан ўтди, мол-дунё талон-тарож бўлди, сенлар кайфу сафо қиляпсанларми!» – деб куйлади-ю, уларни йиғлатиб, 500 тангасини олиб кетибди.

Қарийб афсона даражасига кўтарилган бу нақллар асосида ҳақиқат бор. Улар Шернани чечан санъаткор, ўткир зеҳнли дostonчи, давра аҳлининг дидига қараб, унга мосланиб дoston, терма куйлай олган бахши сифатида баҳолашга имкон беради.

Оқарма кишлогилик (Дехқонобод тумани) Ҳайин Пиримкул ўғли куйидаги термани Шернага нисбат беради:

*Якка тулки шерга менгзар ўзини,
Турса кийикларга тенглар кўзини.
Ҳеч ким жўқта катта кетиб талтаяр,
Булам ўзини кийик этмоқда.*

*Калтасалар дам уради чўлларда.
Булам дам айлайди жилон жутмоққа.
Мерганлар ўзини чаққон айлайди,
Шер боласини тутмоққа.*

*Калтасага сира жилон тутқазмас,
Турса кийик ўлса тулкига жетказмас,
Шер боласи сира ўзини отқизмас,
Пойим керак бул сўзларди билмоққа.*

Авалло, бу терма Махтумқулининг «Ой кунингиз ботмоқда...» шеърига жуда мос келади. Унинг бир варианты фольклоршунос О. Собиров Умир шоирдан 1956 йилда ёзиб олган.

Шерна, айникса, эшонлар, дин аҳли, амалдор қозиларни кўролмаган, улар билан ҳеч қачон келишолмаган. Масалан: Шеробод бозорида бир гуруҳ ёш-яланг бозорчиларни қози ҳақоратлаётганида:

*Ёққонлари ёнгоқ бўлур,
Кийганлари чўнтоқ бўлур,
Ёзган хати лотин бўлур,
Уйинг куйгур қозилар,
Бу кунларинг ботин бўлур, –*

деб куйлаган, – деб сўзлаб берди дехқонободлик Бекназар шоир Раҳматов.

Ч. Ҳамроевнинг 1956 йилда Мардонакул шоирдан ёзиб олган бир эсдалигида Шернанинг ҳисорлик шоир Омонтурди билан мусобақаси ҳақида маълумот берилади: Шерна 23 ёшларида Ҳисорда катта тўй бўлармиш, шу тўйга Омонтурди келармиш, деган доврўғни эштиб қолади. Шунда Шерна ўн кун аввал Ҳисорга йул олади. Бир ҳисорлик бойга етим бўлиб ишлаб туради.

Нихоят, тўй бошланмасдан сал олдинроқ 33 шогирди билан Омонтурди қовчин ҳам келади. Омонтурди дoston айтаётганида, пойгакда Шерна ҳам тикилиб туради. Аста-секин сурилиб шоирнинг ёнига бориб қолади. Шоир бир тўхтаганида ўша ерлик қариялар Шернани Омонтурдининг ёнида кўриб: «Сен нега ҳурматсизлик қилдинг, чолларни пойгада қолдириб тўрга ўтдинг?» – деб уни ташқарига чиқариб юбормоқчи бўладилар.

Шунда Шернанинг бунчалик қизиқиб тикилиб турганини кўрган Омонтурди ундан: «Исминг нима, қаерликсан, сен ҳам кўшиқ айтасанми?» – деб сўраганда: «Ҳа, чўпон кўшиқларидан айтиб юраман», – дейди. Кўлига дўмбира тутқазганда:

*Исмимни сўрасанг ўзим ғарибман,
Авалдан эшитиб қордай эрибман,*

.....
Куч бер, бобо, санам ёра бораман, –

деб жавоб берибди. Шунда Омонтурди:

*Ошиқ бўлсанг, куйиб-ёниб ўтарсан,
Сабр айласанг, ёр қўлини тутурсан,
Илгай берсанг беш юз йилга етарсан.
Беш юз йиллик йўлдиёр ёрнинг макони.*

*Улим, ошали-ошали тоғдан ошали.
Сен бунда қайнасанг, ундай тумали.
Бир наслга хаёл қилган жон болам.
Икковимиз бир майдон гаплашали?*

деган экан.

Бу ерда сўз ўйини бор. Шернанинг сўзларида устозлик қилсангиз, машаққатли бўлса ҳам дostonчи бўламан, сиздан ўрганаман, дейилган фикр айтилса, Омонтурдининг сўзларида уни синаб кўрмоқчилиги англашилади.

Юқорида келтирилган факт ва далиллардан аниқдирки, Шерна Бердиназар ўғли замонасининг етук, камолотга эришган, таҳсинларга сазовор, бой репертуарга эга импровизатор дostonчисидир.¹

¹ Мақола куйидаги манба асосида чоп этилмоқда: А. Қаҳҳоров. Дostonчи Шерна ҳақида // Ўзбек тили ва адабиёти. – Тошкент, 1984. № 3. 35–38-бетлар.

Комилжон
ИМОМОВ
(1930–2013)



Комил Имомов 1930 йил 10 январда туғилган. Филология фанлари номзоди (1968), доктори (1986). Белинский номидаги Тошкент кечки педагогика институтида ўқиган (1949–54). Тошкент шаҳридаги 36-сонли ўрта мактабда муаллим, илмий бўлим мудури (1955–60), Тошкентдаги 1-сон ўрта мактабда ўқитувчи (1960–66), ЎзР ФА Тил ва адабиёт институтда кичик илмий ходим (1968–71), катта илмий ходим лавозимида (1971–2006) ишлаган. «Ўзбек сатирик эртаклари» (1974), «Ўзбек халқ прозаси» (1981), «Ўзбек халқ насри поэтикаси» (2008) каби монографиялар муаллифи. «Ўзбек халқ ижоди» кўпжилдлиги туркумида «Олтин бешик» (1985), «Зумрад ва Қиммат» (1988) номли эртак тўпламларини, шунингдек, «Қари наъматак» (1977), «Ўзбек халқ эртаклари» (1981, 1990), «Сехрли шамчироқ» (1990), «Дев қиз» (1992), «Минг бир кулги» (1994, 2010), «Сичқон қиз» (1998), «Кенжа ботир» (2000), «Жўжа билан тулки» (2005) каби эртаклар мажмуаларни нашрга тайёрлаган. 2 жилдли «Ўзбек халқ мақоллари» (1987–88) мукамал нашрининг тайёрлаш ҳамда «Ўзбек фольклори очерклари» (1988–89) фундаментал тадқиқотининг юзага келишида иштирок этган. «Ўзбек халқ оғзаки поэтик ижоди» дарслигининг (1980, 1990) ҳам муаллифларидан бири. 2013 йил вафот этган.

ЭРТАКЧИ ВА ЭРТАКЧИЛИК АНЪАНАЛАРИ

Эртакчи шахсининг ижодкор сифатида илк бор пайдо бўлиши, ўтмиш билан боғлиқ шарт-шароит, реал воқеликка муносабатдан бошланган ва унинг белгиси сифатида юзага келган. Шаклланишида шомонлик, Қўрқут ота, қабила, уруғга мансуб сўзамол, доно оқсоқолларнинг катта таъсири кучли бўлган. Эртакчи – эртак кашф этувчи, санъаткор. Айни пайтда, тажрибали ижодкор, эртак анъаналарини яхши билган, чечан, хуштаъб, ҳазилкаш ва кизиқчи. Шеър тўқишга мойил, сўз ва образ маъноларига амал қилиб, жонли нутқи, равон тили билан эртак айтиш услубига эга бўлган истеъдодли шахс, эртакларни таъсирчан, ўзига хос шакл-шамойилига эга бўлган асар даражасига кўтариш, авлоддан-авлодга олиб ўтишда самимий хизматлари беназир, тенги йўқ улуг зотдир. У ранг-баранг мавзуи, таълимий-маиший ғоялари, фантастик кўлами, тилсим, мўъжизага бой, жозибали, образли, сирли мотив, анъаналар замирида қурилган оғзаки насрга мансуб эртакларнинг яратувчи, асосчисидир.

Эртакчи – қалбни овутиш, шод этиш, хаёл оғушига олиб кириш, фантастик ҳодисалар мазмунини ҳис этиш, сезиш, англаш, завқланиш, фикрлаш қобилиятини ривожлантиришга ҳисса қўшиб, турли хил ахлоқ нормаларини кузатиш, фарқлашга ўргатувчи муаллим, таълимий-эстетик завқ берувчи санъаткордир. Дарҳақиқат, талантли эртакчидан эртак тинглаш ҳам завқли, ҳам мароқли, айни пайтда, у – эртак айтиш салоҳияти етук ижодкор, ахлоқ ва одоб ҳақида нақл этувчи беминнат хизматкор.

Истеъдод эгаси яратган, ижро этган эртаклар ноёб аталади. Бу хил эртакларнинг ҳар бири нафис, бадиияти гўзал, ёқимли, таъсирчан, санъат асари, доимий барқарор белгилари, хусусан, воқеа-ҳодисаларни ўзаро мантиқан боғловчи, тайёр қолишга айланган формулаларнинг аниқ ва ёрқин, баркамоллигини таъминловчи турли хил тўқнашувларни белгиловчи инициал, медиал ва финал формулалар ғоят гўзал, таъсирчан ифодаланган. Шунингдек, турли хил фикр, нутқни изоҳловчи бадиий шакллар, йўлнинг мислсиз узоқлигини белгиловчи тайёр жумлалар ёки шу йўлни

фантастик тезликда босиб ўтишни накл этган элементлар, учиш тезлигини аниқловчи деталлар, таянч нукталар, воқеаларни жамловчи анъаналар, тилсим мўъжизаларини ифодаловчи бадий фигуралар тингловчига завқ улашади. Фантастик вақт ўлчовини ифода этган тафсиллар, тайёр формулалар қадимда моҳир, атоқли эртақчилар гуруҳининг мавжуд бўлгани ва бадий маҳоратидан дарак бериб туради.

«Бир бор экан, бир йўқ экан, бир подшо бор экан, давлат унга ёр экан, қўшинлари кўп экан, юртдан кўнгли тўқ экан, эли кўп обод экан, подшо таянч-у, шод экан, адл унга ҳамроҳ экан», «Бир бор экан, бир йўқ экан, қарға қақимчи экан, чумчуқ чақимчи экан, гоз карнайчи экан, ўрдак сурнайчи экан, тошбақа тарозидор, қурбақа ундан қарздор экан», «Хап саломинг бўлмаса, икки ямлаб бир ютардим», «Қараса, туя олдида суяк, ит олдида хашакмиш», «Темирдан ҳасса, пўлатдан ковуш кийиб қидирасан, ҳасса игна бўлганда, мени топасан, деб зойиб бўлибди». «Олдиларидан уч йўл чиқибди, бири «Борса келар», иккинчиси «Борса хатар», учинчиси «Борса келмас» экан. Каттаси «Борса келар»га, ўртанчаси «Борса хатар»га, кенжаси «Борса келмас»га қараб жўнаб кетибди». Бу хил бадий тафсил, тайёр формулалар қадимда истеъдодли ва атоқли эртақчилар анъаналари мавжудлигидан дарак беради.

«Ой деса, оғзи бор, кун деса кўзи бор, шириндан шакар сўзи бор, ўнг бетиди чапараста ҳоли бор, неча алвонлар кийган, қирқ кокилга дурру жавоҳир таққан бир паризод ўтирибди», «Семург нафасидан бўрон кўзгалиб, оҳидан чақмоқ чақилиб, кўз ёшидан жала қуюлиб келибди» каби ўзига хос фантастик образлар тизими талантли эртақчиларнинг етук салоҳиятини тавсифлайди.

Қобилиятли эртақчи, аввало, ўзи айтадиган эртақни ёд билади, унинг сюжет тузилиши, айниқса, тайёр қолипга айланган бадий формула, детал, анъаналарни тушунади, ниҳоят уни турли хил оҳангда, маҳорат билан ижро этади, муҳими, анъанага амал қилади, эртақка ижодий ёндашади. Баъзан у тушиб қолган, бироқ мазмунга мос эпизод, мотивларни топиб айтади. Бу нарса эртақ асоси ғоявий мазмунини бузмайди, аксинча, тўлдиради, мукаммаллаштиради, эртақнинг завқли, фусункор, сермаъно

чиқишини таъминлайди. Агар эртақнинг эса қолганини ҳикоя қиладиган ижрочи айтса, сюжет воқеаларига мансуб деталларнинг тушиб қолиши ёки баъзи ҳодисаларнинг ўрин алмашуви, ёки эпизодларни унутиш ҳоллари учрайди. Бу эса унинг мазмун-моҳияти ва бадий таъсир кучининг саёзлашувига олиб келади.

Эртақ айтиш касб-корига айланган моҳир эртақчи, таълимдан дарс берувчи муаллим, уста санъаткор сифатида эъзозланган.

Талантли эртақчилар ўзига мос, мустақил репертуар, эртақ айтиш услубига эга бўлган. Қизиғи шундаки, баъзи бирининг ўзи ёқтирган эртақларнинг образ ва ҳатто мотивлари ўша эртақчининг айнан табиатидан униб чиққандек ифодаланган. Бу шуни кўрсатадики, эртақчи қаҳрамонлик, сеҳрли-саргузашт эртақларни ёқтириб, уни жонли ва маҳорат билан ижро этса, иккинчиси ҳайвонлар ҳақидаги эпос, рамзий эртақларни қойилмақом қилиб айтади. У бўри, эчки, тулки янглиғ овоз чиқариб, ҳаракат билан ҳикоя қилади. Учинчиси эса ҳажвий эртақларни завқланиб, латифа, лофларни жўш уриб нақл этади. Шубҳасиз, бундай ҳолат, у ёки бу эртақчининг табиати, кундалик иш тартиби, дунёқараши, эртақ айтиш манерасидан, тингловчи билан муносабати эса, маҳоратидан келиб чиқади.

Мен кўрган, чўпчагини эшитган завқли санъаткор эртақчилардан бири – қўқонлик Нурали Нурмат ўғлидир. У истеъдодли, хуштаъб, салмоқдор, ширали овоз билан, матални қизикчиликка буриб айтадиган, ярим кулги, ёқимли овоз, кизик ҳаракатлари билан киши эътиборини жалб этадиган эртақчи.

У ўзига хос ижро услубига эга. Нурали ҳикояни сажъда айтиш қобилияти билан машхур. Бу нарса унинг ижро ритмикаси, услубини белгилаган. Сажъда, қофияли насрда айтилган эртақ воқеаларининг ранг-баранг оқими, ўзига мос маром, оҳангдорлигини таъминлаб, жалб этган, таъсир кучини ошириб, енгил юмор, мулойимликни касб этган. Унинг ижросидаги эртақларда Нурали шахси, қизикчи, масхарабозликка мойил хусусиятлар акс этиб туради. *«Бой бўлай, лой бўлай, косада қолган мой бўлай, қайнаб совиган чой бўлай, хумчадаги мой бўлай»* каби қофиядош жумлалар тизими эртақчининг маҳорати, тили, стилини белгилайди. У эртақ бошламаси, хусусан, тугалламанинг

сажъдаги ижроси комик қаҳрамон табиати, характер, хусусиятини ёритади. *«Аккон экан, дуккон экан, Абдурасул деган қизиқ киши чиққан экан, янтоқ гулин чеккасига таққан экан»* ёки тугалламада енгил юмор яратиб, салбий типни белгилайди: *«овқатни олиб чиқиб, идишга солиб чиқиб, меҳмонга егизиб, оллоҳу акбар, дегизиб, кеткизиб, нарироққа етказиб, қутилган экан»*.

«Лаққа шиқилдоқ» лақаби билан машҳур бўлган Нурали қизиқ Тошкентда яшаган. У, асосан, ҳазил-хузул, ҳажвий эртаклар айтган. Қизиги шундаки, у турли хил кўз бойлагич, «Лайзон гул» аталган қўғирчоқ ўйинини қўшиқ қилиб, ижро этиб, ўйин давомида кулгили, ҳажман кичик, оғзаки ҳикояларни қизиқчилик орасига қистириб юборарди: *«Қовунполизнинг нарёғида бир катта қапа, қовун эккан одам қовун пишмаганига хафа», «эчки аччиги келиб, инни узиб, охурни бузиб аразлаб кетиб қолди, бир чет далага етиб қолди»*. Моҳир эртакчи сюжетга қараб шеърини парчалар тўқиган, қўшиқ қилиб айтган, монолог, диалогни ҳажвий оҳангда, кулгили ҳаракат, имо-ишорага боғлаб айтган, комик қаҳрамон ҳолатини жонли, ҳаяжон билан ифодалашга ҳаракат қилган. Ўрни билан у турли хил овоз чиқариб, мимика, ҳаракат билан, чеккасига гул тақиб, гоҳ аёл овозда ёқимли нутқ сўзласа, гоҳ ўта шум, айёр калга айланиб, ҳазил қилади. Унинг ҳар бир нутқ, ҳаракати ўзи айтаётган эртак персонажи билан узвий боғланиб, уйғунлашади. «Эшон хотин сўзига кираверма, ундай қилайиқ, бундай қилайиқ – деб маслаҳатлашма, сирни айтма, яхши эмас, эр деган хотинни писанд қилмай, қовоқ солиб юриши керак, – деб кўрсатади. Айёр кал: – Эшон бобо, Эшонга бир қўй берай, – деб кўнглимдан чиқариб айтган эдим. Мен кириб хотинимга, – Эшон бувага қўйнинг қайсинисини берай, – деб сўрасам, хотиним: – Семизини беринг, деди. Семизини берай десам, сиз хотин билан бемаслаҳат иш қил деб эдингиз».

Нутқнинг бирида маккорлик, мунофиқ, риёкорлик, иккинчисиди тўғрилиқ ҳазил, фош этувчи ҳажвий оҳанг, қочирим, киноя сезилиб туради. Ҳар иккисининг имо-ишораси билан қўшилган нутқий хулосаси бир нарсани, доғули эшон киёфасини ёритишга йўналтирилган. Доно, тадбиркор кал нутқи аччиқ кулги, ҳаракат ва ҳолат комизмини ташкил этади. Баъзан эртакчининг ўзи ко-

мик қахрамонга айланади: Бу нарса, енгил, хушчақчақ юмор кашф этади. «*Шу тўқай ичида уч мерган, топганини ҳар кимга берган, тўкилиб қолса терган, қулочини керган, бирининг оти Эрган, бирининг оти Шерали мерган, бирининг оти Нурмат ака-нинг ўғли Нурали Нурган, гапни ҳар ёққа бурган экан*». Бу хил бадий тўкималар унинг улкан истеъдодидан дарак беради.

Ижодкор эртақчилардан яна бири Ҳусан Худойберди ўгли эди. У сувоқчи ўтган, қийин замонда оғир ҳаёт кечирган. Шунинг учун бўлса керак, унинг эртақларида ҳаёт машаққати, камбағаллик, ночорлик, ёвузлик, шафқатсизлик, зулм ва зўрлик сиёсатига қарши чиқиш ғоялари, эртақ қахрамонида ҳаяжонли ҳаракат, ачинарли муносабатлар акс этиб туради. Эртақчи сеҳрли эртақларни маҳорат билан ижро этган. У эртақ айтиш йўли, усулини косонлик уста Эсон сувоқчидан ўрганган. Истеъдодли эртақчи сеҳрли эртақларнинг қадимий, энг гўзал классик намуналарини билган, завқ билан ижро этиб, бизгача олиб келган моҳир эртақчилардан бири бўлган. У инқилобдан кейин темир йўлда ишчи бўлиб ишлаган, шу йиллари у ишчилар ўртасида «эртақчи» аталиб танилган, ҳурмат қозонган. Ҳусан, эртақчи нақл этган «Булбулиғўё», «Маликаи Ҳуснобод», «Камбағал қиз», «Камбағал қашшоқ», «Озодачеҳра», «Уч ёлғондан қирқ ёлгон», «Кенжа ботир» каби бадий жиҳатдан етук, ажойиб эртақлар машҳур бўлиб, шуҳрат топган. Уста Ҳусан айтган эртақлар ғаройиб, анъанага бойлиги, равон, лирик оҳангдорлиги, тилсимотнинг ранг-баранглиги, образли ифодалар, барқарор формула, муболага, истиора, ўхшатиш, сифатлашларга бойлиги билан ажралиб турган.

Абдуғофир Шукуров эса Қашқадарёда машҳур, моҳир, «эртақчи» номини олган истеъдод соҳиби. У нисбатан бўйчан, ўйчан, босиқ, ўта ёқимли овоз¹ билан эртақ айтган. Бу эртақчи Қашқадарёнинг Китоб шаҳридан. У содда, майин ва босиқ, қишлоқча кийинган, ўта ақлли, камгап, эшитганини эслаб қолиш қудрати кучли, талантли эртақчи. У подачи, молбоқар, қоровул,

¹ Ушбу мақола муаллифи эртақчини 1969, 1978 йиллари Қашқадарёга уюштирилган фольклор экспедициясида кўрган, уйда бўлиб, эртақ ёзиб олган.

ниҳоят фаррош бўлиб ишлаган. У эртақларни бувисидан эшитган. Бувиси таланти эртақчи ўтган. Ундан эртақ айтиш, ҳикоя қилишни ўрганган. У ўн олти ёшидан бошлаб эртақ айтади. Унинг ижро этган эртақлари характер эътибори билан қаҳрамонлик ва паҳлавонликни мадҳ этади. У юздан ортиқ эртақни ёд билган. Абдуғофир отадан сеҳрли-саргузашт эртақлар ёзиб олинган. У киши эртақ айтиш анъанасига амал қилади, эртақни кеч кириб, қоронғу тушганда айтади. Ижро жараёнида у қўл ҳаракати, турли хил овоз оҳанглирида, шошмай, текис, равон ҳикоя қилади. Ундан асарнинг айрим қисмини сўраганда, у айнан ўшани қайтариб эсга соларди, янглишмай, келган жойидан давом этарди. Ўрни билан сирли кулиш, маънодор қараш қилади. Эртақнинг қизик жойида тўхтаб, чой ичади, атрофга қараб қўяди. Эртақчи кўпроқ паҳлавон кудрати, марду майдон қаҳрамонлар ҳақида ҳикоя қилишни ёқтиради, аждар билан жанг мотивини кўтаринки руҳда нақл этади. Ҳикоя қилинган эртақларнинг ҳаяжонли чиқиши эртақчининг маҳорати, таланти билан алоқадордир. Чунки бу хил типдаги эртақчилар ижрочигина эмас, истеъдодли иждокор ҳамдир. Эртақчи эртақ фабуласини сақлаган ҳолда, ўрни билан образ ёки ижтимоий ҳодисалар акс этган эпизодлар мазмунини бўрттиради, тўлдиради, бадиий жиҳатдан кучайтириб, ҳар бирига лирик жумла, шеърий парчалар кистириб, мукамал тавсифига эришади, сюжет тузилишини ташкил этган мотив, персонажларга бадиий ранг, безак беради, уларни бойитиб, таъсир кучини оширади, қиёфани тўлиқ ёритишга эришади. Эртақчи эртақ давомида тингловчилардан узоқлашмай, уларнинг фикри, мақсадини англашга ҳаракат қилади¹. Таланти эртақчи эртақ айтганда, аввало, сюжет воқеаларига аҳамият беради. Унинг мазмунига маҳаллий табиат, ўрин-жой номларини сингдириб юборади. Айниқса, реал, мавжуд боғларни тўлиқ, мукамал чизишга эътибор берган: «*Гуллар очилиб булбуллар сайраган, сув остига себаргалар ўрнаган*». «*Алвон турли мевалар пишиб, булоқ мавъс уриб турибди, бознинг ўртасида шосуна*». Жазирама чўл образли ифодаланган: «*Қуш учса, қаноти, одам юрса, оёғи куяр ерлар*». Миллий кийим, урф-одатларни мукамал ёритади: «*Қиз*

¹ Азадовский М. К. Статьи о литературе и фольклоре. – М., 1960. – С. 18

маҳсисини кийиб, паранжсини эгри ёпиниб йўлга тушиди», «пахса давол урадиган даволзанни топинг». Бу хил бадий детал, образлар воқеа ва ҳодисаларнинг ҳаётӣй, айни пайтда миллий бўёқларда намоён бўлишига имкон беради. Таҷрибали эртақчи аввало анъанага, тилсим воситалари, мўъжизага эътибор беради. Ҳаётӣй уйдирмалардан ташкил топган воқеа ва ҳодисалар қисқа, бироқ лўнда, мазмунан тўлиқ ифодаланган. «Паризод бир силкиниб, оёғи қизил маржон, қаноти лаълу жавоҳир, тумшуғи забаржаддан бир каптар бўлибди». Етақчи қаҳрамон кечинмалари хаёлий уйдирмаларда, образли ифодаланган: «Қиз оҳ урди, оғзидан бир парча ўт чиқиб ерга тушиди», «қиз кулса гул, йиғласа дур сочилибди». Ўхшатишнинг ажойиб намуналари салбий белгиларни аниқлаб юмор яратади: «Қараса, қўзининг энг кичик шилпиғи бут, қора қўнғиздай». Баъзан у сирлилиқ касб этади: «Тўрт дона олма бир пуд тошдек, етти хил товланади». Эртақчи қаҳрамоннинг ғазабга тўлган кайфиятини образли ифодалайди: «Шаҳода чарви еган мушукдек, қўзи йилтиллаб қўп афсус еди», «Бой игна еган мушукдек тиришиб, икки қўлини гирра қилди», «Подшоҳода бир оҳ тортиди, гўё ҳаммом ёрилди», «Қараса, парилар терак баргидек қалтираб турганмиши». У гоҳо муболага, гоҳо мўъжиза қўллаб воқеаларни бўрттиради, ойдинлаштиради. «Қозоннинг тепасига келиб қараса, кирлигидан у қулоғи бу қулоғига етай деб қолибди». «Уругни эрта билан экиб пешинда кўрса, олма буқоқ бўлибди». Моҳир эртақчилар томонидан қўлланган мўъжиза, бадий мотивлар, фигура, образ яратади, руҳий кайфиятни белгилайди. «От саҳрога қараб қулогини қалам, думини алам қилиб кетди». Бадий фигуралар эртақ характери, тилсим мўъжизаси тавсифига бўйсундирилган, воқеа ва ҳодисаларга жон киритган, образлилиқни яратган: «Шарон томогидан» «лиқ» этиб ўтган ҳар бир қароқчининг жони «пирт» этиб чиқаберди». Кўринадики, тайёр формула, бадий деталлар маҳорат белгиси сифатида пайдо бўлган. Бу нарса эртақларнинг таъсир кучини оширган, конкрет образ яратишга ҳисса қўшган. «Подшо, жаллод!!! – деди. Етти жаллод, мурғи саловат, қиличим бурро, забоним гўё, кимнинг ажали етди. Пойқадамиз офтобни сояга етказмай бош кесамиз, деб қўл қовуштириб турдилар».

Ҳар бир детал, бадиий тасвир воситалари, сирли ҳаракат ва муносабатлар эртак мазмунини тўлдириб яхлитлаштиради, таъсир кучини ошириб эртакона шакл яратади. Мазкур эртакчилар асосан сеҳрли ва маиший эртакларни маҳорат билан ижро этишган. Эртак номлари қатъий, эртакчилар томонидан қўйилган номлардир. Ҳар бир моҳир эртакчи асардаги архаик сўзларга эътибор берган, уи тавсиф билан таъминлашга ҳаракат қилган.¹

¹ Ушбу мақола муаллифнинг «Ўзбек халқ насри поэтикаси» (Тошкент: Фан, 2008) номли монографиясидан олинди.

Муҳсин
ҚОДИРОВ
(1932–2015)



Муҳсин Халилович Қодиров 1932 йил 10 мартда Шаҳрисабз шаҳрида тузилган. Тошкент давлат театр ва рассомлик санъати институтида ўқиган (1950–55). Шаҳрисабз театрида бош режиссёр (1955–56), Шаҳрисабз туманидаги 14-ўрта мактабда ўқитувчи (1956–57), Ҳамза номидаги Санъатшунослик институтида кичик илмий ходим (1957–58), катта илмий ходим (1961–64; 1966–76), Театр ва хореография бўлимининг мудири (1976 йилдан) вазифаларида ишлаган. Тошкент давлат санъат институти ректори (1996–98). «Анъанавий ўзбек театри ва унинг ўзбек театрининг шаклланишидаги роли» мавзусидаги докторлик диссертациясини ёқлаган (1976). «Ўзбек халқ оғзаки драмаси» (1963), «Юсуфжон қизиқ ижоди» (1969), «Ўзбек халқ театри» (1970), «Масхарабоз ва қизиқчилар санъати» (1971), «Халқ қўғирчоқ театри» (1972), «Ўзбек театри анъаналари» (1976), «Ўзбекский традиционный театр кукол» (1979), «Ўзбек халқ томоша санъати» (1981), «Темур ва те мурийлар даврида томоша санъатлари» (1996), «Томоша санъатлари ўтмишида ва бугун» (3 жилдли, 2011) каби китоблар муаллифи. 2015 йили Тошкент шаҳрида вафот этган.

ҚЎҒИРЧОҚ ҲЙИН

Ўзбек анъанавий қўғирчоқ театри «қўғирчоқ ҳйин» деб юри-тилган. Ундаги ижрочи эса Алишер Навоий даврида «қовурчоқ-чи» (яъни қўғирчоқчи), кейинроқ «қўғирчоқбоз» деб аталган.

Қўғирчоқ ҳйин халқ байрамлари ва маросимлари муносабати билан Ўзбекистоннинг шаҳар, қишлоқларида катта регистон ва сайлгоҳларда уюштирилган анъанавий бадиий программалар-нинг таркибий қисми билан боғланиб кетган санъатдир. Уму-ман, халқ томоша санъатини белгилаб келган демократик рух, оптимизм, томошавийлик қўғирчоқ ҳйинга ҳам хос. Қўғирчоқ театри, айниқса, халқ профессионал театри бўлмиш «масхара» ва «муқаллид»га яқин.

Маълумки, масхара ва муқаллид театри бир замонлар ниқоб театри бўлган. Масхарабоз ва қизикчилар баъзан ҳозир ҳам ниқоб ишлатишади. Халқ актёрлари ўз томошаларида ниқоб иш-латганларида гўё қўғирчоққа айланганлар, чунки улар гоҳ қотиб, гоҳ жонланиб турувчи сахнавий қўғирчоқ воситаларини ишга со-лишга мажбур бўлишган. Шу ўринда машҳур рус қўғирчоқбози Е. В. Сперанскийнинг қўйидаги сўзларини эслатиш жоиздир: «Оддийгина карнавал ниқобини кийган одам – ярим қўғирчоқ дегандай гап. Агар бунинг устига у актёр бўлса, қўғирчоқбозга айланади, чунки у жонсиз ниқобни жонлантиришга ҳаракат қилар экан, «қўғирчоқ усули» билан яхшироқ ўйнайди».¹ Мас-харабозлар ниқобсиз ўйнаган пайтларида ҳам қўғирчоқ театрига яқин турганлар. Ҳажв ва ҳазил, шартлилик, бадиҳагўйлик, то-мошавийлик каби ижодий принциплар иккала театрга ҳам ба-робар тааллуқлидир. Қаҳрамонларидан бири қўғирчоқ бўлган спектаклларни намоиш қилганларида эса масхарабозлар ҳам қўғирчоқбоз, ҳам корфармон вазифасини бажариб, ўзига хос қўғирчоқ томошасини майдонга келтирганлар. Бугина эмас. Келиб чиқиши, меҳнат ва турмуш шароити, уста-шогирд му-носабатлари, жамиятдаги ўрни, вазифа ва муддаолари, майл ва интилишлари билан ҳам масхарабозлар билан қўғирчоқбозлар қондош, ҳамқору ҳамдаст бўлишган. Шу сабабдан осонгина мас-

¹ Сперанский Е. Актёр театра кукол. – М., 1965. С. 73.

харабоз кўғирчоқбозга корфармонлик қилиб, кўғирчоқбоз масхарабознинг томошаларига аралашиб кетаверганлар.

Аmmo бу билан биз масхарабозлик билан кўғирчоқ ўйинни бир хил санъат демоқчи эмасмиз. Улар ўртасида зикр қилинган муштаракликлар билан бир қаторда жиддий специфик айирмалар борлигини унутмаслик керак.

Кўғирчоқ театри спецификасини белгиловчи асосий фарқ шундан иборатки, бошқа театрларда қахрамонлар қиёфасида актёрларнинг ўзлари кўринса, бунда ижрочилар томошабинларга пинҳон қолгани ҳолда кўғирчоқ – персонажлар намоён бўлади. У ўз қадди-қомати, актёрлик маҳоратини бевосита намоёйиш этишдан маҳрум.

Бутун қобилияти, билими, хатто ҳусни латофатини кўғирчоққа бағишлайди. Шу билан бирга, кўғирчоқбоз айни чоғда драматик актёрга нисбатан бир қанча афзаллик ва имтиёзларга эга. Чунончи, кўғирчоқ театри учун бўй, қад, ёш, жисмоний камчиликнинг аҳамияти бўлмагани сабабли бунда қобилияти тўғри келса ёши ўтган актриса қизча ролини, семиз актёр шаҳзода ролини, оқсоқ киши баҳодир ролини роҳат қилиб ўйнайверади: ориқ ижрочи семиз кўғирчоқ – персонажни, пакана алп қоматни, қиз чолни, бола кампирни бемалол олиб чиқаверади. Кўғирчоқ театрининг шарти шу – истеъдод...

Ўзбекистон территориясида кўғирчоқ театри турли (айниқса, аждодларни эслаш) маросимлар билан боғлиқ ҳолда жуда қадим замонларда пайдо бўлиб, эрамининг V–VII асрларидаёқ мукамал санъат сифатида таркиб топиб, қўшни мамлакатларда ҳам ушбу халқ томошасининг ривожланишига яхши таъсир кўрсатган...¹

Тахминан IX асрда Ўзбекистон кўғирчоқбозлари маъқулланган махсус рисолага² эга бўлиб, унда ўз санъатлари ва ижтимоий вазифаларини қонунлаштириб олдилар. Албатта, рисола

¹ Ушбу масалалар М. Кодировнинг «Ўзбекский традиционный театр кукол» (Тошкент, 1972) китобида батафсил ёритилган.

² «Рисолаи кўғирчоқ» (айрим қисмлар). Уни 1940 йилда Х. Комилова қўқонлик кўғирчоқбоз Ғофуржон Мирзараҳимовдан ёзиб олган. ЎЗММСИ фонди. Инв. 57. Кн. 2, № 55.

кўғирчоқбозларга маълум эркинлик бериши билан бир қаторда уларни муайян қатъий қоидалар исканжасида тутарди [...].

Аммо халқ кўғирчоқбозлари рисола талабларига ҳамма вақт ҳам бўйсунавермаганлар. Улар оғзаки драматургия асосида иш олиб борганлар. Оғзаки анъанани эса тафтиш қилиш, бошқариш жуда қийин. Шунинг учун ҳам кўғирчоқбозлар кўп ҳолларда мотамсаролик, мутеликни эмас, курашиб, завқ олиб, тўлақонли яшашни тарғиб қилиб рисолага тамомила зид позицияни ишғол этиб турганлар.

XI–XII асрларда кўғирчоқ театри Ўрта Осиёда интенсив ривожланади. Айниқса, асосий қисми ўтроқ ҳаёт кечирувчи, асосан, хунармандчилик ва деҳқончилик билан шуғулланувчи ўзбеклар ва тожиклар орасида бу санъатнинг қарийб барча турлари танилган эди.

Мўғуллар истилоси Ўрта Осиё халқларининг бутун ижтимоий, маданий-бадиий ҳаётига катта зарба бўлиб тушди. Кўпгина олимлар, шоирлар, саз ва томоша аҳли кўшни мамлакатларга кетиб қолди. Аммо кўғирчоқ театри, шароит қанча оғир бўлмасин, яшашда давом этди.

XIV асрнинг иккинчи ярмидан бошлаб, яъни Темур ва темуррийлар ҳукмронлиги даврида санъатнинг барча шакл ва турлари кенг тараққий йўлига тушиб олди. Айниқса, XV асрда ўзбек адабий маданияти юксак чўққиларга кўтарилади. Бу даврда тарих майдонига чиққан ва оламга танилган сон-саноксиз олимлар, шоирлар, меъморлар, мусаввирлар, наққошлар, хаттотлар, хонанда, созанда ва бозандалар шундан гувоҳлик беради.

Ҳусайн Воиз Кошифийнинг «Футувватномаи Султоний» номли суфистик трактатининг «Дар шарҳи лўъбатбозон» деган олтинчи боб иккинчи фасли батамом кўғирчоқ ўйинига бағишланган... Кошифий ўз рисоласида XV аср ва XVI аср бошларидаги Ҳирот ва умуман, Хуросон кўғирчоқ театрининг турлари, кўғирчоқбозларнинг маҳорати, томоша техникаси, ҳатто тема ва сюжет доираси бўйича бебаҳо фактик материаллар беради.

Кўғирчоқ театрининг турлари тўғрисида Ҳусайн Кошифий қуйидагиларни ёзади: «Агар лўъбатбозликнинг хусусияти нима деб сўрасалар, хайма (чодир) ва пешбанд деб жавоб бер. Хайма

билан кундузи, пешбанд билан кечаси томоша бериш мумкин. Пешбанд деб бир сандиққа айтадиларки, унинг олдида хаёл ўйини кўрсатилади. Кундузги ўйинда қўғирчоқлар қўл билан ҳаракатга келтирилади, кечкурунги ўйинда эса бир катор иплар билан ҳаракатга келтирилади». Аниқ кўриниб турибдики, автор ўзи яшаган даврда қўғирчоқ театри икки турдан, яъни қўл билан ҳаракатга келтирадиган ва чодир саҳнада кундузи ўйнатиладиган ҳамда иплар воситасида сандиқ олдида кечкурун ўйнатиладиган қўғирчоқ томошаларидан иборат эканини қайд қилмоқда. Афсуски, бу турлар нима деб аталгани айтилмаган. Аммо шундай бўлса-да, жуда ойдин ва тушунарли қилиб берилган таърифга асосланган ҳолда иккиланмай айта оламизки, бу бизнинг асримизгача етиб келган ва бир даража Навоий ҳам қайд қилган «Чодир хаёл» ва «Чодир жамол» турларининг ўзгинасидир.

Кошифий қўғирчоқ театрининг турларини аниқлаш билангина чекланиб қолмайди, балки ҳам бир тур томошаси ва сюжетига ҳам ишора қилиб ўтади. Чунончи, «Чодир жамол»га оид қуйидаги сўзлар шу жиҳатдан жуда муҳимдир: «Савол-жавоб асносида хусумат қилиб, улар (бир эркак ва бир жувон киёфасидаги қўғирчоқ – персонаж тўғрисида гап бораётир – М. Қ.) жанжаллашди, сўнг бир-бирини уришди ва пировардида сулҳ тузишга машғул бўлишди». Бу Ўзбекистонда жуда кенг тарқалган ва шу кунгача халқ қўғирчоқбозлари томонидан намоёиш қилиб келинаётган «Полвон Качал саргузаштлари» комедиясининг Полвон Качал билан хотини Бичахонимнинг кулгили бир вазиятда жанжаллашиб қолишлари эпизодидан бўлак нарсаси эмас.

Иплар билан бошқариладиган тур томошасининг мазмунини қайд қилиб ўтганимиз «пешбанд деб бир сандиққа айтадиларки, унинг олдида хаёл ўйини кўрсатилади» деган жумладан аңлашимиз мумкин. Демак, қўғирчоқ театрининг бу тури хаёлий, бошқача қилиб айтганда, афсонавий-фантастик мавзуларни кўрсатиш билан машғул бўлган. Қуйидаги жумла ҳам шу фикрни тасдиқлайди: «Агар пешбанд нимага ишорат қилади деб сўрасалар, айтгинки, ғаройибот ва ажойибот сандиғига ўхшаш киши қалбигаким, ҳар замон у кишининг бирор сифати ёки аҳволини

ҳаракатга келтиради, деб жавоб бер». Бунда ҳам пешбандда кўрсатиладиган томошанинг «ғаройиб» ва «ажойиб»лиги таъкидлаб ўтилган. Кошифий томонидан томоша мазмунини изоҳлашда ишлатилган «хаёл» сўзи ўша пайтдаёқ тур атамасини ҳам билдирган, деб ўйлаймиз. Бундан келиб чиқадики, «Чодир хаёл» XV аср ва XVI аср бошида ҳам афсонавий воқеаларни намоиш этиб келар эди. Хусайн Кошифий кўғирчоқбоз – лўъбатбозларнинг маҳорати хусусида ҳам аажойиб маълумотлар ёзиб қолдирган. Фаслнинг бошидаёқ, кўғирчоқбоз томошасидан ҳайратга келиб, шундай дейди: «Бир куни бир лахв (ўйинчи маъносида – М. Қ.) ҳангомасида ҳозир бўлдим, бошига чодир тортиб ва ундан икки сурат (кўғирчоқ) кўрсатиб ўтирган кишини кўрдим. У гоҳи эркак овози билан бир сурат тилида савол берарди, гоҳи бошқа сурат тилида қизнинг ингичка ва нозик овози билан жавоб қайтарарди. Ҳолатини ўзгартирмасдан сўзларни чунон айтардики, (икки суратнинг) ҳар хил овозда айтилган овози ва жавобларини (бемалол) эшитмоқ мумкин эди... Бу ҳаммаси чодир ичидаги кишининг қавлу феъли (сўзи ва ҳаракати) эдики, мен бунга таажжубландим». Изоҳнинг ҳожати йўқ. Кошифийнинг таажжубланиши, қойил қолишида асос бор. Тавсифдан очиқ кўриниб турибдики, Навоий замонидаги кўғирчоқбозлар чиндан ҳам зўр маҳорат эгаси бўлишган экан. Ахир бир кишининг ҳам аёл, ҳам эркак тилидан гапириб, жонли ва табиий диалог ҳосил қилиши маҳорат чўққиси, етуклик эмасми? Биз билган машҳур кўғирчоқбозлар ва уларнинг ота-боболари ҳам аёл билан эркак кўғирчоқ – персонажларнинг тилини бера олмаганлар, тил тагига махсус мослама пластинка – сафил қўйиб гапириш уларни бу имкониятдан маҳрум қилиб қўйган. Бундан чиқадики, Кошифий замондоши бўлган кўғирчоқбоз сафилдан фойдаланмаган, ўзининг табиий овозини ишга солиб, персонажларнинг нутқий характеристикасини беришда катта ютуқларга эришган [...].

Яна шу нарса ҳам маълумки, Хусайн Воиз Кошифийнинг маълумотлари ўша замонда кўғирчоқ театрининг ҳар қайси турида томоша техникаси қандай бўлганлиги, қандай воситалардан фойдаланилганлиги аниқ тасаввур этишга ёрдам беради. Кундузи кўрсатиладиган кўғирчоқ театрида ўйинчи бир жойда ўтирган

(ёки турган) ҳолда ҳолатини ўзгартирмасдан махсус чодир-саҳна ичига кириб, ҳар сафар икки қўлига иккитадан кўғирчоқ кийиб, уларни чодир айвонига чиқариб ўйнатган. Буни юқорида бошқа масалалар муносабати билан келтирилган кўчирмаларда яққол кўрамиз. Кечқурун кўрсатиладиган кўғирчоқ театрининг техникаси ҳам, воситалари ҳам бутунлай бошқача. Унинг саҳнаси кўғирчоқбоз кийиб оладиган чодир (хайма) эмас, балки сандиқ (пешбанд)дир. Бу ўринда сандиқ деб катта тўрт бурчакли сандиққа ўхшатиб махсус ясалган саҳна назарда тутилмоқда, албатта. Афтидан, бу сандиқ – театрининг томоша пайтида олди томони ва томи очилган, бошқа вақт унинг ҳамма томони беркилиб, унда кўғирчоқлар ва бошқа асбоблар жойлаштирилган. Кўғирчоқбоз томошабинга кўринмаган ҳолда бир неча жойидан иплар билан боғланган кўғирчоқларни тепадан тушириб ўйнатган [...].

Кошифий ишлатган лўъбат – лўъбатбоз (кўғирчоқ – кўғирчоқбоз), сурат (умумий тасвирий образ, бу ўринда кўғирчоқ образи), лаҳв (ўйин, томоша), шаб бози (кечки ўйин), рўз бози (кундузги ўйин) терминлари фақат Хуросонда эмас, Мовароуннаҳрда ҳам кўп кўғирчоқбозлар томонидан қўлланилган.

Шундай қилиб, мавлоно Кошифийнинг маълумотлари кўғирчоқ театрининг XV аср ва XVI асрнинг биринчи ярмида шуҳрат топганидан, ўз камолоти ва мавқеи билан олимлар диққатини ҳам жалб қила бошлаганидан далолат беради [...].

XIX аср ва XX аср бошида ўзбек кўғирчоқ театри икки турдан иборат бўлган: «Чодир хаёл» ва «Чодир жамол». Шундан «Чодир жамол» – бу кишиларнинг кундалик ҳаётидан олинган воқеаларни қўлга кийиб ўйнатиладиган кўғирчоқлар ёрдамида кундузи акс эттирувчи ўзига хос халқ театридир.

«Чодир жамол» саҳнаси кўпинча якранг (қизил, сарик) матодан халтасимон қилиб тикилган бўлиб, чодир деб аталади. Ўйинчи унинг ичига кириб қуйи томонини белига боғлаб олади, юқори томони эса пасту баланд кесилган бўлиб, ошиқ-маъшукли болорчўп, остона, иккита ён чўп ва тирговучлар ёрдамида чоркунжак саҳна тусини олади. Кўғирчоқбоз ўзи кўринмасдан чўккалаган ёки тик турган ҳолда¹ чодир ичида тикилган чўнтакда

¹ Бухоро, Самарқанд ва айрим бошқа шаҳарларда кўғирчоқбоз узала тушиб

тахланиб ётган кўғирчоқлардан навбат билан чиқариб ўйнатади. Ҳар сафар бир жуфт кўғирчоқ чиқади, чунки ҳар кўлда фақат биттадан кўғирчоқ ўйнатиш мумкин. Кўғирчоқни ҳаракатга келтириш мураккаб эмас. Ўйнатувчи кўғирчоқни кўлига кияркан, бошини ўрта, (баъзан кўрсатгич) бармоғига кўлларини чимчилок (баъзан ўрта бармоқ) билан бош бармоқларига кўндиради. Мана шу бармоқларни букиш, тўғрилаш, силкитиш, титратиш орқали кўғирчоқлар ҳаракатга келтирилади. Ўйинчи тили тағига пишиқ ёғоч паррагидан ясалган сафил деган пластинка кўйиб, кўғирчоқларнинг жисмига мос характерли, ўткир, чийилдоқ товуш ҳосил қилган.

Кўғирчоқларнинг боши, кўллари ва кўйлаги бўлиб, ўйинчининг билагидан уларнинг танаси ҳосил қилинган. Кўғирчоқларга баъзан оёқлар ҳам ясалган. Кўғирчоқ бошлари, одатда, ёғочдан йўнилган. XIX аср охирларида Фарғона водийси ва Тошкентда чинни бошли ва елимли кўғирчоқлар ҳам истеъмолга кирган. Кўғирчоқ яшаш, уни кийинтириш билан кўғирчоқбозларнинг ўзлари шуғулланганлар. Баъзан буюртма билан бешиксоз усталар ясаб беришган. Кўғирчоқларнинг кўзлари, одатда, ранг билан чизилган, баъзида қора, яшил, сариқ, пушти рангли мунчоқлардан ясалган. Қош, соқол, мўйлов баъзан чизилган, баъзан жундан қилинган. Масалан, чол киёфасидаги кўғирчоқларнинг қоши, мўйлови ва соқоли оқ ёки мошгуруч жун ёпиштиришдан ҳосил этилган. Кўғирчоқларнинг кўллари сариқ, пушти ёки қора чармдан, баъзан латгаю увададан тикилган. Албатта, бунда кўғирчоқ қандай типни тасвирлаши эътиборга олинган. Чунончи, бой ҳинди, яллачи лўлининг кўллари пушти рангли, дев, кўмирчи, дарвишнинг кўллари қора рангли бўлган.

П. А. Комаров чодир жамол театри ихтиёрида 45 тача кўғирчоқ бўлган, деб тахмин қилади.¹ Аммо унинг 34 кўғирчоқдан иборат коллекциясида ҳаммаси бўлиб 18 та персонаж – кўғирчоқни кўрамиз, қолган 16 таси қайтариқ, чунки бир қатор кўғирчоқлардан

ётган ҳолда томоша кўрсатган. Машхур кўғирчоқбоз Дониёр Шохсуворовнинг айтишича, бундай томошалар аёллар орасида, меҳмонхонада, ўрдада кўрсатилган, холос.

¹ П. А. Комаровнинг Санкт-Петербургдаги этнография музейидаги архиви.

2–3 тадан йиғилган. Мана, Комаров коллекциясидаги кўғирчоқ персонажлар: Полвон Качал, Бичахон ойм (Пучуқхон, Ойимхон), Бой хинди судхўр, кўкнори, Саидбойнинг кизи, Тўрагелдиннинг қизи, Бекназар карнайчи ва унинг хотини Бибихон, Эрназар маймунчи маймуни билан, Тўтихон (Назокатхон), Қумрихон (Саодатхон), етим киз, Абрам мужик хотини билан, лўли киз, Борух жугут, Шура қиз.

Эҳтимол, XIX аср ва XX аср бошида Ўзбекистон ҳудудидаги кўғирчоқбозлар ишлатган барча кўғирчоқлар – типларни йиғиб келганда 54 та эмас, юзтадан ҳам ошар, чунки жуда кўп кўғирчоқ ва уларнинг томошалари бизгача етиб келмаган. Аммо шу нарса аниқки, ҳар қайси кўғирчоқбоз кўпи билан йигирмата кўғирчоқ ишлатган. Чунки ҳар спектаклда 8–12 кўғирчоқ иштирок этиб, мазмунан бир-бирига боғланиб кетувчи 4–5 эпизод ҳосил қилган.

Ҳар қандай кўғирчоқбоз томошасида бир кўғирчоқ муҳим аҳамиятга эга бўлганки, у ҳам бўлса Полвон Качалдир. Шу сабабли уни яшашга алоҳида эътибор берилган. Унинг қиёфаси кўпинча шундай бўларди: буғдойранг, қийғир бурун, қайрилма мўйлов, кўзлари қора мунчоқдан қилингандан қопқора бўлиб йилтиллаб, яшил ёки кўк рангли қалпоғининг тагидан қора сочлари чиқиб туради. Унга, одатда, тўқ қизил ёки сариқ кўйлак кийдирилган. Хуллас, Полвон Качалнинг ташқи кўриниши, юз ифодаси унинг ҳамиша хушчақчақ ва шўхлигидан дарак беради.

Иккинчи муҳим персонаж Полвон Качалнинг хотини (баъзан маъшуқаси) Бичахондир.¹ У ҳам ҳар жойда ҳар хил ясалган ва ҳар хил кийинтирилган бўлса-да, қиёфасидаги айрим белги ва хусусиятлар, одатда, такрорланган. У кўпинча шахло кўз, бодом қовоқ, қайрилма қош, оқ бадан, ёш ва сулув жувон қиёфасида тасвирланган. Юзидаги бир дона қора холи билан икки юзининг қизиллиги унинг соғломлиги, сулувлигини яна бир бор тасдиқлаб туради. Эғнида одми гулдор кўйлак (баъзида рангдор адрас ёки

¹ Бу кўғирчоқ-персонаж Бича ойм, Ойимчахон, Бувичахон, Ойхоним каби турли номлар билан юритилади. Аммо шулар орасида Бичахоним кўпроқ қўлланилгани учун биз ҳам шуни асос қилиб олишни лозим топдик.

шойи), бошида шойи рўмол ва пешонабанд бўлиб, бўйнида маржон такилган. Бир сўз билан айтганда, Бичахоннинг киёфаси унинг шўх ва таннозлигини ифодалаган.

Чодир жамол театрининг, Полвон Качал билан Бичахондан ташқари, бизга маълум бўлган барча кўғирчоқларни тўрт гуруҳга ажратиш мумкин: сатирик персонажлар, халқ типлари, санъаткорларнинг киёфалари ҳамда ҳайвон ва афсонавий махлуклар.

Сатирик кўғирчоқ-персонажлар раис, ясовул, судхўр, хожи кампир, терговчи каби ҳукмрон синф вакиллари бўлган кўкнори, далла-совчи каби типлар киёфасидадир. Улар бўрттирилган ҳажвий тасвирларда гавдалантирилиб, ижтимоий тип даражасига кўтарилган. Чунончи, раис киёфасида шу лавозимдаги у ёки бу амалдор белгиларини эмас, балки ўтмишдаги барча раисларга хос бўлган типик аломатларни (такаббурлик, қаҳр каби) кўрамиз [...]. Шу нарсани ҳам кўшиб кетиш керакки, сатирик кўғирчоқ-персонажларнинг асосий қисми қадимий бўлиб, улар орасида «оқ подшо қизи»га ўхшаш мустамлака даврида вужудга келганлари ҳам учрайди.

Халқ типлари деб белгиланган кўғирчоқ-персонажлар Ўзбекистонда яшаган турли халқларнинг ижтимоий киёфасини акс эттиради. Улар орасида биз ўзбек, рус, яхудий, козоқ ва туркман типларини кўрамиз. Ҳар бир кўғирчоқ-персонаж ҳаётдаги маълум бир тоифа кишиларининг умумий хусусиятларини ўзида мужассамлаштирган. Умумлаштириш принципи жиҳатидан уларнинг сатирик кўғирчоқ-персонажлардан фарқи йўқ. Аммо кўғирчоқ ясовчилар сатирик персонажларга бўлак, халқ типларига бўлак муносабатда бўлганликлари туфайли гуруҳлар характер жиҳатидан бир-биридан кескин ажралади. Сатирик кўғирчоқ-персонажларнинг айрим белгилари ўта бўрттирилган ҳолда ҳажв ва мазах билан акс эттирилса, халқ типларида фақат умумлашмани кўрамиз. Бу тоифа кўғирчоқлар орасида ҳам қадимгилар билан бир қаторда Абрам мужик, Ойқиз Шура каби XIX аср охирида пайдо бўлган персонажларни учратиш мумкин.

Санъат аҳли киёфаларини гавдалантирувчи кўғирчоқ-персонажлар ҳам умумлаштирувчилик хусусиятларига кўра юқоридаги тоифаларга яқин туради. Буларда созандалик, ялла,

масхарабозлик, рақс, дорбозлик, маймун ўйин, тосбозлик каби санъат турлари намояндаларига хос умумий белгилар ўз ифодасини топган [...].

Ҳайвон ва афсонавий махлуқлар кўғирчоқ усталари тарафидан одамбашара қилиб ясалган. Бу ҳолатни ҳайвонлар ҳам суратини ўзгартирган одамлардир, деган қадимги дунёқараш ифодаси деб изоҳлаш мумкин. Иккинчидан, ялмоғиз кампир, аждаҳо, шайтон кўғирчоқ-персонажларининг киёфасини кузатиш бир пайтлар ўзбек кўғирчоқ театрида чинакам афсонавий махлуқ сурати кенг ишлатилганидан далолат беради [...].

Хулоса қилиб шуни айтиш мумкинки, чодир жамол театрида хушчақчақлик ва донолик, жасурлик ва шижоат каби ўзининг бир қанча фазилатлари билан халқ оммасининг меҳр-муҳаббатини қозонган Полвон Качалнинг бошидан кечирганларини шўх, жозибали ҳамда самимий ҳикоя қилувчи, замон зўравонларини масхара ва фош этувчи ажойиб комедия намоиш қилинган.

Чодир хаёл театри чодир жамолга нисбатан анча мураккаб ва мукамал. Бу хусусият сахна тузилиши, кўғирчоқларнинг ясашиш, ижро техникаси, тематика – барча компонентларда яққол кўриниб туради.

Сайлгоҳ, кўча ёки ҳовлида шундай жой танланадики, токи ўйинчи томошабинга кўринмасин. Шу ерда узунлиги 5–6, бўйи 2–2,5 метр келадиган ранг-баранг ва йўл-йўл читдан парда тутилади. Унда сахна кўринсин учун махсус жой қилинган. Унинг «чодир пардаси» деб аталиши ҳам шундан келиб чиққан бўлса керак. Чодир пардасининг ортида узунлиги 3–3,5 метр, бўйи 120–125 см келадиган ички қора чодир бўлиб, унинг ҳам пастки томони 180 см узунликда ва 70–75 см баландликда кесилиб, ўйин жойи ҳосил қилинган. Ички чодир остона, устун, болор ва тирговучлардан иборат мосламалар билан тикланиб турган. Ярим метрча ичкарида қора газламадан ички парда осилган.

М. Ф. Гаврилов томоша техникасини шундай баён қилади: «Театр сахнасида кўғирчоқлар ишлар ёрдамида ҳаракатга келади. Иплар ҳам ички парда сингари қора. Иплар билан одатда кўғирчоқларнинг танаси, боши, қўллари ва оёқлари боғланган, бир учи «дастчўп» деб аталувчи (20 см) чўпга уланган бўлади.

Ички парда орқасида турган кўзирчоқбоз дастчўпни кўлига ушлаб, кўғирчоқни саҳнага чиқаради, ўзи эса такдан ички парда билан, тепадан чодир пардаси билан томошабиндан яширинган ҳолда қолаверади».¹ Бу театр томошалари одатда кечкурунлари кўрсатилгани, оддий нур-шуъла ва шовқиндан фойлалангани туфайли қора пардалар ичидаги кўғирчоқларнинг иплари кўринмаган, худди кўғирчоқларнинг ўзлари ҳаракат қилаётгандай табиий ва ажиб манзара ҳосил бўлган. Ҳар бир кўғирчоқбоз бир пайтнинг ўзида ишлар ёрдамида 3–4 кўғирчоқни ҳаракатга келтира олган. Чодир жамол театрининг бир томошасида кўпи билан ўн кўғирчоқ иштирок этган бўлса, чодир хаёлда бир томошада 50 дан ортиқ кўғирчоқ ўйнаган. Иккита турда ҳам томошалар асосан икки киши – кўғирчоқбоз билан корфармон томонидан уюштирилган ва бошқарилган. Корфармон кўғирчоқларни гапга солган, томошани бошлаган, якунлаган, шунингдек, созандалик вазифасини бажарган. Кўғирчоқбоз чодир ичида ёки парда орқасида сафил ёрдамида кўғирчоқлар тилидан гапирган, уларни ҳаракатга келтирган, бадий образ яратган. Аммо шуни кўшиб кетиш керакки, «Чодир хаёл» мураккаб бўлгани учун ўйинчи актёрга бир-икки шогирд ёки созанда кўғирчоқларни тайёрлаб бериб турган [...].

Халқ кўғирчоқбозларининг фаолияти XX асрда ҳам самарали бўлди. Пўлатжон Дониёров, Дониёр Шохсуворов, Қули Наввотов, Холмурод Сиддиқов, Матёқуб Воисов, Тиллахон Матёқубов, Ғофуржон Мирзараҳимов сингари ўнлаб кўғирчоқ ўйин усталари анъанавий репертуарни янги замон, янги томошабинга хизмат қилдириш, янги томошалар яратиш бобида муҳим ишлар қилдилар.

Айниқса, халқ кўғирчоқбозларининг янги ўзбек театрини яратишдаги хизматлари фавқулодда аҳамиятли бўлди. Халқ кўғирчоқ театрининг энг яхши анъаналари – услуб, образ ва воситалари замонавий ўзбек кўғирчоқ театрлари томонидан ижодий ўзлаштирилди ва ривожлантирилди. Бу жараён ҳамон давом этмоқда.²

¹ Гаврилов М. Ф. Кукольный театр Узбекистана. – Т., 1928. с. 16.

² Ушбу мақола куйидаги манбадан қисқартирилиб чоп этилмоқда: Кодиров М. Кўғирчоқ ўйин // Ўзбек фольклори очерклари. 2-том. – Тошкент: Фан, 1989. – 280–317-бетлар.

Ғайрат
ЖАЛОЛОВ
(1933–2014)



Жалолов Ғайрат Орипович 1933 йил 9 июнда туғилган. Тошкент педагогика институти (ҳозирги Низомий номидаги Тошкент педагогика университети) филология факультети талабаси ҳамда (1952–55), аспиранти (1956–59). Тошкент педагогика институтида ўқитувчи, катта ўқитувчи (1960–69), Кутубхоначилик факультети декани (1964–70), «Ўзбек адабиёти» кафедраси доценти (1970–74), Тошкент давлат маданият институти Кутубхоначилик факультети декани (1975–80), шу институт «Ўзбек адабиёти» кафедраси профессори (1980–87), мудири (1987–2001) вазифаларида ишлаган. «Ҳамза ва халқ оғзаки ижодиёти» мавзуида номзодлик (1962), «Ўзбек халқ сеҳрли эртақларининг генезиси ва поэтикаси» номли докторлик (1987) диссертациясини ҳимоя қилган. «Эртақ ва ҳаёт» (1975), «Ўзбек халқ эртақлари поэтикаси» (1976), «Ўзбек фольклорида жанрларро муносабат» (1979) «Узбекский народный сказочный эпос» (1980) каби китоблар муаллифи. Рус тилида нашр этилган 2 жилдли «Ўзбек халқ эртақлари» мажмуасини нашрга тайёрлашда қатнашган; «Ўзбек фольклори» (1967) номли услубий қўлланмаси чоп этилган. 2014 йилда вафот этган.

«АЛПОМИШ» ВА ХАЛҚ ЭРТАКЛАРИ

«Алпомиш» ўзбек халқининг қабила, элат ҳолидаги ҳаёт тарзини ифода этувчи дostonдир. У халқ ҳаёти, тарихи ва реал воқелик билан доим узлуксиз алоқада яратилди ва ривожланди.

«Алпомиш» эпосининг миф ва эртақлар сюжети, мотивларига яқин, ўхшаш бўлишига қарамай, ҳаёт ҳодисаларини тасвирлашда ҳар бир жанрнинг ўзига хос талабларидан келиб чиқадиган қайтарилмас хусусиятлари мавжуддир. Ана шу хусусият ва ҳолатлар уларни бир-бирдан фарқлаб турувчи омиллар ҳисобланади. Чунончи, буни биз ҳаёт воқелигини тасвирлашда қўлланилган асар шаклида ҳам, образлар тасвирида ҳам кўришимиз мумкин. Сюжетлардаги фантастик тасвир, бадийий уйдирмалар заминида қандай реал мақсад турганлигини қаҳрамоннинг рақибларни ажойиб куч-қувват, ботирлик билан енгиб ўтиши, образларнинг халқи, ватани учун ҳар қандай тўсиқларни тадбиркорлик, ақл-заковат, баҳодирлик билан моҳирона ҳал этишлари ва мақсадларига эришишларида кўришимиз мумкин. «Алпомиш» дostonидаги воқеа ва ҳодисалар тасвирида эртақона фантастика, уйдирмаларни эмас, нисбатан реалликка интилиш, ҳаётий воқеаларни бўрттириб талқин этиш ҳолатини яққол кўрамиз.

Мифологияда ва эртақларда рақиблар жуда чуқур, туби кўринмас чоҳлар (нариги дунё сифатида) яратиб, қаҳрамонни ўша ерда тутқунликда тутсалар, дostonда эса ерни ковлаб, зиндон қазиб, қаҳрамонни шу ерга, у уйкуга кетганида қамайдилар. Эртақлардаги ер ости оламининг дostonда зиндонга алмашинишининг ўзи бахши-ижодкорларнинг реалликка, ҳаётийликка томон интилишининг бир кўринишидир.

Дostonдаги Сурхайил кампир образини олиб кўрадиган бўлсак, у энди эртақлардаги жодугар, мастон кампир образларидан фарқ қилади. Дoston қаҳрамонига қарши қаратилган кампирлар тасвирида ҳам реалликка интилиш кўринади. Шум, жодугар кампир эртақларда афти-юзи буришган, ҳамма билан уришган одам-хўр, кишиларга ёмонлик қилувчи сифатида берилса, Сурхайил кампир дostonда реал, болаларининг ўлими учун Алпомишдан ўч олишга киришган муғомбир, ваҳший қасоскор қиёфасида

тасвирланади. Баъзи тасвирлар «Алпомиш»да примитив, содда қилиб берилса, (уни зиндонга солиш, 7 йил очлик, чўпон берган қўйлар билан кун кўриши каби), бироқ унда шу воқеаларни ҳаётӣ, реал қилиб тасвирлашга интилиш мавжудлиги сезилиб туради. Лекин «Алпомиш» каби йирик эпик асарларнинг яратилишида, албатта, ўзга жанрлардан фойдаланиш, уларни ижодий ишлаб мазмунга сингдириб юбориш кўзга ташланади. Айниқса, тубандаги эпизодларда эртақ жанрига хос фантастика, уйдирмаларнинг дostonга сингиб кетгани, воқеаларнинг кўтаринки, эртақона услубда беришга хизмат этганлигини кўриш мумкин. Алпомиш сувда чўкмас, қилич ўтмас, оловда қуймас этиб тасвирланган. У эртақлар қаҳрамони каби барча кураш, тўқнашувлардан ғолиб чиқади. У худди миф, эртақлардаги каби паҳлавонларга хос уйқуга эга. У ухлагач, маълум вақтгача уйғотиб бўлмайди. Уни шундай ухлаганида банди этилади, зиндонга ташланади.

Алпомишнинг оти Бойчибор одамдай фикрлашга молик, лекин гапира олмайди. Эртақлардаги отлар гапириш хусусиятига ҳам эга. Унинг дастлабки кўриниши, эртақлардаги каби назарга тушмайдиган, эътибордан йироқ бир кўринишда бўлса-да, аслида, ажойиб, қанотлари мавжуд, қобилиятли тулпор.

Алпомишнинг зиндондан қутилиш мотиви ҳам фантастик, эртақона услубда, мўъжизакорлик билан тасвирланган. Унинг зиндондан туриб туғишганларига хабарни ғоз орқали юбориш мотиви ҳам эртақларга хосдир.

Демак, «Алпомиш» дostonидаги қатор мотивлар, чунончи, унинг зиндонга ташланиши, ўтда ёнмас, қилич олмаслиги, оти ёрдамида тутқинликдан озод бўлиши каби ўринлар фантастикага бурканган. Эртақ ва дostonдаги фантастика ва муболаға миф ва афсоналарнинг кучли таъсиридан юзага келган.

«Алпомиш» ўзбек халқининг йирик эпик асари. Унинг синкретиклик хусусияти фольклоримизнинг кўплаб жанрларига хос белгиларнинг дoston сюжетида мужассамлашганида кўзга ташланади. «Алпомиш»да эртақларга хос хусусиятлар, қўшиқларга ўхшаш парчалар (Алпомиш ва Барчин, Алпомиш ва Бодом бикач ўрталаридаги ўланлар), ажойиб мақол, ибораларни қаҳрамонлар диалоги, ички кечинмалари, ташқи кўринишлари-

нинг тасвири ва бошқа кўплаб ўринларда кўриш мумкин. Умуман, фольклор асарларига хос хусусиятнинг бир кўриниши ҳам шундандир. Айниқса, «Алпомиш», «Кунтуғмиш», «Рустамхон», «Малика Айёр», «Ширин ва Шакар» каби дostonларда халқ эртакларига якин турувчи мотивларни, образлардаги ўхшаш хусусиятларни, ажойиб муболага, уйдирмаларни истаганча кўриш мумкин. Лекин эртаклардаги воқеалар тасвири тор, ҳажми кичик бўлса, дostonларда воқеалар кенг атрофлича баён этилади. Бироқ, реалликка интилиш сезилиб туради.

Эртак воқеалари дoston воқеаларига нисбатан тез ривожланади. Воқеа, ҳодисалар қисқа, лўнда ифодаланади. Эртакларда шеърий парчалар ҳам ишлатилади. Бу парчалар руҳий кечинмаларни, насрий эпизодлар эса асосий мақсад, ғоя, мазмунни ифодалайди. Дostonларда эса кўпинча асосий мақсадни шеърий қисмлар ифодалаб, насрий қисмлар уларни бир-бирига улаш, тўлдириш каби ёрдамчи вазифани ўтайди. Бундай фарқни уларнинг ижро усулида ҳам кўриш мумкин. Эртак айтилади, дoston эса қуйланади. Эртак айтувчи асардаги баъзи учрайдиган кичик шеърий парчаларнигина куйлаши мумкин. Бизнингча, бу шеърий парчалар эртакларга кейин, дoston, терма, кўшиқлардан ўтган бўлиши керак.

Дoston ва эртакларнинг бир-бирига ўхшаш томонлари ҳам мавжуд бўлиб, булар мотивлардаги яқинлик, чунончи, қаҳрамоннинг ўзи севгилисига эришиш мақсадида узоқ юртларга сафари, мураккаб шартларни бажариши, севгилисини олиб ўз юртига қайтиши кабиларда кўринади.

«Алпомиш» эпосидаги Бойбўри ва Бойсарининг фарзанд кўриши билан боғлиқ мотивлар деярли миф, афсона, эртак мотивларига яқиндир. Боласиз отанинг бола тилаб олиши ва боланинг ажойиб сеҳрли кучга, баҳодирона сифатга эга қилиб берилиши шундай эпизодлардандир. Эртакларда кўпроқ тугилган бола сеҳрли кучга, эпосда ғайритабiiй туғилган қаҳрамон зўр куч-қувватга эга бўлади ва баҳодирлик хусусиятлари бўрттириб тасвирланади. В. М. Жирмунский ҳам Ўрта Осиё халқларининг сеҳрли эртаклари ва қаҳрамонлик эпосларида фарзандсизлик эпизоди жуда катта ўрин эгаллаганлигин, ота-оналарнинг худо ёки бошқа сеҳрли ҳимоячиларга ялиниб, бола тилаб олиши-

ни таъкидлаб, бу ҳол Яқин Шарқ ва Ўрта Осиёда яшовчи араб, форс ва туркий халқларда кўп учрашини айтади. Достон ва эртаклардаги фарзанд тилаб олиш мотиви жуда қадимий бўлиб, халқимизнинг урф-одатлари, қадриятлари заминида вужудга келган. Халқимизда фарзандсизлик жуда катта фожеа саналган, унинг натижасида қанча оилалар хазон бўлиб кетган. Шунинг учун халқ эпосида қаҳрамонлар ёш, қари бўлса ҳам, уларнинг фарзанд кўришлари шарт қилиб қўйилади. Подшоми, вазирми, ким бўлишидан қатъи назар фарзандлик бўлиши эртак ва эпос учун шартдир. Жуда бўлмаса, Гўрўғли сингари болани асраб олиши ва меросхўр этиб белгилаши керак. Эртак ва достонларимизда қаҳрамонлар қариганида, қирқ биринчи хотинга уйланиши ёки бирор илоҳий маскан ва авлиёларга сиғинишлари, ёхуд сеҳрли олма ва ҳоказоларни истеъмол қилишлари натижасида фарзанд кўрадилар. Уларнинг фарзандлари ажойиб, жуда қудратли, ақлли, баҳодир, сеҳрларни билувчи ўғил ёки доно, одобли гўзал қиз бўлади.

Оила ва оилани сақлаш, оиланинг бирлиги учун кураш қадимги патриархал ҳаёт талаби билан юзага келган. Кейинчалик бу одат патриархал уруғчилик даврида ҳам уруғнинг, қабиланинг бутунлиги, бирлиги учун шарт, омил ҳисобланган. Патриархал ҳаёт заминида яратилган бу мотив кейинги даврларда ўз кучини йўқотмади, аксинча, фольклор асарларида салмоқли ўринни тутиб келди. Шунинг учун Бойбўри ва Бойсариларнинг фарзанд учун интилиши мотивини қадимий эканлигини уқтириш лозим.

Достонда Бойбўри ва Бойсарининг Шоҳимардонга бориб фарзанд тилаб олишлари қуйидагича ифодаланади: «Иккови қилди маслаҳатди, бу сўз икковига жуда ботиб кетди. Бойбўри туриб айтди: – Бойсари ука, қариганда бизнинг молимиз бесоҳибга чикди, энди бизлар бир фарзанд тарадди қилмаймизми? Бойсари туриб айтди: – Тортиб олиб бўлмаса, сотиб олиб бўлмаса, худо бизга бермаса, қаёқдан қиламиз тарадди?! Бойбўри айтди: – Шу ердан Шоҳимардон пирнинг равзаси уч кунчалик йўл келар экан, ҳар ким бориб тунар экан; давлатталаб давлат тилар экан, фарзандталаб фарзанд тилар экан, охира талаб иймон тилар экан, қирқ кун

тунаган киши муродига етиб қайтар экан. Биз ҳам борсак, назру ийёзимизни берсак, Шохимардон пирнинг равзасида тунаб, биз ҳам бир фарзанд тилаб кўрсак». Ака-укалар Шохимардон пир равзасига бориб фарзанд тилаб ётадилар ва Бойбўрига бир киз, бир ўғил, Бойсарига киз ато этади. Мотив Ўрта Осиё халқлари орасида жуда қадимги ва кенг тарқалган бўлиб даврлар ўтиши, дostonни қайта-қайта айтилиши билан унга диний тушунчалар келиб кирган. Бундан кейинги сюжет силсиласида яна қадимги Ўрта Осиё халқлари эртақларида учрайдиган сайёр мотивларни кўрамыз.

Кўпчилик эртақ ва дostonларимизда фарзандларнинг туғилиши вақтида ота кўпинча уйда бўлмайди: у овда ёки сафарда, ёхуд бирор юмуш билан кетган бўлади. Бу ҳол қабилачилик давридаги маросимларнинг ўзига хос кўриниши билан боғлиқдир. Этнограф М. Косвеннинг таъкидлашича, Африка, Индонезия, Шимолий Америкада яшовчи айрим қабилаларда бола туғилиши вақтида ота атайин уйда бўлмас экан, унинг бўлиши қабила одатлари бўйича ман этилар экан.

Худди шу одат ўзбеклар учун ҳам хосдир. Бизда ҳам фарзанд туғилаётган вақтда эртақларнинг уйда бўлиши мумкин бўлмаган. Болани қабул қилиб олиш, барча расм-русумларни амалга ошириш махсус аёллар – доялар томонидан бажарилган.

«Алпомиш» дostonида Бойбўри ва Бойсари уйда бўлмайдилар. Бу ҳолат дostonда шундай тасвирланади:

«Бойбичаларнинг ой-куни яқин етди, бийлар иккови айтди: «Бизлар ҳам бир шоҳлик шавкати қилсак, овга чиқиб кетсак, фарзандлар ер юзига тушса, суюнчи, деб бир нечалар олдимизга йўлга чиқиб, бизлардан тилла-танга инъом олса», – деб ўйлаб, бийлар овга жўнаб кетди». Дostonдаги бу мотив ҳам эртақларга хос бўлиб, унда янги туғилганларга ном кўйиш ҳам муҳим аҳамиятга эга. Бойбўри ва Бойсари янги туғилган фарзандларига атаб 40 кечаю 40 кундуз тўй берадилар. Қирқинчи куни қаландар келиб, чақалоқларга ном беради. У шундай тасвирланади: «Қирқ кечаю қирқ кундуз бўлгандан кейин тўй тарқайдиган куни бўлди. Бир вақт шунда бийлар қараса, узоқдан бир қаландар кўриниб кела берди... Бийлар ўрнидан туриб, олдига пешвоз чиқиб, салом бериб, зиёрат қилиб, мажлисхонага бошлаб олиб келди. Шунда

фарзандларнинг учовини ҳам олиб келиб, Шоҳимардон пирнинг этагига солди. Шоҳимардон пири Бойбўрининг ўглининг отини Ҳақимбек қўйди, ўнг кифтига беш қўлини урди. Беш қўлининг ўрни доғ бўлиб, беш панжанинг ўрни билиниб қолди. Қизининг отини Қалдирғочойим қўйди. Бойсарининг қизининг отини Барчиной қўйди. Ана шунда Шоҳимардон пири Ҳақимбекка ой Барчинни аташтириб, бешиккerti қилиб: «Бу икков эр-хотин бўлсин, Ҳақимбек билан ҳеч киши баробар бўлолмасин, омин оллоху акбар», – деб фотиҳани бетига тортди». Халқ маросимлари, урф-одатлар дostonда шундай жонли, гўзал услубда тасвирланади. Қаландарнинг ишлари, вазифалари, фотиҳалари, бу ўринда жуда жонли, реалликка яқинлаштириб, эпосона услубда тасвирланган.

Юқоридагиларга ўхшаш мотивлардан бири қаҳрамоннинг йўлдоши, ёрдамчиси Бойчибор билан боғлиқ эпизодлардир. Сеҳрли эртақларнинг баъзиларида ҳам асар қаҳрамонига ёрдам берувчи, мақсадга эришувида унга кўмаклашувчи ҳайвонлар ичида от образи алоҳида ўрин эгаллайди. У қаҳрамоннинг энг содиқ ҳамроҳи ҳисобланади. Эртақлардаги отлар сеҳрли, курашувчи, гапирувчи, ҳар бир нарсани олдиндан кўрувчи ва қаҳрамонни хавф-хатар, ўлимдан сақлаб қолувчи энг ишончли дўст сифатида гавдаланади. Чунончи, «Абулқосим» каби эртақлардаги оқ, сарик ва қора тулпор отларни эслаш кифоя.

Дostonлардаги қаҳрамоннинг ёрдамчиси, ҳамроҳи от образи эртақлардаги отлар образидан қатор сифатлари билан фарқланади. Авваламбор, Бойчибор, Гиркўк каби отлар тасвирида деталлаштиришнинг кучлилигини кўраимиз. Алпомиш билан Бойчибор Гўрўғли билан Гиротнинг ширхўралиги, яъни сут эмишганлигига алоҳида эътибор берган фольклоршунос Ҳ. Зарифов бу ҳолатнинг генезиси узоқ ўтмишга оид эканлигини, ибтидоий тушунчалар билан боғлиқлигини кўрсатади. Эртақларда эса жанр талабига кўра умумлаштириш кучлидир. Дostonлардаги от образларида эртақдаги каби фантазиянинг кучли кўринишлари мавжуд эмас. Чунончи, улар сеҳрли эртақлардаги отлар каби гапириб, қаҳрамонга маслаҳатлар бериш хусусиятидан маҳрумдирлар (Фақат «Алпомиш» дostonининг бир ўринда Боботоғда Қоражон ва Бойчибор диалогини кўриш мумкин).

Эпосшунос олимларнинг таъкидлашларича, «Алпомиш»нинг қорақалпоқ, қозоқ ва ўзбек версияларининг асосида қўнғирот версияси ётади. Бу версияда сюжет чизиги бир хил ифодаланиб, унда воқеалар тизими маълум тартибда баён этилади; фарзандларнинг дунёга келиши, болалар туғилмасдан оталарининг қуда бўлиш хусусидаги аҳдлари, бешиккерт қилиниши, Бойсарининг қудачилиқдан айнаниши ва ўз элати билан қалмоқлар элига қўчиши, қаҳрамоннинг севиқли ёрига бориши, шартларни бажариб қайлигига уйланиши, жодугар Сурхайил макри билан асирликка тушиши ва узоқ давр (7 йил) зиндонбанд этилиши, Бойчиборнинг хон қизи ёрдамида озод этилиши, ватанга қайтиш ва Ултонтоз билан олишув, уни енгиб қаллиғини қутқариш каби мотивлар тасвирланади. Бу сюжет қурилмасидаги эпизодларда эртак мотивларига ҳамоҳангликни кўрамиз. Бу мотивлар эртакларга нисбатан анча кенг, атрофлиқ, реалликка интилиш асосида берилдики, бу ҳол икки жанрнинг ўзига хос услуби, ифодалаш йўллари билан боғлиқ. Бу нарса ҳар икки жанрнинг ўзаро бир-бирига таъсирини ҳам тасдиқлайди. Юқоридаги мотивларнинг бирортасини тушириб қолдириш мумкин эмас, чунки улар «Алпомиш» достонининг сюжетини ушлаб турувчи асосий устунлар сифатида келган. Эртакларда мазкур мотивларнинг айримларигина сюжетнинг асосини ташкил этганининг гувоҳи бўламиз. Бундан келиб чиқадиган хулоса, даврлар оша эртакларнинг айрим мотивларидан шоирлар ижодий озикланиб, уларни сюжет таркибига сингдириб юборган бўлишлари керак.

Ўзбек халқининг ижодий даҳоси бўлган «Алпомиш» уруғ ва қабилаларда патриархал уруғчилик муносабатларининг емирилиши ва феодал тузумнинг шаклланиб бориши даврларида яратилган, халқ тарихи, қурашларини бадий тараннум этган. «Алпомиш» синкретик эпос. Унда даврлар оша жуда кўп фольклор асарларининг хусусиятлари ўз аксини топган. Достон кенг қўламда халқ ҳаётини тасвирлаган ва у узоқ даврлардан бўён оғиздан-оғизга ўтиб вариант ва версияларига эга бўлган.¹

¹ Ушбу мақола қуйидаги манба асосида чоп этилмоқда: Жалолов Ғ. «Алпомиш» ва халқ эртаклари // «Алпомиш» – ўзбек халқ қаҳрамонлик эпоси. – Тошкент: Фан, 1999. – 140–147-бетлар.

Малик
МУРОДОВ
(1933–2001)



Малик Муродов 1933 йил 20 июлда Наманган вилояти Янгиқўр-гон тумани Чортоқ қишлоғида туғилган. Филология фанлари номзоди (1975). Тошкент давлат университетининг филология факультетида (1950–55), ЎзР ФА Тил ва адабиёт институти аспирантурасида (1959–61) ўқиган. Чортоқ туманидаги Фурқат номли ўрта мактабда ўқитувчилик қилган (1955–58). ЎзР ФА Тил ва адабиёт институтининг фольклор бўлимида катта илмий ходим (1961–76), Алишер Навоий номли Адабиёт музейида бўлим бошлиғи (1967–78), Тошкент давлат маданият институтида катта ўқитувчи, доцент, профессор, кафедра мудири лавозимларида ишлаган (1979–2001). «Гўрўғлининг туғилиши», «Хиламан», «Баҳром ва Гуландом», «Зевархон», «Гулрухпари», «Қоракўз ойим», «Жорхун мастон», «Нурали» каби достонларни нашрга тайёрлаган. Ўзи ёзиб олган материаллар асосида «Ой-мома аждаҳо» (1983), «Қора дев» (1984), «Ёнар дарё» (1985), «Илон пари» (1986) «Само тулпори» (1987), «Гулиқаҳқаҳ» (1988), «Олтин олма» (1989) каби эртақлар мажмуасини, «Доно Алишер» (ҳамк.), «Алломалар ибрати» (1982), «Асотирлар ва ривоятлар» (1991) каби тўпламларни чоп эттирган. «Ижод дурдоналари излаб» (1969), «Сарчашмадан томчилар» (1984), «Ҳаётбахш хаёллар» (1985), «Энос Горголы соқровициница души и чаяния народа» (1990), «Алпомишнома» (1–2-китоблар, ҳамк., 1999–2000), «Қадриятнома» (2001, ҳамк.) каби монографиялар муаллифи. 2001 йил 25 декабрда Тошкент шаҳрида вафот этган.

ЎЗБЕК ХАЛҚ ДОСТОНЛАРИДА ОБРАЗ ЯРАТИШ УСУЛЛАРИ ҲАҚИДА БАЎЗИ МУЛОҲАЗАЛАР

Ўзбек халқ достонларида, жумладан, «Гўрўғли» достонларида образ яратиш ва уни типиклаштириш усуллари ҳозирга қадар ёритилмаган. Бу масалани атрофлича ҳал қилиш традицион сюжетли достонларнинг ўзига хос қонуниятларини аниқлашга, уларнинг эстетик ва эмоционал хусусиятларини изоҳлашга ёрдам беради. Биз бу мақолада ўзбек фольклорида муҳим ўринни эгаллаган «Гўрўғли» цикл достонларида (уларнинг сони қирктадан ошади) Гўрўғли образини яратиш учун ишлатилган бадиий приём ва воситалар ҳақида баъзи бир мулоҳазаларимизни айтишга ҳаракат қиламиз.

«Гўрўғли» достонлари ижтимоий ҳаётнинг актуал масалаларини қамраб олиши, халқнинг орзу-умидларини ташиши, илгор халқчиллик ва умумбашарий ғоялари билан характерланиб қолмай, балки поэтик форма жиҳатдан ҳам юксак асарлардир. Бу достонларда, айниқса, ҳаётий ва етук образлар яратишда катта муваффақиятга эришилган.

Халқ шоирлари қаҳрамонлар образини яратишда доимий эпитет – сифатлар, портрет, сифатлаш ва истиоралар, ҳаётий конфликт, таққослаш, қаршилантириш ва гротексли муболағалар, киноя, пичинг, сўроқ ва ундовлар, оҳангдор вазнлар, такрор ва рефренлар, инверсия, метафора, анафора, метонимия, литота, турли хил параллелизм, монолог, диалог, катталаш, кичрайтириш-эркалаш суффикслари, риторик сўроқ, кўчирма, хитоб сингари образ яратиш воситалардан унумли ва ўринли фойдалана олганлар. Образ яратиш ва типиклаштиришда муҳим роль ўйнаган бадиий тасвирий воситалардан айримларини «Гўрўғли» достонлари мисолида кўриб ўтамиз.

Бошқа ўзбек достонларида бўлганидек, «Гўрўғли» достонларида ҳам образ яратишда ишлатилган тасвирий воситалардан бири доимий эпитет ва ташбихлардир.

*Шул замон Гўрўғли султон,
Оловдай бўлиб туташиб,*

*Ғайрати ғайратига етишиб,
От қўйди шердай бўлиб¹.*

Ёки: «Ана энди Гўрўғлининг ҳар кўзи шокосадай, баданидаги туклари сихдай бўлиб кетди... шердай бўлиб имраниб, булутдай кўнграниб, кўзлари ўтдай ёниб, аждарҳодай ишқириб, филдай пишқириб, кетиб бораётипти»².

Гўрўғлининг муайян кайфияти, куч-қудрати ва душманга нисбатан нафрати ўхшатишлар орқали ана шундай бўрттирилади.

Муваффақиятли чиккан ҳар бир ташбиҳ хоҳ ижобий, хоҳ салбий образни тип даражасига кўтаришда катта аҳамиятга эга бўлган:

*Гўрўғлининг тоғдай улуғ кучига,
Ҳаммаси йиғилиб офарин айтти³
Аччиги чиллада яхлаган қишдай
Норкалла келганда, чуйди қўшмишдай⁴.*

Достончилар халқ ибораларидан усталик билан фойдаланиб, Гўрўғли образига нисбатан шундай ўхшатишлар ишлатганларки, натижада у куч-қудрат ва улуғворликнинг тимсолига айланган.

*Йўлбарсдай бўб чопинди,
Айиқдай бўб бақирди.
Шердай бўлиб бек Гўрўғли,
Кел дейди, майдон қуради.*

Бу тўртликдаги ўхшатишларда бақувват, чаққон, эпчил, мустаҳкам иродали, қисқаси, хулқ-атвори ва ташқи портрети билан алоҳида ажралиб турувчи баҳодирнинг яхлит ва ҳаққоний образи яратилган.

¹ ЎЗР ФА Ўзбек тили, адабиёти ва фольклори институти Фольклор архиви. Инв. № 8.

² Эргаш Жуманбулбул ўғли. Далли. – Тошкент: Ўз ФА нашриёти, 1932, 131-бет.

³ Эргаш Жуманбулбул ўғли. Хушкелди (қўлёзма) // ЎЗР ФА Ўзбек тили, адабиёти ва фольклори институти Фольклор архиви. Инв. № 50, 188-бет.

⁴ Фозил Йўлдош ўғли. Зулфизар билан Авазхон. – Тошкент, 1942, 113-бет.

Халқ севимли қаҳрамони Гўрўғли образини типиклаштириш учун бисотида бор бўлган ўхшатишлардан энг кўп фойдаланган. Гўрўғлининг жанг майдонларидаги ҳолати, босқинчи душманга қаҳр-ғазаби шер, йўлбарс, аждар, қоплон, бўри, айик, фил, лочин, қарчигай, бургут, италғи, қузғун, шунқор, бахрин сингари ҳаётда мавжуд бўлган ҳайвон ва қушларга ўхшатилади. Лекин муҳими шундаки, қаҳрамон оддий ҳайвон ва қуш ёки табиат ҳодиса-воқеаларига таққосланмайди. Балки энг характерли ва куч-қувватда тенгсизларига ўхшатилади. Масалан, Гўрўғлининг куч-қудрати кўпроқ шер, арслон, йўлбарс ва қоплон каби энг кучли ҳайвонларга нисбатан берилса, савлати ва гавда тузилиши тоғ, қоя, адир, қирга; эпчиллиги бургут ва қарчигайга ўхшатилади. Цикл дostonларида **содда ва мураккаб** ташбиҳлар учрашини айтиб ўтиш зарур. Улар кўпинча «дай» (дек), «ча» кўшимчалари орқали ясалади.

Шунингдек, «ўхшаш», «каби», «бамисоли», «сингари», «менгзиди», «худди», «гўё», «симон», «мисли», «янглиғ» сингари ёрдамчи сўзлар орқали ҳам ўхшатилади. Мисоллар келтирамиз:

*Арқираган эрдай бўлиб,
Тогда юрган шердай бўлиб,
Аввал Гўрўғли от қўйди
Қар яғрини қирдай бўлиб¹.*

*Жамолинг менгзидим осмонда ойга,
Қошингни менгзайман эгилган ёйга.
Жасадинг менгзайман бўз қарчигайга,
Қарчигай чангаллим кимнинг ўғлисан².*

Айниқса, образни яна бўрттириш мақсадида ўхшатишлан предмет «оч», «маст» ва бошқа сифатлар билан берилиши жуда характерли бўлиб, ботирнинг энг муҳим белгиларини, етакчи хислатларини алоҳида таъкидлаб кўрсатишда, уни янада конкретлаштиришда катта роль ўйнайди.

¹ Ўзбек халқ дostonлари. II-том. – Тошкент, 1957, 433-бет.

² Фозил шоир. Балоғардон (кўлёзма) // ЎЗР ФА Ўзбек тили, адабиёти ва фольклори институти Фольклор архиви. Инв. № 14, 46-бет.

*Кўлида ханжари марднинг ялангоч,
Оч арслондай бўб савашига тушди¹.*

*Гўрўглибек гайрат қиб,
Тўп тўпига йўлбарсдай.
Маст бўб кетган шердай бўб.
Фил устидаги ҳиндини,
Тошдай қиб тўлғаб отди².*

Шундай қилиб, баҳодир шер, йўлбарс, бўри каби ҳайвонларга ўхшатишда, унинг куч ва эпчилликда бундай ҳайвонлардан устун турушлиги таъкидланади.

Гўрўглининг оғир ва мушкул аҳволи, унинг ҳаяжонлари ҳам ташбиҳлар ёрдамида янада ёрқин, янада аниқ кўрсатилган. Унинг ўзи шундай дейди:

*Гоҳ вақтларда кетдим бўтадай бўзлаб,
Кўрар кўзим, Аваз болам, бормисан³.*

Шуни алоҳида қайд этиш зарурки, ташбиҳлар тасодифан қўлланилмаган. Балки қаҳрамоннинг хислат ва ҳолатини бошқа сўз билан бериш мумкин бўлмай қолган тақдирдагина ўз ўрни билан ишлатилган. Шунинг учун ҳам, айниқса, ташбиҳлар билан типиклаштирилган образлар қалбга чуқур киради, қониқмас кайғунинг қайновчи ширин туйғуси билан уни ҳаяжонлантиради.

*Бир зўр одам майиб нордай инграниб,
«Болам!» деб ўртаниб, ўтларга ёниб,
Қоп-қорайиб чуйкаб кетган тўлғаниб
От устида йиглаб келган ким бўлди?*

Бу мисолда Гўрўғлига нисбатан ишлатилган майиб нордай ташбиҳини бошқа сўз билан алмаштириб кўринг, барибир, фарзанд доғида куйиб қорайиб кетган ота кайфиятига жуда мос бўлиб

¹ Эргаш Жуманбулбул ўғли. Далли. – Тошкент, 1942, 100-бет.

² Пўлкан. Гулнор пари (кўлёма). – 24-бет.

³ Достонлар. II том. – 453-бет.

тушган «майиб нор» ташбихининг ўрнини боса олмайди. Демак, халқ шоирлари бошқа тасвирий воситалар каби, ўхшатишларнинг ҳам куйма ва гўзал бўлиши учун ҳаракат қилганлар.

Салбий типлар характерини очиш учун ясалган ташбихлар ҳам мароқлидир. Салбий типлар характеридаги етакчи ва типик «фазилатлар» ўхшатишлар орқали шафқатсизлик билан фош этилади:

*Итдай Аҳмад элга кирибда кетар,
Қул Авазни ўхшатдим деб ҳароми,
Балки, бир хил ерда мақтаниб юрар...
Бу кучук кўптакдай ҳуриб боради
Барингни ёмонлаб койиб боради¹.*

Умуман, ички ва ташқи душманлар кўпинча кўршапалак, ит, кучук, пода, бия ва молга ўхшатилади. Бу ўхшатишлар ўз навбатида уларнинг характерига жуда мос бўлиб тушган.

Ўхшатиш приёмининг функцияси у ёки бу образнинг типиклаштиришга ёрдам бериш билан чекланиб қолмайди, балки табиат лавҳалари ва жамият ҳодисаларини ёрқинроқ чизиш учун ҳам ажойиб ўхшатишлар ясалган. Ташбихлар ёрдамида она юртнинг чўл-саҳролари, ажойиб мевазор боғлари, булоқ ва ирмоқлари, тоғу тошларининг ҳам жонли картинаси яратилган.

Халқ дostonларида образ яратиш ва типиклаштиришда гипербола ва бўрттириш усуллари дан ҳам кўп ва ўринли фойдаланилади. Чунки бутун бир халқ характеридаги умумбашарий фазилатларни бир-икки баҳодир образида бериш табиий равишда қаҳрамоннинг жисмоний ва психологик хусусиятларини муболағали ифодалаш заруриятини келтириб чиқарган. Шунинг учун ҳам бошқа приёмлар муболаға приёми билан чамбарчас боғлангандир.

Муболаға характернинг ички ва ташқи қиёфасини бўрттириб беришда, тасвирланаётган нарсалар образини ёрқинроқ кўрсатишда энг асосий приёмлардан биридир. Муболаға орқали инсон ҳиссиётининг энг нозик ўринлари ва кечинмалари атрофлича очилади. Гўрўғли образига нисбатан ишлатилган

¹ «Хушкелди» (қўлёзма). – 105–106-бетлар.

гўзал ва хилма-хил муболағалар меҳнаткаш халқда мавжуд бўлган типик хислатларни шу образ орқали умумлаштириб беришга имкон туғдирган.

Унинг халқ ва юрт манфаатларига қаратилган ҳаракати, муомаласи, юриш-туриши, ҳолати ва бошқа хусусиятлари муболағалар орқали алоҳида бўрттириб кўрсатилади:

*Шул замон Гўрўгли султон,
Оловдай бўлиб туташиб,
Ғайрати ғайратига етишиб,
Неча девни ушлаб белидан
Силтади, ҳавога отди,
Ҳамма қаради фалакка,
Осмонда кўринмай кетти¹.*

Чиройли муболағалар асосига қурилган бу мисраларда Гўрўглининг чинакам баҳодир эканлиги очилган. Гўрўглининг хис-туйғулари, мақсадлари, ғалабалари ва фожиалари ҳам муболағалар орқали тобора очила боради. Достончи Гўрўглини аудиторияга биринчи бор таништирар экан, албатта, унинг куйидаги портретини келтиради:

«Гўрўглининг зўр деб таърифи кетган, зарбаси тошдан ўтган, донғи Доғистон кетган»².

Гўрўглига берилган бу муболағали таъриф цикл достонларининг деярлик барчасида учрайди. У ҳақдаги термаларнинг бири-да эса мана бундай дейилади:

*Сатта ботир бўз бола
Юрса титрар муз, дала,
Ёвга яшин ҳам жала
Гўрўглибек зўр ботир³.*

¹ «Машрико» (қўлёзма) // ЎЗР ФА Ўзбек тили, адабиёти ва фольклори институти Фольклор архиви. Инв. № 110, 104-бет.

² Фозил Йўлдош ўғли. Балогардон (қўлёзма) // ЎЗР ФА Ўзбек тили, адабиёти ва фольклори институти Фольклор архиви. Инв. № 14, 1-бет.

³ Ўзбек фольклоридан ўқув материаллари. – Тошкент: Ўқувпеднашр, 1950, 55-бет.

Бу тўртликда баҳодирнинг яшин, жала ва музга тенглаштирилиши жуда характерлидир. Чунки халқ тушунчасида энг зўр табиат стихияси бўлган яшин ва жаланинг олдини олиб бўлмайди. Демак, Гўрўғли шундай қудратли, кучли ва даҳшатлики, уни енгиш мумкин эмас. Гўрўғли шундай муболағалаштириладики, унинг жаҳли чиқса, «чиллали қишдай муртига чаппа қайтади», «шар тебранганда эса, куймичи ерга тўрт эллик ботади». Унинг зарбига тоғлар бардош бера олмайди, дарёлар оқмай тўхтаб қолади. У ўнларча, юзларча ва ҳатто мингларча девлар, йиртқич хайвонлар билан ҳам кураша олади. Масалан, «Малика айёр» достонида у:

*Кўклам тоғни сўта билан уради
Кўклам тоғи қоқ ёрилиб боради¹.*

Гўрўғлининг минг-минглаб шер ва аждарларини сўта билан уриб, ер билан яксон этиши («Малика айёр»), осмонда ва ерда юриб, инсонга кулфатлар келтирувчи беҳисоб девлар билан курашиб, уларни забун этиши («Машриқо»), юртни вайрон, халқни қул қилиш учун бостириб кирган сон-саноксиз ёвлар ва ғайритабиий кучларни («Юнуспари», «Интизор» ва бошқа достонларда) енгиши ҳам ҳамма нарсалардан қудратли инсон эканлигини муболағалаштирилишидир. Гўрўғли образи бошқа образ ва персонажларнинг эътироф ва таърифлари орқали бўрттирилган ҳолда ҳам тингловчига етказилади:

*Душман тоб бермас отангинг ишига,
Танҳо ўзи тегар юз лак кишига.
Билдим отанг Гўрўғлидир зўравон
Ғайратидан титрайди Шаҳри зар².*

Муболагали сўз ва иборалар асосида яратилган катта-катта лавҳалар, драматик эпизодлар тингловчи диққатини шундай мафтун қилиб оладики, натижада киши тасвирланаётган инсон

¹ Ўзбек халқ достонлари. I том, 290-бет.

² «Машриқо» (қўлёзма), 62-бет.

ва нарсалар образини кўриб тургандек бўлади. Бу дostonчиларнинг энг катта ютугидир.

Қахрамоннинг қурол-аслаҳалари ҳам унинг ўзига хос эканлигини кўрсатиш мақсадида ниҳоят даражада муболағалаштирилади. Масалан, **Гўрўғлининг қиличи «илон тилли кескир исфиҳон» бўлиб, «теккан омон қолмасии» деб, «заҳарнинг суви ялатилган».** Гўрўғли уни ишга солар экан, «ўн етти газ узаяди». Бундай ҳол қахрамон куч-қудратини аниқроқ тасаввур этишга ёрдам беради.

Гўрўғли образига қайтиб шуни ҳам айтиш зарурки, унинг азаматлигини бўрттириб кўрсатиш мақсадида қаршисига қўйилган ғов ва тўсиқлар ҳам, танлаб олинган табиат тасвири (пейзаж) ҳам атайин муболағалаштирилади. У, мақсад йўлида сафарга отланар экан, осмон билан сўзлашган, йўл бермас тоғларга, қуш учса қаноти, одам юрса оёғи қуядиган чўл-биёбонларга, дамига тортар дарё ва тўқай – ботқoқларга дуч келади. Улар билан тўқнашувларда Гўрўғлининг баҳодирлик характери очила боради.

Хулоса қилиб шуни айтиш мумкинки, образ ва воқеа-ҳодисаларни типиклаштиришнинг энг зарур приёмларидан бири бўлган муболаға халқ дostonлари учун универсал приёмлардан биридир. «Гўрўғли» дostonларида типик характерлар яратишда, тасвирланаётган воқеа ва ҳодисаларни типиклаштиришда жуда кўп учрайдиган приёмлардан фақат иккитасинигина кўриб ўтдик. Қолганлари ҳақида кейинги ишларимизда батафсил тўхтаб ўтамиз. Шунга қарамай, юқорида кўриб ўтилган приём ва тасвирий воситаларни ўзи «Гўрўғли» дostonлари ҳам бошқа ромонтик ва қахрамонлик дostonлари сингари юксак санъат асари эканлигидан далолат беради.

Муаззам
МИРЗАЕВА
(1933–2009)



Муаззам Қодировна Мирзаева 1933 йил 24 декабрда Бухоро вилояти Шофиркон туманида туғилган. Тошкент давлат университетининг филология факультетида ўқиган (1953–58). ЎзР ФА Тил ва адабиёт институти Фольклор бўлимида лаборант (1961–66), кичик илмий ходим (1966–86), илмий ходим (1986–1994) вазифаларида ишлаган. «Гўрўгли» дostonларида наслий туркумлик проблемаси («Хасанхон» туркуми мисолида) мавзуида номзодлик диссертациясини ҳимоя қилган (1982). «Хасанхон» дostonини сўзбоши ва изоҳлар билан нашрга тайёрлаган (1967). Икки жилддан иборат «Ўзбек халқ мақоллари» академик нашрида (1988) иштирок этган. «Ўзбек халқ дostonларида туркумлик» (1985) номли монографияси муаллифи. 2009 йилда Тошкент шаҳрида вафот этган.

ЎЗБЕК ХАЛҚ ДОСТОНЧИЛИГИДА ТУРКУМЛИК

Халқимиз оғзаки бадий ижодида дostonлар салмоқли ўрин эгаллайди. Бу ҳол дostonларда халқ ҳаёти, ижтимоий воқелик фольклорнинг бошқа жанрларига қараганда кенгроқ ифода этилганлиги билан изоҳланади. Шунинг учун бўлса керак, ўзбек фольклоршунослигида дostonлар нисбатан кўпроқ текширилган. Кейинги йилларда олиб борилган тадқиқотлар, эълон қилинган монографик асарлар, ёқланган диссертациялар шундан

далолат беради. Бу ўринда биз В. М. Жирмунский, Ҳ. Т. Зарифов, М. Саидов, Т. Мирзаев ва бошқа олимларнинг асарларини кўзда тутамиз. Мазкур ишларда дostonларнинг вариантлари, жанр хусусиятлари, образлар талқини сингари бир қатор масалалар таҳлил қилинади. Шунга қарамай, ўзбек халқ дostonчилигида туркумлик, туркумлаштириш принциплари, туркумликнинг турлари ва шунга ўхшаш бир қатор масалалар борки, улар биринчи галда текширилиши лозим бўлган долзарб муаммолар жумласига киради. Бу масалалар ўзбек фольклоршунослигида ҳали махсус ўрганилиб, атрофлича илмий таҳлил қилинганича йўқ.

Туркум, туркумлаштириш, муайян ғоя ва воқеликка асосланган эпик сюжет асосида ҳар қайсиси ўзича мустақил ва айни вақтда бир-бирига боғлиқ бўлган бир неча асар яратиш, умуман, халқ оғзаки ижодига, хусусан, дostonчиликка хос хусусиятдир. Мана шу хусусиятни атрофлича текшириб, илмий ҳал этиш фольклоршунослигимиз учун ҳам назарий, ҳам амалий аҳамиятга эга. Чунки халқ дostonчилигида туркумлик масаласи ўша туркумга мансуб дostonларнинг ғоявий йўналиши, бадий-тасвирий воситалари, ижобий образ масаласи, шунингдек, айрим дostonлар генезиси, умуман, дostonчилик тадрижий ривожланишининг қонуниятларини очиш билан боғлиқ масалаларни илмий асосда тўғри ечишга ёрдам беради.

Биз қуйида «Гўрўгли» дostonлари мисолида дostonчиликдаги ана шу туркумлик масаласига оид баъзи фикр-мулоҳазаларни баён этмоқчимиз.

Маълумки, ўзбек халқ оғзаки ижодиётида дostonлар шунчаки оддий тарзда куйловчи шоир ёки бахшининг хоҳишига кўра туркумлаштирилмайди. Аксинча, дostonларни туркумлаштириш асосида муайян объектив ижтимоий эҳтиёж зарурияти ётади. Маълумки, кичик бир қўшиқ ёки дostonдан иборат эпик сюжет давр ходисасини, воқеликни акс эттириб авлоддан-авлодга, оғиздан-оғизга ўтади, муайян тарихий шароитга мос эпизодлар билан бойиб, мукаммаллашиб, кенгайиб боради. Халқимизнинг турли даврлардаги ҳаёти ва тушунчасини акс эттирган ўзбек «Гўрўгли» туркуми дostonлари мисолида ушбу ҳолни яққол кўрамиз. В. М. Жирмунскийнинг ёзишича, «реал тарихий воқеликка

асосланган кичик бир процесснинг бундай туркум тарзида шакллангунига қадар қарийб икки аср (XVII асрнинг бошидан XIX асрнинг иккинчи ярми) вақт ўтган. Албатта, бу воқелик илк бор лирик-драматик характердаги кичик бир қўшиқда ифодаланган бўлиши мумкин. Кейинчалик эса у кенгая бориб, эпик тарзда тасвирлангандир»¹.

Бироқ муайян ижтимоий зарурият халқ ижодининг маҳсули бўлган эпик сюжетнинг чексиз кенгайиб кетишига ҳам, айти вақтда унда тасирланиши лозим бўлган воқеаларнинг тўла очилмай, чала бўлиб қолишига ҳам йўл қўймайди. Бунда дostonчи ҳамда тингловчининг ҳолати, куйлаш ва тинглаш учун кетадиган вақт ҳам муҳим роль ўйнайди. Шу ўринда фольклорчи Я. Нальскийнинг «Бобо Юнус қўшиқлари» китобида берилган қуйидаги фикри характерлидир. «Мен Бобо Юнуснинг қўлига дутор олиб, «Гўрўғли» халқ эпосидан тингловчиларга кечқурундан то тонг отгунга қадар зўр иштиёқ билан куйлаганининг гувоҳи бўлганман... Шу каби куйлаш бир неча кунга чўзилар эди. Назаримда, қўшиқнинг охири йўқдек туюлар эди. Кунларнинг бирида Бахшидан «Гўрўғли»ни куйлаб тугатишингиз учун неча кун керак, деб сўрадим. Шунда у кеч киргандан то кун чиққунга қадар куйлаган тақдирдагина бир ойдан зиёд вақт лозим, деб жавоб берди»².

Ҳар бири 3–4 минг сатрдан 10–12 минг мисрагача шеърни ўз ичига олган 40 дан ортиқ «Гўрўғли» дostonларини бошдан охиригача бир йўла куйлаш ва тинглашни кўз олдимишга келтирайлик. Мазкур «Гўрўғли» дostonларини айрим-айрим ҳолда куйлаш ва тинглашдан бўлак илож бўлмаса керак. Мана шу объектив зарурият дostonчиликда маълум ғоя ва воқеликка асосланган муайян эпик сюжет негизида бир неча мустақил ва айти вақтда бир-бири билан узвий боғлиқ дostonларнинг яратилишини тақозо қилган. Бу ҳол, умуман халқ оғзаки ижодиётида бўлгани каби, ўзбек халқ дostonчилигида ҳам туркумликнинг вужудга келишига, дostonларни туркумлаштиришга сабаб бўлган, деб ўйлаймиз. Ана шу маънода туркумликни қуйидагича таърифлаш мумкин: сюжетлар-

¹ Народный героический эпос. М – Л., ГИХЛ, 1962, стр. 34–35.

² Нальский Я. Гафиз Бобо Юнус (в кн: «Песни Бобо Юнуса». – Сталинабад, 1950, стр. 53–54).

нинг бирор эпик сюжет заминада бир-бирига боғланиши, асосий қаҳрамонларнинг бир жой номи ёки бош қаҳрамон-шахс атрофида бирлашуви натижасида яратилган бирдан ортик дostonлар сирасига туркумлик дейилади. Чамбил, Гўрўғли шахси, Гирот мазкур туркум дostonларини туркумга бирлаштирувчи асосий факторлар ҳисобланади. Шу нуқтаи назардан М. Г. Тахмасибнинг «Кўрўғли, Гирот ва Ченлибел «Кўрўғли» эпосининг асосий таянч элементларидир»¹, деган фикрини тўла қувватлаб, бу ҳол ўзбек «Гўрўғли» дostonлари учун ҳам хосдир, дейиш жоиздир. Ўзбек «Гўрўғли» дostonларининг ҳар қайсиси алоҳида айтилишига қарамай, уларнинг ҳар бири аввалги дostonнинг давоми ёхуд Гўрўғли, Гирот, Чамбил номи билан боғлиқ бўлган яхлит эпик сюжетнинг бир бўлаги сифатида туркумликни ҳосил этган.

Ўзбек халқ оғзаки ижодида «Гўрўғли» номи билан юригиладиган туркум «Гўрўғлининг туғилиши» дostonидан бошланиб, «Жаҳонгир» дostonи билан тугалланади. Мазкур туркумга мансуб дostonлар бир вақтда яратилган деб бўлмайди, улар давр, ижтимоий тараққиёт, ҳаёт тақозоси билан муайян туркум сифатида шакллангунча бир неча аср ўтган.

Маълумки, туркумлик муайян дostonда илгари сурилган гоя ва мазмунни янада ривожлантиришга имкон беради. Шунинг учун ҳам Гўрўғлининг туғилиши, болалиги, йигитлиги ҳақида алоҳида-алоҳида дostonлар яратилган. Гўрўғлининг туғилиши, болалиги, йигитлиги вақт нуқтаи назаридан бир пайтда бўлиши мумкин эмас. Аммо Гўрўғлининг ҳаёт дақиқалари бир-бирига боғлиқ бўлганидан уларнинг бирортасини тушириб қолдириш, биринчидан мантиққа ҳам, тараққиёт жараёнига ҳам тўғри келмайди, иккинчидан, халқ қаҳрамонининг ҳаёт фаолияти, тўла-тўқис бўлиши учун қизиққан тингловчи унинг чала қолдирилишини истамайди. Бу халқ қаҳрамони таржимаи ҳолининг тўла тасвирланишини тақозо қилади. Мана шу тарзда туркумлаштириш биографик туркумлик касб этади. Қаҳрамоннинг туғилиши, болалиги ва дастлабки жасорати, баҳодирлик сафарлари, уйланиши каби биографиясининг муҳим босқичларига оид дostonларга биогра-

¹ Тахмасиб М. Г. Азербайджанские народные дастаны. АДД. – Баку, 1965, с. 43.

фик туркумлик дейилади. Гўрўгли хақидаги дostonлар бунга мисол бўла олади («Гўрўглининг туғилиши», «Гўрўглининг болалиги», «Юнус пари», «Мисқол пари», «Гулнор пари», «Ҳасанхон», «Авазхоннинг олиб келиниши» ва бошқа дostonлар). Туркумлаштиришнинг иккинчи тури – географик туркумликдир. У ўзбек халқ дostonчилигида унча ривожланмаган бўлса-да, «Гўрўгли» туркуми дostonларида географик туркумлик намуналари мавжуд («Замонбек» дostonи – Пўлкан шоир варианты). Бу дoston мазмун эътибори билан «Гўрўгли» туркуми дostonларини туркумликка бирлаштириб турувчи асосий омиллар – Гўрўгли образи билан ҳам, Ғирот билан ҳам боғланмайди. Бироқ дostonда қуйланган воқеа-ҳодисалар Чамбил эли ҳамда туркман юрти фониди рўй беради. «Замонбек» дostonи «Гўрўгли» туркуми дostonларига фақат мана шу Чамбил эли – жой номи орқали боғланади. Бинобарин, муайян ҳудуд ёки жой номи билан бир-бирига боғланувчи дostonларга географик туркумлик деб аталади. Ўзбек халқ дostonчилигида «Замонбек», «Хиломон», «Бердиёр оталиқ» каби дostonлар бунга мисол бўла олади.

Ўзбек халқ дostonчилигида туркумликнинг энг кенг тарқалган тури наслий туркумликдир. Бу ҳолни биз Ҳасанхон ва Авазхон, уларнинг фарзандлари ва иккинчи, учинчи авлод ҳақида алоҳида-алоҳида дostonларнинг яратилишида ва бу дostonларнинг, умуман, «Гўрўгли» ҳақидаги дostonларга хос хусусиятларини сақлаб қолгани ҳолда уларни мантиқан катта туркумга бирлаштирилишида кўраимиз. Бу тарзда янги дostonлар яратиш ўзбек халқ дostonчилигининг муҳим хусусиятидир. Халқ дostonчилигидаги туркумлаштиришнинг бундай хили наслий (генеалогик) туркум номи билан юритилади. «Гўрўгли» ва унинг тутинган фарзандлари Авазхон ҳамда Ҳасанхон, неваралари Нурали билан Равшан, эвараси Жаҳонгирлар... ҳақидаги дostonлар ана шу наслий туркумликнинг энг ажойиб намуналаридир»¹.

Наслий туркумлик нуктаи назаридан «Гўрўгли» дostonларига ёндашилса, унинг икки йўналишда эканлиги кўзга ташланади. Бир томондан, Гўрўгли – Авазхон – Нурали – Жаҳонгир, иккинчи томондан, Гўрўгли – Ҳасанхон – Равшан йўналиши бор. Мана

¹ Жирмунский В. М. Тюркский героический эпос. – Л., 1974, с. 637.

шу икки йўналиш ўзбек халқ достончилигида наслий туркумликини вужудга келтирган¹. Бу ўринда шунини эътиборга олиш зарурки, «Гўрўғли» туркуми достонлари наслий туркумлик нуқтаи назаридан қуйидаги формага эга.



Кўриниб турибдики, наслий туркум достонлари биографик туркум достонларидан вужудга келади. Масалан, Гўрўғли ҳақидаги достонлардаги айрим мотивлар асосида Авазхон, Ҳасанхон тўғрисидаги, Ҳасанхон билан Авазхонга бағишланган достонлардаги баъзи мотивлар асосида эса, Равшан, Нурали, шунингдек, Жаҳонгир ҳақидаги достонлар яратилган.

Туркумнинг юқорида кўрсатилган турлари ўзаро узвий боғлиқдир. Чунончи, бефарзандликдан руҳий азобланган Гўрўғли Ваянган деган юртдан темирчининг ўғли (Пўлкан шоир варианты бўйича Темирхон подшонинг ўғли) Ҳасанхонни Чамбил юртига олиб келиб ўзига ўғил қилиб олади, уни тарбиялайди, баҳодир йигит қилиб етиштиради. Бу ҳодисани, аввало, Гўрўғли биографиясига тааллуқли деб қараш керак. Бу жиҳатдан Ҳасанхон ҳақидаги достон Гўрўғлининг кичик биографик туркумлигига янги асар бўлиб қўшилиши билан наслий туркумликини ҳам юзага келтиради. Наслий туркумлаштириш, яъни насл принципи бўйича достон яратиш ўз навбатида биографик туркумни давом

¹ Жирмунский В. М., Зарифов Х. Т. Узбекский народный героический эпос. – М., 1947, с. 225–265.

эттириш имконини беради¹. Биографик туркумлик билан наслий туркумлик ўртасида узвий боғланиш бор. Чунончи, «Ҳасанхон» достони наслий туркумликнинг намунаси бўлиш билан бирга айни вақтда «Гўрўғли» биографик туркуми дostonлари қаторига ҳам киради, чунки ундаги айрим муҳим маълумотлар бевосита Гўрўғлининг биографиясини тўлдиради.

Ўзбек халқ дostonчилигида наслий туркумликни ташкил этувчи анча пухта ва тўлақонли дostonларнинг мавжудлиги оғзаки ижодиётимизда эпос – дoston жанрининг тараққий этганлигидан ҳамда юксак даражага кўтарилганлигидан далолат беради.²

¹ Жирмунский В. М. Тюркский героический эпос. – Л., 1974, стр. 92.

² Ушбу мақола куйидаги манба асосида чоп этилмоқда: Мирзаева М. Ўзбек халқ дostonчилигида туркумлик // Ўзбек тили ва адабиёти. – Тошкент, 1977. – 4-сон. – 80–83-бетлар.

Сиддиқа
ШОДИЕВА
(1936–1993)



Шодиева Сиддиқа Файзиевна 1936 йил 1 мартда Бухоро шаҳрида тугилган. Ўзбек давлат университети (ҳозирги СамДУ)нинг филология факультетини битирган. Бухоро давлат педагогика институтининг Ўзбек адабиёти кафедрасида ўқитувчи бўлиб ишлаган (1959–60). ЎзР ФА Алишер Навоий номидаги Тил ва адабиёт институти аспирантурасида ўқиган (1961–64). Тошкент давлат чет тиллар институтида ўқитувчи, катта ўқитувчи, доцент ҳамда кафедра мудираси вазифаларида ишлаган (1965–85). «Соҳибқирон» достонининг гоаявий-бадий хусусиятлари (эпоснинг турли версияларини қийсий ўрганиш тажрибаси) мавзуда номзодлик диссертациясини ҳимоя қилган (1968). «Ислоҳ шоир Назар ўғли. «Соҳибқирон» (1964), «Умир Сафар ўғли. «Ойпарча» (1965) каби китобларни нашр эттирган. Унинг ўзбек халқ достонларининг гоаявий-бадий хусусиятлари, адабиёт ва фольклор, фольклор жанрлари ва халқ ижоди асарларида вариантлик масалаларига доир «Соҳибқирон достонининг вариантлари ҳақида» (1964), «Кунларим» асари ҳақида (1973), «Соҳибқирон» достони ва унинг вариантлари» (1976), «Ўзбек фольклорини ареал тадқиқ этишининг баъзи масалалари» (1985) каби мақолалари чоп этилган. 1993 йилда Тошкент шаҳрида вафот этган.

«СОҲИБҚИРОН» ДОСТОНИ ВА УНИНГ ВАРИАНТЛАРИ

Ислом шоир репертуаридаги энг яхши эпик асарлардан бири «Соҳибқирон» достонидир¹. Бу сюжет «Қиронхон», «Соҳибқирон ва Соҳибжамол», «Ойпарча», «Одилхон», «Қорақўзойим», «Дурапшо», «Чорёр», «Шаръяр», «Зорлиқ билан Мунглик» номларида достон ва эртак шаклида ўзбек, козоқ ва қорақалпоқ халқлари орасида кенг тарқалган бўлиб, уларнинг бир-бирига ўхшашлиги бу халқларнинг узоқ ўтмиш ҳаётида рўй берган муштарак воқеа ва ҳодисалар билан изоҳланади. Бу достонлар асрлар давомида авлоддан-авлодга мерос бўлиб қолганлиги туфайли буни куйлаган ҳар бир шоир давр шароитига хос ҳолатларни қолдиришга ҳаракат қилиб, давр, замон, одамлар завқини ҳисобга олиб, маълум даражада ўз ҳиссасини ҳам қўша борган.

«Соҳибқирон» достонининг мундарижасини золим шохлар, хонлар замонида меҳнатқаш халқнинг бошига тушган оғир кулфат ва машаққатлари, эксплуатацияга асосланган тузумдаги адолатсизлик ташкил этади. Ноҳақ тухмат билан маломатга йўлиққан она ва болаларнинг жудоликлари, уларнинг бу йўлда тортган азоблари, бир-бирларига интизорлиги, аянчли аҳволлари, воқеага алоқадор бўлган образларнинг ўзаро муносабатлари ниҳоят даражада таъсирли ифодаланади. Достоннинг ҳамма ўзбекча вариантларида асосий масала қилиб энг таъсирчан ва ҳаётий воқеа — она ва бола образи қўйилади. Улар орқали феодал муносабатлар, очкўзлик, бойлик орттириш, хусусий мулкчилик ва шу шароитда аҳолининг оғир қисмати, хон ва унинг атрофидагиларнинг разил ҳагти-ҳаракатлари фош этилади. Дин йўл қўйиб ва тасдиқлаб берган эркислик, кўп хотин олиш, кундошлик можаролари, адоват ва кўра олмаслик натижасида юз берган воқеаларнинг гуноҳсиз гўдакларни йўқ қилишгача олиб боргани, мазлумларнинг оғир кўргуликлари ҳам айтувчини, ҳам эшитувчини қаттиқ ҳаяжонга

¹ Достонни шоир оғзидан С. Аскарров ёзиб олган. Қаранг: «Соҳибқирон», нашрга тайёрловчи С. Шодиева. — Тошкент, 1964. Мисоллар шу китобдан олинади.

солади. Бу ҳол уларда эзувчиларга нисбатан чексиз қаҳр-ғазаб ва нафрат кўзғатади. Оқибатда ёвузлик устидан эзгулик ғалаба қилади, тухматдан ажралиб, жафо тортганлар бир-бири билан топишади.

Достоннинг ўзбек, қозоқ, қорақалпоқ версиялари ва уларнинг вариантлари бир-бирига умуман ўхшаш бўлса-да, деталларнинг ишланиши, бадиий тексти ва ғоялари жиҳатидан маълум даражада фарқ ҳам қилади. Қадимий илдизи бир бўлган бу сюжетнинг турли элатлар, қабилалар, халқлар ўртасига тушиб қолиши натижасида ўша халқ ёки этник гурӯҳга хос эпик аъёналар бўйича ривожлана борган. Мазкур сюжетнинг дастлабки яратувчиси ким бўлишидан қатъи назар, ҳар бир халқ унда ўз хусусиятларини, ўз интилишлари ва қарашларини этник ва миллий тушунчалари доирасида ифодалаб, ўз улуши ва ҳиссасини қўша борган. Бу ҳол генетик асоси бир бўлган юқоридаги асарлар ўртасида катта-катта айирмаларни фарқларни юзага келтирган. Достоннинг ўзбек, қозоқ ва қорақалпоқ версияларининг юзага келиши ва тарқалиши ҳам шулар билан белгиланади.

Ҳажман кенглиги деталларнинг атрофлича ишланиши, бадиий камолоти билан «Соҳибқирон» достонининг ўзбек версияси бошқа версиялардан устун туради. Бу версиянинг барча вариантларини ўрганиш шуни кўрсатадики, мазкур достон ўзбеклар ўртасида икки версияда тарқалган ва иккаласи ҳам баббаравар жонли оғзаки традицияда яшаб келган. Бундан бу версияларнинг бири илгари, иккинчиси кейин юзага келган, деган маъно чиқмаслиги керак. Умуман, ўзбек халқининг тарихий тараққиёти бир хил бўлмаганидек, бу асарлар ҳам бир халқ ичидаги турли этник гурӯҳлар орасида турлича ривожлана борган. Ҳар бир уруғнинг ўзидаги ҳамма эътироф қилган қадимий эпик аъёналар доирасидан чиқиб кетмасликка уриниши уларнинг эпосида ўз изини қолдирган. Натижада бир асарнинг ўшаларга хос версияси бошқа қўшни версиялар билан ёнма-ён жонли оғзаки традицияда яшай берган, ҳар бирининг ўз вариантлари юзага кела берган.

Бир неча хотини бўлган фарзандсиз кекса ҳукмдорнинг оҳ-зорлари, фарзанд кўриш ниятида подачининг қизига уй-

ланиши, ўғай оналар тухмати билан бегуноҳ эгизакларнинг чакалоқлигидаёқ она бағридан улоқтирилиши, уларнинг маълум сабаблар билан тирик қолиши ва улғайиши, ота-оналари билан дийдор кўришиши дostonнинг ўзбек версияларидан бирининг асосий сюжет ҳалқалари ҳисобланади. Бу версия уч вариантда, яъни ўзбек бахшилари Ислom Назар ўғли, Умир Сафар ўғли ва Зоҳир Кўчқор ўғлидан ёзиб олинган. Булар орасида Ислom Назар ўғли варианты анча мукамал ва бадийий пишиқдир. Унда социал мотивлар янада ўткирлаштирилган. Дostonда Бўтакўзнинг ҳимоячиси сифатида Ойтўра образининг ёрқин ва жозибали ишланиши Ислom шоир вариантининг ғоявий мазмунини теранлаштириб, бадийий жиҳатдан янада юксак даражага кўтарган. Бу образ Ислom шоир вариантининг муҳим янгилигидир. Дostonчи бу образ орқали тухмат ва иғволар, адолатсизлик ва ҳақсизликларга тўлган замонга нисбатаи исён кўтаради. Ойтўра, Қинғир подачи ва бошқалар мазкур вариантда тенгсизлик дунёсини ўзларига хос равишда фош этадилар. Бу ҳол халқнинг ижтимоий қарашларини ўрганишда муҳим аҳамиятга эгадир.

Қашқадарёлик Умир шоир варианты ҳам дostonнинг яхши нусхаларидан биридир. Асар дostonчининг традицион текстга ижодий муносабатда бўлганлиги билан ажралиб туради. Бу вариантнинг муҳим янгилиги Тўқсон бобо образининг атрофлича ишланишидир. Бошқа вариантларда эпизодик ҳолда кўринган бу образ (масалан, Ислom шоир вариантыда Қамбар бобо) Умир шоирда деярли бутун дoston давомида ҳаракат қилади. Бошқа вариантларда ўзининг шахсий манфаатлари учунгина адашганларга «ёрдам» қўлини чўзган бу ҳол Умир шоирда ижобий образ даражасигача кўтарилган. Демак, Умир шоир варианты айрим образларни ижодий ишлаш билан характерланади¹.

Дostonнинг Зоҳир шоир варианты эса бадийий жиҳатдан анча бўш, эпик традицияга қатъий риоя қилинмайди. Бахши ўзича янгиликлар киритмоқчи бўлиб, баъзан қарама-қаршилиқларга ҳам йўл қўяди. Бироқ бу вариант ҳам дostonни қиёсий ўрганиш учун муайян аҳамиятга эга.

¹ Дoston нашр этилган. Қаранг: «Ойпарча», нашрга тайёрловчи С. Шодиева. – Тошкент, 1965.

«Соҳибқирон» достонининг бошқа бир группа вариантлари ҳам мавжудки, улар юқоридаги вариантлардан принципиал равишда фарқ қилади ва улар ўзаро алоҳида бир версияни ташкил этади. Ҳукмдорнинг фарзандсизлиги, подачи қизига уйланиши, ўгай оналар тухмати билан чақалоқларнинг чўлу биёбонларга улоқтирилиши, уларнинг улғайиши, Соҳибқироннинг ўзга мамлакатларга бир неча бор сафари, шунингдек, Соҳибжамолнинг бегона юртда қийинчиликларга тушиб қолган акасини қутқазиб учун қилган сафари ва ниҳоят, жудоликда улғайган фарзандларнинг ота-оналари билан танишишлари бу версиянинг асосий сюжет чизиқларидир. Демак, бу версия эгизакларнинг улғайиш жараёни, улар фаолиятини кенг ва атрофлича тасвирлаш билан юқорида тилга олинган версиядан фарқ қилади. Бу версиянинг вариантлари Муҳаммадқул Жонмурод ўғли Пўлкан, Саидмурод Паноҳ ўғли¹, Ёрлақаб Бекназар ўғли, Мурод Отабой ўғли, Раҳматулла Юсуф ўғли, Матназар Жаббор ўғли² каби ўзбек бахшиларидан ёзиб олинган. Шунингдек, Хоразм халфалари кўлида унинг бир неча кўлёма нусхалари ҳам мавжуд.

Бу версия эгизакларнинг қахрамонлик фаолиятини атрофлича ишлаш билан ажралиб туради ва шу жиҳатдан қозоқ ҳамда қорақалпоқ версияларига яқин туради. Фантастик эртақларга хос хусусиятларга ўта мойиллик, парилар ва уларнинг аждар, қуш ва аёл сингари турли-туман қиёфаларга кира олишлари, ҳатто керак бўлганда инсон ҳам ўз қиёфасини ўзгартириши, ваҳимали аждарлар, сеҳрли қушлар билан тўқнашув, асар воқеаларининг ғалати ва сирли жойларда кечиши каби ҳолатлар бу версиянинг характерли белгилари сифатида қаралмоғи керак. Бу жиҳатлари билан қорақалпоқ ва қозоқ версияларига яқин туради.

Шундай қилиб, дoston версия ва вариантларида, бир томондан, хусусий мулкка асосланган тузумдаги адолатсизлик, унда меҳнатқаш халқнинг тортган жафоси, иккинчи томондан, ҳар

¹ Бу вариант нашр этилган. Қаранг: «Одилхон» нашрга тайёрловчи Т. Мирзаев. – Тошкент, 1972.

² Бу вариант ҳам нашр этилган. Қаранг: «Қорақўзойим», нашрга тайёрловчилар М. Муродов ва Н. Сабуров. – Тошкент, 1967.

қандай азоб ва уқубатларда ҳам захматкаш элнинг ёруғликка интилиши, уларнинг доимо эзгу ният ва яхшилиқни ўйлаши маҳорат билан тасвирланган. Ижобий қахрамонларнинг ўз мурод-максадига етишишини тасвирлаш орқали ҳам бу идеал янада тасдиқланади. Бу умумий йўналиш барча версия ва вариантлар учун бир бўлса-да, ҳар бир версияда дostonнинг атилиши ва қахрамонларнинг исмлари, географик ўринларнинг номланиши ҳар хил, айрим эпизод ва деталлар эса турличадир. Шунингдек, дostonнинг бадиий тексти ҳар бир вариантда ўзгача намоён бўлган.

«Соҳибқирон» дostonининг версия ва вариантлари шуни кўрсатадики, ўғай оналар тухмати ва хатти-ҳаракати билан фарзандсиз ҳукмдорнинг кексалигида кўрган зурриётларининг чакалоқлигидаёқ адаштирилиши ва у билан боғлиқ турли-туман ички ва ташқи коллизияларни ўз ичига олган бу сюжет жуда кенг тарқалган. «Бундай сюжет феодализм шароитида ўзининг реал заминига эга эдики, бу нарса унинг жуда кенг тарқалишига, бир қанча тиллар ва элатларда турлича мазмун ва формаларда намоён бўлишига сабаб бўлган»¹, Ниҳоятда халқчиллик касб этган дoston воқеалари ярим реалистик, ярим фантастик характерга эга. Фольклорист Т. Мирзаевнинг ёзишича, «Фарзандсизлик туфайли чекилган оҳ-зорлар, кундошларнинг мол-дунё учун ҳар қандай ярамасликлардан қайтмасликлари, ҳатто ўзларининг ғараз ниятларини амалга ошириш учун бегуноҳ гўдақларни ўлдиришга ҳам тайёр турганликлари, ҳукмдорларнинг адолатсиз ҳукми, Бўтақўзнинг зиндонда тортган азоблари қанчалик реал бўёқларда кўрсатилган бўлса, чўлга улоқтирилган эгизаклар – Қиронхон ва Қорасочларнинг тақдири, саргузаштлари, Қиронхоннинг ўзга юртларга қилган сафарлари (гарчи бу сафарларнинг кўзгатувчиси реал асосга эга бўлса-да) шунчалик фантастик қобикда, фантастик эртақларга хос тасвирда берилган. Бу нарса мазкур дostonда эртақ мотивлари анча устун бўлганлиги билан изоҳланади»².

¹ Мирзаев Т. Сўз боши ўрнида // «Одилхон». Дostonлар, термалар. – Тошкент, 1972, 6-бет.

² Ўша ерда, 7-бет.

«Соҳибқирон» достони учун характерли бўлган мотивлардан бири фарзандсизликдир. Дунё халқлари оғзаки ижодиётида, хусусан, Шарқ халқлари бадий ижодида кенг тарқалган бу мотив бу ерда ўзига хос равишда оригинал кўриниш берган. Ҳамма вариантларда ҳам шоҳларнинг фарзандсизликдан қайғуришларининг асосий сабаби тожу тахт ва молу дунёга бошқаларнинг эга бўлишидан кўркишларидир. Ислом шоир вариантида айтилишича, Октошнинг подшоси Одилхон олтмиш уч ёшига қадар фарзанд кўрмаган, аммо унинг давлати, молу дунёси эса жуда кўп:

*Фарзандлар кишининг меҳри гиёси,
Бефарзанднинг сабил йилқи, туяси.
Ҳасрат била мен оламдан ўтганда,
Ким бўлади шунча молнинг эгаси?*

Бу мисралардан кўринадики, шоҳ, аввало, ўзининг мол-дунёсини кимга мерос қолдиришнигина ўйлайди. Шу билан бирга, бу парчада фарзандли киши ҳаётининг шод-хуррамлик билан, лаззатли ўтиши, бефарзанд киши эса дунёда из қолдирмай ҳасрат билан кетишидан иборат аччиқ ҳақиқат ифодаланади.

Демак, «Соҳибқирон» достонида шоҳнинг фарзанд учун қайғуриши шахсий манфаатлар доирасида бўлиб, феодализм шароитида яратилган эпос учун бундай ҳолнинг бўлиши қонуний, реал ва воқеликка батамом мосдир.

Шоҳнинг фарзанд талабида овга чиқиши ва уч қизнинг суҳбати устидан келиб қолиши барча версия ва вариантларда мавжуд. Фарзандсизлиги туфайли қаттиқ қайғу ва изтиробда қолган шоҳнинг овга чиқиши ва бунда кутилмаган ҳодисаларга дуч келиши (бўғоз ёки чўлоқ жондорга йўлиқиши, дунёни кезиб юрувчи қаландарга учраши ва шулар ёрдамида сеҳрли ғорлар, қандайдир қадамжоларга бориб ўз муродини топиши) каби ҳолатлар, умуман, эпоснинг қадимий элементларидан бўлиб, бўлғуси қаҳрамонларнинг ажойиб ҳолатда тугилишлари мотиви билаи маҳкам боғлангандир. «Соҳибқирон» достонида бу ҳол ўзаро суҳбат қилиб турган уч қиздан кичигининг яхши ният қилиши мисолида ифодаланган.

«Соҳибкирон» достонининг версия ва вариантларида кундошлик конфликти қизиқарли эпизод ва деталлар орқали очила боради. Ислон шоир вариантыда Одилхоннинг уч хотини ўзаро маслаҳатлашиб мастонни олтин билан кўлга олиш режасини тузадилар. Достонда кундошлар ўртасидаги диалогларда, гап-сўзларда, хатти-ҳаракатларда уларнинг характери батамом очилади. Кундошларнинг ёвуз ниятларидан уларнинг характерида ёвузлик кайфияти борлиги беандишалик билан масалани узил-кесил ҳал қилишданоқ, мастон кампирни пул, олтинга сотиб олиб, шу орқали Бўтакўзнинг туғиладиган болаларини йўқ қилишни қатъий қилиб қўйишлариданоқ билиб олинади. Кундошлар ҳийланайранглардан умумий ниятда фойдаланиб бирлашсалар-да, уларнинг ҳар қайсисининг достонда индивидуал сифатлари мавжуд.

Достонда кундошлик конфликти жуда таъсирчан ифодаланган. Айниқса, шоҳ хотинларининг мансабпарастликлари, молдунёга қизиқишлари ва меҳнаткаш табақа вакилларига паст назар билан қарашлари очиб ташланади. Феодализмнинг жирканч қонунлари расмийлаштирган кўп хотинлилик ва кундошлик балоси хотин-қизлар хўрланишининг ёрқин кўриниши эди. Достонда гарчи жуда содда шаклда бўлса-да, ана шу хўрланишга қарши исён кўтарилади.

Достоннинг барча версия ва вариантларида чўлга улоқтирилган болаларни кийик эмизиб, вояга етказди. Онасиз қолган чақалоқларни кийик ёки бошқа бир жондорнинг эмизиб катта қилиши эртақ ва эпосдаги жуда қадимий мотивлардандир. Жабрдийда она ва болаларнинг эсон-омон қолишига гойиб эранлар, қирқ чилтан сабабчи қилиб тасвирланади. Достонда булар кўпинча кўк кийинган ёки малла тўнли чол бўлиб, энг зарур пайтда ёрдамга келиб, йўл кўрсатиб, мадад беради. Бу жуда қадимий мифологик тушунчалардан келиб чиққан бўлиб, ҳозиргача бу нарса чўл эгаси, ғариблар, мушкулга қолганлар ҳомийси сифатида эпик асарларда гавдаланадилар. Достон вариантларида қуйланишича, чўлга ташланган болалар бир-бирининг билагини сўриб ётган пайтда уларни эмизиш учун кийикни чўл эгаси Хизр бошлаб олиб келади. Айни пайтда кийик ҳам ўз қуралайларидан ажралган, қаттиқ алам, изтиробда қолган

бўлади ва дархол ҳар икки чақалокни ўз болаларидай бағрига босади. Чол кийикка шундай дейди:

*Ҳеч ким билмас юрагингда ўтингни,
Эшитмайди сенинг қилган додингни,
Раво кўргин бер уларга сутингни,
Бор, эмизгин у икки фарзандингни.*

Бу билан чўл ҳомийси бўлган чол инсонга ҳам, ҳайвонга ҳам мадад берувчи, ҳар кимнинг ҳол-аҳволидан хабардор ва мададкор сифатида гаудаланади. Кийик болаларга меҳрибончилик қилади:

*Айрилиқ савдоси тушди бошимга,
Томоша қил кўздан оққан ёшимга.
Сен онангдан, мен боламдан айрилдим,
Оёқ билан торта берди тўшина.*

Шу тарзда кийик болаларни эмизишни одат қилади, кийик ва болалар бирга яшай бошлайдилар. Бу ҳолат халқнинг оғзаки ижодида кенг тарқалган. Одамзод боласининг ҳайвонлар ўртасида яшаганлиги эртақларда кўп учрайди. Бундай ҳолатлар маълум маънода ўзининг реал асосига ҳам эга. Лекин дostonда болаларни кийик эмизиши ўзининг қадимий изларига эга бўлган поэтик мотив бўлиб, бу билан дostonчилар ҳар қандай гуноҳсизни ҳатто бутун табиат, мавжудот ҳам қўриқлайди, деган ғояни ўтказганлар.

Ўзбек версиясида кийик улғайтирган болаларнинг келгуси ҳаёти ҳам ўзига хос равишда тасвирланган. Улар ўзлари учун Хизр томонидан пайдо қилинган боғда ёки тоғ камарида катта бўладилар.

Бўтакўзнинг жазоланиши ва саргузашти тасвири дostonнинг энг таъсирчан эпизодларидан биридир. Гуноҳсизнинг фарёди дostonчи томонидан жуда таъсирли мисраларда ифодаланади. Айниқса, Бўтакўзнинг чоҳ олдидаги фарёди ғоятда таъсирлидир:

*Мен кўрдим, кўрмасин ўзга муштирап,
Ҳеч киши бўлмасин бу гамга дучор,*

*Кўрмайманми энди боламдан дийдор,
Чорраҳада бўлди менга бу мозор.*

Достонда Бўтакўзнинг ҳаёти оркали, бир томондан, халқнинг ўша даврда яшаётган турмушдан қаттиқ норозилиги акс эттирилса, иккинчи томондан, золимлар зулмини ўз қисматидан деб билган, тақдирга ишонган меҳнаткаш халқ кўз ўнгимизда гавдаланади. Достончининг ўша давр тузумига нисбатан норозилиги асарни куйлашидан англашилади. Шу билан бирга, золим ва мазлумлар замонида халқ руҳининг адолат ва ҳақиқат томонга талпингани ўзига хос равишда тасвирланган. Меҳнаткаш халқнинг феодал-сарой тузумига нисбатан нафратланиб, туҳмат гирдобиди қолган Бўтакўзга нисбатан қуруқ ачинишигина эмас, балки тобе синф вакиллариининг бундай зулмга, ҳақсизлик, адолатсизликка қарши чексиз ғазаб-нафратлари чоҳга ташлаш пайти манзарасида, айниқса, алоҳида мунг ва исён оҳангида ифодаланади. Меҳнаткаш халқ вакили Ойғуранинг: «Ташламагин, золим, кўрсин онаси!» каби ғазабли хитоби ҳукмрон синф вакиллари ва уларнинг раҳм-шафқат билмаган ҳиссиз, қалбсиз амалдорларига нисбатан оддий халқнинг чексиз нафрати ифодасидадир.

Бу ўринда оналик меҳр-шафқати, оналарнинг меҳрибонлиги жуда ҳаётий, таъсирли ифодаланади. Она қизи тортаётган кўргуликларнинг барини кундошларидан кўради. Муштипар она жигарбандининг ноҳақ жазоланишини кўриб шоҳ салтанатидан ўз кулбасининг минг бор яхши эканини англайди. Бу меҳнат билан камбағалликда кун кўрувчи барча захматкашларнинг овози эди:

*Яхши эди подшолик салтанатдан,
У кулбамда сени ўйнаб юрганинг,
Шу бўлдимди подшоликда кўрганинг,
Гашти ўксинасан, азобда танинг.*

Меҳнаткаш халқнинг ўз меҳнати билан кун кечириши, таъмасиз, ҳасадсиз тирикчилик билан шуғулланиши инсонни, ҳаётни кадрлашга ўргатиб қўйган. Уларнинг қалб, виждонлари

меҳнатда тамал топгани учун зулм, зўравонликка асосланган, таъна, туҳматлар уяси бўлган шоҳлик ва бойликдан кўра, соф ва самимиятли, ҳашаматсиз турмушни минг марта афзал кўради. Достончи ҳаётни жуда яхши билгани учун ҳам ўзбекларнинг ўлим муносабати билан қиладиган йиғи ва расм-русумларини бу эпизод тасвирига олиб кириб, асарнинг таъсир кучини, ҳаётийлигини оширган.

Достонда болалар ҳаётини тасвирлаш орқали халқдаги келажакка ишонч, адолат ва ҳақиқатнинг, албатта, юзага чиқишига умид ўз ифодасини топган. Болаларни чўл эгаси олмали боғда катта қилади. Чўл эгаси ҳақидаги тасаввур ниҳоятда чегараланган бўлгани учун у фақат йўл кўрсатувчи, назорат қилувчидир, холос. Шуниси характерлики, Соҳибқирон мард, жасоратли, Соҳибжамол хушёр, билимдон, тез таъсирланадиган ва юксак фаросат эгаси сифатида гавдаланади. Демак, достончилар болаларнинг вояга етиши процессидаги воқеаларни тасвирлаш орқали шу билан боғлиқ равишда бутун бир муҳитни, ўша давр ҳаётини кўрсата билган.

Достонда қўйиладиган масаланинг ечилиши воқеанинг характеристикасига қараб, қаҳрамонларнинг бир-бири билан учрашуви, хуллас, бир-бирини топишуви билан ҳал этилади. Халқ тушунчасидаги ёвузлик устидан эзгулик, ҳақсизлик устидан адолат енгиб чиқишига ишонч мавжудлиги натижасида достондаги ижобий қаҳрамон кўп қийинчиликларни матонат билан енгиб, мурод-мақсадига етади. Салбий қаҳрамонлар жазоланади. Ота, она ва болаларнинг бир-бирлари билан топишишлари тасвирида вариантларда умумийлик ва хусусийлик кўзга ташланади. Бунда фикрни баён этишда, воқеани тасвирлашда ички кечинмаларни ифодалашда достончининг шахсий тажрибаси муҳим роль ўйнайди. Шунинг учун ҳам қаҳрамон танлашни ҳар бир достончининг эстетик принциплари, ҳаёт тажрибаси, ўзига хос фантазияси белгилайди.

Ислом шоир варианты ечимида Ойтўра образи ўзининг олижаноб ҳаракатлари билан муҳим роль ўйнайди. Бўтакўзни озод қилиш учун эшон, сипоҳилар чоҳ бошига келадилар. Буларни итлар талайди. Сипоҳилар чоҳга кирмоқчи бўлганда,

Эшон номаҳрамлар кирмасин, деб туради. Мутлако зарурияти бўлмаган бу ўринда эшоннинг ноўрин гаплари келтирилиб, бу билан унинг жирканч афт-башараси очилади. Ойтўра Бўтакўзнинг кийимларини олиб келиш учун шоҳнинг хотинлари олди-га борганда улар уни уришиб-юлишиб, ҳеч нарса ҳам беришмайди. Бу ўринда кундошларнинг афт-ангори маҳорат билан очилади:

*Доим юрдинг Бўтакўзга бўлишиб,
«Сиз» нега «келдингиз»¹ бунга эргашиб.
Келган йўлдан кета беринг, Ойтўра,
Нима бўлар, подачининг қизи-да!*

Бўтакўзнинг ота-онаси, опалари ҳам етиб келади. Адолатсизлик ва ноҳақликдан пичоқ бориб суягига тақалган бу одамлар шоҳ ва унинг амалдорларидан кўркиб турмайди. Шу тарзда санъаткорона ва реал тасвирланган гурбатзадаларнинг топишиши ҳаммага тушунарли тил билан, ёрқин образлар орқали гавдалантирилган, шеърый мисралар жуда ҳам таъсирли тузилган.

«Соҳибкирон» достонининг сюжет состави ва асосий мотивларининг таҳлили шуни кўрсатадики, унинг асослари халқ эртақларига бориб тақалади. Достон мотивлари бир-бири билан органик равишда боғланган бўлиб, ундаги фантастик ҳолатларни – жодугар-мастонларнинг хатти-ҳаракатларини, сеҳрли ғорлар ҳамда саройларни, парилар ва уларнинг кийик, аждар, қуш, булбулигўё, аёл сингари турли киёфаларга кира олишларини, ҳатто инсоннинг ҳам сеҳрли хусусиятларга эга бўлишлигини ота-она, ота-бола, она-бола, ака-сингил муносабатлари билан аралаш ҳолда тасвирлаш асарнинг қизиқарли чиқишини таъминлаган. Достоннинг баъзи мотивлари нисбатан қадимий даврларга бориб тақалса-да, айримларида кейинги асрларнинг воқелиги ўз ифодасини топган. Достонда талқин

¹ Доим сенсираб муомала қилиб юрилган кишига нисбатан заҳархандалик билан кесатиб гапирилганда, одатда, сизсирашга ўтилади. Бу ўринда достончи халқ ўртасидаги ана шу одатдан маҳорат билан фойдаланган.

этилган мотивлар асос-эътибори билан халкчил. Улар умумбашарий ғояларни ташийдилар ва дostonнинг халқчиллигини ҳар жиҳатдан асослаб берадилар.

Дostonда энг қадимий мотивлар изларини кўриш мумкин. Ҳатто унда ибтидоий жамоага алоқадор айрим деталлар ҳам кўринади. Болаларнинг ҳайвонлар сингари чўлу даштларда, саҳроларда яшаганликлари, уларнинг кийим киймай, яланғоч юриб катта бўлишлари маълум даражада халқимизнинг ибтидоий жамоага хос ҳолатидан дарак беради, деб қараш мумкин. Шунингдек, Умир шоир вариантда баъзи бир қадимий курулларнинг тасвирланиши, пул муомаласи ўрнига буюмга буюм алмаштиришнинг акс эттирилиши ва шу сингарилар дoston қадимийлигини кўрсатувчи белгилардандир. Лекин шуни ҳам айтиш керакки, асарда қадимийликка хос деталларнинг учраши бутунисича шу дostonнинг қадимийлигини исботлай олмайди, албатта. Булар айрим эпизодлар ва мотивлардагина учрайдиган қадимийлик нишонасидир. Асарга яхлит ҳолда қараш керак. Бизнингча, мазкур сюжет дoston формасини олганга қадар халқ оғзаки ижодида қандайдир бошқа бир жанрда мавжуд бўлган бўлиши ҳам эҳтимол. Ҳар ҳолда бу сюжет қайси жанрда бўлган бўлмасин, у ҳаётий-маиший ва фантастик эртақларга яқин тўрган. Унинг дoston жанрига кўчиши типологик жиҳатдан бутунлай янги ҳодиса бўлиб, бу ҳолнинг юз бериши XVII асрдан берида бўлмаса керак.

Дostonда умумхалқ тилида ишлатиладиган мақоллар ва халқ ибораларининг жуда кўплаб ва моҳирлик билан қўлланиши, хусусан, образлар талқинида бу воситалардан дostonчиларнинг мақсадга мувофиқ ва ўринли равишда фойдалана билганлиги асар тилининг бой, образли ва бадиий томондан юксак бўлишини таъминлаган. Чунончи, «Кўй бўрисиз бўлмас, эл ўгрисиз бўлмас», – деган халқ мақоли орқали Бўтакўзнинг тухматга қолганлиги образли баён этилган. «Яхши ният – ярим давлат», «Эрдан эр туғилар, нордан нор туғилар», «Тенг тенги билан, тезак қопи билан» каби мақоллар ҳам асарда ўринли қўлланган. «Сухан деган дурдир, кўнгил деган гулдир», «Подшо деган одамнинг гапи икки бўлмайди», «Очилган гулни сўлдирма» каби халқ

иборалари асар персонажларининг нутқига едириб юборилган. Хуллас, бу хил халқ мақол ва ибораларини қўллаш асарнинг бадий кувватини беқиёс даражада оширган.

Достонда диалог ва монологлар пухта ишланган. Ҳар бир образ ва персонажга муносиб сўз ва иборалар қўлланиб, уларнинг индивидуал хусусиятлари очилган. Фикримизнинг исботи учун Одилхон ва унинг ўгли Соҳибқирон ўртасидаги айтишувни келтирайлик:

Одилхон:

*Одил айтар бир турқинга қарайман,
Сен гапирсанг, эшитаман, фаҳмлайман,
Термиламан, сумбатинга тўймайман,
Меҳри иссиқ, бекзод, кимнинг дилисан?*

Соҳибқирон:

*Эшитинглар, бўлинг сўзим ҳайрони,
Мен қўрганман кўп зиёда савдони,
Бор дейдики тўқсон олти қўргони,
Мен фарзанди шу анжомдор подшони.*

Бу диалог орқали ота ва бола ўртасидаги меҳрибонликнинг уйғониши, шохнинг фарзанд дийдорига муҳтожлиги, асли подшозода Соҳибқироннинг чақалоклигиданок ота-онадан айрилиб, кўз кўриб, кулоқ эшитмаган, инсон ақли бовар қилмайдиган бениҳоя кўп қийинчиликларни қўрганлиги ихчам, лекин чуқур маъноли жумлалар билан тўғри қайд қилинган.

Соҳибқирон ва Соҳибжамол ўртасидаги диалогда эса уларнинг она дийдорига зор эканликлари энг таъсирли воситалар орқали баён қилинган.

Соҳибжамол:

*Мен сўзласам сизга малол бўлмасин,
Ҳеч ким ёмон қўрмас туққан онасин,
Бежон ўйлаб қолдим унинг танасин,
От қўйган, огажон, онам ўлмасин.*

Соҳибқирон:

*Об келмасам, бўлар бетимга уят,
Сени-ку гамингдан меники зиёд,
Тирик бўлса, қилгин ўлгунча хизмат,
Йиғлама, зорингни олиб келаман.*

Кўринадики, Соҳибқироннинг мардлиги, жасурлиги, бир сўз-ли ботир эканлиги синглиси олдида ва демакки, тингловчи ва ўқувчи кўз ўнгида унинг сўзлари (нутқи) оркали намоён бўлади.

Достонларда портрет бир ўринда тугал берилмайди. Бутун асар давомида у ё бу образнинг ташқи кўринишдаги у ёки бу белгилари тасвирлана боради ва бутун асар давомида образнинг тўлиқ портрети чизилади. Лекин достонларда шундай традицион образлар ҳам борки, улар портретининг умумий белгилари бир жойда жамланган. Шундай образлардан бири мастон кампир образидир. Унинг портрети Умир Сафар ўғли вариантида шундай чизилади: «Қағажон шундай кампир эдики, танаси тепадай, калласи қападай, қовоғи катта мешдай, ҳар бурунлари мўридай, киприги сўридай, ўзи кампирнинг зўридай, тепадан ташлаб кочган бўридай, шундай бир ҳайбатли кампир эди». Қағажон кампирнинг портретини ўқир эканмиз, унинг бундай ташқи кўриниши қиладиган бутун хатти-ҳаракатларига, айёрлиги ва ёвузлигига батамом мос эканлигига қаноат ҳосил қиламиз. Шунингдек, унинг тилидаги ёлғон гапиришлик, ўзини мақташ ва бошқаларни менсимаслик хусусияти, алдамчи ва қалбакилиги ҳам унинг портретида, ташқи қиёфасида ўз аксини топган.

Шундай қилиб, «Соҳибқирон» достони ижтимоий-маиший характердаги асар бўлиб, ўзбек халқи эпик ижодиётида муҳим ўрин тутади. Унинг кўпгина версия ва вариантлари бир қанча халқлар ўртасида кенг тарқалганлигидан ва унинг яратилишида ўша халқлар баравар иштирок этганлигидан далолат беради. Бу версия ва вариантлар орасида гоёвий-бадий пишиқлиги, эпик кўлами ва мукамаллиги жиҳатидан Ислом шоирдан ёзиб олиниб, нашр этилган достон алоҳида қимматга эга.¹

¹ Ушбу мақола куйидаги манба асосида чоп этилмоқда: Шодиева С. «Соҳибқирон» достони ва унинг вариантлари // Ислом шоир ва унинг халқ поэзиясида тутган ўрни. – Тошкент: Фан, 1976. – 37–47-бетлар.

Шўра
МИРЗАЕВ

(1936 йилда туғилган)



Шўра Мирзаев 1936 йил 6 мартда Бухоро вилояти Шофиркон тумани Саврак қишлоғида туғилган. Бухоро Давлат педагогика институти (ҳозирги Бухоро давлат университети)нинг Тарих-филология факультетини тугатган (1957), Сурхондарё вилоятининг Жарқўрган туманида ўқитувчилик қилган (1957–60). ЎзР ФА Тил ва адабиёт институти аспирантурасида ўқиган (1960–63). ЎзР ФА Тил ва адабиёт институтида аввал кичик илмий ходим, сўнг катта илмий ходим лавозимларида ишлаган (1964–71). Шу институтнинг Фольклор бўлимига раҳбарлик қилган (1971–2002). ЎзР ФА Адабиёт институтининг раҳбари (1991–98), ЎзР ФА Тил ва адабиёт институтининг директори (1998–2010). ЎзР Фанлар академиясининг вице-президенти вазифасини бажарган (2001–2006). Ҳозирги кунда ЎзР ФА Тил, адабиёт ва фольклор институти Фольклор бўлимининг етакчи илмий ходими сифатида фаолият кўрсатади. «Алпомиш» достонининг ўзбек вариантлари мавзусидаги номзодлик диссертациясини ҳимоя қилган (1965). «Ўзбек халқ ижоди» кўпжилдлигига кирган «Алпомиш» (1979), «Эрали ва Шерали» (1987), «Юсуф ва Аҳмад» (1987), «Малика айёр» (1988), «Ўзбек халқ мақоллари» (1989), «Луқмони ҳаким» (1989), «Нурали» (1989) каби жилдларнинг чоп этирилишида қатнашган. Бундан ташқари, «Жонодил» (1970), «Одилхон» (1971), «Авазхоннинг ўлимга ҳукм қилиниши» (1976), «Нуралининг ёшлиғи» (1993), «Гўрўглининг туғилиши» (1994), «Райҳон араб» (1994), «Авазхон». «Гўрўгли» достонлари. 2-том (1997, ҳамк.), «Шоқаландар» (2004, ҳамк.) достонлари, Раҳматулла Юсуф ўғли репертуаридаги «Гўрўгли» достонларини нашрга тайёрлаган.

Ҳозир «Ўзбек халқ ижоди ёдгорликлари» 100 жилддигини нашрга тайёрлашда қатнашмоқда. «Алпомиш» достонининг ўзбек вариантлари» (1968), «Ҳоди Зариф» (1968), «Халқ бахшиларининг эпик репертуари» (1979), «Эпос и сказитель» (2008), «Ҳоди Зариф сабоқлари» (2014) каби монографиялар муаллифи. Илмий ва ташкилотчилик фаолияти учун профессор (1991) илмий унвони, Абу Райҳон Бериуний номидаги Республика давлат мукофоти (1973), «Дўстлик ордени» (1997) ва Ўзбекистон Республикаси фан арбоби унвони (2003) берилган.

ФОЛЬКЛОР ВА УНИНГ АСОСИЙ ХУСУСИЯТЛАРИ

Фольклоршуносликда «халқ ижоди» атамасининг моҳияти ва бу тушунчанинг маъноси ҳақида турли хил фикрлар билдирилган бўлса-да¹, халқ ижодиётининг ўзига хос табиати ва етакчи хоссалари тўла очиб берилган эмас. «Халқ ижоди» (фольклор) тушунчаси халқ оммасининг бадий, ижодий-амалий ва хаваскорлик фаолияти билан боғлиқ бўлган анъанавий моддий ва номоддий маданиятнинг халқ оғзаки бадий ижоди (фольклор), халқ мусиқаси (мусиқа фольклори), халқ театри (томоша санъати), халқ ўйинлари (ракс), қўғирчоқбозлик, дор ва ёғочоёқ санъати (халқ цирки), халқ тасвирий ва амалий-безак санъати, халқ архитектураси (қурилиш амалиёти) ҳамда бадий ва техникавий хаваскорлик каби ижодиёт турларини ўз ичига қамраб олади. Халқ ижодиётининг бу каби турлари яратилиши, ижро этилиши ва амалга оширилиши жиҳатидан кўпчиликнинг (жамоанинг) иштироки билан юзага чиқадиган бадий иқтидор намунасидир. Фольклор халқнинг турмуш тарзи, яшаш шароитлари, ижтимоий меҳнат даражасига мос равишда шаклланиб, отадан ўғилга, устоздан шогирдга, аждоддан авлодга ўтиб, доимий равишда сайқаллашиб, мукамаллашиб, тобора анъанавийлашиб борган ва ниҳоят, касбийлик (профессионаллик) касб этган ҳамда жонли

¹ Имомов К., Мирзаев Т., Саримсоқов Б., Сафаров О. Ўзбек халқ оғзаки поэтик ижоди. – Тошкент: Ўқитувчи, 1990. – 4–14-бетлар; Мирзаев Т. Ўзбек халқ ижоди // Ўзбекистон Республикаси. Энциклопедия. – Тошкент, 1997. – 512–516-бетлар; Жалолов Ғ. «Фольклор» атамаси хусусида айрим мулоҳазалар // Халқ донишмандлиги маърифати. – Тошкент, 2000. – 13–20-бетлар.

ижро шароитлари ҳамда кундалик амалиёт орқали бизгача етиб келган. Халқ ижодиётининг ўзига хос қадимий намуналари ёзма манбаларда, тарихчи ва ёзувчиларнинг асарларида, қоятошларда (Сармишсой, Зараутсой расмлари каби), археология ва архитектура ёдгорликларида, меҳнат қуруллари ва уй-рўзғор буюмларида сақланиб қолган.

Халқ ижодида халқнинг турмуш тарзи, ижтимоий ва маиший ҳаёти, меҳнат фаолияти, табиат ва жамиятга қарашлари, инонч ва ишончлари, эътиқодий ва диний тасаввурлари, инсон ва оламга нисбатан ҳис-туйғулари, бадий олами, билим даражаси, бахтли ва адолатли замон ҳақидаги ўй-фикрлари ўз ифодасини топган. Жамият тараққиёти ва меҳнат тақсимотининг кучая бориши билан халқ ижоди турлари ва жанрларига нисбатан айрим истеъдодли шахсларнинг ихтисослашуви оша борган. Шу тариқа бахшилар, эртақчилар, масҳарабозлар, қизиқчилар, аскиябозлар, кўғирчокбозлар, раққослар, машшоқлар, кулоллар, меъморлар, наққошлар, ўймакорлар, каштадўзлар ва ҳоказолар санъати юзага келган, корфармон ва ишбошилар пайдо бўлган. Аммо халқ ижоди намуналарининг яратилиши, ўзлаштирилиши ва амалга оширилишида кўпчиликнинг иштироки, ҳар бир ижро ва амалиётнинг қадимдан қарор топган мустаҳкам анъаналар доирасида воқеъ бўлиши сақланиб қолган. Шу сабабли ҳам ҳар қандай бадиха, ҳар бир ижодий ҳаракат, давомчи томонидан киритилган қай бир янгилик барқарор анъаналар доирасида, устоз-шогирдлик қобиғида рўй берган. Шу тариқа, бир томондан, анъаналарнинг ўзи ривожлана борган, иккинчи томондан, ҳар бир ижро ва амалиёт давомида халқ ижодининг анъанавий намуналарига ўзгартиришлар, янгиликлар киритила борган, янги асарлар, янги вариантлар, янги ечимлар юзага келган. Ҳатто қай бир намуналар унутилиб, ижро ва амалиётдан тушиб қолган.

Халқ ижоди профессионал санъатнинг юзага келиши ва ривожига катта ўрин тутди. Ўз навбатида, профессионал санъат ҳам халқ ижоди ривожига таъсир кўрсатиб, уни бойитиб келмоқда. Жамиятда халқ ижодиёти намуналарини сақлаш ва ривожлантириш, йўқолганларини тиклаш эҳтиёжи ўзининг эстетик та-

ҳар бир ижодкор (қайта ижод) ва ижрода анъанавий асардаги айрим унсурлар ўзгаради, нималардир аввалгисидан бошқачароқ талқин этилади, қай эпизодлар қўшилади ёки тушиб қолади. Бундай ўзгарувчанлик ижтимоий муҳит, маиший шароит, эшитувчилар талаби, ижодкор салоҳиятига ҳам боғлиқ, албатта. Лекин ҳар қандай ўзгариш, ижро давомидаги қайта ижод асрлар давомида қатъийлашган пухта анъаналар доирасида содир бўлади. Демак, жонли оғзаки анъана доирасидаги бадиҳагўйлик фольклор асарларининг кўп вариантларда тарқалишига олиб келади.

Фольклорнинг жамоавийлик характери яқка ижодчилар фаолиятини инкор этмайди. Истеъдодли ижодкорлар фольклор намуналарини сақлаб қолиш ва кенг оммалаштириш билан бирга оғзаки анъаналар доирасида уни янада мукамаллаштирадилар, баъзан янгиларини ҳам яратадилар. Бироқ, бунда қатъийлашган ва барқарорлашган жамоавийлик анъаналари етакчилик қилади. Шунинг учун ҳам фольклорнинг деярли барча жанрлари турлитуман ижодкорлар фаолияти билан боғлиқдир. Айрим жанрлар (мас., топишмоқ, мақол каби) оммавий характерга эга бўлса, яъни уларнинг намуналаридан ҳар бир киши озми-кўпми айта олса, бошқаларининг (достон, оғзаки драма сингари) ижроси муайян тайёргарликни талаб қилган. Шу тариқа фольклор намуналарини яратиш ва ижро этишда ўзига хос касбий ижодкорлик юзага келган. Ўзбек фольклорида ижодкор ва ижрочи (бахши, эртақчи, аскиябоз, қизикчи, дорбоз)ларнинг касбий маҳорати ниҳоятда ривожланган. Шунинг учун ҳам бахшилар, эртақчилар, қизикчилар, дорбозлар, аскиябозлар, халфалар бу санъатни эгаллаш учун махсус тайёргарлик кўриши, муайян устоздан таълим олиши зарур бўлган.

Кўшиқ, мақол, топишмоқ, афсона, ривоят, лоф, латифа, эртақ, достон, аския, оғзаки драма ва бошқалар фольклорнинг асосий жанрлари бўлиб, улар сўз санъати намуналари бўлиши билан бирга муайян бир ижтимоий-маиший функцияни ҳам адо этадилар. Масалан, халқ кўшиқлари меҳнат жараёнларига алоқадор бўлса, ёр-ёр, ўлан, лапар, келинсалом, йиғи-йўқловлар тўй ва мотам маросимлари билан боғлиқдир. Фольклор жанрлари ғоявий-бадий хусусиятлари билан эмас, балки ижро усуллари (яқка

ижрочилик, жамоавий ижрочилик, созли, созсиз каби) жиҳатидан ҳам бир-биридан фарқ қиладилар. Уларнинг бири куйлаш учун, иккинчиси айтиб бериш, ҳикоя қилиш учун, бошқаси кўрсатиш, намоиш этиш учун ёки ҳам куйлаш, ҳам ўйнаш, ҳам айтиш учун мўлжалланган бўлади. Фольклор жанрлари қанчалик хилма-хил, баъзан ўта функционаллашган ва қатъий вазифадор бўлишига карамай, улар яхлит бадиий тизимни ташкил этади.

Фольклор жанрлари ижтимоий-иқтисодий ва маданий тараққиёт билан узвий боғлиқ. Шу сабабли халқ ҳаётидаги тарихий ўзгаришларга кўра, улар ҳам ўзгара борган. Қай бир жанрлар ёки намуналар ижрочилар репертуаридан тушиб қолган ёки бутунлай йўқолган, янгилари яратила борган. Шунинг учун ҳам кейинги асрлардагина ёзиб олинган фольклор намуналарида кўп қатламлилиқ мавжуд бўлиб, узоқ ижро давомида уларда бир неча даврлар ўз изини қолдирган. Фольклор жанрларининг стадиал тараққиёти ва тарихий-типологик нуқтаи назардан қараганда, энг қадимги даврларда кўпчилиқ халқларда мифлар, уруғ ва қабилалар ҳақидаги афсона ва ривоятлар, айтимлар, олқиш ва қарғишлар, мавсум-маросим фольклори намуналари, меҳнат қўшиқлари, топишмоқ ва мақоллар кенг тарқалган. Кейинги даврларда эса, эртаклар, эпоснинг архаик шакллари юзага келган. Патриархал-уруғчилик муносабатларининг емирилиши ва илк давлатларнинг шаклланиши даврида қаҳрамонлик достонлари яратилган, кейинроқ романик эпос, лирик ва тарихий қўшиқлар, оғзаки драма, латифа ва лофлар пайдо бўлган.

Ўзбек фольклорининг қадимги намуналари асл ҳолида тўла равишда бизгача етиб келмаган. Қадимги мифлар, афсона ва ривоятлар, мақол, топишмоқ ва қўшиқлар, эпос парчалари турли характердаги ёзма ёдномалар; юнон, хитой, араб манбалари; тарихчиларнинг маълумотлари, археологик топилмалар орқали, шунингдек, кейинги даврларда ёзиб олинган фольклор асарлари таркибида сақланиб қолган. Қаюмарс, Жамшид, Гершасп, Сиёвуш, Афросиёб, Рустам, Искандар, Эликбек, Тўмарис, Широқ, Зариандр ва Одатида, Зарина, Ойсулув, Гулдурсун, Одами Од ҳақидаги афсона ва ривоятлар, қаҳрамонлик эпослари, «Девону луғотит турк»да келтирилган фольклор намуналарининг ярати-

лишида ўзбек халқи қадимий ота-боболарининг ҳам муносиб ҳиссаси бор. Бу қадимий фольклор намуналарида тасвирланган ёруғлик ва зулмат, яхшилик ва ёмонлик, эзгулик ва қабоҳат, тўғрилиқ ва эгрилик, адолат ва ҳақсизлик ўртасидаги кураш мотивлари кейинчалик ўзбек халқ оғзаки бадиий ижодида қайта ишланиб, халқимизнинг ижтимоий муносабатлари ва курашлари билан уйғунлашиб кетган.

Ўзбек халқ оғзаки бадиий ижодининг қадимий намуналари меҳнат ва мавсум-маросим кўшиқларидир. Улар кўшиқ яратувчиларнинг амалий фаолияти – овчилик, чорвачилик, деҳқончилик, ҳунармандчилик билан бевосита боғланган ва меҳнаткаш омманинг қадимий урф-одатлари, хилма-хил маросимлари ва эътиқодлари негизида яшаб келган. Меҳнат кўшиқлари турли меҳнат жараёнлари билан боғлиқ. Масалан, хирмон янчишда «хўп-майда» ёки «майдагул», сигир, қўй, эчкиларни соғиш ва бузоқ, қўзи, улоқларни эмизишда «хўш-хўш», «турей-турей», «чурей-чурей» кўшиқлари куйланган. Ер ҳайдаш, ўрим, ёрғичоқ тортиш, чарх йигириш ва бўз тўқиш жараёнларида махсус кўшиқлар айтилган. Инсоннинг яшаш ва ҳаёт кечириш тарзи, турли-туман примлар, урф-одатлар, мавсумий юмушлар, маросимлар ва байрамлар билан боғлиқ равишда жуда кўп фольклор намуналари яратилган. Масалан, оналар ва бувилар томонидан айтиладиغان аллалар ҳамда оталар ва боболар томонидан куйланадиган ҳўйяларда эзгу орзу-ҳаваслар, фарзанднинг келажаги ҳақидаги умидбахш ниятлар тасвирланади, бола тарбиясига оид халқона қарашлар баён этилади. Фарзанднинг туғилиши, чақалоқнинг бешик даври, улғайиши, жисмоний ва нутқий баркамоллиги, ёш ва суннат тўйлари, улғайиш эҳтирослари билан боғлиқ айтим-олқишлар, эркалама, овутмачоқ, ялинчоқ, ҳукмлагич, чалғитма, чорлама, гулдур-гуп, санама, айтишма, тегишмачоқ, масхараламалардан иборат бутун бир болалар фольклори тизими яратилган. Никоҳ тўйи маросими билан боғлиқ равишда ёр-ёр, лапар, ўлан, келинсалом, куёвсалом каби кўшиқлар куйланган. Буларда келин-куёвнинг таъриф-тавсифлари, тўйнинг шавқ-завқи, шунингдек, ижтимоий ҳаёт ва тенгсиз никоҳдан норозилик мотивлари тасвирланган. Қадрдон кишининг вафоти муносабати билан

йиғлаб айтиладиган кўшиқларда эса, марҳумнинг энг яхши сифатлари, шафқатсиз ўлим туфайли бошга тушган мусибат, жудолик дарди ғам-алам билан изҳор этилади. Йил курғоқчилик келганда, ёмғир чақиришга бағишланган «Суст хотин», қаттиқ шамол бўлганда, уни тўхтатиш учун «Чоймомо» маросими ва кўшиқлари ижро этилган. «Бойчечак», «Барот келди», «Ё рамазон» кабилар ҳам турли мавсум-маросимлар билан боғлиқ. Байрамлар, жумладан, Наврўз байрами ҳақида туркум фольклор намуналари яратилган.

Халқ бадий ижодининг каттагина қисмини лирик ва сатирик кўшиқлар, термалар ташкил этади. Лирик кўшиқларда ишқ-муҳаббат, оила, ижтимоий ва маиший ҳаёт ҳодисалари кенг ёритилса, сатирик кўшиқларда жамиятдаги салбий ҳодисалар, айрим ноҳўя ишлар танқид қилинади. Кўшиқлар дилраболиги, ёқимли оҳанги, тўқ қофиялари, образлилиги, тасвирий усул ва воситаларнинг хилма-хиллиги билан инсон руҳиятини ғоятда теран акс эттиради. Муҳим ғоявий-эстетик вазифани ўтайди.

Ўзбек фольклорининг энг оммавий жанрлари мақоллар ва топишмоқлардир. Халқнинг асрий тажрибалари, панд ва насиҳатларини ўзида ифодалаган мақоллар ҳажман қисқа, бироқ, кенг маъноли образли нутқ мевасидир. Мақолларда халқимизнинг ҳаётга, табиатга, инсон, оила ва жамиятга муносабати, ижтимоий-сиёсий, маънавий-маърифий, ахлоқий-эстетик ва фалсафий қарашлари ифодаланган. Уларда ватанпарварлик, мардлик, қаҳрамонлик, меҳнатсеварлик, дўстлик, вафодорлик, илм-ҳунар ўрганиш каби олижаноб фазилатлар улуғланади, қўрқоқлик, нодонлик, ёмонлик, эгрилик, умидсизлик, ёлғон гапириш, ялқовлик, очкўзлик, таъмагирлик каби ярамас сифатлар инкор этилади. Ўзбек халқи бисотида ўттиз мингга яқин мақол бўлиб, улар ғоявий ва тематик жиҳатдан бой ва ранг-баранг.

Халқ орасида бадий асарлардан топишмоқлар ҳам жуда кенг тарқалган. Улар нарса-ҳодисаларнинг муайян белгиларини бошқа предметларга қиёсан, яшириб, яширилган нарса ва ҳодисани топишга мўлжалланган бадий асарлардир. Шунга кўра, топишмоқ икки қисмдан иборат бўлади: яширилган нарса ва ҳодисалар ҳақидаги образли ифодалар, яъни топишмоқнинг

ўзи ва унинг жавоби. Тоғ ва ўрмонлар, дарё ва қўллар, чўл ва биёбонлар, бўрон, сел ва тошқинлар, ер ва осмон, йил ва унинг фасллари, ҳайвонлар ва ўсимликлар олами, уй-рўзғор ва маиший жиҳозлар ҳақида кўплаб топишмоқлар яратилган. Топишмоқлар ҳам мақоллар сингари тузилиш жиҳатидан баъзан насрий, кўпчилик ҳолларда шеърий шаклда бўлади. Шеърий топишмоқларда муайян вазн, ўзига хос туроқланиш, яхлит қофия тизими мавжуд. Масалан,

*Тўрт оёқли,
Темир туюқли.*

(От).

Топишмоқлар бир савол-жавобли, яъни бир предметли бўлиш билан бирга кўп савол-жавобли – кўп предметли ҳам бўлади. Бундай топишмоқлар кўпчилик ҳолларда яхлит шеърий парча тарзида намоён бўлади:

*Тогда талаймонни кўрдим,
Сувда сулаймонни кўрдим,
Тузсиз пишган ошни кўрдим,
Юмалаб ётган тошни кўрдим.*

(Бўри, балик, сумалак, тошбақа).

Афсона ва ривоятлар, нақл, латифа ва лофлар, эртақлар ўзбек фольклорининг насрий жанрларини ташкил этади.

Хабар, ахборот бериш тарзидаги хаёлий уйдирмаларга асосланган қисқа сюжетли баёний ҳикоялар афсоналарни ташкил этади. Шунинг учун ҳам тадқиқотчилар афсоналарга ҳақиқатдан хабар берувчи ёлғон ҳикоялар, дея баҳо берадилар. Ўзбек халқи оламнинг ибтидоси ва интиҳоси, осмон жисмларининг ҳаракати, сахро, чўл, дашт, тоғ, қўл, дарё ва денгизларнинг пайдо бўлиши, баъзи иншоотларнинг қурилиши ва вайрон бўлиши, авлиё-анбиёлар, хаёлий қаҳрамонларнинг турмуш тарзи ва мақомотлари ҳақида юзлаб афсоналар яратган. «Ширин қиз», «Дев қалъа», «Калтаминор», «Илонбузган», «Эр Ҳубби», «Анбар она», «Етаган», «Искандар Зулқарнайн» кабилар шулар жумласидандир.

Қачонлардир бўлиб ўтган ёки бўлганлигига ишонилган воқеа ва ҳодисалар, тарихий шахсларнинг у ёки бу ишлари ҳақида ҳабар берувчи баён тарзидаги қисқа сюжетли ҳикоялар ривоятлар ҳисобланади. Ривоятлар сюжет тузилиши, баёний тарзи, ахборот бериш хусусиятлари билан афсоналарга ўхшайди. Аммо тарихий воқеалар ва шахслар, уруғ ва жой номларига доир маълумотлар, фактик ҳодисалар ҳақида ахборот беришлиги билан улардан фарқ қиладилар. Беруний, Ибн Сино, Алишер Навоий, Амир Темур, Улуғбек, Машраб каби тарихий шахслар ҳақидаги ривоятларда бу шахслар билан боғлиқ қизиқарли воқеалар баён этилиб, уларнинг юксак фазилатлари, донишмандликлари ибрат қилиб кўрсатилган. Афсона ва ривоятлар халқнинг эътиқодий ва мифологик қарашларини, табиат ва жамият ҳақидаги илмий (эмпирик) билимларини ўрганишда катта аҳамиятга эга.

Ўзбек фольклорига халқ фалсафаси ва донишмандлигини намоён этувчи нақллар закийлик, фасоҳатга бойлиги, ҳазил-мутойиба ва ҳажвий йўналиши билан ажралиб турувчи аския ва латифалар, ижтимоий ҳаётдаги нарса ва ҳодисалар ҳақида бўрттириб, ошириб сўйлаш, муболағалашни қиёслаш санъати орқали яратиладиган лофлар ҳам алоҳида жанрлар сифатида катта ўрин тутаяди. Анъанавий халқ театрининг асоси бўлган, ранг-баранг жанрлари билан ажралиб турувчи бутун бошли адабий тур – оғзаки драматургиянинг мавжудлиги ва унинг беш юздан ортиқ пьесалари ёзиб олинганлиги ҳам ўзбек фольклорининг турлари ва жанрлар бойлигини намоён этади.

Фольклор жанрлари орасида эртақлар алоҳида мавқега эга. Улар ҳаёлий ва ҳаётий уйдирмалар асосида қурилган, ҳақиқат ва ёлғонни ажойиб бир тарзда ўзида уйғунлаштирган нодир эстетик ҳодисалардир. Эртақлар ғоявий-тематик ва бадиий хусусиятлари жиҳатидан ҳайвонлар ҳақидаги, сеҳрли, маиший эртақлар каби турларга бўлинади. Бу турлар образлар талқини, конфликт, сюжет, композиция, фантастик уйдирманинг ўрни ва функцияси, тил ва услуби жиҳати билан бир-биридан фарқ қиладилар.

Ҳайвонлар ҳақидаги эртақларда («Чўлоқ бўри», «Меҳригиё», «Кўк қўчқор», «Оққуш», «Айиқ полвон», «Илон пари», «Илон

оға», «Бўри киз» ва б.) ибтидоий тушунчалар билан боғлиқ равишда от, қўй, эчки, сигир каби уй ҳайвонлари, бўри, айиқ, илон каби ёввойи ҳайвонларнинг ғайритабиий кўринган характер-хусусияти, уларнинг одамлар билан бўлган муносабати ҳикоя қилинади. Ажойиб кўринган ҳодисалар ва турли хил ҳайвонларга нисбатан тотемистик, анимистик қарашларнинг ифодаланиши бундай эртақларда алоҳида ўрин тутди. Ҳайвонлар ҳақидаги эртақларнинг бир қисми («Бўри билан тулки», «Тулкининг тақсимоти», «Кумурсқа», «Қарға билан қўзи» ва б.) қадимий тасаввурларнинг унутила бошлаши билан жамият тараққиётининг кейинги босқичларида мажозий эртақларга айланган. Эртақлардаги аллегорик образлар орқали ижтимоий муносабатлар ифодаланган, жамиятдаги тенгсизлик тасвирланган.

Сеҳрли эртақлар сеҳр-жоду, тилсим, фантастик уйдирмалар асосига қурилган бўлади. Уларда персонажлар, воқеа ва ҳодисалар одатдан ташқари, ғайритабиий ҳолда тасвирланади. «Девсафид», «Ялмоғиз», «Семурғ», «Кенжа ботир», «Ёрилтош», «Гулиқаҳқаҳ» қабилар бундай эртақларнинг характерли намуналаридир. Пари, ялмоғиз, дев, аждар, семурғ каби фантастик ва мифологик образлар бундай эртақларда муҳим ўрин тутди. Бош қаҳрамон буларга қарши курашади ёки уларнинг хизматидан фойдаланади. Сеҳрли эртақлар қанчалик ҳаёлий бўлмасин, уларнинг асосида ҳаётийлик мавжуд. Учар гилам, ойнаи жаҳон ҳақидаги тасаввурларнинг реал кўзғатувчиси аниқ, уларда орзу-умидлар мужассамлашган.

Маиший эртақлар реал ҳаётий асосга эга бўлиб, фантастика кўмакчи вазифани ўтайди. Уларда, асосан, ижтимоий тенгсизлик, адолатсизлик, зулм ва зўрлик қораланиб, эзгулик, ҳақиқатнинг ғалабаси улуғланади. «Зиёд ботир», «Уч оға-ини ботирлар», «Озодачехра», «Тоҳир ва Зухра», «Аёз», «Авом фолчи» ва бошқаларда меҳнаткашларнинг аҳволи, зулм ва зўрлик ҳомийларининг кирдикорларига нисбатан норозилиги тасвирланган.

Маиший эртақларнинг каттагина қисмини ҳажвий эртақлар ташкил этади. Бундай эртақлар ижтимоий ҳаётда реал асослари бўлган ҳаётий уйдирмалар заминига қурилган бўлиб, ўткир сатира ва хушчақчақ юмор уларнинг асосий хусусиятини белгилайди.

Ҳажвий эртақларнинг асосий ижобий қаҳрамонлари донишманд чол, камбағал йигит, доно аёл, ҳозиржавоб кал ва бошқа. Булар ўзларининг кўркмаслиги, топқирлиги, донолиги, ҳозиржавоблиги билан калтафаҳм рухонийлар, золим амалдорлар, хасис бойларни фош этадилар, баъзан ўзлари ҳам комик ҳолатларга тушиб қоладилар. «Қози билан камбағал», «Туғматчилар жазоси», «Икки мулла», «Тўрт ялқов», «Икки ўжар», «Уч ёлғонда қирк ёлғон», «Бой билан кал» кабилар ҳажвий эртақларнинг энг яхши намуналаридир.

Ўзбек фольклорининг энг йирик жанрларидан бири достонлардир. Ўзбек халқ бахшиларида юз эллиқдан кўпроқ сюжетга бўлинган тўрт юздан ортиқ достон ёзиб олинган. Бу достонлар ниҳоятда кўп тармоқли ва кўп мавзули бўлиб, узоқ асрлар давомида яратилган ва турли ижтимоий-иқтисодий шароитларда куйланиб келинди. Уларнинг қадимий намуналари қаҳрамонлик достонларидир.

Қаҳрамонлик достонлари патриархал-уруғчилик муносабатлари билан, кўчманчилик ва ярим кўчманчилик ҳаёт тарзи билан маҳкам боғлиқдир. Уларда реал ижтимоий воқелик қаҳрамонлик идеализацияси доирасида кўтаринки руҳда тасвирланади. Қаҳрамонлик достонларининг ёркин намунаси «Алпомиш» (X аср) ва унинг давоми «Ёдгор» достонларидир. «Алпомиш»да қаҳрамонлик, мардлик, ватанпарварлик, дўстлик, вафо ва садоқат улуғланади. Қаҳрамонлик достонлари таъсирида жангнома достонлар юзага келди. Агар қаҳрамонлик достонларида бош қаҳрамон фаолияти яккама-якка олишувларда, баҳодирлик шартларини бажаришда намоён бўлса, жангномаларда турли-туман характердаги уруш эпизодларида кўрсатилади. Душманга қарши курашда мардлик ва жасорат кўрсатиш, она ер бутунлиги учун кураш, эл-юртлар бирлиги, ватанпарварлик ва дўстлик каби олижаноб гоёлар куйланади. «Юсуф билан Аҳмад» ва унинг давоми бўлган «Алибек билан Болибек» достонлари бунинг ёркин мисолидир. Ҳар иккала достон ватанпарварлик туйғулари, она юрт соғинчи билан йўғрилган.

Тарихий достонлар тарихда бўлиб ўтган воқеа ва ҳодисалар, айрим тарихий шахслар фаолияти асосида яратилган бўлиб,

бундай дostonларда тарихий ҳақиқат билан афсона, факт билан бадий тўқима ўзига хос равишда чатишиб кетган. «Ойсулув», «Тулумбий», «Шайбонийхон», «Ойчинор», «Тўлгоной», «Номоз», «Маматкарим полвон» кабилар шу турга мансуб. Улар тарихдаги конкрет воқеалар ва фактларни тасвирлаш характери, ҳужжатийликнинг даражаси жиҳатидан бир-бирларидан жиддий фарқ қилади. Ўзбек дostonчилигининг кейинги тараққиёт даврларида тарихий дostonларнинг бир хили сифатида афсонавий бахшилар ҳамда айрим дostonчиларнинг ҳаёт йўли тасвирланган автобиографик ва биографик дostonлар («Кунларим», «Гаржимаи ҳол», «Мулла Ғойиб», «Оллоназар Олчинбек», «Маҳтумқули» ва б.) юзага келди.

Халқ дostonларининг катта бир турини романик эпос намуналари ташкил этади. XII–XVII асрларда яратилган бундай дostonлар ўз даврининг ижтимоий-сиёсий муносабатлари билан боғлиқ бўлиб, уларнинг моҳиятини севги можаролари, кўркинчли саргузаштлар, эртакка хос фантастик воқеалар, шу билан бирга ҳаётий ҳодисалар тасвири белгилайди. Романик дostonларнинг сюжет тузилиши ниҳоятда бир-бирига ўхшаш бўлиб, одатда, қаҳрамон ғойибона ошиқ бўлган гўзални излаб сафарга отланади, ажойиб-ғаройиб ҳодисаларни, қийин саргузаштларни бошидан кечиради, ғайритабий кучлар билан тўқнашади, барча қийинчиликларни енгиб ўз мақсадига эришади. Бироқ бу дostonларнинг ҳар бири композицион қурилиши, образлари, мотивларининг ишланиш характери ва мазмунлари жиҳатидан мустақил бўлиб, бир-бирларидан фаркланадилар. Романик дostonларнинг таркиби ниҳоятда мураккаб. Қаҳрамонлик дostonларида романик эпосга хос жиҳатлар бўлганидек, романик дostonлардан қаҳрамонлик унсурлари, жангномалар хусусиятлари ҳам мустаҳкам ўрин олган. Ҳатто баъзи дostonларда бир неча мавзу баравар ишланган. Қаҳрамонлик-романик дostonларда («Рустам» туркуми, «Якка Аҳмад», «Гўрўғли» туркумига кирувчи бир қанча асарлар) қаҳрамонлик йўналиши устун турса, ишқий-романик дostonларда («Кунтуғмиш», «Орзигул», «Ёзи билан Зебо», «Гўрўғли» туркумининг сўнгги ҳалқалари) севги можаролари, саргузаштли воқеалар тасвирига алоҳида эътибор берилади.

Ўзбек халқ дostonлари жонли оғзаки ижрода асрлар давомида бой ёзма адабиёт намуналари билан ёнма-ён яшаб келди. Мумтоз адабиётнинг дostonчиликка таъсири баракали бўлди. Бундай жараён XVII асрдан кейин янада кучайди. Оқибатда романик эпоснинг бир тури сифатида китобий дostonлар юзага келди. Бундай дostonлар мумтоз шеърят намуналарининг бахшилар томонидан фольклорга хос равишда қайта ишланиши натижасида юзага келган ёки яратилиши жиҳатидан ёзма адабий манбага эга бўлган, шунингдек, бевосита ёзма адабиёт таъсирида яратилган асарлардир. «Фарход ва Ширин», «Лайли ва Мажнун», «Баҳром ва Гуландом», «Юсуф ва Зулайҳо», «Варқа билан Гулшоҳ», «Вомиқ билан Узро», «Зевархон» ва бошқа шу хил дostonлардандир. XVIII асрнинг охирларидан, хусусан, XIX асрнинг иккинчи ярмида фольклор асарларини ёзма адабиётга яқин руҳда қайта ишлаш ёки аксинча, ёзма адабиёт намуналарини «фольклорлаштириш» жараёни ниҳоятда кучайди. Бунинг натижасида турли характер ва мазмундаги қиссалар («халқ китоблари») пайдо бўлди, айрим бахшилар ижодида ёзма адабиёт унсурлари кўрина бошлади.

XIX асрнинг иккинчи ярми – XX аср бошлари ўзбек фольклори таракқиётида алоҳида босқич бўлди. Бу даврда анъанавий фольклор асарлари кенг ижро этилиши билан бирга замоннинг муҳим ижтимоий-сиёсий масалаларини акс эттирувчи лирик ва эпик асарлар яратилди, тарихий кўшиқлар жанрининг янги намуналари юзага келди. Россиянинг босқинчилик сиёсати ва мустамлакачилик зулмига қарши халқ норозилигини акс эттирувчи, амир ва бекларнинг ўзаро келишмовчиликларини қораловчи «Хоразмнома», «Ботирхон зулми», «Назар ва Оқбўтабек», «Музаффархон», «Жиззах кўзғолони» каби асарлар яратилди.

Анъанавий фольклорнинг жонли ижроси шўро даврида ҳам давом этди. Бу даврда фольклор ижодкорлиги ва ижрочилигининг жонли анъаналарини давом эттириб келаётган юзлаб бахшилар, эртакчилар, кизикчи ва масхарабозлар, кўгирчоқбозлар, аскиячилар ижро этган асарлар ёзиб олинди. Улар орасида Фозил Йўлдош ўғли, Эргаш Жуманбулбул ўғли, Пўлкан, Ислон шоир, Бола бахши, Ҳасан Худойбердиев, Нурали Нурмат ўғли, Юсуф-

жон кизик каби санъаткорлар бор. Бугунги кунда ҳам фольклорнинг деярли барча жанрларида янги асарлар яратилмоқда. Айниқса, бадий ҳаваскорлик, бахшилар ижоди, қўшиқчилик янада тараққий қилмоқда. Кейинги йилларда кўплаб фольклор-этнографик ансамбллар пайдо бўлди. Ёзиб олинган фольклор асарлари нашр қилинмоқда.

Халқ оғзаки бадий ижоди миллий маданиятнинг таркибий қисми сифатида жуда катта ижтимоий қимматга эга. Унинг ижтимоий қиммати маънавий-маърифий, гоъвий-тарбиявий ва эстетик аҳамияти билан белгиланади. У халқнинг тарихи, урф-одати, маишати, дунёқараши, ижтимоий муносабатлари, орзу-умидлари ҳақида кенг маълумот беради. Ўзбек фольклорига бутун бир халқнинг тақдири, у мансуб ватаннинг гўзалликлари тасвирланган, тинчлик ва фаровонлик учун кураш, ватан тупроғини кўз қорачиғидек асраш гоълари, бу йўлда мардлик кўрсатган қаҳрамонлар куйланган. Халқ оғзаки бадий ижодидида халқимизнинг бадий диди, воқеликка нисбатан халқона эстетик муносабат ифодаланган. Унинг намуналари халқ ижодчилари томонидан ниҳоятда пардозланган, юксак санъат намунаси даражасига кўтарилган. Эстетик сезгилар ривожидида, гўзалликни, бадий сўз қадри ва қимматини, она тили бойликларини ҳис қилишда фольклорнинг аҳамияти беқиёсдир. Ўзбек фольклори адабиёт, театр, кино, рақс, мусиқа ва бошқаларнинг тараққиёти ҳамда бугунги ривожидида муҳим роль ўйнади ва ўйнамоқда.

*Шўхтамурод
ЗУФАРОВ
(1936 йилда туғилган)*



Шўхтамурод Усмонович Зуфаров 1936 йил 10 июлда Тошкент шаҳрида туғилган. Тошкент давлат чет тиллар институтини битирган (1961). Тошкент вилояти мактабларида ўқитувчилик қилган (1961–65). Матбуот соҳасида ишлаган (1965–70). Алишер Навоий номидаги давлат Адабиёт музейида, кейинчалик шу музей асосида ташкил этилган ЎзР ФА Қўлёмалар институтида кичик илмий ходим (1970–86), катта илмий ходим (1986–1993 йиллар) бўлиб ишлаган. «Ўзбек халқ достонларининг спецификаси ва уларининг бадиий тасвир воситалари» мавзуида номзодлик диссертациясини (1985) ҳимоя қилган. «Халқ достонлари муболагасининг айрим хусусиятлари» (1973), «Балогардон» достони ҳақида айрим мулоҳазалар» (1973), «Зулфизар» достонида муболаганинг ўрни» (1976), «Ўзбек халқ достонларининг специфик хусусиятлари» (1985) каби мақолалари чоп этилган.

ДЎМБИРАНИНГ АСРОРИ

Ўзбекистон Фанлар академияси Алишер Навоий номидаги Адабиёт музейининг илмий ходимларидан ташкил топган экспедиция 1974 йил июн ойининг бошларида халқ оғзаки ижодиёти намуналарини аниқлаш ва ёзиб олиш мақсадида жанубий музофотлар бўйлаб сафарга чиқди.

Экспедиция аъзолари – филология фанлари номзоди Малик Муродов (экспедиция раҳбари), филология фанлари номзоди Саид Асқаров ва мен – кичик илмий ходим Тўхтамурод Зуфаров эди. Қарши шаҳрида сафимизга Педагогика институтининг талабаси Холмирза Акрамов ҳам қўшилди.

Аввалига биз Қашкадарё воҳасидаги бир неча шаҳар ва қишлоқларда бўлгач, Дехқонободга, ундан эса баланд-паст суйри қирлар бағрига жойлашган Тўда Чорбоғ қишлоғига етиб келдик. Қишлоқ қуйисини илон изи янглиғ сой кесиб ўтган бўлиб, ёз ойларида сой суви камайиб кетар, аммо сой қирғоғидаги боғлар кузга қадар кўм-кўк тураверар экан. Бизлар шу қишлоқлик Ражаб бобо Нормурод ўғлининг сой билан туташиб кетган боғига жойлашдик.

Ражаб бобо тўқсон ёшни қоралаб қўйган бўлса ҳам ҳамон нигоҳи тийрак, ҳаракатлари тетик эди. У ёшлигида маҳорат билан дўмбира чертиб, анъанавий дostonларни эл орасида куйлаб келган экан. Бизга у «Алпомиш» дostonидан бир парчани ўзига хос виқор билан дўмбира чертиб, куйлаб берди. Аммо унинг овозида, дўмбира чертишида қариллик аломати сезилиб турарди. Бироқ қарилликни донолик безайди, деганларидек, Ражаб бобо ўзининг пурмаъно гаплари, кези келганда ҳаётий насиҳатлари билан ҳамқишлоқларининг эҳтиромига сазовор экан.

Шунингдек, Ражаб бобо дўмбира чолғусини ҳар томонлама мукамал қилиб ясар экан. Бу ҳол менда дўмбиранинг ясашиш жараёнига нисбатан кучли қизиқиш уйғотди ва мен Ражаб бободан бу ҳунарга оид жараёнларни ёзиб олдим. Чунки отам уста Усмоннинг миллий чолғуларни ясовчи етук созгарлиги ва менинг ўзим ҳам дутор, танбур ва сато каби чолғуларни ясай олишим туфайли бу жараёнга алоқадорлигим бор эди. Бундан ташқари дўмбира чолғусининг ясашиши хусусида, баъзи мавҳум фикрларни ҳисобга олмаганда, ҳеч қандай маълумот йўқ эди. Шу боис Ражаб бобо маълумотларининг бир томондан амалий санъатнинг созгарлик соҳаси, иккинчи томондан, илмий этнографик аҳамияти бор эди.

Дўмбира ҳам мусикий чолғу бўлгани учун унинг ясалиш жараёнида созгарлик соҳасига мансуб илмларга риоя қилиниши табиийдир. Булар:

- | | |
|------------|---|
| илми ёғоч | – яъни қандай ёғочлардан ясалиши; |
| илми асбоб | – яъни қандай асбоблар билан ясалиши; |
| илми соз | – яъни чолғунинг тузилиши, ўлчам ва детал (қисм)лари. |

Ражаб бобо маълумотига кўра, дўмбира, асосан, зардоли (ўрик) ёғочидан ясалади. Уни дарахтнинг дуч келган жойидан кесиб олинган ёғочдан яшаш мақбул эмас, балки ёғочнинг айна дўмбирабоп жойидан олиш мақсадга мувофиқдир. Бундай ёғоч эса ноёб топилма ҳисобланади.

Модомики, дўмбира ёғочдан ясалар экан, уни яшашда созгарликда ишлатиладиган арра, теша, ранда, эгов ва турли шаклдаги исканалардан фойдаланилади. Буларнинг ҳар бирини ўз қўлланиш ўрни бор.

Дўмбирани яшаш жараёни дутор сингари, айрим-айрим бўлақларни йиғишдан эмас, балки бир бутун ёғочдан – қорнини ҳам, дастасини ҳам биргаликда теша билан чопишдан бошланади. Умумий шакл рўёбга келгач, унинг қорни ўйилади. Айна шу жараён дўмбиранинг қадимий чолғу эканлигидан далолат беради.

Дўмбиранинг шу заминда ўсадиган дарахт ёғочидан ясалиши эса унинг шу юртнинг ва халқнинг чолғуси эканини исботлайди.

Воҳа бахшиларининг дўмбиралари тахминан 60–80 сантиметрлик бўйдан иборат бўлиб, 3–4 та қўшимча қисмлари бор. Булар: кулоқлари, қорин устидаги қопқоғи, торлари ва харрагидир, холос. Бу дўмбиралар аксарият чолғулар сингари бошдан-оёқ ялтиратиб лакланмайди.

Кўпинча, «дўмбира» дейилганда кўз олдимизга қозоқ халқининг миллий чолғу асбоби келади. Аслида эса, ўзбекларнинг ҳам ўз дўмбираси бор бўлиб, Ўзбекистоннинг жанубий музофотла-

рида кенг тарқалгандир. Ўзбек дўмбираси ўзининг тузилиши жиҳатидан қозоқ дўмбирасидан кескин фарк қилади. Чунончи, унинг қорни ўзбек миллий чолғуси бўлмиш танбур қорнига ўхшаш бўлиб, юзи тут ёки тол ёгочидан юпқа қилиб тайёрланган қопқоқ билан ёпилади. Қозоқ дўмбирасидан фарқли равишда қопқоқ қоринга ёпиштирилмай, ўзига хос услубда боғланади. Бунинг учун қорин орқасига кичик бир қозиқча ўрнатилади. Қопқоқдан эса тўртта тешик очилиб, улардан ип ўтказилади ва ўша қозиқчага маҳкам тортиб боғланади. Қопқоқ устидан тортилган икки тор остига қўйилган харрак эса уни маҳкам босиб туради.

Ўзбек дўмбирасининг дастаси нисбатан калтароқ бўлиб, унга қозоқ дўмбирасидаги каби «парда»лар боғланмайди ва даста юқорисига «шайтон» харрак ўрнатибмайди. Унинг ўрнига учтўрт сидра ип ёки ичак парда ўраб боғланади ва дўмбира юзи бўйлаб тортилган икки тор шу ип боғламаси устидан ўтказилади. Дўмбирани чертиш чоғида бу торлар ёнга сурилиб кетмаслиги учун уларни ҳам ип билан маҳкам ўраб қўйилади.

Одатда, торларнинг бир учи қорин остидаги «тор тортқич»га, иккинчи учи эса даста юқорисидagi «бошлик»ка ўрнатибган икки «кулоқ»ка ўралади. «Кулоқ»лар ҳам, қозоқ дўмбирасидаги каби, «бошлик» остида эмас, унинг устига ёнма-ён ўрнатилади. «Бошлик» ҳам, қозоқ дўмбирасидан фарқли ўлароқ, белкурак шаклида эмас, балки архар шохи янглиғ эгик бўлиб, унга чиройли попук ва турли мунчоқлар осиб қўйилади.

Қадимда бахшилар дўмбирага қуш ичагидан махсус тайёрланган тор – «қушпай» тортганлар. Ҳозирда эса «қушпай» ўрнига капрон ип (жилка) боғламоқдалар. Бунда, албатта, дўмбирага хос овоз (тембр) ўзгариши аниқ.

Дўмбира сўзининг луғавий маъноси хусусида мутахассислар турлича фикр билдирадilar. Аммо айрим илмий манбаларда бу сўзни «танбур», яъни қадимий «танбура» сўзи билан боғлиқлиги ҳақида маълумотлар бор. Дарҳақиқат, «танбура» икки сўздан иборат бўлиб, «тан» – дил, кўнгил, «бура» эса тирнаш, эзиш маъносидадир. Дўмбира ҳам айнан ана шундай таъсир кучига эга бўлган чолғудир.

Экспедиция раҳбари Малик Муродов Ражаб бободан бир неча бор: «Қодир бахши яхши юриптими?» – деб сўради. Ражаб бобо: «Алағда бўлманг, Қодир эртан келади» – деб жавоб берди. Малик Муродовнинг айтишича, мана шу Ражаб бобо «Зўр бахши бўлсин» деб, ёш Қодирнинг оғзига «ушқирган» экан.

Дарҳақиқат, эртаси куни Қодир бахши «лагер»имизга келди. Ўттиз ёшлар атрофидаги, қотмадан келган, ўрта бўйли Қодир бахши Малик Муродов билан қуюқ сўрашди. Бундан бир неча йил аввал Малик ака Қодир бахшидан халқ ижодиётидан айрим намуналарни ёзиб олган экан.

Даврамизда суҳбат, асосан, дўмбира хусусида кетди. Ниҳоят, Қодир бахшидан бирор куй чалиб беришни сўрадик. Маълум бўлишича, Қашқадарёда дўмбира чалишни «дўмбира чертиш» дейишар экан. Воҳа халқи дўмбирани, айниқса, дўмбира куйларини бағоят қадрлайди.

Қодир бахши илтимосимизни эшитгач, бир дам тараддулланиб турди ва ер остидан Ражаб бобога кўз ташлади. Ражаб бобо, розилик аломати сифатида, бошини оҳиста тебратиб кўйди. Зотан, Ражаб бобо Қодир бахшига хешгина эмас, балки етук дostonчи шоир сифатида устоз ҳам экан. Одатда, устоз қошида ўлтирган шогирд унинг розилигисиз бирор иш қилмаслиги лозим. Акс ҳолда, у устозни менсимай, ўзини кўз-кўз қилган ҳисобланади. Қодир бахши шу удумга амал қилган ҳолда, қовушигина дўмбирани кўлига олди ва бағрига босиб, бир-бир черта-черта, қулоқларини эҳтиётлик билан бураб созлади-да, кўзларини ним юмиб шитоб билан черта бошлади. Шу ондаёқ кўз олдимиздаги бог манзараси сўниб, тасаввуримизда ўтмиш тасвири намоён бўлди:

«...Мана... Тиккага келган қуёш отлиқ навкарлар қуршовида кетаётган аёл-эр бандилар бошига сахийлик билан оташ пуркайдди... Уларни тезроқ юришига қистаб дағдага қилаётган навкарлар остидаги отлар тинимсиз ҳансирайди... Сувсизликдан лаблари қақраган бандилар ҳам отларга жўр бўлиб ҳансирайдилар... аммо уларнинг ҳансирашларига оналари этагидан ушлаб ке-

таётган ёш болаларнинг «су-в-в-в» деган илтижолари, илдам юришга ҳаракат қилаётган келинлар бағридаги гўдакларнинг ожиз инграшлари қўшилиб, ҳасратли бир нола пайдо қилади... Мана, узоқдан бир манзил кўринди... энди бандилар ўз ихтиёрлари билан қадамларини тезлатдилар...»

Бу пайт Қодир бахшининг ўнг қўли дўмбира торлари узра шитоб билан югурар, атрофга эса дўмбира овози эмас, балки отлар ва бандилар оёғи остидан чиқаётган товуш ёки бурксиб кўтарилаётган чанг янглиғ буралиб-буралиб тараларди.

«...Мана... бандиларга қишлоқ ўртасидаги ҳовуздан сопол товоқларда сув тарқатилди ва дам олмоқ учун ўлтиришга рухсат берилди. Деярли қуролсиз лақайлар устига ҳужум қилиб, «зафар қучган» амир Музаффар асрий чинор остидаги супага ёнбошлаши замон, унинг ҳузурида қишлоқ оқсоқоли қўл қовуштириб, бош эгди... Дарҳол чинни товоқларда чалоб тортилди. Амир чалобни мириқиб симирди-да, оқсоқолда:

– Бу жернинг номи не? – деб сўради.

– Каганни¹, – жавоб берди оқсоқол.

– Иби, қиззиқ! – деди амир сийрак соқолини сирли силаб. Сўнгра бир дам ўйланиб тургач, сардорни имлаб ёнига чорлади ва у билан шивирлашиб сўзлаша бошлади...»

Бу пайт Қодир бахши кўлидаги дўмбира ваҳимали, айни пайтда, сирли товуш билан янграй бошлади. Сўнгра бир муддат мунгли нола таратиб турди-да, бирданига фиғон чекди:

«...Мана... Навкарлар бараварига бандилар устига ташландилар ва шавқатсиз равишда оналар бағридан гўдакларни тортиб ола бошладилар. Аёлу эр бандилар фарёди фалакка етди. Айниқса, гўдаклар чинқириги юракларни пора-пора қилди...»

Бу пайт Қодир бахши чертаётган дўмбира тўлиқ маънода ўкириб-ўкириб йиғлашга тушди... Гўё дўмбира Қодир бахши измидан буткул чиқиб, ўзича нола тортаётганга ўхшар, Қодир

¹ Қашкаларё воҳасида чўпонлар подадаги совлик қўйларни соғаётганларида уларнинг қўзичоқларини зўрлик билан она эмчагидан айириб, икки козик орасига тортилган арконга майда чилвирдан тугилган бўйинбоққа солиб қўяр эканлар. Шу арқон «кеганни» дейилиб, қўзиларни бўйинбоққа солиш «қўзи кеганлаш» дейилар экан.

бахши эса унинг дастасини ўзига торта-торта ўз измига олишга уринарди...

«...Мана... Навкарлар чинқириб йиглаётган болаларни йўл ўртасига уюб, худди каганниланган қўзичоқлардек, чилвир билан ўзаро боғлаб чиқдилар... Амир ва унинг ёнидагилар буларни хотиржам кузатиб турардилар... Кутилмаганда қишлоқ четидаги отлиқ наварлар ваҳшиёна қийқириб, болалар устига от суриб кела бошладилар... Аммо... Аммо отлар болаларни босмадилар, балки улар устидан сакраб, айримлари эса қамчи зарбини тисанд қилмай, улар ёнидан ўқдек учиб ўтдилар...»

Бу пайт Қодир бахши кўлидаги дўмбира ваҳшатли нола тортар, гўё чавандознинг кўлидан чикиб кетишга уринаётган тулпордек, ўқтин-ўқтин олдинга талпинарди...

«...Мана... Навкарлар елиб-югуриб хонадонлардан кигиз олиб чиқиб, ваҳимадан қотиб қолган болалар устига таиладилар... Отлиқ наварлар энди бу томонда от қўйдилар. Надоматлар бўлсинки, бу гал отлар сезмай қолдилар... Сезганлари эса оёқларини кўтараман деб болалар устига қулаб тушдилар... Буни кўриб турган оналар ҳам бирин-кетин унсиз қулай бошладилар...»

Бу пайт дўмбира куйламас, балки инграр эди. Бу ингров гўё Қодир бахшининг чертиши оқибатида эмас, балки дўмбира қорнидан ўзидан-ўзи сизиб чиқаётганга ўхшарди...

«...Мана... Қулаган отлар типирчилаб ўринларидан туришга уринишар, улар остидаги кигизларнинг четларидан эса болаларнинг қирмизи қони сизиб чиқарди... Бу вақтда бандилар орасида турган бир бахшининг қалбидан худди болалар қони янглиз бир нола сизиб чиқарди...»

Шу пайт Қодир бахши худди дармони қолмагандек, кўлини даста юқорисидан пастга тортиб, хорғин бир ҳолда «ох...» дея, дўмбира чертишдан тўхтади...

Кейинча ўша куй «Лақай жилаш» («Лақайлар йиғиси») номи билан бахшилар орасида кенг тарқалган экан. Қашқадарё ва Сурхондарё бахшилари бу куйни ҳамон зўр маҳорат билан чертиб келмоқдалар. Айни пайтда бу иккала вилоят бахшилари бисотида бунга ўхшаган куйлар бисёрдир.

Эътиборлиси шундаки, бу куйларда таъсирлилик билан тас-
вирлилик мужассам топган. Шунингдек, «Лақай жилаш»га ўх-
шаш ҳар бир куйнинг ўз тарихи ва ўзига монанд номи бор.

Бахшилар бу куйларнинг айнаи шу сифатларини эътиборга
олиб, дўмбира жўрлигида «Гўрўғли» каби дostonларни халк ора-
сида куйлайдилар. Бу куйлар умумий ном билан «Бахши куй»
деб юритилса-да, улар ниҳоятда пухта ишланган бўлиб, ҳар бири
етук мусиқий асардир.

Бахшилар дoston мазмунига мутаносиб ҳолда бу куйларни
ўз ўрни-ўрнида чертадилар. Одатда, улар: «Кўшиқ (яъни, дос-
тон) айтаётганимда дўмбира мени етаклайди» – деб, дўмбира-
га эҳтиром кўрсатадилар ва ўз миннатдорчиликларини дoston
ижросидан олдин айтиладиган «Дўмбирам» термасида изҳор
киладилар.

Хулоса қилиб айтганда, халқимизнинг қадимий чолгуси бўл-
миш дўмбира ва унинг куйлари деярли ўрганилган эмас. Со-
ветлар даврида мусиқашунос Файзулла Кароматов бу мавзуга
қўл уриб, 1962 йили «Узбекская домбровая музыка» («Ўзбек
дўмбира мусиқаси») китобини нашр эттирди. Олим бу китоб-
га олтмишдан ортиқ дўмбира куйларининг нотасини киритган.
Шунингдек, бу китобга бу куйларнинг кимдан ва қачон магнит
тасмасига ёзиб олингани илова қилинган. Ҳозирча бу китоб маз-
кур мавзудаги ягона ноёб асардир. Аммо, афсуски, у ўзбек ти-
лида чоп этилмаган.

Шундан бери бу мавзу фольклоршунос тадқиқотчилар эътибо-
ридан четда қолиб келмоқда. Ваҳоланки, дўмбира ва унинг куй-
ларида халқимизнинг буюк мусиқий истеъдоди ва яратувчилик
фаолияти тажассум топгандир. Шунинг учун, бугунги истиқлол
замонида дўмбира ва унинг куйларига халқимиз маънавияти-
нинг асрлар оша бизга етиб келган бебаҳо дурдонаси сифатида
қарамогимиз лозим.

Камол
ОЧИЛОВ

(1936 йилда туғилган)



Камол Очилов 1936 йил Қашқадарё вилояти Қариши тумани Тахтапул қишлоғида туғилган. Қаришидаги икки йиллик ўқитувчилар тайёрлаш институтининг филология факультетида (1955–57), Қариши давлат педагогика институти (ҳозирги Қариши давлат университети)нинг тарих-филология факультетида (1957–62) ўқиган. Қариши давлат педагогика институти Ўзбек адабиёти кафедрасида ўқитувчи, катта ўқитувчи, доцент лавозимларида ишлаган (1962 йилдан). Ҳозир Қариши давлат университети Ўзбек адабиёти кафедраси доценти. «Ўзбек халқ меҳнат қўшиқлари (Қашқадарё вилояти материаллари асосида)» мавзусидаги номзодлик диссертациясини ёқлаган (1974). Унинг «Қалдирғочни қўндирган қўшиқ» (1992) «Ўзбек аллалари» (1994, ҳамк.), «Шунқор болам, хўйё-хўй» (2003, ҳамк.), «Меҳнат қўшиқлари бадиияти» (2006) каби китоблар муаллифи.

ХИРМОН ЯНЧИШ ҚЎШИҚЛАРИ

Дехқонларнинг турмуш тарзини, тирикчилигини ифода этувчи поэзиясининг бир турини хирмон янчиш жараёнини ифода этувчи ва шу пайтда айтиладиган «хўп майда» қўшиқлари ташкил этади. «Хўп майда» қўшиқнинг номи бўлиб, янчилиши лозим бўлган пояни-хирмонни майда қилиб янчувчи ишчи ҳайвонларга қарата айтиладиган ҳар бир мисра охиридаги нақорот (майда-а,

майда-эй) ва хирмон янчишни ифодаловчи ҳўп сўзидан келиб чиққан. «Хўп майда» қўшиқлари ўзбек, қирғиз, тожик халқлари орасида кенг тарқалган. Хирмон янчишда айтиладиган бундай қўшиқларни ўзбеклар: «Хўп майда», «Майда», «Майдагул»; қирғизлар: «Ўп майда», тожиклар: «Майдо» деб юритадилар.

Ҳар бир халқнинг оғзаки бадиий ижоди асарларида уларнинг турмуши, тирикчилиги, урф-одати, дунёқараши, руҳияти, ижтимоий ҳаёт воқеаларига бўлган муносабатлари ўзига хос йўл билан ифодаланган. «Хўп майда» қўшиқлари биргина ўзбек халқи орасида мавжуд бўлиб қолмасдан, балки қадимдан бир-бирлари билан алоқадор бўлган туркий халқлар орасида ҳам кенг тарқалган.

Шу нарсани қайд қилиб ўтиш керакки, ҳўпга қўшилиши лозим бўлган ҳайвонларнинг номлари алоҳида-алоҳида айтилмайди, улар қайси турдаги ҳайвон бўлишидан қатъи назар ҳаммаси галагов дейилаберади. Лекин илгари галагов қилинган ҳайвонларнинг ҳар бири тизилиш ўрнига қараб маълум атама-лар билан аталган бўлиши керак: Маҳмуд Кошғарий «Оп хирмон янчувчи ҳўкизларнинг ўртасидаги ҳўкиз (арғуча)» деб изоҳлайдики, бу нарса ҳам бизни юқоридагича ҳукм чиқаришга ундайди. Демак, Маҳмуд Кошғарий замонида ҳўпга қўшилган ҳўкизларнинг ўртасидаги ҳўкизни айни замонда шу меҳнат жараёни номи билан оп (хўп) деб аталган. Замонлар ўтиши билан галаговдаги ҳайвонларнинг ҳар бирининг номи унутилиб кетган бўлиши керак. Лекин айрим жойларда ҳозир ҳам галаговга биринчи боғланган ҳайвонни (хўп чўп ёнидаги ҳўкиз, ё от, ё эшакни) хўп деб аташ учрайди. Демак, деҳқонлар орасида ҳозир ҳам хўп сўзи икки маънода, яъни хирмон янчиш жараёни ва ҳўпга қўшилган биринчи (бош) ҳайвон номи маъносида қўлланилади.

Галагов қилинган ишчи ҳайвонларга хирмон похolini текислаб борадиган махсус тўқилган «чақар» боғлаб қўйилади. «Хўп майда» қўшиғининг мавзуси донли экинларни янчиб олиш бўлиб, мазмуни эса, инсон меҳнатини қадрлаш, ҳосилни хирмондан кўпроқ кўтариш умиди билан тўладир. Масалан:

*Қизилини қирдай қил, майда-ё, майда,
Саригини сойдаи қил, майда-ё, майда.*

Бизгача сақланиб келган «Майдагул» кўшиқларининг матни жуда қадимий бўлмаса ҳам, уларда қадим тушунчаларнинг изларини кўриш қийин эмас. Жумладан, буғдойни тўғридан тўғри ўз номи билан атамай «қизил» деб аташ офатлардан сақлаш, учун сир тутиш тушунчаси билан боғлиқ бўлган. Худди шундай тушунча халқнинг жонли сўзлашув нутқида ҳам қўлланади. Масалан, ёмчи уруғидан булган Шарофат ходима (асли исми Шарофат Тўраева, Қарши туманидаги Тахтапул кишлоғида яшаган. Тўйларда ходималик қилади) тўйга тўёна олиб келган хотинларга қарата: «Қизилинг қирда, саригинг сойда, оқинг ангарда пишиб ётган пайтда силани тўйма-тўй санғиб юришларингга қарайла», – дейди. Демак, бу фикр орқали Шарофат ходима ҳосилнинг ғарқ пишганини, йиғим-терим палласи яқинлашиб қолганини айтмоқчики, бу ҳол халқнинг жонли сўзлашув нутқида ҳозирги кунга қадар ҳам сақланиб келмоқда. Кўриниб турибдики, қирдаги қизил – ўрилмай пишиб ётган буғдой; сойдаги сариқ эса, олма, ўрик, узум, умуман, ҳўл мева; ангардаги оқ эса пахтадир. Бу ўринда, албатта, оқ, қизил, сариқлар аслий сифат бўлиб, бу ерда отлашиб келмоқда.

Майда кўшиқлари алоҳида-алоҳида мустақил тўртликлардан ташкил топган бўлиб, уларга майда-ё майда-эй, майда-а каби турли эмоционал сўзлар, қийқириклар, нидолар қўшиб куйланади. Булар шу кўшиқнинг нақорати ҳисобланиб, олдинги мисраларга қараганда бирмунча чўзиқроқ талаффуз қилинади ва ўзига хос мустақил куй касб этиб, барча бандлар учун ҳам характерли бўлган мазмуний белгиларни яхлит композицион қурилмага жойлаштира олувчи бош пафос қиёфасида гавдалана бошлайди. «Майда-ё майда», «Ҳайда-ё, ҳайда», «Ҳа хўп, ҳайда-ё, ҳайда», «Хўп майда-ё, хўп майда» каби эмоционал қичқириклар мустақил характерга эга бўлган тўртликларга композицион яхлитлик касб этади, бу мавзудаги мустақил тўртликларни гўё бир шеър остида бирлаштиргандай бўлади.

Айрим ҳолларда эса:

*Хўп майда-ё, хўп майда,
Буғдойи менга фойда,*

*Сомони сенга фойда,
Ҳа, ҳайда-ё, ҳа, ҳайда,*

– каби бутун бир тўртлик ҳар банддан кейин такрорланиб қолиши мумкин. «Майдагул» кўшиқларида янги шунга ўхшаш эмоционал қичқирикларнинг мўл-кўллиги унинг жанр хусусиятларини белгиловчи муҳим бир атрибутдир. Баъзан бундай эмоционал қичқириклар ҳар бир мисра охирида қўлланила берган, улар ҳар мисрага кўшиб ижро этила берган:

*Сакраб-сакраб ҳайдагин, майда-ё, майда,
Саксонлар ботмон келсин-ой, майда-ё, майда,
Йўртиб-йўртиб ҳайдагин, майда-ё, майда,
Юз ботмонлар келсин-ой, майда-ё, майда.*

Хўкизларнинг сакраб-сакраб, йўртиб-йўртиб юришида, албатта, руҳий ҳолат ифода қилинади. Ишчи-ҳайвонларнинг сакраб, йўртиб юришида, бир томондан, деҳқонларнинг хурсандчилиги ифодаланса, иккинчидан меҳнат ритми ҳам аниқ сезилиб туради.

Майда кўшигида, асосан, якка ҳолда бир хил куйни баланд овоз билан ижро этилади. Ғаллакорликка техниканинг кириб келиши билан кўп меҳнат талаб қиладиган, нисбатан ибтидоий даражадаги хўпга ҳожат қолмади. Натижада «Хўп майда» кўшиқларини ижро этиш ҳам камая борди. Шунга қарамай, «хўп майда» кўшиқлари 30–40-йилларда Қашқадарёнинг айрим узоқ ва тоғлик туманларида ижро этилиб турганки, буни кўшиқларни билувчиларнинг ўзлари тасдиқлаб турибдилар.

Хўп кўшиш айрим узоқ қишлоқларда ҳозирги кунда ҳам мавжуд. Бу илгарилардагидек катта хирмон эмас, балки деҳқонларнинг томорқасидан келадиган ҳосилни янчиш учун қилинган кичик-кичик хирмонларда ижро этиляпти. Бундай хўпларда ҳозир ҳам унинг кўшиқларидан айтилади. Бу энди илгаригилардек оммавий характерда эмас. Б. Х. Кармишева-нинг юқорида кўрсатилган асарида (67–70-бетлар) янги даврда яратилган майда кўшиқлари мавжудлиги ҳам қайд этилади:

*Майдаласам ярашар,
Қизлар қирдан қарашар.
Чаққон-чаққон юринглар,
Раис акам уришар¹.*

Янги майдалар анъанавий қўшиқлар заминида яратилган бўлиб, асосан, тўртликдаги кейинги мисралар янгиланган. Демак, хўп меҳнатининг йўқолиши билан унинг қўшиқларини ҳам ижро этиш камайиб йўқолиб бормоқда.

Майда қўшиқлари маълум тартиб билан айтилади. Юқорида майда қўшиқларини мустақил тўртликлардан иборат дедик. Лекин бундай мустақил тўртликларни олдинма-кейин айтишда маълум бир тартиб мавжуд, яъни майдалар орасида аввал, ўртасида кейин айтиладиган бандлар бор. Хирмон янчиш дастлаб хўп ҳайдаётган деҳқон ўзидан маълум куй оҳанги яратиб, сўзсиз хиргойи қила беради. Аста-секинлик билан қўшиқда мурожаат этади. Хирмон янчишда аввал куйидаги тўртликни куйлаш одат тусига кириб қолган:

*Чў-ҳе, галаговим, ҳайда,
Хирмонни қилгин майда.
Ишни тамом қилмасанг,
Танингга тиним қайда.*

Шуни қайд этиш керакки, хирмон янчаётган деҳқон шу жараёни ифода қиладиган қўшиқни тўқий олмай ёки эслай олмай қолса, қайси дostonдан, термалардан бўлишидан қатъи назар, бирор парча ёхуд хаёлига келган шеърлардан намуналар айтиб майда қўшиғига аралаштириб юбора беради.

Кўпгина жойларда майда билан бир қаторда ишқий-лирик қўшиқлар ҳам ижро этилган. Баъзи жойларда эса, соф майда умуман ижро этилмаган, балки хўп жараёнида фақат севги лирикасидан намуналар куйланган. Бундай намуналар кўп ҳолларда юмористик, ҳазил-мутойиба характерига эга бўлган. Бироқ ҳар бир банд «майда-эй майда» нақорати била куйланган.

¹ Кармышева Б. Х. Об узбекских трудовых крестьянских песнях // Труды Академии наук Таджикистана. Т. СХХ. – Ходженд, 1960. – стр. 70.

*Қарқарангга қора мунчоқ тақайин-эй, майда-эй,
майда-а-а,
Сен келганча уйгинангни боқайин-эй, майда-эй,
майда-а-а,
Сен келганча уйгинангни боқмасам-эй, майда-эй,
майда-а-а,
Уйгинангни орқасидан ариқ бўлиб оқайин-эй,
майда-эй, майда-а-а,*

* * *

*Баланд тоғдан қор юмалаб келади-ей,
Паранжига ўралиб ёр келади-ей.
Паранжига ўралсанг, ўралмасанг,
Ой юзингга ким харидор бўлади-ей.*

Деҳқон эрта баҳордан бошлаб қилган меҳнатининг натижасини, яъни ҳосилини кузда йиғиб олади. Куз палласи деҳқон хўжалиги учун ҳосил тўйи ҳисобланади. Майда кўшиқларида мана шу ҳосил тўйи деҳқоннинг бир қадар хурсандчилигини, кўтаринки руҳини ифодалайди. Маълумки, ўтмишда от йигитнинг йўлдоши бўлганидек, хўкиз ҳам деҳқоннинг бирдан-бир таянчи ҳисобланган. Хўкиз билан деҳқон эрта баҳордан то кеч кузгача тирикчилик учун зарур бўлган барча ишларни бажарган ва шу ваяндандирки, деҳқон ўзининг тирикчилигида ғоят муҳим роль ўйнаган ҳайвонни дўст билиб ниҳоятда қадрлайди. Хўкизнинг барча хатти-ҳаракатлари, одимлаб юришидан тортиб, товуши, шохи, кўзи, думи, туёқлари ва терисига қадар алоҳида бир ҳикмат касб этиб кўринади унга:

*Айри-айри туёгинг, майда-ё, майда,
Олмос бўлсин жонивор, майда-ё, майда.
Сени боққан деҳқонлар, майда-ё, майда,
Зармаст бўлсин, жонивор, майда-ё, майда.*

Хирмон ҳосилининг кўпроқ кўтарилишини сабрсизлик билан кутган деҳқон ўзининг дастлабки байтларини ғаллакорликнинг

асосчиси ва деҳқоннинг ҳимоячиси, афсонавий пир – Бободехқон пойқадамига умид билдириш билан бошлайди:

*Майда-майда морисин, майда-ё, майда,
Дон сомондан арисин, майда-ё, майда.
Айни саҳар бўлганда, майда-ё, майда,
Бободехқон дорисин, майда-ё, майда.*

Бободехқон кўшиқларда ижобий образ бўлиб, ривоятларда айтилишича, чош созуриш пайтида (тонг саҳарда, яъни ёмон, ювуксиз кишиларнинг юзига кўз тушмаслиги учун) хирмонга разм солар эмиш. Натижада хирмонга барака кириб ботмон-ботмон ҳосил кўтарилар экан. Хирмон кўтариш турли расм-русумлар, одатлар билан боғлиқ. Шундай одатлардан бири Деҳқонободда «Тоҳир қилиш» дейилади. Бу одатга кўра тозаланган чошни қопларга жойлаб бўлгач, бир ховуч чори ғаллани Хизр ёки Бободехқон ҳақи учун чош кўтарилган жойга сепиб юборилади.

Деҳқончилик ишлари билан боғлиқ бўлган одатларда Бободехқон культига нисбатан бўлган эътиқод диккатга сазовордир. Деҳқончилик ишини бошлашдан олдин Бободехқон хотирасига атаб бир неча маротаба ис чиқарганлар, турли хил ноз-неъмат таомлар тайёрлаганлар. «Бобо» термини қариндошлик маъносида эмас, балки биринчи деҳқон, кишиларни деҳқончиликка ўргатган культ сифатида қабул қилинган. Шунинг учун ҳам қишлоқ хўжалиги билан боғлиқ бўлган барча одатлар Бободехқонга бағишланади. Дастлабки ерга ташланадиган уруғ (барака уруғи)ни кекса деҳқон сочиб берган. Чошнинг остига Хизр кесак, барака кесак, тоза кесак кўйиб устидан чошни уйганлар. Тозаланган чошни қопларга жойлаш олдидан бир ғалвирни тўлдириб олиб, чошнинг атрофига айлантириб тўкиб чиққанлар.

Шу билан чошнинг белини (чошнинг бели боғланди) боғлармиш, ҳосилни ёмон кўздан асрар эмиш. Чошдан бир ғалвир буғдой ҳақулла-худо ҳақи олиб, юзини қибла (ғарб) томонга ўгириб чошдан четга сепиб юборган, кейин уни супириб

олиб ўзидан қолган бирон кишига ҳады қилган. Қопларга жойланган ғалладан бир ҳовуч олиб Хизр ҳақи деб сурпа ўрнига сочиб юборган. Похолни ғалла ҳолига олиб келгунга қадар бўлган барча ишлар, асосан, хўкиз меҳнати туфайли бажарилган. Хўкиз деҳқончиликда муҳим ишлаб чиқарувчи курул бўлганлиги туфайли у культ объекти ҳисобланган.

Деҳқончиликни бошлашдан олдин хўкизнинг шохини мойлаш маросими ўтказилган. Ерни хайдашга олиб чиқиладиган хўкизларга бир бўлакдан нон бериш, унинг шохига тумор тақиш одатлари бўлган.

Турли хил расм-русумлар, одатлар билан ўз хўкизини улуглаб, сиғиниб келган деҳқон майда қўшиқларида ҳам унга алоҳида эътибор берган. Хўкиз хўпда асосий фигура эканлиги уқтирилади. Унинг шохи ҳам, кўзи ҳам, териси ҳам, думи ҳам, туёғи ҳам, қисқаси, барча аъзолари чиройли, бадийий гўзал мисраларда мақталади:

*Айри-ақри туёққа, майда-ё, майда,
Айри наҳал ярашар, майда-ё, майда,
Жилвираган қулоққа, майда-ё, майда,
Тилла сирға ярашар, майда-ё, майда.*

*Майдалар қил, кўрайлик, майда-ё, майда,
Шохингга гул ўрайлик, майда-ё, майда,
Шохингдаги гулларни, майда-ё, майда,
Яхшиликка жўрайлик, майда-ё, майда.*

*Шохларинг бор шотидай, майда-ё, майда,
Турқинг тўриқ отидай, майда-ё, майда,
Танглайингни чибори, майда-ё, майда,
Муллаларнинг хатидай, майда-ё, майда.*

Қаранг, ўтмишда оддийгина иш ҳайвонининг қадр-қиймати деҳқон учун нақадар юксак, бебаҳо бўлган. У ҳатто ўз хўкизининг қулоғига олтин сирға тақиб қўйишни ҳам лозим кўради. Халқ оғзаки ижодида энг яхши доимий безак – эпитетлар (олтин, ол-

мос) хўкиз ва унинг айрим аъзоларига нисбатан қўлланилади. Шохига гулдаста боғлашга ҳам тайёр туради. Баъзи жойларда хўкизнинг шохига чалпак ўрайди. Баъзан эса, худди ёш болани ардоқлаб овунтиргандай турли хил таърифу тавсифлар билан далда бериб, хўкизнинг огирини енгил қилишга, дардига малҳам бўлишга интилади. Чунки деҳқон унга оғир меҳнатда ҳамдарди, эзгу ниятлар йўлидаги бирдан-бир суянчиғи сифатида қарайди. Хўкиз таърифида бадиий тасвирнинг ҳар бир компоненти деҳқоннинг орзу-умидларидан дарак берувчи бадиий восита сифатида гавдаланади.

*Майдажсон келар ҳали, майда-ё, майда,
Иргалар майдам толи, майда-ё, майда.
Юлгундан қамчи қилаб, майда-ё, майда,
Юлдузга минар ҳали, майда-ё, майда.*

Хўп майда қўшиқларида ишчи ҳайвонларни ҳатто инсон киёфасига киритиб тасвирлаш ҳам табиий бир ҳолдир:

*Майдалашган тилинг бор, майда-ё, майда,
Хипчагина белинг бор, майда-ё, майда.
Хипчагина белингни, майда-ё, майда,
Кимга сотар кўнглинг бор, майда-ё, майда,*

Юмористик оҳанг билан тўқилган бу мисралар заминида «қизим сенга айтайин, келиним сен эшит» қабилида вужудга келтирилган нозик кинояни фаҳмлаб олиш қийин эмас. Бу ўринда деҳқон ўзининг, ҳатто, маҳбубага бўлган муносабатларини ҳам хўкизи орқали, билвосита ифодалаётирки, бошқа бирон касб эгаси косиб ёки бўзчи мазкур маънодаги ҳазил-мутойибани шу таҳлитда ифодаламаслиги турган гап.

Куйидаги мисралар машаққатли меҳнатдан қутулолмай, азо-бу уқубатда қолган деҳқонларнинг руҳий аҳволини мажозий киёфалантирувчи хўкиз таърифидир. Хўкиздан айрилиш деҳқон учун энг оғир мусибатдир. Агар у касал бўлиб қолса ёки ўлса деҳқон худди фарзанд доғини бошдан кечираётгандай мунгли оҳангда куйлайди:

*Қарчигайни қочириб, майда-ё, майда,
Боги қолди билакда, майда-ё, майда.
Ўн тўрт яшар майдамнинг, майда-ё, майда,
Доғи қолди юракда, майда-ё, майда.*

Баъзи бир меҳнат кўшиқларида амалдорларнинг халқ бошига солган беҳисоб азоблари, моддий, яъни капсан олиш, сув ҳақи, эшонга назр бериш каби одатлар аччиқ киноялар, истехзоли иборалар ва ҳатто қарғиш аломати сезилиб турадиган мисралар орқали қораланади:

*Қағ-қағлаган қарғалар, майда-ё, майда,
Қамишини кўрса йўрғалар, майда-ё, майда.
Уйинг куйгур дарғалар, майда-ё, майда,
Хирмонни кўрса йўрғалар, майда-ё, майда.*

Бу кўшиқнинг бошқа бир вариантыда:

*Уйинг куйгур дарғалар, майда-ё, майда,
Очкўз итдай йўрғалар, майда-ё, майда, –*

дейиладики, бу ҳар хил юлғичларга қарши ўтли нафратдир.

Деҳқон ўзининг ниҳоятда силласи қуриб, ишга ярамай ночор қолган вақтлардаги кайфиятларини ҳам кўшиқ орқали тасвир эта билган. Айниқса, иш ҳайвони билан уни ишлатувчи шахс ўргасидаги зиддият ҳайвон ва унинг эгаси тилидан тўкилган кўшиқларда очик-ойдин кўриниб туради:

От:

*Нимча кепакни иласан,
Уни емасдан оласан.
Мен ишга ярамасам,
Сўнгра очликдан ўласан.*

От эгаси ҳайвоннинг ҳолига ачинади:

*Қатра лойдан ўтолмай,
Балчиққа ботган отим.*

*Олти ботмон арпа еб,
Тиррайиб қотган отим.*

Майда қўшиқларининг айримларида ўлпон, солиқлардан юраги олинган деҳқоннинг кийган кийими-бўзлиги алоҳида таъкидланиб ўтилади. Иккинчи томондан, ўроқда йўқ, машоқда йўқ, хирмонда ҳозир бўладиган савлатли амалдорларнинг номи нафрат билан тилга олинади. Чунки улар хирмонга чанг солиб, чопининг баракасини учиради, деҳқонларнинг бутун нонини яримга қилади, хонавайрон этади. Бундай қўшиқларда деҳқонларнинг руҳидаги шодлик, ҳазил-мутойиба кайфиятини ғзаб, зорланиш, порозилик эгаллайди. Қўшиқдаги деҳқон нутқи аччиқ заҳарханда билан йўғрилган бўлади. Деҳсалган деҳқон ҳўкизига ёлворади, хирмонни тезроқ янчишга ундайди. Ўлпончиларни кўриб унинг ранги ўчади, уларни қаттиқ қарғайди:

*Майда қилгин уватиб, майда-ё, майда,
Сенсан менинг қувватим, майда-ё, майда.
Келаётир эшонлар, майда-ё, майда,
Дасторини чуватиб, майда-ё, майда.*

Майда қўшиқларида деҳқон ва деҳқончилик янгроқ овозда куйланади. Уларда келажак умидлари, яхши кунлар тилаги, тўй-томоналар орзуси баралла янграйди. Қўшиқларда деҳқоннинг орзулари – хирмон янчилгандан сўнг тўй қилиш, яна хурсандчиликка етишиш, рўзгорини, бола-чақаларини шод қилишдан иборатдир.

Майда қўшиқлари бадиий жиҳатдан гўзал асарлар. Улар кўпинча биринчи, иккинчи ва тўртинчи сатрларининг ўзаро кофияланиб келиши билан ажралиб туради. Тўқ кофиялар деҳқон овозини борича оҳангдош қилиб баланд овоз билан айтилишига мослаштирилган. Бундай ҳол куйлашда ажойиб мусиқийликка олиб келган.

Майда қўшиқларининг деярли кўпчилиги ўн икки бўғиндан ташкил топган бўлиб, $4 + 3 + 3 + 2 = 12$ шаклдаги бўғинларда гуруҳлашган. Бу ҳол ҳўп майда қўшиқларининг чўзиб ижро этиш имкониятини туғдиради. «Хўп майда» қўшиқларининг

бундай куйланиши ишчи-хайвонларнинг меҳнати – хирмонни янчиш жараёнидаги юриш ритми билан ички боғланишни ташкил қилади:

*Майдам ўзи яхши қиз, майда-ё, майда,
Майда билан тўқмиз биз, майда-ё, майда.
Бугдой кирса омборга, майда-ё, майда,
Тўй қиламиз эрта куз, майда-ё, майда.*

«Хўп майда» қўшиқларида бадий тил воситаларидан ўхшатиш кўп учрайди. Қўшиқлардаги ўхшашлик кўпроқ муболағали бўлиб, бу ҳолнинг қўшиқларда кўпроқ учраб туриши шу қўшиқнинг мусиқийлигини, оҳангдорлигини ва бадий қимматини оширади:

*Сағрларинг супадай, майда-ё, майда,
Майда қилган упадай, майда-ё, майда,
Қорнигинанг қозондай, майда-ё, майда.*

Ёки:

*Киприкларинг сўзондай, майда-ё, майда,
Ангиллаган овозинг, майда-ё, майда,
Мулла айтган азондай, майда-ё, майда.*

Баъзан муболага ҳаддидан ошириб юборилади. Шунда ҳам ишчи-хайвон кўкларга кўтарилиб мақталади, унга деҳқон ўзининг муҳаббатини изҳор этади. Деҳқоннинг тасавурида унинг думлари гўё кизларга сочбов, косадек кўзлари, олмосдек туёқлари эса бекларнинг қалқони бўлиб туюлади. Бундай ажойиб бадий гўзал тасвир фақат халқ ижодигагина хосдир:

*Узун-узун думларинг, майда-ё, майда,
Қизларга сочбов дейишар, майда-ё, майда.
Коса-коса туёгинг, майда-ё, майда,
Бекларга қалқон дейишар, майда-ё, майда.*

Ўхшатиш хўп-майда қўшиқларида -дай, -дек, -дан ташқари -симон сингари, каби сўзлари ва баъзан -б қўшимчаларсиз ҳам юзага чиқади:

*Хўп-хўп десам хўпади, майда-ё, майда,
Хаамири тез кўпади, майда-ё, майда.
Тангасимон қашқангдан, майда-ё, майда,
Хўпни оғанг ўпади, майда-ё, майда.*

Шуни ҳам қайд қилиб ўтиш керакки, «Хўп майда» кўшиқларининг баъзиларида бечора, камбағал деҳқонларнинг ночор аҳволи, турмуш тирикчилигидаги танқислик, айна киш кунларида қийналиб қолиш хавфи доим уни эзиб келаётганлиги аниқ сезилиб туради. Қуйидаги бир тўртликда камбағал деҳқонлар ҳаёти реалистик равишда тасвирланган:

*Создир найим товуши, майда-ё, майда,
Адо бўлди кавушим, майда-ё, майда.
Отам берган чориқни, майда-ё, майда,
Кийишамиз овушиб, майда-ё, майда.*

Ёки:

*Икковора бир иштон, майда-ё, майда,
Қандай чиқамиз қишдан, майда-ё, майда.
Топганимиз етмайди, майда-ё, майда,
Билсанг қишки емишдан, майда-ё, майда.*

«Хўп майда» кўшиқларида ҳазил, мутойиба йўли билан айтилган тўртликлар ҳам борки, уларда деҳқон ўзининг кўнгилхушлигини ифодалайди.

«Хўп майда» кўшиқларида ҳаёт билан поэзия ўртасидаги бирлик, тўғрироғи, меҳнаткаш халқ оммасининг руҳий аҳволи, турмуши бевосита ўз ифодасини топган. Демак, «хўп майда» кўшиқлари кишиларнинг ижтимоий ҳаётга, одамга, меҳнатга бўлган муносабатларини акс эттиради, уларнинг эзгу ниятларини ифодалайди.

Шиловқул
АШУРОВ
(1938–2006)



Шиловқул Ашуров 1938 йилнинг 2 февralида Бухоро вилояти Шофиркон туманида туғилган. «Ўзбек халқ достонларида юмор ва сатира яратилиши йўллари ва воситалари» мавзuida номзодлик диссертациясини ёқлаган (1967). Бухоро давлат педагогика институтининг тарих-филология факультетида ўқиган (1954–59). ЎзР ФА Тил ва адабиёт институтининг Фольклор бўлимида (1959–71) лаборант, кичик илмий ходим, Тошкент ирригация ва қишлоқ хўжалигини механизациялаш инженерлари институтида катта ўқитувчи (1971–74), доцент (1974–79), Тошкент давлат маданият институти доценти (1979–81), тайёрлов бўлими декани (1981–82), Тошкент вилоят давлат педагогика институти доценти (1985–90), Тошкент давлат Маданият институти доценти (1991–2003) вазифаларида ишлаган. «Балогардон» (1964), «Шохдорхон» (1967), «Бўтакўз» (1967) достонларини, «Олтин олма» (1966) эртақлар мажмуасини наирга тайёрлаган. «Ўзбек халқ достонларида сатира ва юмор» (1974) номли монографияси чоп этилган. 2006 йил Тошкент шаҳрида вафот этган.

ХАЛҚ ДОСТОНЛАРИДА ҚАХРАМОН-ТИТАНЛАР ОБРАЗИ ТАЛҚИНИГА ДОИР

Халқ ижодчилари ички ва ташқи душманларга, табиатнинг ёвуз кучарига қарши курашда турли-туман йўллардан, усуллардан фойдаланганлар ва хилма-хил образлар яратганлар. Улар табиат ҳодисалари ва жамиятдаги воқеаларнинг туб сабабларини тушуниб етмаганликлари туфайли турли мифологик образлар жамиятнинг иқтисодий ривожланиши қуйи даражада эканлиги ва ундаги башарият билимининг жуда заифлиги натижасида келиб чиққан бўлсалар-да, инсон куч-қудратини ўзларида мужассамлантириб, одамларни ҳаётни севишга ундаганлар, ҳар қандай кийинчиликларни енгишга руҳлантирганлар.

Халқ бундай мифологик ва афсонавий қахрамонларни баъзан маънавий, баъзан жисмоний енгиб, ўз ақл-заковатинининг кучи билан ўзига бўйсундиради, хизмат қилдиради. Шундай титан-мифологик образлардан бири Ҳасан Кўлбардир. У, аслида, дев бўлиб, Гўрўғли уни ўзига бўйсундириб олган эди. Бу мифологик образ «Гўрўғли» туркумидаги достонларнинг қўпчилигида иштирок этади. У енгилмас, Гўрўғлининг энг яқин сафдошларидан бири сифатида намоён бўлади. Гўрўғлининг бошига оғир кун тушса, содиқ дўст сифатида мададга тайёр туради. Ҳасан Кўлбарнинг ёрқин бадий портрети атоқли ўзбек халқ шоири Фозил Йўлдош ўғли қуйлаган «Интизор» достонида берилади. Ҳасан Кўлбар жуда баҳайбат, катта бир махлук. Лекин инсоннинг ақл-заковати олдида таъзим қилади, доимо унинг хизматида бўлади. Унинг асосида табиатнинг қандай ёвуз кучи бўлмасин, барибир инсон уни ўзига бўйсундиради, хизмат қилдиради, деган ғоя этади. Ҳасан Кўлбар зўр, ҳайбатли бўлишига қарамай Гўрўғли уни ўзига тобе қилиб олган. У бир неча марта Чамбилни ташқи душманлардан ҳимоя қилади ва душман бошига бало тошини ёғдиради. «Интизор» достонида тасвирланишича, Авазни излаб борган Гўрўғли асир тушганида Ҳасан Кўлбар ёрдамга етиб келади. Йўлда у жувознинг ўқини халачўп қилиб эшагини қистаб боради. Одатда, у жангга киришдан олдин қорнини тўйдириб, нашасини чекиб қолар эди. Бунда ҳам Соқибулбулга овқат тайёр-

лашни буюради. Ҳасан Кўлбарнинг Исфиҳонга келиш овозасини эшитган душман аскарлари ваҳимага тушиб қолади:

*Кўринг, Соқи бангни пишишиб бўлди,
Ўтириб шу замон бангни ийлади.
Катта сархонага буни жойлади.
Устига чўғ босиб бангни тортди,
Тогнинг газалари тутун бўп кетди,
Бу тутуннинг иси ҳар ерга етди,
Бангнинг иси ётган лашкарга борди,
Исфиҳон лашкари қилтиллаб қолди.
«Чамбилнинг Кўлбари бунда келди», деб,
Эшитганлар бунда гумон қиб қолди¹.*

Биргина «бангнинг иси ётган лашкарга борди» иборасининг ўзи Ҳасан Кўлбарнинг келганидан хабар беради ва душманни ваҳимага солади. Ҳасан Кўлбар душманни енгиб, Авазнинг аммаси деб Абжўш кампирни Кўлбарига солиб қайтади, чунки Авазхон Интизорни излаб бораётганида, унга Гуржистондаги бева қолган юз йигирмага кирган аммасини келтириб беришини ваъда қилган эди. Гўрўғли ҳам, ўз аскарлари билан омон-эсон қайтиб келади. Ҳасан Кўлбар Исфиҳонда Гўрўғли ва унинг йигитларини ҳалокатдан саклаб қолади, чунки Исфиҳон подшоси уларни ҳийла билан асир олган эди.

«Холдорхон» достонида Ҳасан Кўлбарнинг яна бошқа сифатлари намоён бўлади. Қрим хони Холдорхон Гўрўғли ва унинг йигитларини меҳмонга чақиради. Гўрўғли Аваз, Ҳасан Кўлбар ва яна бир йигитни юборади. Бунда Холдорхон хафа бўлади. Лекин келтирилган овқатларнинг ҳаммасини Ҳасан Кўлбарнинг бир ўзи еб қўяди. «Наҳотки подшоларинг шунча камбағал бўлса, бир мени тўйдиролмайди-ю, яна бутун Чамбилни чақирибди», деб Холдорхондан хафа бўлади.

Ҳасан Кўлбар урушга ҳеч қандай қуролсиз киради. Ё катта чинорни томири билан суғуриб душманга отади ёки душманнинг

¹ «Интизор», «Нурали». Ўзбек халқ ижоди. Кўп томлик. «Тошкент» бадиий адабиёт нашриёти, 1964. – 180-бет.

катта бир гуруҳини гавдаси билан босиб ўлдиради. Унинг жанг майдонидаги ҳаракати шундай тасвирланади:

*Қулочини катта ёйиб мард Кўлбар,
Бир тўпини йиғиб, бобонг йиқилди...
Бари чиқиб кетди деди, остимдан...
Томоша қинг эр Кўлбарнинг ишини,
Бир ўзи босибди беш юз кишини.
Ортида қолганлар типирлай деса,
Ҳасан Кўлбар кўрсатади мушитини...¹*

Ҳасан Кўлбар характери янада чуқурроқ очиш учун унга қарши душманнинг баҳайбат кучлари қарши қўйилади. Холдорхоннинг Афсарзанги деган полвони Ҳасан Кўлбар билан олишади. Ҳасан Кўлбар зўр, баҳайбат, паҳлавон бўлмасин, Афсарзанги ҳам ундан қолишмайди: «Унинг бўйи минордай, кўли кенг панжали шоҳ чинордай, оғизлари ўзи қулаб қолган ғордай, калласи тепадай, қулоқлари супрадай, қорни мол қамаб қўядиган хонадай, эгинлари беш-олти одам чой ичиб ўтирадиган супадай, бурни тегирмоннинг новидай, жағлари тегирмоннинг катта қопидай, лаби ариқнинг рошидай, тишлари омоннинг тишидай, кўзлари нонвойнинг тандиридай, билаги синган харидай баччағар экан»². Бундай муболаға билан тасвирланган Афсарзанги, биринчидан, гротескли кулги туғдириб сатирага замин бўлса, иккинчидан, унинг уруши адолатсиз уруш бўлганлиги учун ҳам у ўлимга маҳкум этилган, шунинг учун ҳам у енгиледи.

Ҳасан Кўлбарнинг мақсади – Гўрўғлига яхшилик қилиш. Бу ўз-ўзидан шундай бўлиб қолган эмас, албатта. Бу инсоннинг кучқуввати, ақл-заковати ҳар қандай ёвуз кучни енгишга, маҳв этишга ва ўзига хизмат қилдиришга кодир эканлигини кўрсатади. Мард Гўрўғли Эрам богидан Юнус Пари билан Мисқол Парини Чамбилга олиб келгач, уларни кўриқлаб юрадиган Ҳасан Кўлбар ҳам Чамбилга келади ва Гўрўғлининг хизматида бўлади.

¹ «Холдорхон» қўлёзма. А. С. Пушкин номидаги Тил ва адабиёт институти фольклор сектори архиви. Инв № 898. 28-бет.

² Ўша асар, 50-бет.

Ҳасан Кўлбар қанчалик зўр, кучли ва баҳайбат бўлмасин, барибир инсон каби чуқур тафаккур қилиш, фикр юритиш қобилиятига эга эмас. Унинг характерида бачкана хатти-ҳаракатлар, бир гапга тез ишониш каби примитив ҳолатлар учрайди. Бу эса уни кулгили аҳволга солиб қўяди. Достонларда юморни юзага келтиришда восита бўлади. Унинг бундай хусусияти ҳақида В. М. Жирмунский ва Ҳ. Т. Зарифов «Ўзбек халқ қаҳрамонлик эпоси» китобида шундай деб ёзадилар: «Ҳасан Кўлбар жасур ва олижаноб, аммо ўзининг болаларча соддадиллиги ва соф кўнгиллиги билан ажралиб туради. Шу сабабли у ёлғонга ҳам тез ишонади ва унинг жанговар саргузаштларида доимий йўлдоши бўлмиш Авазнинг истеҳзосига нишон бўлади. Шундай ҳолларда унинг кекса ёшига гротескли зид бўлган севги ишларидаги шўхлиги комик ҳолатга тушиб қолишига сабаб бўлади»¹.

Ҳасан Кўлбарнинг ҳар бир хатти-ҳаракати уни комик ҳолатга солиб қўяди. Бу унинг характеридан келиб чиқади. Унда Чамбил юртига, Гўрўгли ҳамда унинг йигитларига нисбатан ҳеч қандай ғаразлик йўқ. У ўз характерининг юмшоқлиги, юриш-туришининг соддалиги билан кишига бевосита кулги туғдиради. У жуда кўп овқат ейди. Шунинг учун уялганидан доимо чўлда яшайди ва чўл ҳайвонларини тутиб таътил қилиб юради. У баҳайбат бўлишига қарамай, жуда тез чопади. Чопганда чўл ҳайвонларидан ўтиб кетмаслик учун икки кўлида тоғнинг икки чўққисини кўтариб юради. Тез чопганлиги ва чакқонлиги учун ҳам уни баъзан Ҳасан Чопсон деб атайдилар.

Достонларда тасвирланишича, бундай баҳайбат кишилар учта: Ҳасан Кўлбар, Ҳасан Чопсон, Ҳасан Якдаста. Улар уч хил вазифани бажарса ҳам, уларга учта индивидуал образ деб қараб бўлмайди. Достонда, асосан, фақат Ҳасан Кўлбар катнашади. Қолганлари эса эслатиб ўтилади, холос. Асосий ном берилиб, унинг барча белгилари, хусусиятлари бир образга мужассамлаштирилади. Эпосда бундай усуллар анчагина учрайди. Бу алоҳида текширишни талаб қилади. Масалан, Пўлкандан ёзиб олинган «Юнус пари» достонида учта – Ҳасан Кўлбар, Ҳасан Чопсон, Ҳасан Якдаста катнашади. Аммо асосий ўринда Ҳасан

¹ Жирмунский В. М., Зарифов Х. Т. Узбекский народный героический эпос. – М., ГИХЛ, 1947. Стр. 217–218.

Чопсон берилган, дostonда воқеанинг кейинги ривожланиши эса, Ҳасан Кўлбарнинг чаққонлиги билан боғланади.

Гўрўғли Юнус парини олиб келгач, катта тўй беради. Ҳасан Чопсон тўйга тайёрланган овқатнинг барини бир ўзи еб қўяди. Атрофига ёш хотин-қизларни тўшлаб шўх, ҳазил қўшиқлари билан уларни алдайди. Ва тўйдан олган нон-ошларини еб қўяди. Гўрўғли ҳаммага уст-бош улашганида Ҳасан Чопсонга 300 тўп газлама ҳам етмайди. У 500 қизни елкасига миндириб, Қуйи Қоф томонга кочади. Лекин Ҳасан Кўлбар уни тутиб келади. Бунда Ҳасан Чопсоннинг жуда тез чопиш қобилиятига эга эканлиги Ҳасан Кўлбар образига сингдириб юборилади. Лекин улар фақат эпизодик ролларда қатнашадилар. Асосий вазифани бажариш тўғри келганда эса яна Ҳасан Кўлбарнинг ўзи намоён бўлади. Худди шундай ҳолни Пўлканнинг «Гулнор пари» достонида ҳам кўриш мумкин. Гўрўғли Гулнор Парини олиш учун Ҳиндистонга отланади ва у ерда қийин аҳволга тушиб қолади. Унга Ҳасан Чопсон мадаккор бўлади. Гулнор парининг ёрдамида у Ҳиндистонга етиб келади, душманни енгилда Гўрўғлига қўмаклашади. Бу курашда Ҳасан Кўлбар, Ҳасан Чопсон ва Самандар дев қатнашади. Асосий воқеаларда эса Ҳасан Чопсон актив иштирок этади.

Ҳасан Чопсон характеридаги соддалик ва жаҳлнинг тез чиқиши инсонларга хос сифатлар билан берилади. У Ҳиндистонда душманни енгач, ўзига муносиб ёр ахтаради.

*Ёш деб қизларни олмади,
Чопсоннинг кўнгли тўлмади;
Кўнгилдагиси бўлмади.
Тиши тушган, ёши етган,
Тўқсон яшар, саксон яшар,
Шундай хотин топилмади.
Соқолларин тараёттир,
Семиз кампир қараёттир,
Ўзи семиз, бўксаси кенг,
Тўладан келган кампирни
Ўҳ-ўҳ деб топиб олди¹.*

¹ «Гулнор пари». – Тошкент: Ўзбекистон ССР «Фан» нашриёти, 1965. 223–224-бетлар.

Унинг топган хотинини Гулнор пари менсимайди ва киноя аралаш:

*Каллалари худди гов саватдай,
Тиши сўйлоқ, хўп қонгир бой теватдай,
Олган ёринг ўзи худди кўк итдай,
Қутли бўлсин, жезна, сулув бойбучча!¹*

деб мазхара килади. Ҳасан Чопсоннинг бу сўзга жаҳли чиқиб хотинини елкасига миндириб кетиб қолади. Бундай халқ юмори билан суғорилган эпизодлар, биринчидан, тингловчиларнинг активлигини оширса, иккинчидан, дostonни безайди, тингловчи қалбидан абадий ўрин олади ва Ҳасан Чопсон характерининг турли қирраларини очишга ёрдам беради.

Ижобий қаҳрамон ва унинг ишлари қанчалик бўрттирилиб тасвирланса, шу билан бирга, салбий кучларнинг қуввати ҳам эътиборсиз қолдирилмайди. Буни «Маликаи Айёр» дostonидаги Мақотил образида кўриш мумкин.

Авазхон Маликани излаб кетаётганида йўлда «фил минган, икки оёғи чим ерни омондай тилган, соқол-мўрти ўсиб кетган «бир одамнинг Чамбилга қараб келаётганини кўради. Бу Гўрўғли ва унинг йигитларини асир қилиб олиб келиш учун Арботин юртининг подшоси юборган баҳайбат Мақотил эди. Авазхон ундан эътиборсиз ўтолмади. Мақотил ҳам биринчи учрашишдаёқ, мақсадни айтади.

*Сафар қилиб кўрай Чамбил белини,
Вайрон қилай Гўрўғлининг элини
Арботинда шоҳдан бўлди фармонлар,
Ўлжа қилай Фирот, Аваз ўғлини.
Эшит Мақотилнинг айтган сўзини,
Олиб келсам Чамбилнинг Авазини,
Шоҳим билан ваъдалашган шартим бор,
Оламан юз бешга кирган қизини².*

¹ Ўша асар, 226–227-бетлар.

² Фозил Йўлдош ўғли, Маликаи Айёр. Нашрга тайёрловчи Ҳоди Зариф. – Тошкент: Ўздавнашр, 1941. – 29-бет.

Мақотилнинг бу монологи душман мақсадини ёрқин ифода-
лайди. Афсонавий Чамбилда халқ тинч ҳаёт кечирар эди. Аф-
рофдаги қўшни юрт подшолари эса уни кўролмасди. Бу табиий,
албатта.

Авазхон унинг мақсадини билгач, ўзини танитади. Лекин
ҳайбатли душман Авазхонни менсимайди:

*Миниб юрган чигирткадай отинг бор,
Қумирсқадай сенинг бир жасадинг бор,
Тўғри йўлга юра бергин, баччагар,
Мендан савол сўраб нима ишинг бор¹.*

Дастлаб душман ўзини катта тутади, ўзини енгилмас деб
хисоблайди. Аммо воқеанинг ривожланиши билан адолатнинг
зўр кучга эга эканлиги, унинг ҳар қандай разолатни енгити-
шга қодирлиги кўрина боради. Бу вазифани адолатли ижобий
қаҳрамон бажаради. Мақотил жангга киришдан олдин ўз ан-
лиёларидан мадад сўраб, сиғинади:

*Қани, сенинг кароматинг билайин,
Шул майдонда қўлламагин, кўрайин!
Темирдай авлиё, зўла чорёр,
Боргандан ўрнингдан бекор қилайин².*

У Авазга «Менга навбатни бериб нима қиласан, аввал сен ур!»
деб туриб олади. Авазхоннинг кистови билан барча хунарни
ишга солади, лекин ҳеч натижа чиқаролмайди. Авазхон «ило-
тилли олмос пўлатини шириллашиб филофидан суғуриб олганда,
буни кўриб Мақотилнинг «туси қочди, ранги зафарондай бўлиб
колди». Бу эпизоддаги Мақотилнинг руҳий ҳолати биринчи уч-
рашувдаги портретига контраст қўйилади ва уни бевосита кул-
гили ҳолатга солиб қўяди. Бу кулги Мақотилнинг ўлими билан
яқунланади ва у сатира ўқининг қурбони бўлади. Бунда бахши
усталик билан ўз бадиий маҳоратини намойиш қилган, чунки

¹ Ўша асар, 28-бет.

² Ўша асар, 32-бет.

душман Мақотилнинг руҳий ҳолатини аниқ бера олган. Бахши Мақотил образини салбий-сатирик образ даражасига кўтариб, гротескли муболағалар ёрдами билан унинг характерини тасвирлайди ва уни салбий тил даражасига кўтариб, жамият ҳаётидаги вайронгарчиликларни юзага келтирувчи адолатсиз урушлар билан боғлаб умумлашма ясайди.

Шу нарса характерлики, инсон қиёфасида тасвирланадиган ёвуз кучларга, агар у салбий образ сифатида талқин этилса, инсондаги барча салбий хусусиятлар бўрттириб берилади. Достонларда тасвирланишича, инсон ва унинг адолатли ишларига қарши курашда, ҳатто девлар ҳам қатнашади, улар инсон каби гапирарди, ҳаракат қилади. Инсон уни ўзига бўйсундириб олгандан сўнг у инсонга хизмат қилади. «Гўрўғли» туркумидаги достонларда қатнашадиган Оқ дев, Қора дев, Боймоқ дев ва шунга ўхшаш жуда кўп ҳайбатли дев-маҳлуқлар Гўрўғлидан кўрқади, унинг номини эшитса, баданида қалтироқ пайдо бўлади. «Маликаи Айёр» достонидаги Шоқаландар – Гўрўғлининг Малика учун Туркистон шаҳрига бораётганда йўлда энг катта ғов Боймоқ девнинг доимо «Балонинг қадами етса-етсин, Шоқаландарнинг қадами етмасин» деб дуо қилиши бежиз эмас, албатта. Гўрўғли қуйи кофининг орқасидаги Эрам боғидан Юнус Пари билан Мисқол парини олгандан кейин барча девлар ундан кўрқиб қоладилар. Улар шундай зўр кучга эга бўлишига қарамай, инсон олдида кулгили ҳолга тушадилар, юмор, сатира ўқига нишон бўладилар. Бу уларнинг характеридан келиб чиқади, албатта. Чунки улар чуқур фикр қилиш қобилиятига эга эмас. Буни «Балогардон» достонидаги биргина эпизодда кўрса ҳам бўлади. Авазхон балога учраб қолгач, ўзини Балогардон деб танитади ва куч синашади. Шунда Балогардон – Аваз ўртадаги шартларни бажариб, уни ўзига қарам қилиб олади ва жуда оғир машаққатли вазифаларни унинг ёрдамида бажаради, Чамбилни яна шод-хуррам, қувончга тўлдиради. Отаси Гўрўғли ва бошқаларнинг таҳсинига сазовор бўлади. Халқ бундай образлардан ўз мушқулени осон, оғирини енгил қилиш учун фойдаланган, албатта.

Сафарбой
РЎЗИМБОВ

(1942 йилда туғилган)



Сафарбой Рўзимбоев 1942 йил 14 мартда Хоразм вилояти Қўшқўпир тумани Қўҳна зей қишлоғида туғилган. Хоразм давлат педагогика институти (ҳозирги Урганч давлат университети)да ўқиган (1960–65). Армия сафида хизмат қилган (1965–66). Хоразм давлат педагогика институти Ўзбек адабиёти кафедрасида ўқитувчи бўлиб ишлаган (1967–75). Шу олий ўқув юртининг Ўзбек филологияси факультети декани (1975–84, 1992–96), шу университетнинг факультетлараро ўзбек тили ва адабиёти кафедраси мудири (1996–2007), Хоразм Маъmun академияси Тил ва адабиёт бўлими мудири лавозимларида хизмат қилган (1998–2001). Ҳозир Ўзбек адабиёти кафедраси профессори вазифасида ишлайди. «Хоразм воҳаси ўзбек халқ кўшиқларининг гоаявий-бадий хусусиятлари» мавзусидаги номзодлик (1972), «Хоразм халқ достонларининг спецификаси, типологияси ва поэтикаси» мавзусида докторлик (1990) диссертациясини ёқлаган. «Хирмондали», «Ошиқ Ғариб ва Шоҳсанам» (1981), «Бозиргон» (1969), «Аваз уйланган» (1980), «Хурлиқо ва Ҳамро» (1981), «Ошиқ Ғариб ва Шоҳсанам» (1970) достонларини ёзиб олган. «Хуришиди жаҳон келди» (1987), «Анаш халфа» (2006) номли фольклор тўпламлари нашр қилинган. «Гўрўели» туркумига мансуб Хоразм достонлари ҳамда «ошиқ» туркумига кирувчи достонларни нашрга тайёрлаб, чоп эттирган. «Хоразм достонлари» (1985), «Ошиқ» туркуми достонларининг гоаявий-бадий хусусиятлари» (1987), «Авесто» мифологияси ва Хоразм фольклори» (2001, ҳамк.) каби монографиялар муаллифи.

ХОРАЗМ ВОҲАСИДАГИ ЭТНОГРАФИК ЖАРАЁНЛАР ВА УЛАРНИНГ ЭПИК АНЪАНАЛАРГА ТАЪСИРИ

Хоразм қадимги маданият ўчоқларидан бири бўлиб, воҳадаги этнофольклористик жараён ниҳоятда мураккаб характерда кечган. Ижтимоий-иқтисодий, сиёсий ва маданий шарт-шароитлар халқ эпосида муайян даражада ўзининг бадиий ифодасини топганлиги сабабли уни ушбу ҳудудда яшаган халқнинг тарихий-этнографик жараёнидан ажратиб текшириш мумкин эмас, албатта.

Маълумки, Хоразм ҳудудида қадимги замонлардан бери жуда кўп уруғ-жамоалар, халқлар яшаган. Турли ижтимоий-иқтисодий шарт-шароитлар натижасида воҳадан кўплаб қабилалар бошқа ҳудудларга кўчиб кетган ёки жуда кўп уруғ-қабилалар кўчиб келиб, ўрнашиб қолган. Шу сабабдан Хоразм аҳолисининг этник таркиби ниҳоятда мураккабдир. Бу борада жуда кўп илмий адабиётларда муҳим маълумотлар қайд қилинган¹.

Хоразм аҳолиси ҳақида гапирар экан, Н. Н. Муравьев «Сартлар бу ўлканинг қадимий истиқомат қилувчилари»² деб ёзади.

¹ Рашид ад-Дин. Сборник летописей. – Баку, 1957; Муравьев Н. Путешествие в Туркмению и Хиву 1819–1820 годах. – М. 1822; Вамбери А. Путешествие по Средней Азии. – М.: 1865; Аристов Н. А. Заметки об этническом составе тюркских племен и народностей и сведения об их численности – СПб, 1887; Материалы по истории туркмен и Туркмении. Т. I. – М.–Л.1939; Т. 2. М.–Л. 1938; Бартольд В. В. Сочинения. т. I. Туркестан в эпоху монгольского нашествия. – М. 1963; Толстов С. П. Древний Хорезм. – М.: Изд-во МГУ, 1948; Агаджанов С. Г. Очерки истории Огузов и туркмен Средней Азии IX–XII вв. – Ашхабад, 1969; Снесарев Г. П. Реликты до мусульманских верований и обрядов у узбеков Хорезма. – М. 1969; его же: Хорезмские легенды как источник по истории религиозных культов Средней Азии. – М. 1983. Задыхина К.Л. Узбеки дельты Аму-дарьи. Археологические работы Хорезмской экспедиции 1945–1948 г. – М. 1952; Абдуллаев Ф. Хоразм шевалари. – Тошкент, 1961; Сазонова М. В. Традиционное хозяйство узбеков Южного Хорезма. – Л.: 1978; Традиционная культура народов Передней и Средней Азии. – Л.: 1970; Буятов З. М. Государство хорезмшахов-ануштегинидов. – М. 1986; Толстова Л. С. Вопросы ранней этнической истории народов Приаралья. – Нукус. 1984; Толстова Л. С. Исторические предания Южного Приаралья. // К истории ранних этнокультурных связей народов Арало-каспийского региона. – М. 1984 ва бошқалар.

² Муравьев Н. Указ. Соч. стр. 85.

Сартлар ҳақида гапирилганда, илгариги ўтроқ ҳаёт кечирувчилар¹ ёки шаҳарликлар² назарда тутилган. «Сартлар – қадимги Хоразм цивилизациясининг юксак дехқончилик маданиятини ўзида ташиган воҳадаги эроний тилли аҳолининг қадимги авлодларидан иборат»³. Улар воҳадаги маданий ҳаётни шакллантириш ва тараққий эттиришда етакчи роль ўйнаганлар. «Тарихий манбаларнинг маълумотларига кўра, Хоразмнинг туб аҳолиси маиший турмуши, маданияти ва маълум даражада тилининг ўзига хослигини, энг янги тадқиқотларнинг тасдиқлашича, Олтин Ўрда хонлиги ва Хоразмда чиғатой турклари ҳукмдорлиги даврларида ҳам саклаб қолган эди»⁴. «У сўғд тилига қариндош бўлиб, ҳозирги осетин тилига жуда яқин»⁵. Қадимги хоразмийлар тили, С. П. Толстовнинг таъкидлашича, Шимолий Эрон тиллари гуруҳига киради. Хоразм воҳасига туркий халқларнинг келиб ўрнаша бошлаши эрамизнинг дастлабки йилларига тўғри келсада, ерли аҳоли билан уларнинг фаол аралашуви жараёни, асосан, X–XI асрларга тўғри келади. Ўша пайтларда воҳанинг теварагида кўпроқ ўғуз турклари ўрнашган бўлиб, Берунийнинг маълумот беришича, «Хоразм подшолари... ўз чегараларидан ўғуз туркларини қувар ва мамлакатлари атрофини улардан ҳимоя қилар эдилар»⁶. Кейинчалик эса уларга аста-секин мамлакат ичкари-сига ўрнашиш учун руҳсат берилади. «Эрамизнинг XI асрида Хоразмшоҳ Хорун ўғузларга Хоразмда ўрнашишга ижозат берганда уларнинг ерларини Гавҳора канали бўйлаб белгилайди»⁷. Бу ерлар эса ўша пайтларда мамлакат пойтахти билан ёндош жойлар бўлган. «Хоразмда ўғуз элементларининг фаоллашишига энг сўнгги хоразмшоҳлар шажарасининг ўғуз-салжуқ доираларидан чиқиши ҳам катта ёрдам берди»⁸.

¹ Аристов Н. А. Указ. Соч. стр. 157.

² Зарубин И. И. Список народностей туркестанского края. – Л. 1925, стр. 15.

³ Задыхина К. Л. Узбеки дельты Аму-дарьи. стр. 332.

⁴ Сазонова М. В. К этнографии узбеков Южного Хорезма // Археологические и этнографические работы хорезмской экспедиции 1945–1948. стр. 250.

⁵ Толстов С. П. Арх. и этног. раб. хор. экспедиции 1945–1948 гг., стр. 44.

⁶ Беруний А. Танланган асарлар. Т. I. – Тошкент, 1968, 281–бет.

⁷ Неразик Е. Е. Об этнических процессах в раннесредневековом и средневековом Хорезме. // Материалы к этнической истории населения Средней Азии. – Ташкент, 1986, стр. 42.

⁸ Снесарев Г. П. Объяснительная записка к карте расселения узбеков на

Ўғуз туркларининг эрон тилли аҳоли билан чапишувининг кучайиши тилнинг туркийлашиш жараёнини ҳам тезлаштирди. Ўзини сарт номи билан атовчи субстрат аҳоли туркий тилли суперстрат билан бирлашиб, янги бир этник гуруҳни шакллантиради. Бу гуруҳ вакиллари ҳозирги ўғуз лаҳжасида гапирувчи ўзбек аҳолисининг энг қадимги авлодлари бўлиб, улар Хоразмнинг жанубий томонига жойлашганлар. Шунинг ҳам унутмаслик керакки, ўғуз туркларини туркманлар билан аралаштирмаслик лозим. Чунки «Ўрта асрлар ўғузлари ва туркманлар жуда яқин бўлсалар ҳам, бироқ бутунлай ягона бир халқ бўлмаганлар»¹. Зотан, «Жанубий Хоразм ўзбеклари генетик жиҳатдан ўғузларнинг йирик бир қисмини ташкил қилиб, Хоразм тупроғида, Сирдарёнинг қуйи оқимларида, Орол денгизи ва Амударё ёқаларида жуда қадимдан яшаб келганлар, асрлар давомида турли-туман этник гуруҳлар билан аралашганлар, шаҳар ҳаётини яратишда иштирок қилганлар. Туркманлар эса ўғузларнинг бошқа бир гуруҳини ташкил қилиб... тил томондан юқорида зикр этилган ўғузлардан анча фарқ қилганлар»². Шу нарсани ҳам таъкидлаш жоизки, «Хоразм воҳасидаги ўзбек аҳолиси ўзининг этник келиб чиқиши жиҳатидан бир хил эмас. Улар шимолий ва жанубий ўзбекларга бўлинадилар»³. Воҳанинг шимолий қисмида кипчоқ гуруҳ шева вакиллари истиқомат қилишади. Бу аҳолининг кўнғирот, қиёт, кипчоқ, қангли, хитой, жалойир, ос каби уруғлари Хоразмда XI асрдан бери яшаб келади. Уларнинг уйғур, найман, дўрман, манғит, нукус, тома, масит, кулон, олчин сингари уруғлари эса воҳага XVI аср бошларида келиб ўрнашганлар⁴. Бу аҳолининг XI асрдан бери яшаб келадиган уруғлари турли даврларда Хоразмнинг ичкарасига кўчирилиб, субстрат аҳоли билан тўла ассимиляциялашиб,

территории Хорезмской области конец XIX – нач. XX в. // Хозяйственно-культурные традиции народов Средней Азии и Казахстана. – М. 1975. стр. 91.

¹ Агаджанов С. Г. Очерки истории огузов и туркман Средней Азии. IX–XIII вв., стр. 6.

² Абдуллаев Ф. Хоразм шевалари, стр. 245–246.

³ Сазонова М. В. Традиционное хозяйство узбеков Южного Хорезма, стр. 8.

⁴ Снесарев Г. П. Объяснительная записка..., стр. 83–85.

Ўғузлар таркибига кириб кетганлар¹. XVI асрда кўчиб келган аҳолининг шимолий ҳудуддаги уруғлари эса ўзларининг тил хусусиятларини, уруғ номлари ва кўпгина урф-одатларини ҳозиргача сақлаб келмоқалар. Шу сабабли бу уруғларга мансуб бахшиларнинг дoston куйлаш анъаналарида ҳам муайян ўзига хосликлар сақланиб қолган.

Шундай қилиб, Хоразмнинг туркийлашиш жараёни XI асрлардан бошлаб интенсив равишда ривожланиб борди. XVI асрдаги Дашти қипчок ўзбекларининг кириб келиши билан бу жараён яқунланиб, форсий тил «XVI асрда Хоразмда деярли бутунлай сахнадан тушиб қолади»².

Воҳадаги тарихий-этнографик жараён Шимолий Эрон, Жанубий Озарбайжон, умуман, Олд Осиё мамлакатлари билан шу даражада чамбарчас боғланганки, бу этнографик аралашувлар, ўзаро ижтимоий-иқтисодий алоқалар, фольклор асарларида ўзининг ўчмас изларини ҳозиргача сақлаб қолмоқда.

Оролбўйи халқларининг Кавказдаги халқлар билан этногенетик алоқадорлигини қадимдан келаётган уруғ ва топонимик номлар ҳам яққол кўрсатади. Масалан, баёт, овшар, чавулдур, саёт ва бошқа қатор уруғ номлари турк, озарбайжон, туркман, шунингдек, Олд Осиёда истиқомат қилувчи бошқа қатор халқларнинг этник таркибида учрайди³. Ўз навбатида бу уруғ номлари Хоразмда ҳам мавжуддир. Дарвоқе, «Баётлар, саётлар, қармишлар, таганлар, авшарлар, жувондирлар, жангатинлилар, пичоқлилар, қоражинлилар, алилилар каби генетик жиҳатдан ўғуз қатламига алоқадор аҳоли гуруҳлари воҳадаги қадимги маҳаллий аҳолини туркийлаштиришда турли даврларда, турли даражада иштирок этган қадимги уруғларнинг авлодлари бўлиб туюлади бизга»⁴.

Бундан ташқари, биз тилга олаётган ҳудудларда ўзаро муштараклик касб этувчи кўпгина топонимлар ҳам учрайди. Маса-

¹ Неразик Е. Е. Об этнических процессах..., стр. 35.

² Толстов С. П., По следам древнехорезмийской цивилизации. – М.-Л.: изд. АН., 1948, стр. 319.

³ Еремеев Д. Е. Этногенез турок. – М. 1971, стр. 84.

⁴ Снесарев Г. П. Объяснительная записка... стр. 92.

лан, Хоразмдаги Навхос топоними Осетияда энг кўп таркалган¹. Шимолий Осетиядаги Моздок шахри билан алоқадор бўлган Маздакхон шахри ўрта асрларда гуллаб-яшнаган қалъа бўлган². Шунингдек, Хонқа туманидаги Мадир, Хива туманидаги Шайхи Машад қишлоқлари ҳам ҳозирги Афғонистондаги Машҳад ва Мадер шаҳарлари билан қадимий алоқадорликка эга эканлиги шубҳасиздир. Чунки, «маҳаллий ахборотчиларнинг айтишлари-ча, мазкур қишлоқ аҳолиси қачонлардир Мадер ва Машҳаддан келиб қолган кишиларнинг авлодидир»³. Л. С. Толстованинг ёзишича, Кавказортининг қатор туманларида матиен номидаги қабилалар яшаган⁴. Мазкур қабилалар ҳам этногенетик томондан Хоразм билан боғланиб кетади. Мунис ва Огаҳийлар «Фирдавс ул-икбол» асарида Ҳазорасп яқинида Мўтиён қишлоғи борлиги ҳақида маълумот беришади⁵. Бинобарин, уруғлар, қабилалар, топонимик номлардаги муштаракликлар Олд Осие халқлари билан Оролбўйи халқларининг энг қадимги генеологик алоқаларининг акс садоси бўлиб ҳисобланади. Бу алоқадорликнинг фольклор асарларида ўз ифодасини топиши эса табиийдир.

Хоразмда яшовчи халқларнинг қадимдан бошлаб Хуросон билан бўлган алоқаси алоҳида қизиқиш туғдиради. «Тарихан ягона тарихий-маданий вилоятни ташкил этган Хоразмни Хуросондан (Шуни ҳам айтиш керакки, иккала топонимнинг этимологияси ҳам қизиқиш туғдиради) ажратиш ўзини оқлай олмайди»⁶. Бу регион Эроннинг шимолий-шарқий томони, Марв воҳаси, ҳозирги Туркменистоннинг жанубий қисми ва Афғонистоннинг шимолий-ғарбини ўз ичига олиб, унда эронийлар, курдлар, озарбайжонлар, туркманлар ва бошқа қатор халқлар истиқомат қилишган. Шу нарсани диққат марказида тутиш керакки, Хоразм дostonларида Хуросон билан боғлиқ бўлган Нишопур, Балх, Сабзавор, Лут, Марв сингари топо-

¹ Дўсимов З. Хоразм топонимлари. – Т.: 1985, 24-бет.

² Дўсимов З. Эгамов Х. Жой номларининг қисқача изоҳли луғати. – Т., 1977. 99-бет.

³ Снесарев Г.П. Хорезмские легенды... стр. 60.

⁴ Толстова Л.С. Указ. соч., стр. 52

⁵ Материалы по истории туркмен и Туркмении. Т.: 2. стр. 352.

⁶ Снесарев Г.П. Хорезмские легенды..., стр. 138.

нимлар тез-тез тилга олинади. Дархақиқат, Хоразм дostonлариди қайд этилган топонимлар асосида ҳам улкан тарихий-иктисодий, сиёсий ва маданий муносабатлар ётадики, бу борада муайян тасаввурларга эга бўлиш учун кейинги 300–400 йил ичида бўлиб ўтган айрим демографик жараёнларга қисқача назар ташлашнинг ўзи кифоядир.

Биз тилга олаётган муддат орасида Хоразмнинг жанубида яшовчи аҳоли билан туркман қабилаларининг аралашуви ва ўзаро чатишув жараёни ниҳоятда кучаяди. 1729 йилда йўмитларнинг катта бир гуруҳи Нодиршоҳ кўшинларидан қочиб, Каспий бўйларида Хива томонга кўчиб келади¹. 1735 йилда уларнинг яна бир гуруҳи Гурген, Атрак ва Болқон томондан Хоразмга кўчирилади². Кейинчалик улар Хуросонга қайтиб кетиб, 1806 йилда яна Хоразмга қайтиб келишади. Оқсарой вилоятидаги туркманларнинг имрели қабиласи Янгиарикқа кўчирилиб, қайтиб келган йўмитлар уларнинг ўрнига жойлаштирилади³. Огаҳийнинг «Риёз уд-давла» асарида ёзилишича, Оллоқулихон 1830 йилда Хуросондан туркманларнинг алили, 1836 йилда кўклан қабилаларини кўчириб келиб, Кўҳна Урганч ва Қилич Ниёзбой канали бўйларида жойлаштиради⁴. Яна шу муаллифнинг «Зубдат ут-таворих» асарида ёзилишича, 1841 йилда Раҳимқулихон 7600 оиладан иборат жамшид қабиласини Кўҳна Урганч ва Манғит ўртасига жойлаштиради. 1856 йилда жамшидлар яна Хуросонга қайтиб кетишди⁵. Хоразм хонлари Хуросон билан боғлиқ юришларида фақат туркман қабилаларинигина эмас, балки эроний қабилаларни ҳам кўчириб келтиришади. Жумладан, Оллоқулихон 1826 йилнинг апрель ойида Оқ Дарбанддан, шу йили декабрь ойида Имгондан кўпгина аҳолини кўчириб келиб, Хивага яқин жойдан уларга ер беради⁶. Натижада, Эрондан келтирилган кишилар сони тобора кўпайиб боради. Буни шу нарсадан ҳам билиш мумкинки, 1740 йилда Нодиршоҳ Хоразмни босиб олгач, Эрондан келтирилган

¹ Материалы по истории туркмен и Туркмении. Т.; 2, стр. 132.

² Ўша асар, 359-бет.

³ Материалы по истории туркмен и Туркмении. Т.; 2, стр. 370.

⁴ Ўша асар, 458, 470-бетлар.

⁵ Ўша асар, 481-бет.

⁶ Ўша асар, 434, 439-бетлар.

30000 кишини озод қилиб, Эронга олиб кетади. Бу аҳоли 40–50 йил бурун Хоразмга келтирилган эди¹. Бинобарин, Хоразм билан Хуросон ўртасидаги аҳолининг кўчиши масаласи узоқ тарихга эга ва икки томонлама характерга эга «бу жараён жуда ҳам узоқ тарихга эга бўлиб, у Ўрта Осиёнинг айрим жойларида фақат Октябрь тўнтаришидан кейингина тўхтади»². Эрон тилли бу этник суперстрат абориген аҳоли оғзаки ижодиётга алоқадор жуда кўп маънавий меросни олиб келганлар ва бу мерос маҳаллий халқнинг оғзаки меросига самарали таъсир кўрсатганлигига шубҳа қилмаса ҳам бўлади. Шу боисдан Жанубий Эрон ва Шимолий Озарбайжон билан боғлиқ бўлган Хоразмдаги эпик асарларнинг аксариятини мазкур этногенетик жараён билан узвий алоқада олиб текшириш лозим. Мана шу нарсадан келиб чиқиб айтиш мумкинки, Кавказ билан Хоразм ўртасидаги фольклор алоқалари бевосита ва билвосита характерга эга. Озарбайжон билан боғлиқ эпик сюжетларнинг айримлари Хоразмга тўғридан-тўғри Озарбайжондан кўчиб ёки кўчириб келтирилган аҳолининг маҳаллий халқ билан бевосита аралашуви натижасида ёйилган бўлса, айримлар улар билан бевосита генетик ва коммуникатив алоқаларга эга бўлган туркман қабилалари вакиллари билан бирга кириб келганлиги шубҳасиздир. Бундан ташқари, Хоразм воҳасидан кўплаб қабилаларнинг турли даврларда ғарбга томон кўчишлари масаласини ҳам назардан четга қолдирмаслик лозим.

Фольклор алоқалари масаласига қараганда шуни айтиш лозимки, этногенетик жараёнлар билан алоқадор ҳодисалар бир асос бўлса, Хоразмнинг Олд Осиё ва Кичик Осиё билан бўлган қадимий маданий-адабий алоқалари иккинчи асосни ташкил этади. Чунки Оролбўйи халқларининг Хуросон ва Кавказ халқлари билан бўлган маданий-адабий алоқалари жуда қадимий тарихга эга. С. П. Толстовнинг ёзишича, кўплаб археологик материаллар «Оролбўйининг Азовбўйи билан қадимий алоқалари мавжудлиги алан-массагет алоқаларида акс этганини тасдиқлайди»³. Бу

¹ Ўша асар, 166-бет.

² Короглы Х.Г. Взаимосвязи эпоса народов Средней Азии, Ирана и Азербайджана, М.: Наука, 1983, стр. 33.

³ Толстов С.П. Древний Хорезм, стр. 69.

алоқалар XII асрларга келиб, Хоразмшоҳ Текеш даврида жуда фаоллашади. «Жаҳон-Паҳлавон (1175–1186) Озарбайжоннинг отабеки бўлиши биланоқ у билан Текеш ўртасида дўстона муносабатлар тикланди»¹.

Маълумки, XIII асрларга келиб, Хоразмшоҳлар давлати кенг ҳудудни эгаллаб, маданий-иқтисодий томондан юксак даражада ривожланади, унинг чегараси жанубий-ғарбга қараб кескин кенгайди. «614 1217 йилга келиб Хоразмшоҳ нафақат форс Ироғини, балки Мозандарон, Аррон, Озарбайжон, Ширвон, Форс, Кирмон, Макрон, Манғишлоқ, Балх, Сижистон, Гур, Ғазна, ва Бомиённи тўлиқ ўзига бўйсундириб, Ҳиндистон чегараларига қадар етиб боради»². Мана шу катта ҳудудни ишғол қилган, жуда кўп қабил ва халқларни ўз ичига олган бу мамлакат ички томондан мустаҳкам бўлмаса-да, бир давлат ичида яшаган халқлар орасидаги алоқа-аралашувнинг, адабий-маданий яқинлашувнинг кучайишига ижобий таъсир кўрсатади. Ўша даврларда жуда кўп қўлёзма китоблар юзага келган, улар мамлакатнинг турли тарафларига олиб кетилган ва ўз навбатида, марказга бошқа жойлардан ҳам олиб келинган. Бинобарин, бу даврда адабий алоқаларнинг ривожланишига кенг имконият юзага келди. Анъанага биноан хоразмшоҳ саройида мамлакатнинг турли бурчакларидан олиб келинган олимлар, шоирлар, санъаткорлар яшаган. Улар орасида Озарбайжон ва Хуросон томондан келтирилган бахшиларнинг бўлганлиги ҳам шубҳасиздир. Негаки саройда бахши сақлаш анъанаси Хива хонлиги барҳам топгунча давом этганлиги бизга маълум³. Дарҳақиқат, Хоразмда тарқалган «ошиқ» туркуми дostonларининг дастлабки илдизларини ўша даврлардан излаш ҳақиқатга анча яқин келади. Биринчидан, уларнинг сюжет йўналиши энг қадимги, ҳатто Гомернинг «Одиссея»си билан ҳамоҳанг келувчи мотивлар билан боғлиқ бўлса, иккинчидан, бу дostonлар тилида форсий лексик қатлам сезиларли даражада сақланиб қолган. Чамаси, бу типдаги дostonлар воҳада форсий

¹ Бунятов З. М. Государство хорезмшахов-ануштегинидов, стр. 69.

² Ўша асар, 82-бет.

³ Жирмунский В. М., Зарифов Х. Т. Узбекский народный героический эпос, стр. 32.

ва туркий тилларнинг тенг мавкега эга бўлган икки тиллилик жараёнини тўла бошдан кечирган.

Хоразмда сақланиб қолган рақс санъати билан боғлиқ айрим номлар ҳам ўша давр тили билан узвий боғлиқдир. Масалан, «Лайлара бурдам» рақси номини профессор О. Мадрахимов «Лайлиро буридам – мен Лайлини ютдим» тарзида шарҳлайди.¹ «ога дором» рақсининг номи ҳам «дорад» – «эга бўлмоқ» феъли билан алоқадор бўлиб, «огам меники» маъносини беради. Кўринадики, ҳар иккала ном ҳам форсий тилга бориб тақалади. Бундай мисоллар анчадир. Н. В. Муравьев ва А. Вамбериларнинг ёзишларича, Кавказ билан Хоразм ўртасидаги алоқа XIX асрда ҳам фаол давом этган. Кўплаб кишилар савдо баҳонасида Астробод, Гилон, Астрахан каби шаҳарларга бориб, шу ерларда ўтроклашиб қолган ва айримлари кейинчалик қайтиб келган².

Бинобарин, Хоразм воҳасининг сиёсий-иқтисодий ва маданий-адабий ҳаёти қадимдан бошлаб, ғарбий ўғуз қабилалари, хусусан, туркман ва озарбайжон халқлари билан боғлиқ ҳолда ривожланиб келган. Бу ҳолат воҳанинг географик жиҳатдан жойлашиши билан ҳам боғлиқдир. Воҳада ҳозирда яшаб келаётган эпоснинг айрим мотивлари узоқ асрларга бориб тақалади. Баъзи дostonларда эрон тилли субстрат аҳоли билан алоқадор мотивлар ва урф-одатлар тез-тез кўзга ташланади. «Хирмон дали» дostonига асос бўлган қизнинг йигит билан курашиб, енгилгач, турмушга чиқиши³ мотиви, «Аваз олиб қочган» дostonидаги оташпарастлик билан боғлиқ айрим ирим-сиримлар бунга мисол бўла олади. Бундай бўлиши табиий ҳамдир. Чунки эпос «айрим архаик эртак мотивлари ва ҳаттоки мифик моделларни истифода этиш билангина чегараланмайди»⁴. Дostonлардаги бунга ўхшаш мотивлар, урф-одатлар ва қатор анистик тушунчалар билан алоқадор эпизодларни профессор Х. Г. Корогли эрон эпоси билан боғлаб, улар Ўрта Осиё халқ-

¹ Мадрахимов О. Ўзбек тилининг ўғуз лаҳжаси лексикаси. – Т., 1973. 527-бет.

² Муравьев Н. Кўрсатилган асар, стр. 170.

³ Бу мотивни С. П. Толстов сак-массагет қабилалари билан боғлайди. Қаранг: Древний Хорезм. стр. 326.

⁴ Корогли Х. Г. Взаимосвязи эпоса ..., стр. 46.

лари эпоси учун генеологик хусусият эканини таъкидлайди.¹ Лекин шу нарсани алоҳида таъкидлаш лозимки, «Гўрўғли» туркуми дostonларининг Хоразмга кириб келиши форсий тилининг тўла барҳам топганидан сўнгги даврларга, аниқроғи, XVII–XVIII асрларга тўғри келади.

X–XI асрларга келиб Хоразмдаги маҳаллий аҳолининг туркий ўғуз қабилалари, айни пайтда қипчоқ, кўнғирот ва қиёт каби бошқа кўчманчи туркий қабилалар билан фаол чатишувига киришиши субстрат аҳолининг туркийлашиш жараёнини тезлаштирди. Хоразмшоҳлар даврига келиб, Хуросон ва Озарбайжон билан бўлган маданий алоқалар янада кучаяди ва адабий алоқаларнинг ривожини учун қулай вазият юзага келади. Демак, эпос алоқаларининг бошланишини ҳам ўша даврлардан излаш лозим. Олтин Ўрда хонлиги ва ундан кейинги даврларда воҳага туркман қабилаларининг кўплаб кўчиб келиши, улардан айримларининг Жанубий Хоразмдаги (айниқса, Янгинарик худудидаги) субстрат аҳоли таркибига сингишиб кетишлари суперстрат аҳоли билан субстрат аҳолига тегишли фольклор асарларининг ўзаро синтезлашувига олиб келган. Хуросон ва Шимолий Эрондан кўчиб келган туркман қабилалари ўзларининг маҳаллий фольклори билан биргаликда Эрон, Озарбайжон фольклоридан ўзлаштирилган айрим асарларни ҳам воҳага олиб кирдилар. Мазкур қабиланинг воҳанинг ичкари қисмига жойлашган бўлаги, юқорида таъкидлаганимиздек, маҳаллий аҳоли билан чатишиб, бирикиб кетган бўлса, воҳанинг гарбий қисмида алоҳида макон тутган туркман қабилаларининг ҳозиргача ўзбеклар билан ёнма-ён яшаши, тарихий-этнографик жараёндаги турли аралашувлар, адабий алоқалар, таъсир ва акс таъсирлар Хоразмда яшовчи ўзбекларнинг маданий ҳаёти саҳифаларида сезиларли даражада из қолдирган. Хоразмда тарқалган эпик асарларнинг Ўзбекистоннинг бошқа жойларида оммалашган дostonларга ўхшамай, кўпроқ туркман ва озарбайжон дostonларига ҳамоҳанг келишининг асосий сабабларидан бири ҳам ана шунда.

¹ Мелетинский Е. М. Введения в историческую поэтику эпоса и романа. М., 1986. стр. 112.

ва туркий тилларнинг тенг мавқега эга бўлган икки тиллилик жараёнини тўла бошдан кечирган.

Хоразмда сақланиб қолган рақс санъати билан боғлиқ айрим номлар ҳам ўша давр тили билан узвий боғлиқдир. Масалан, «Лайлара бурдам» рақси номини профессор О. Мадрахимов «Лайлиро буридам – мен Лайлини ютдим» тарзида шарҳлайди.¹ «оға дором» рақсининг номи ҳам «дорад» – «эга бўлмоқ» феъли билан алоқадор бўлиб, «оғам меники» маъносини беради. Кўринадики, ҳар иккала ном ҳам форсий тилга бориб тақалади. Бундай мисоллар анчадир. Н. В. Муравьев ва А. Вамбериларнинг ёзишларида, Кавказ билан Хоразм ўртасидаги алоқа XIX асрда ҳам фаол давом этган. Кўплаб кишилар савдо баҳонасида Астробод, Гилон, Астрахан каби шаҳарларга бориб, шу ерларда ўтроқлашиб қолган ва айримлари кейинчалик қайтиб келган².

Бинобарин, Хоразм воҳасининг сиёсий-иқтисодий ва маданий-адабий ҳаёти қадимдан бошлаб, ғарбий ўғуз қабилалари, хусусан, туркман ва озарбайжон халқлари билан боғлиқ ҳолда ривожланиб келган. Бу ҳолат воҳанинг географик жиҳатдан жойлашиши билан ҳам боғлиқдир. Воҳада ҳозирда яшаб келатган эпоснинг айрим мотивлари узоқ асрларга бориб тақалади. Баъзи дostonларда эрон тилли субстрат аҳоли билан алоқадор мотивлар ва урф-одатлар тез-тез кўзга ташланади. «Хирмон дали» дostonига асос бўлган қизнинг йигит билан курашиб, енгилгач, турмушга чиқиши³ мотиви, «Аваз олиб қочган» дostonидаги оташпарастлик билан боғлиқ айрим ирим-сиримлар бунга мисол бўла олади. Бундай бўлиши табиий ҳамдир. Чунки эпос «айрим архаик эртак мотивлари ва ҳаттоки мифик моделларни истифода этиш билангина чегараланмайди»⁴. Дostonлардаги бунга ўхшаш мотивлар, урф-одатлар ва қатор анистик тушунчалар билан алоқадор эпизодларни профессор Х. Г. Корогли эрон эпоси билан боғлаб, улар Ўрта Осиё халқ-

¹ Мадрахимов О. Ўзбек тилининг ўғуз лаҳжаси лексикаси. – Т., 1973. 527-бет.

² Муравьев Н. Кўрсатилган асар, стр. 170.

³ Бу мотивни С. П. Толстов сак-массагет қабилалари билан боғлайди. Қаранг: Древний Хорезм. стр. 326.

⁴ Короглы Х. Г. Взаимосвязи эпоса ..., стр. 46.

лари эпоси учун генеологик хусусият эканини таъкидлайди.¹ Лекин шу нарсани алоҳида таъкидлаш лозимки, «Гўрўғли» туркуми дostonларининг Хоразмга кириб келиши форсий тилнинг тўла барҳам топганидан сўнги даврларга, аниқроғи, XVII–XVIII асрларга тўғри келади.

X–XI асрларга келиб Хоразмдаги маҳаллий аҳолининг туркий ўғуз қабилалари, айти пайтда қипчоқ, қўнғирот ва қиёт каби бошқа кўчманчи туркий қабилалар билан фаол чатишувига киришиши субстрат аҳолининг туркийлашиш жараёнини тезлаштирди. Хоразмшоҳлар даврига келиб, Хуросон ва Озарбайжон билан бўлган маданий алоқалар янада кучаяди ва адабий алоқаларнинг ривожини учун қулай вазият юзага келади. Демак, эпос алоқаларининг бошланишини ҳам ўша даврлардан излаш лозим. Олтин Ўрда хонлиги ва ундан кейинги даврларда воҳага туркман қабилаларининг кўплаб кўчиб келиши, улардан айримларининг Жанубий Хоразмдаги (айниқса, Янгиарик худудидаги) субстрат аҳоли таркибига сингишиб кетишлари суперстрат аҳоли билан субстрат аҳолига тегишли фольклор асарларининг ўзаро синтезлашувига олиб келган. Хуросон ва Шимолий Эрондан кўчиб келган туркман қабилалари ўзларининг маҳаллий фольклори билан биргаликда Эрон, Озарбайжон фольклоридан ўзлаштирилган айрим асарларни ҳам воҳага олиб кирдилар. Мазкур қабиланинг воҳанинг ичкари қисмига жойлашган бўлаги, юқорида таъкидлаганимиздек, маҳаллий аҳоли билан чатишиб, бирикиб кетган бўлса, воҳанинг ғарбий қисмида алоҳида макон тутган туркман қабилаларининг ҳозиргача ўзбеклар билан ёнма-ён яшаши, тарихий-этнографик жараёндаги турли аралашувлар, адабий алоқалар, таъсир ва акс таъсирлар Хоразмда яшовчи ўзбекларнинг маданий ҳаёти саҳифаларида сезиларли даражада из қолдирган. Хоразмда тарқалган эпик асарларнинг Ўзбекистоннинг бошқа жойларида оммалашган дostonларга ўхшамай, кўпроқ туркман ва озарбайжон дostonларига ҳамоҳанг келишининг асосий сабабларидан бири ҳам ана шунда.

¹ Мелетинский Е. М. Введения в историческую поэтику эпоса и романа. – М., 1986. стр. 112.

Албатта, Хоразмда тарқалган дostonларнинг барчасини ҳам озарбайжон ва туркман фольклорига алоқадор деб караш тўғри эмас. Алоқадорлари ҳам ўзбек бахшиларининг каттагина ижодий қайта ишлашлари орқали оммалашган. Шу билан бирга Хоразмнинг ўзида ҳам кўплаб эпик асарлар юзага келган ва уларнинг энг яхшилари, ўз навбатида, бошқа халқлар фольклори хазинасидан мустаҳкам ўрин эгаллаган. Жумладан, «Ошиқ Ғариб ва Шоҳсанам», «Асил ва Карам» каби дostonлар озарбайжон, «Гўрўгли» туркумига оид аксарият дostonлар эса туркман версияларига жуда яқин. Аммо «Юсуф ва Аҳмад», «Мискин ва Гулқанд», «Ошиқ Ғариб ва Ҳилола пари», «Маликаи Завриё» каби дostonларни Хоразмнинг ўзида яратилган деб айтишга етарли далилларни келтириш мумкин. Биринчидан, ушбу дostonларнинг экспозицияси Хоразм билан узвий боғлиқ, воқеалар воҳа ҳудуди доирасида харакатга киради. Иккинчидан, бу дostonлар бошқа халқлар орасида кенг оммалашмаган. Учинчидан, улар, асосан, ёзма равишда тарқалган бўлиб, қўлёзмалар ҳам хоразмлик котибларга тегишлидир.

Бундан ташқари, Хоразм дostonлари ҳақида сўз кетганда мумтоз ёзма эпоснинг, хусусан, «Ўғузнома» ва «Китоби дада Қўркут» каби ёзма эпоснинг таъсирини ҳам алоҳида таъкидлашга тўғри келади. Негаки воҳада тарқалган кўплаб дostonларнинг («Гўрўгли», «Юсуф ва Аҳмад», «Ошиқ Ғариб ва Шоҳсанам») асоси ўша манбалардаги мотив ва сюжетларга ҳамоҳанг келади.

Охунжон
САФАРОВ
(1940–2014)



Охунжон Сафаров 1940 йил 18 февралда Бухоро вилояти Шофиркон тумани Додбоғни қишлоғида тугилган. Бухоро давлат педагогика институти тарих-филология факультетида ўқиган (1956–61). Жондор туманидаги мактабда (1961–62); Бухоро давлат педагогика институти «Педагогика ва психология» кафедрасида (1962–66), «Ўзбек адабиёти» кафедрасида ўқитувчи (1967–72); катта ўқитувчи, доцент, декан, кафедра мудири лавозимларида хизмат қилган (1972–2014). «Шукур Саъдулла – болалар адиби» мавзусида номзодлик (1971), «Ўзбек болалар поэтик фольклорининг жанрий таркиби ва бадиияти» мавзусида докторлик (1986) диссертацияларини ҳимоя қилган. Профессор унвони берилган (1989). «Болаларни эркаловчи ўзбек халқ кўшиқлари» (1983), «Ўзбек болалар поэтик фольклори» (1985), «Алла-ё алла. Ўзбек халқ аллалари» (1999), «Тўй муборак, ёр-ёр. Ўзбек халқ никоҳ тўйи маросими кўшиқлари» (2000), «Бўзлардан учган газал-ай: ўзбек халқ йиғилари ва йўқловлари» (2004), «Бухорча» ва «Мавриги» тароналари: халқ ашула – рақс туркуми» (2005), «O'zbek bolalar adabiyoti va folklori. 1-kitob» (2007, ҳамк.), «O'zbekiston xalqlari etnografiyasi va folklori. Madaniyat va san'at kasb-hunar kollejlari uchun darslik» (2007, ҳамк.), «O'zbek xalq og'zaki ijodi xrestomatiyasi» (2008, ҳамк.), «Фольклор – бебаҳо хазина: сайланма» (2010), «O'zbek xalq og'zaki ijodi. Universitetlar va pedagogika institutlarining filologiya fakulteti bakalavrlari uchun darslik» (2010), «Tez aytishlar» (2010), «Chittigul. O'zbek bolalar o'yin folklori» (2010) каби илмий асарлар муаллифи. 2014 йили Бухоро шаҳрида вафот этган.

БОЛАЛАР ФОЛЬКЛОРИ

Болалар фольклори халқ оғзаки поэтик ижодининг таркибий қисми сифатида инсоният бадиий тафаккурининг илқ тонгладиёқ шакллана бошлади. Бунинг учун ҳам ижтимоий, ҳам маънавий асослар мавжуд эди. Чунки болалар ҳам ўз оналариди қаториди туриб, ижтимоий-маиший ҳаётда, хусусан, ишлаб чиқаришнинг талай жабҳаларида ўз имкониятлари ва иқтидорлари доирасиди қадим замонлардан бери қатнашиб келадилар. Катталар иморат қурса, улар ғишт, лой етказиб турганлар, катталар хирмон янчса, улар хўп ҳайдалганлар. Хуллас, катталар уюштирган турли-туман маросимларда қатнашганлар, улар қўшиқ қуйласа, жўр бўлганлар, биргалиқда рақсга тушганлар. Бундай аралашув болаларнинг ҳаёт воқеаларига ўз муносабатларини ифодалаш йўсинини ҳам ола бошлаган. Бу жараён болалар учун гоҳ ўйин тарзиди кечса, гоҳ мажбурий меҳнат шаклиди кечган: ўйин тарзиди кечганиди болалар эҳтиросларга тўлиб-тошиб, ўз завқларини жўшқин ва самимий оҳангларда қуйлаганлар; мажбурий меҳнат тарзиди кечганиди эса, огир меҳнат туфайли ҳоргин ва аламли туйғуларини ғамгин шаклиди ифода этганлар. Ўзбек болалар фольклори ана шу тариқа юзага кела бошлаган. У узоқ асрлар давомиди хилма-хил шаклиди асарлар ҳисобига бойиб борган. Бунга болалар билан бирга катталар ҳам баб-баравар ҳисса қўшганлар. Катталар бутун бир системадан иборат болаларни эркалаш поэзиясини яратганлар; болаларга мўлжаллаб ажойиб-ғаройиб эртақлар тўқиганлар; болалар зеҳнини чархловчи топишмоқлар, нутқини ривожлантирувчи тез айтишлар ижод қилганлар. Шундай жараёнда катталар болаларни тарбиялаш мақсадларини амалга ошириб пировард-оқибатда ўзбек халқ педагогикасининг асосларини ҳам яратганлар.

Болалар оғзаки ижодига мансуб хилма-хил ўйинлар ва ранг-баранг жанрди қўшиқларда болалиқнинг қалб тебранишлари, қизиқиш ва эҳтирослари, воқелиққа муносабатидаги ўзига хосликлари, психологияси балқиб туради. Болалар шулар билангина чекланмаганлар. Улар ижтимоий-тарихий тараққиёт тақозоси билан катталар репертуарига дахлдор айрим жанрди асарлар-

ни ўзлаштириб «ўзлариники» қилиб борганлар. Бугунги кунда топишмоқлар, тез айтишлар ва қўғирчоқ театрининг том маънода болаларники бўлиб қолгани ҳеч кимда шубҳа уйғотмайди. Ўйинлар, қўшиқлар, оғзаки наср, мукаллид ёки оғзаки театр тарзида тармоқланган ва ўзаро чамбарчас боғланиб, яхлит бир системага айланган ўзбек болалар фольклори шу тариқа шаклланган. Бу яхлит системани ташкил этган асарлар хилма-хил жанрлардан иборат бўлиб, уларни уч гуруҳга бўлиш мумкин.

I. Катталар ҳамиша ўз фарзандларини ўйлаб яшаганлар, меҳнат ва ижод билан шуғулланганлар. Бу жараён уларда бола ва унинг тақдири тўғрисида қайғуриш мажбуриятининг тобора чуқурлашуви тарзида кечиб, талай қўшиқларнинг тўқилишига сабаб бўлган. Айниқса, чақалокни парвариш этиш масъулияти беҳад катта бўлган. Оналар ана шу мураккаб масъулиятни зиммаларига олганлар, ўтқир заковат, тадбиркорлик, беқиёс инсоний меҳрибонлик эвазига ўзлари гоҳо тушуниб, гоҳо тушунмай, «болаларни тарбиялаб, ўстириш билан мамлакатнинг келажак тарихини ва демак, дунё тарихини ҳам тарбиялаб етиштирган»¹лар. Бу йўлда қўшиқ уларга мадаккор бўлган: болаларини қўшиқ билан ухлатганлар, йиғласа куйлаб овутганлар, эркалатганлар, ҳатто қўшиқ билан чақалокқа дахлдор маросим, расм-русмларини бажарганлар. Шу зайдда аллалар, овутмачоқлар, эркаламалар, қизиқмачоқлар юзага келган.

Шуни ҳам айтиш зарурки, аллалар, овутмачоқлар, эркаламалар, қизиқмачоқларнинг ижод этилишида барча катталар – оталар, бувилар, боболар, аммаю холалар қатнашган бўлсалар-да, барибир, оналар етакчи мавқеда турганлар. Қолаверса, ўша аммаю холалар, бувилар ҳам, аввало, она эдилар. Шу сабабли халқ оғзаки поэзиясининг ана шу намуналарини оналик фольклори тарзида умумлаштириш ва характерлаш асослидир.

Бирок, шуни ҳам айтиш керакки, оналик фольклори кенг маънодаги тушунча бўлиб, ўз қамровига фақат поэтик асарларнигина эмас, балки эртақ, латифа, реприа сингари оғзаки наср намуналарини ҳам олади. Оналик фольклорига мансуб алла, эркалама, овутмачоқ, қизиқмачоқ каби поэтик намуналарда эса, эркалаш

¹ Макаренко А. С. Ота-оналар китоби. 1-китоб. – Тошкент. 1954. 5-бет.

мотиви етакчидир. Шу мантикқа асосланиб, оналик фольклоридаги поэтик асарлар силсиласини прозаик асарлар гурухидан равшанроқ ажратиш ниятида оналарнинг эркаловчи поэзияси деб аташ маъкулроқ туюлди. Зотан, болалар фольклоршунослигида ҳам бу гуруҳ шундай номланган.

Ўз навбатида эркалаш поэзиясига мансуб намуналар ижро мақсади, ўрни ва бола ёши, савиясига кўра икки гуруҳга ажралади. Биринчи гуруҳга мансуб кўшиқлар боланинг бешикдалиги даври билан чамбарчас боғлиқ. Шу ваздан уларни бешик кўшиқлари дейишади. Аллалар ва талай этнографик мазмундаги поэтик парчалар – айтим-олқишлар ана шундай характерга эга. Бешик кўшиқлари бола уч ёшга тўлгунигача айтилади. Иккинчи гуруҳга мансуб кўшиқлар бола туғилганидан то 10–11 ёшга тўлгунигача ижро этилса-да, аслида, бешик билан боғланмаган оналик меҳри тароватидан юзага келган бадихалардир. Булар суйиш кўшиқлари бўлиб, эркаламалар, овутмачоқлар, қизикмачоқлардан таркиб топган. Шу маънода эркалаш поэзияси халқ педагогик даҳосининг ифодаси бўлиб, кейинчалик болалар учун махсус адабиётни юзага келтиришда муҳим манбага айланган.

II. Тагин шундай кўшиқлар силсиласи ҳам борки, уларни катталар қачонлардир у ёки бу муносабат билан тўқиганлар. Булар маросим ва мавсум тароналари бўлиб, давр ўтгани сайин янгича социал ўзгаришлар тақозосига кўра, ижтимоий-эстетик моҳияти ва мавқеи ўзгариб турган, аниқроғи, ижтимоий-маънавий эҳтиёжга кўра катталар репертуаридан болалар репертуарига ўтган («Бойчечак», «Читтигул», «Ё рамазон» кабилар). Натижада болалар фольклорида мавсум ва маросим кўшиқларига асос солинган. Шу билан бирга, катталар сафида маросимларга қатнашган болаларнинг ўзлари ҳам талай тақлидий кўшиқлар ижод этганлар, болаликнинг ўзига хос мавсумий аъъаналарини яратганлар ва шу мавсумлар моҳиятига муносиб бадихалар, ялинчоқлар, ҳукмлагичлар тўқиганлар. Шу тариқа катталар раҳнамолигида, аниқроғи, улар билан бевосита ҳамкорликда болаларнинг ўз мавсум ва маросим тароналари юзага келган. Буларда халқ этнографиясининг тарихий илдизлари сақлаб қолинган ва шулар

таъсирида болаларнинг катталарникидан фарқ қиладиган этнографияси ва календари юзага келган.

III. Улгайиш эхтирослари, ўйинлар, катталар билан муносабатлар, ҳаётда ўз мавжудлигини англай бориш шавқу завқлари мурғак қалблардаги тебранишларни ранг-баранг оҳангларда товлантириб, болаларнинг ўзларини ҳам қўшиқчига айлантириб қўйган. Шу йўсинда болалар ҳам ижод эта бошлаганлар ва айтиш мумкинки, улар яратган қўшиқлар ўзбек болалар фольклорининг хилма-хил жанрларга бой энг катта таркибий қисмини ташкил этади. Бинобарин, уларга болалик қўшиқчилари сифатида қараш табиийдир.

Болалик қўшиқлари ижро ўрни, ижтимоий-эстетик моҳияти жиҳатидан хилма-хил бўлиб, уларни тўрт гурпуага ажратиб ўрганиш мақсадга мувофиқдир.

1. Ўйин компонентлари билан боғлиқ қўшиқлар. Маълумки, болалар ўйинларининг асосини ҳаракат ташкил этади ва улар ҳаракатли ўйинлар деб юритилади. Бироқ, болалар ижрочилигида шундай қўшиқлар ҳам борки, улар ҳаракатдан иборат ана шу ўйинларнинг қайсидир қисми мазмундорлигини тўлдиришга хизмат қилади: ё ўйинга чорлайди, ё ўйинга зачин бўлади, ё ўйин учун шарт вазифасини ўтайди – бундай вазиятда ўйинга муқаддималик функциясини бажаради; ё ўйиндаги ҳаракатнинг йўналишини белгилаб, драматик ҳолатини юзага келтиради; ё ўйинга яқун ясаб, иштирокчиларни тарқалишга даъват этади. Бу типдаги қўшиқлар ўйин таркибидаги муҳим компонент ҳисобланади. Чунки уларда бутун ўйин жараёни зухур топмайди. Чорламалар, чеклашмоқлар, гулдур-гуллар, санамалар, ўйин-қўшиқлар ва тарқалиш қўшиқлари ана шундай характерга эга.

Сўз-ўйинлар. Болалар сўз билан ўйнаб, маънавий камолот пиллапояларидан илдамлайди. Бола ўз камолотининг илк босқичида сўз маъносини англашдан йироқ туради. Бироқ сўзнинг сеҳри оламига у билан ўйнаб туриб кира боради. Оналар аллаларининг назокатли оҳанги билан танглайи кўтарилган болакай энди товушларнинг мўъжизакор оҳангларидан хузурлана бошлайди. Энг муҳими, шундай хузурланиш завқини ўзи учун ўзи кашф этишга интилиб, аста-секин сўзлар ҳосиласидан туғилгаи ритмларнинг

ҳаракатга ёки фикрга омухта тароватидан маъно уқишга майли кучая боради. Катталар болалардаги бу маънавий эҳтиёжни қондиришни кўзлаб, қачонлардир топишмоқ, тез айтиш сингари сўз ўйинларини ўйлаб топганлар. Болаларга булар гоят мақбул тушган ва уларни чинакамига ўзлаштириб, ҳатто «ўзлариники» қилиб олганлар. Аини чокда ўзлари бир-бирларини сўзда чандишни чинакам маънавий ўйин даражасига кўтарганлар, шунингдек, хилма-хил яширин тил шаклларини ўйлаб топганлар.

Кўшиқлар. Оналар алласидан ритмик укуви шакллана бошлаган кичкинтойларда 2–5 ёшларидаёқ ўз хатти-ҳаракатлари, ўйинларини ритмик жиҳатдан баҳолаш майли туғилади. Бу шунчаки баҳолаш бўлмай, уларнинг ўша хатти-ҳаракатлари, ўйинларидаги ҳаётий мазмунни ритмга солишдан иборат кўтаринкилик ҳисобланади. Шу сабабли улар шовқин солиб айтилади ва аксар ҳолатларда икки мисрадан ошмайди. Товушлар шовқинининг ритмик гармонияси ҳосиласи бўлган бундай кикилламалар болалар фаолиятида илк поэтик ижод акти ҳисобланиши билан кимматлидир.

Турли ёшдаги болаларнинг воқеликка поэтик муносабатлари чуқурлашгани сайин кўшиқлар ҳам шакл, ҳам мазмун жиҳатидан теранлашиб, такомиллашиб боради. Шу зайлда учлик, тўртлик, бешлик, олтилик ва саккизлик шаклидаги намуналари юзга келган. Айниқса, тўртлик шакли болалар репертуарида кенг тарқалган.

Композицион жиҳатдан диалог асосида қурилган кўшиқлар ҳам бир талай. Одатда, бундай кўшиқлар айтишувлар (айтишмалар) ҳам дейилган.

Ҳажман анчайин катта кўшиқлар ҳам бор: рус фольклоршунослигида улар катта кўшиқ номи остида ажратиб таъкидланган. Хуллас, кўшиқлар қандай ҳажмда ва шаклда бўлмасин, асосан, болалар ёши ва савияси даражасида ижтимоий воқеликка поэтик муносабатларининг ифодаси сифатида яратилган.

4. Болалар ҳам ҳазил-мутойибага алоҳида рағбат билан қарашади. Бир-бирларида табиий ёки маънавий камчиликларни пайқашган заҳотиёқ тап тортмасдан, аяшмай, аввалига номга қофиядош лақаб топиб, кейинроқ – жараён чуқурлашгани

сари шу лақабнинг оҳангдошлигига омукта ритмга уйғунлашган ҳазилни чуқурлаштириб мазах қилишади, тегишишади; ҳатто ота-оналаридаги ноҳўя хатти-ҳаракатларни ҳам бошлаб юзлари-га солишади.

Болалар, ақл-идроклари тўлиша ва теранлаша боргани сайин, *социал* воқеликка ҳам активроқ муносабатда бўлишга ҳаракат қиладилар. Шу актив муносабат жараёнида ўзлари пайқаган ижтимоий иллатларни масхаралаш даражасида журъат сеза бошлайдилар. Ана шундай ассоциация замирида уларнинг фольклор бисотида сатирик ва юмористик кўшиқлар силсиласи юзага келган.

Шуниси ажабланарлики, болалар оғзаки поэтик сатираси ва юмори намуналарини эътироф этиш ва характерлашда фольклоршунослар орасида турли хил қарашлар мавжуд. Айрим фольклористлар болалар табиатида фақат юморни хос деб билади, сатирани ҳали улар поэтик ижоди кўтармайди, чунки улар ҳали социал иллатларни англашга қодир эмаслар, деб ҳисоблашади. Шу сабабли болалар сатираси атамасини қўллашдан ҳадиксирашади. Аммо фактлар ва илмий кузатишлар болалар оғзаки сатирик поэзияси мавжудлигини, унинг болалар оғзаки юмористик поэзияси билан ёндош ва жондош бўлиб яшаётганлигини тасдиқлайди. Ўзбек болалар оғзаки поэзиясида қофиядош лақаблар ва тенгишмачоклар қаторида сатирик ўти ярқираб турган масхараламаларнинг ҳам анчагина эканлиги бунинг ёркин шаҳодатидир.

Шундай қилиб, ўзбек болалар фольклори халқ ижодининг таркибий қисми сифатида қадимги замонларда юзага келган ва асрлар давомида янги-янги бўёқлар ва шаклларда ривожланишда давом этган ҳамда бойиб бораётган яхлит бир системадирки, бунда жанрлар ранг-баранглиги, асарлар хилма-хиллиги муҳим ўрин тутди. Ана шу ранг-баранглик ва хилма-хилликнинг ўзига хос хусусиятларини кўрсатиш, уларнинг муайян ижтимоий-маиший турмуш шароитлари билан шартланганлиги моҳиятини очиш, бадий-эстетик, ижтимоий-ғоявий функцияларини белгилаш ўзбек фольклоршунослиги олдидаги муҳим вазифалардан бўлмоғи керак.

Барча халқларнинг сўз санъати ўша халқларнинг фольклоридан бошланади. Бу таъриф улуғ рус адиби Максим Горькийга мансуб. Шундан келиб чиқиб, инсон тақдирида фольклор аллалардан, бешик поэзиясидан бошланади, дейишимиз мумкин. Оналарнинг бешик ёнидаги сўзлари нечоғлик оҳангдор, ёқимли, мулойим, оромбахш бўлса, ундан баҳраманд бўлган боланинг қалби ҳам шунчалик юмшариб, мусиқага, поэтик сўзга, майин куйга, ширин муомалага мойил бўлиб ўсади. Куй ва бадий сўз гўдакнинг камолатига, соғлом ва нормал болалар бўлиб ўсишига бевосита ёрдам беради.

Болани йўргаклаш, бешикка солиш, ухлатиш, уйғонган болани йўргакдан ечиб олиш, у билан қилинадиган муомала, машғулотлар айрим поэтик жумлалар, куйлар билан безалган бўладилар. Бундай поэтик иборалар, баъзан бутун бошлиқ шеърини тўқималар боланинг улғайиши, тарбияси билан, айрим бир маросимлар билан боғланган ва шу муносабат билан айтилган бўладилар. Буларнинг ҳаммаси ҳам тўла маънодаги бешик қўшиқлари бўлмайдилар. Уларнинг кўпчилиги шу халқнинг турли одатлари, расм-русумлари билан боғланган бўладилар. Бешик қўшиқлари эса, оналар томонидан бола ёнида, болани овутиш, ухлатиш жараёнида айтиладиган лирик характердаги қўшиқлар бўлиб, уни ўзбекларда кўпинча алла қўшиқлари дейилади. Аллалар онадан кизига, кизидан унинг кизига ўтиб, сараланиб, сайқал топиб, аста-секин турғун қўшиқларга айланиб борадилар, халқ оғзаки поэзиясида ўзига хос туркум ҳосил қилиб, алоҳида ўрганиш объекти бўлиб қолдилар. Ўзбек халқининг узоқ аждодлари бешик қўшиқларини билганлар. Абу Али ибн Сино ўзининг машҳур «Тиб қонунлари» китобида алланинг аҳамиятига тўхталиб шундай ёзади: «Боланинг мижозини кучайтирмоқ учун унга икки нарсани қўлламоқ керак. Бири – болани секин-секин тебратиш, иккинчиси – уни ухлатиш учун одат бўлиб қолган мусиқа ва аллалашдир. Шу иккисини қабул қилиш миқдорига қараб боланинг танаси билан бадантарбияга ва руҳи билан мусиқага бўлган истеъдоди ҳосил бўлади»¹.

¹ Абу Али ибн Сино. Тиб қонунлари. 1-китоб. Тошкент. 1959. 293-бет.

Узоқ замонлардан бери болага алла айтишни ўзига касб қилиб олган бола овутишнинг усталари, ажойиб алла айтувчилар ҳам бўлишган. Болаларга алла айтувчилар, асосан, меҳнаткаш оила вакиллари бўлган. Улар оиланинг янги аъзоларини тарбиялаган, жамиятнинг ёш авлодини улғайтирган. Айни вақтда, бир ҳовуч бойлар, сарой аҳллари болаларига тарбиялаш учун энагалар, бола боқувчилар, оқсочлар ҳам сақлашган. Улар мулкдорларнинг болаларини йўргаклаган, бешигини тебратган, улар ҳақида мадҳ-санодан иборат аллалар айтган. Аммо бундай мақтовлар юракнинг чуқур жойларидан чиқмагани учун ҳам самимияти кам бўлган, кенг тарқала олмаган. Бешик қўшиқларини оналар бола бешикдалик даврида – туғилганидан то уч ёшга тўлгунча айтишади.

Бешик қўшиқларининг катта социал аҳамияти бор. Бунга сабаб бешик қўшиқларининг жуда узоқ замонлардан буён тарихга йўлдош бўлиб, барча тарихий даврларда, турли-туман тарихий воқеаларни ўзида акс эттириб келаётганидир. Жамиятнинг кўпчилигини ташкил этган, унинг етакчи кучларидан бири ҳисобланган оналарни ҳаётини тажрибага жуда бой дейиш керак. Негаки улар шахсида жамиятнинг турли табақалари тўқнашиб туради, улар хотирасида шу табақаларнинг муносабатлари тикланади, моддий, маиший муносабатлар уларнинг аллаларида ўз ифодасини топади.

Бешик қўшиқларида оналарнинг ҳамма орзу умидлари баён этилган бўлади. Оналар ўзгаларга айтолмаган сирларини, «дардларини» ўз чақалоғига, боласига айтадилар, юрак дафтларини фарзандига очадилар. Бундан мурод – дард ёзилади, кўнгил зардоби кетади. Оналар алла қўшиқлари орқали ҳамма яхши ниятларини баён қиладилар. Аллалар ўз даврининг лирик кўзгуларидирлар. Бешик қўшиқларининг ёқимли оҳанглари ичида давр муҳити, кишилар тирикчилиги, сиёсий-иқтисодий ҳаёт, яшаш шароитлари, кишилар орасидаги муносабатлар, ҳамма хилдаги қарама-қаршиликлар оддий бўёқларда катта маҳорат билан ўз тасвирини топган бўладилар. Аллаларни тинглаб туриб, ўнларча китобларда ёзилган, ҳатто ёзилишга улгурмаган фактларни билиб олиш, уларни жонли ҳис қилиш,

улар ҳақида чуқур ва реалистик тасаввур ҳосил қилиш мумкин бўлади. Сиртдан қараганда бу сўзларнинг, бу тарихларнинг, бу кечинмаларнинг болага – бешикдаги гўдакка дахли йўқдек кўринса-да, аслида, уларнинг ҳаммасининг болага, унинг келажига, унинг тақдирига, ниҳоят, бўлғуси йигитнинг, келажак эгасининг жамият ва инсонлар олдидаги бурч ва вазифаларига тўла тааллуқли!

Бешик кўшиқларининг мазмуни давр, шароит шахснинг тақдир билан боғланган бўлгани учун ҳам ўзгариб туради. Буни унинг шеърий формасида ҳам шундай ўзгаришлар бўлиб туришига ҳар доим тадбиқ қилиб бўлмайди. Аллаларнинг формаси, уларнинг куй-оҳанглари, кайтариклар, болаларни овутишга, осойишта этишга хизмат қиладиган поэтик элементлар узоқ вақтлардан бери ўзгаришларга кам учради, учрасалар ҳам сезилмас даражада учради.

Алла кўшиқлари, асосан, рефрен асосида қурилади дейиш хато бўлмайди. Алла кўшиқларидаги чўзиқ оҳангда айтиладиган нақарот сўзлари – рефренлар гоҳ икки, гоҳида тўрт йўл текст билан кўшилиб, олти йўл бўлиб, такрорланиб келадилар. Онанинг ўзи «тўқиган», «ижод қилган» сўзлари эса шу рефрен жумлалар орасида айтилади. Бу сўзлар боланинг тушуниши учун айтилмайди, балки сўзларнинг майин, чўзиқ, бир маромда айтилган, ижро қилинган оҳанги болани ухлатишга хизмат қилади:

*Алла болам, алла,
Жоним болам, алла,
Икки кўзим, алла,
Ширин сўзим алла...*

Орада она кўшиқ қолипидан чиқиб, янги бир оҳангда:

Алла-ё, алла!

деб кўяди, бу ҳам етмагандек «Қани, ухлай қол», «Кўзгинангни юмақол» жумлаларини кўшиб юборади. Гўдак ҳадеганда ухлайвермаса, бешикни қаттиқроқ чайқатиб, «Ўб-бў-ў-ў...» деб ҳам кўяди.

Ниҳоят бола ҳам тинчлана бошлайди, она ҳам ўзини «алла ай-тиш» муҳитига тушириб олади. Кўнгли кундалик ташвишлардан холи бўлиб, она ва бола мулоқоти шароити туғилгандан кейингина аста қўшиғини давом эттиради:

*Алла қилсин болам-о,
Уйқуда ором олсин-о,
Алла, алла, деганда
Жимгина ухлаб қолсин-о...*

Бир фикр айтиб бўлинди. Иккинчи фикр она хотирига келиши учун рефрен сатрлар кўприк бўлади. Она алланинг нақаротини айтади:

*Алла, болам, алла,
Жоним болам алла...
Баъзан сўзларини янгилайди:
Икки кўзим алла...*

Бола шаънига айтиладиган эпитетлар ҳам кўпинча халқ орасида бир-бирига ўхшаш тасвирлаш, қиёслаш методи билан амалга оширилади. Масалан, бола кўпинча гулга ўхшатилади:

*Алла, болам, ётарсиз,
Ястугларга ботарсиз,
Бу ястугни кўтарсам,
Гулдан тоза ётарсиз.*

Ҳатто бешик ясалган ёғоч тури ҳам она учун болани овутишга хизмат қилади:

*Тут ёғочдан бешиги,
Туртмай турсин,
Каримжоннинг йиғиси
Энди тинсин.*

Бешик қўшиқларида энг кўп кўзга ташланадиган тема — бола таърифи. Она фарзандини ўзи билган энг яхши сўзлар билан таърифлайди. Она тавсифида бола кўрар кўзи, уйининг чироғи, оиланинг бахти, кўрки обрўси, кундуз қуёши, тунда ойи,

ёлғизликда ҳамроҳи, овунчоғи, қариганда таянчи, онасининг эр-танги ёруғ куни. Келажакдаги орзу-умидларининг барчаси шу фарзандидан:

*Қўзи боққан қўй этсин,
Топганимга тўй этсин,
Тўй-тўйларга улансин,
Давлат бошингга ўрнашсин.
Аллаё, алла.*

Она ўғил-қизининг соғлом, кўркам, бахтли бўлиб улғайишини орзу қилади. Фарзанди қиз бўлса, яхши жойларга келин бўлишини, серфарзанд, сердавлат бўлиб, «туп куйиб, палак ёзишини» тилайди. Ўғилга қилган тилаклари ўзига хос: Рустами дostonдек паҳлавон бўлсин, «чопингани бўридай, бўриларнинг зўридай» бўлсин дейилади. Бунинг сабаби ўғил – отасининг таянчи, ўрин-босари, боқувчиси, эл ичида обрўси, юрт посбони, душманидан химоячиси:

*Қўли арслон билаклим,
Ботир, қоплон юраклим,
Яхши-ёмон кунимда,
Менга жуда кераклим.*

Халқ орасида қадим вақтларда гўдакка, чақалокқа зарар етказадиган «зиён-заҳматлар» бор, деган тушунча бўлар эди. Бундай нарсаларни инсу жинс ҳам дейишарди. Гўё улар чақалокнинг бешиги атрофида айланиб юришар эмиш. Шу сабабдан бешикдаги болани ёлғиз қолдирмаслик, бешик асбобларини қоқиб сўнгра тўшаш, баъзан исириқ солиш, бешикка укки қушининг патларидан қадаб қўйиш, кўзмунчоқ, тумор сингари тақинчоқлар қадаб қўйиш иримлари бўлган. Аммо халқда соғлом кучларга таяниш, яхши ният, дадил ҳаракатлар ҳам бўлган. Бу боланинг баданини тарбиялаш, ўстиришдаги қатор тадбирлар, қўл, оёқлар, қорин, бўйин ҳаракатлари, чўмилтириш, фойдали ёғлар билан ёғлашлар, бурун, қулоқларини, томоқларни тозалашлар ва ҳ.к. Бундай ишлар тажрибали, қўлидан даволаш келадиган кишилар-

нинг ёрдами билан қилинган. Оналар шундай кишиларга таяниб иш қилган.

Бешик қўшиқлари фақат бешик ёнидагина туғилган қўшиқлар, бола туғилиши билан она шоира бўлиб қолади, деган мулоҳаза тўғри эмаслиги ҳаммага маълум. Оналар поэзияси шу оналарнинг болалик, қизлик даври поэзиясининг тадрижий давоми деб қарамоқ керак. Умуман, хотин-қизлар лирик поэзиясининг бир бўлаги деб билиш керак.

Ўтмишда яратилган аллаларда ёрнинг раҳмсизлиги, «турган битгани захар»лиги, «қизил гул очилгунча қўймаслиги» устига қайнаналарнинг «ўгли келса чақиши», шу туфайли ўғлининг жаллод чикқанлиги, ёрнинг вафосизлигидан нолиш ҳасратлари ифодаланади:

*Гули сафсарни кўринг, алла,
Сувга қараб қайриладир, алла,
Бевафо ёрни кўринг, алла,
Ўлмай туриб, айриладир, алла.*

Юртдан юртга иш қидириб, нон қидириб сарсон кезишлар, кўпинча ойлаб, йиллаб давом этарди. Бу давр ичида болалари билан оч-юпун қолиш, топилса бировларнинг кирини ювиш, хизматини қилиш, топилмаса, бир бурда нонга зорлик бўлган кунлар қишлоқда кўпчилик хонадонларнинг улуши эди. Ана шундай «ташлаб кетишлар», шундай «отани кутишлар» қўшиқлар орасида анчагина ўрин оладилар:

*Алла, алла айтаман,
Устинга тўним ёпаман,
Сенинг бу дайди отангни,
Истаб қаердан топаман,
Алла, аллаё, алла.*

Ўзбек меҳнаткашлари озодлик, тенглик, эркин меҳнат ҳуқуқлари билан бирга эрлар ва хотин-қизларнинг тенглиги-га, эркин ва ихтиёрий никоҳ ҳуқуқига эга бўлдилар. Хотин-қизларнинг жамиятдаги ўрни ва қадри ортди. Уларнинг турмуши бахт-фаровонлик, хушнудлик томон юзланди. Бунинг

натижасида янги давр – озод ва бахтли ҳаёт поэзияси дунёга келди. Бунда анъанавий кўшиқ формаларига янги мазмун бағишланиб, янгича бадий воситалар билан ич-ичдан келади-ган хурсандлик ҳолатларини, замондан, турмушидан мамнунлиги ифода қилинганини кўриб турамыз:

*Бог ичида чаман гуллар,
Алла, қўзим, алла.
Сайрайди шайдо булбуллар,
Алла, қўзим, алла.*

Она ҳатто шодлигини айтишга сўз тополмай қоляпти:

*Дилимдагини айтаверсам,
Тилим етишмас, алла.
Шодлигимни айтаверсам,
Умрим етишмас, алла,
Аллаё, алла.*

Бордию келин кўшалок бола кўрса, бу оиланинг шодлиги чексиз. Ўзбекларда, қардош халқлардагидек Ҳасан-Ҳусан, Фотима-Зухралар туғилиши – қадимдан ардоқли. Кексалар дуо қилишганда, алқаганларида ҳар доим: «Кўш ўғил, кўш қиз кўргин» дейишади. Шундан бўлса керак, кўпгина халқ эртақларида, дostonларида кўш бешик, кўш ўғил ҳақида, меҳрибон сингиллар ҳақида чиройли сюжетлар юрадилар. Алла кўшиқларида ҳам шундай мотивлар бор.

*Алла, болам, жоним болам,
Қўзичоқларим, алла,
Овунчоқларим, алла.*

*Қараб турган қароқларим,
Ёниб турган чироқларим,
Аллаё, алла.*

*Биринг ўғил, биринг қиз,
Қўшалокларим, алла.*

*Ўсиб-унинг, олай баҳра,
Чақалоқларим, алла.*

Болалар учун махсус катталар томонидан яратилиб ва бешик ёнида ижро этилиши традиция бўлиб келган бу жанрнинг бундан кейинги тақдири қандай бўлиши, аллаларнинг кимлар томонидан яратилиши, қайси бадий формаларда ва қандай ижро этилишини турмуш белгилайди. Бизнинг давримизда турмуш маданияти кун сайин ўсиб турибди, оналарнинг савияси тобора ошмоқда. Янги туғилган гўдак тарбияси билан энди фақат она эмас, балки врачлар, тарбиячилар, ясли, боғча ходимлари, бутун бошлиқ китоб, журнал, газеталар, радио ва телевидениедаги мутахассислар, композитор, шоирлар, артистлар, рассомлар, мусиқачилар, қисқаси, бутун жамият шуғулланмоқда. Буларнинг ҳаммаси болалар фольклорининг сўзсиз бойишига, формаларининг кенгайишига, келгусида боланинг маънавий жиҳатдан бой, ахлоқан тоза, жисмонан бақувват кишилар бўлиб етилиши учун зарур бўлган ҳамма имкониятларнинг яратилишига олиб келади.¹

¹ Ушбу мақола қуйидаги манба асосида тайёрланди: Сафаров О. Болалар фольклори // Ўзбек фольклори очерклари. Уч томлик. Биринчи том. – Тошкент: Фан, 1988.

Омонулла
МАДАЕВ
(1942 йилда туғилган)



Омонулла Аҳмедович Мадаев 1942 йил 20 апрелда Тошкент шаҳрида туғилган. Тошкент давлат университети (ҳозирги Ўзбекистон Миллий университети)нинг филология факультетида таҳсил олган (1959–64). Тошкент шаҳридаги 1-, 40- ва 82-ўрта мактабларда ўқитувчи бўлиб ишлаган (1958–65). Тошкент давлат университети (ҳозирги Ўзбекистон Миллий университети)нинг филология факультетида катта лаборант, ўқитувчи, катта ўқитувчи, доцент вазифаларида ишлаган (1965 йилдан). «Хоразм достонлари ва уларнинг ўзига хос хусусиятлари» деган мавзуда номзодлик диссертациясини ёқлаган (1983). «Ўзбек халқ оғзаки бадиий ижоди» дарслигининг муаллифларидан бири. «Ўзбек халқ эртаклари» мажмуаси (1977–78, ҳамк.) ҳинд, урду, форс ва араб тилларида нашр этилган. «Мақоллар оламида» (1984), «Алпомиш» достони матнини ўрганиш методикаси» (1998), «Алпомиш» билан суҳбат» (1999), «Ўзбек халқ оғзаки поэтик ижоди» (2001, ҳамк.) каби китоблар муаллифи.

ХАЛҚ ДОСТОНЛАРИ ГЕНЕЗИСИГА ДОИР

Халқ оғзаки ижодидаги жанрлар генезиси фольклоршуносликнинг ҳамшиша долзарб бўлган муаммоси ҳисобланади. Таниқли олимларимиз Ҳоди Зарифов, Мансур Афзалов, Музайяна Алавия, Зубайда Ҳусанова, Охунжон Собиров оғзаки ижод жанрла-

ри бўйича олиб борган тадқиқотларини Муҳаммаднодир Саидов, Жуманиёз Қобулниёзов, Тожибой Ғозибоев, Малик Муродов, Баҳодир Саримсоқов, Абийр Мусақулов, Субҳон Умаров каби мутахассислар давом эттирдилар. Мазкур илмий асарларда ўрганилаётган намуналарнинг жанр хусусиятлари, ғоявий-бадий жиҳатлари, ижрочилар маҳорати даражалари кузатилди. Лекин тадқиқотчилар жанр генезисига келиб тўхтаганлари заҳоти эътибор, муносабат, қизиқиш кескин ўзгарган. Ҳар сафар касбдош қандай янгилик топганлиги ҳақида тезроқ маълумотга эга бўлиш истағи пайдо бўлган. Айнан ана шундай вазиятлардан бири Баҳодир Саримсоқовнинг 1999 йилда «Фан» нашриётида нашр этилган «Алпомиш» – ўзбек халқ қаҳрамонлик эпоси» китобидаги «Алпомиш» эпоси ҳақида уч этюд» мақоласидан кейин ҳам пайдо бўлди. Мақолада муаллиф «Алпомиш» эпоси халқ тарихи, реал воқелик билан узвий алоқада эканига урғу берар экан, дostonнинг минг йиллик тўйига тараддуд кўрилаётганини айта туриб, ўз мақсадини шундай ифодалайди: «Шу муносабат билан «Алпомиш» эпосининг вужудга келиш тарихи, унда тасвирланган воқеалар асосида ётувчи эпик манбалар ҳақда алоҳида тўхталиб ўтишга имконият туғилади».¹ Мақолада В. М. Жирмунскийнинг «Алпомиш» ҳақидаги ривоя ва баҳодирлик эртаклари ётиши ҳақидаги гипотезаси кескин танқид остига олинади ва: «Эпос тарихан, асосан, кўчманчи ёки ярим кўчманчи уруғ, қабилаларнинг санъати» эканига урғу берилади. Шунингдек, Е. М. Мелетинскийнинг «Алпомиш» эпоси «баҳодирлик эртаклари» асосида, ё ўзга халқлар эпик меросидан ўсиб чиққанлиги ҳақидаги фикри ҳам танқид қилинади. Баҳодир Саримсоқов А. Н. Веселовский томонидан эпоснинг шаклий турларидан бири сифатида «Тарихий воқеаларнинг қайноқ изларидан кейиноқ юзага келган «лиро-эпик кўшиқлар»²ни кўрсатганини баҳолаб: «Бу назария халқ эпосининг вужудга келиш ва тарихий тараққиёти каби масалаларга муайян даражада ойдинлик киритиш нуқтаи назаридан катта аҳамият касб этади»³, дейди. Олим фикрлари давомида

¹ Саримсоқов Б. «Алпомиш» – ўзбек халқ қаҳрамонлик эпоси. – Т.: «Фан», 1999. 115-бет.

² Ўша асар. 131-бет.

³ Ўша асар. 131-бет.

куйдаги жумлани ўқиймиз: «Масалан, қахрамонлик ва тарихий эпос ибтидосида тарихий кўшиқ ётса, романик эпос ибтидосида афсона, ривоят ва эртақ каби жанрлар ётади».¹ Юқорида қайд этилган маълумотлардан дастлабки хулосаларга келиш мумкин:

Халқ эпоси оғзаки ижод намунаси сифатида халқ ижодининг кейинги босқичида шаклланган жанр.

Қахрамонлик эпосининг шаклланишида тарихий лиро-эпик кўшиқлар манба вазифасини ўтаган.

Фақат ўйлатадиган жиҳат шундаки, «Алпомиш» достонининг ўзбек қахрамонлик эпосига мансуб дастлабки мукамал асар экани ҳақида яқин йигирма беш саҳифа мулоҳаза юритган олим айнан қадимги эпик кўшиқларни эсга олмайди. Бизнингча, Баҳодир Саримсоқов бу масалани ёритишга алоҳида мақола ёзиш ниятида бўлган...

Маълумки, халқ достонларида қайта-қайта такрорланадиган бадий лавҳалар жанг жараёни билан боғлиқ. Қахрамон юртини ташқи душмандан ҳимоя қиладими, ор-номус учун курашадими, севикли ёрига эришмоқчи бўладими, албатта, жанг майдонида синовдан ўтади. Ўрхун-Энасой битигларида Тўнжук ўз элининг Табғач билан муносабатларини баён қилишда лашкар, отлиқ аскарлар, пиёдалар, ҳужум, қамал, уруш, лашкар тортиш, кувиш² ҳақида жуда кўп тарихий маълумотлар берилган. «Билга хоқон битигтоши»да Билга хоқоннинг ўн етти, йигирма, йигирма етти, ўттиз ёшларда жанг қилгани, баъзан бу урушлар олти, баъзан тўрт марта такрор бўлгани айтилган. Бу воқеаларнинг рўй бериш тафсилотлари ҳам келтирилган.³ Хусусан, хоқоннинг душманни уйқуда босгани, сув кечгани, молини олгани ҳақида ҳикоялар бор. «Кул тигин битигтоши»да лашкарбошининг бошқа-бошқа отларда жангга киргани айтилган. Бу саҳифаларда бўз, тўрик, оқ айғир, Азманнинг оқ оти каби отлар номлари тилга олинади ва қонли жанглар тасвирланади. Бундай лавҳаларда от ўз эгаси билан бирга жанг қилувчи ҳамроҳга айланади. Ўрхун-

¹ Ўша асар. 132-бет.

² Абдурахмонов Ғ., Рустамов А. Қадимги туркий тил. – Т.: «Ўқитувчи» 1982. 71–79-бетлар.

³ Ўша асар. 126–129-бетлар.

Энасой битигтошларидаги лавҳалар билан танишган ўқувчи кўп ҳолатларда Алпомиш, Гўрўғли, Ҳасанхон, Авазхон иштирок этган жанрлардаги воқеаларни эсга олади. Ҳақиқатан ҳам, қадимги битигтошлардаги жанрлар тасвири тарихий асос сифатида кейинчалик қаҳрамонлик эпосига кўчмаганмикан, деган тасаввур уйғотади.

Келинг, фикримизни асослаш учун баъзи манбаларга мурожаат қилайлик. «Алпомиш», «Гўрўғли» туркумидаги дostonларда бош қаҳрамонларнинг мардлиги, жасорати ҳақидаги лавҳалар тарихини Маҳмуд Кошғарийнинг «Девону луғотит турк» асаридаги халқ кўшиқларида ҳам учратамиз. Фитрат «Энг эски турк адабиёти намуналари» рисоласида «Девону луғотит турк»даги икки парча ҳақида тўхталар экан: «Униси бир уруш майдони ҳақида, буниси Ёй-қиш мунозараси тўгрисидадир. Мумкинким, бу икки манзума, ҳатто бу рисоладаги манзумаларнинг кўбчилиги эски бир дostonнинг (балким, «Эртўнга» дostonининг) айрим-айрим парчалари бўлсун»,¹ дейди. Шунингдек, китобнинг XIV бобини Фитрат шундай номлайди: «Тубандаги манзумага бир унвон бера олмадим, балким бир дostonнинг бошланғичидир (олти парча)».² Эътибор берган бўлсак, олим икки ўринда «дoston» атамасини қўллаган. XX аср ўзбек адабиётшунослигининг етук билағони Фитрат «Девону луғотит турк» асаридан олинган учта иқтибосда қадимги туркий халқлар оғзаки ижодидаги дoston белгиларини кўрсатиб ўтган. Биринчиси, ёз ва қиш мунозараси; иккинчиси, уруш майдони ҳақида; учинчиси, муайян мавзу бўйича мазмунан бирор соҳага ажратиш мушкул бўлган олти парча. Қизиғи шундаки, мазкур олти парчанинг бирида қуйидагиларни ўқиймиз:

*Йукурди кавал от,
Чақилди қизил ўт,
Куйурди арут ўт,
Сачраб ани ўртанур.³*

¹ Фитрат. «Энг эски турк адабиёти намуналари». – Т.: «Ўқитувчи» 1982. 71–79-бетлар.

² Ўша асар. 70-бет.

³ Ўша асар. 72-бет.

Мазмуни:

*Гузал от югура бошлади,
Унинг туёғидан сачраган
Қизил оловлар
Ҳар томонда қуриб ётган ўтларни куйдиради.*

Энди Эргаш Жуманбулбулдан ёзиб олинган «Равшан» достонидаги Ҳасанхоннинг ўғли Равшанни кутқариш учун кетаётган сафарини эслайлик:

*Отга солди дирдикка,
Қойил бўлинг эрликка,
Сувсиз чўлда бедов от
Гоҳи чикка, гоҳ пукка.
Қамчи урса ўйнайди,
Йўлларда диркка-диркка.¹*

Икки парчадаги вазнда бармоқ, бўғинлар сони яқин (ҳар икковида шиддатли от югуриши аниқ акс этган), агар аввалгисида от туёғидан сачраган олов қуриган ўтларни куйдиргани айтилса, кейингисида отнинг гоҳ чикка, гоҳ пукка тарзида югуриб кетаётган ифодасини топган.

Муҳими шундаки, ўзбек фольклоршунослиги асосчиси Ҳоди Зариф ҳам ўз вақтида халқ дostonлари тарихи хакида фикр юритар экан, бу жанрнинг вужудга келиш тарихи қадимдан бошланганини ҳис қилади ва шогирдларига бу масалада йўл-йўриқ кўрсатгандек бўлади: «Маҳмуд Кошғарийнинг «Девону луғотит турк» асарида учраган дoston парчалари XI асрга қадар туркий халқлар ўртасида дostonлар куйланганидан дарак берадилар. Кўп насллар орқали бизгача етиб келган дostonлар, шу қатори «Малика айёр»даги шеър формаларининг, асосан, тўртликлардан иборат бўлиши, Маҳмуд Кошғарий тўплаган дoston парчаларида, шеърларида ҳам тўртликларнинг ҳоким бўлиши тасодифий эмас, албатта».²

Халқ дostonларида, айниқса, Фозил Йўлдош ўғли, Эргаш Жуманбулбул ўғли, Ислom шоир, Пўлкан ижро этган асарлар-

¹ Булбул тароналари. 2-том. Далли, Равшан. – Т.: «Фан», 1972. 525-бет.

² Ўша асар. 46-бет.

да, кўпинча, тўртлик шаклидаги шеърӣ мисраларнинг қайд этилиши, ҳақиқатан ҳам, «Девону луготит турк»да келтирилган кўшиқлар билан дostonлар ўртасидаги шаклий уйғунликдан дарак беради. Хусусан, Фитрат кўрсатиб ўтган яна бир тўртликка эътибор беринг:

*Изимни укарман,
Биликни йукарман,
Кўнгулни тўкарман,
Ардам била турлунур.¹*

Мазмуни:

*Эгам Тангрига ҳамд, сано айтаман,
Билим, маълумотни йиғаман-да,
Кўнглимда тугунлаб сақлайман,
Менинг кўнглим мақтанарлиқ*

сифатларни ўраб оладир.

Эргаш Жуманбулбул куйлаган «Равшан»да эса куйидаги мисраларга дуч келамиз:

*Парвардигор панодир,
Ҳолин билган донодур,
Гўрўглидан дуо олиб,
Ҳасан полвон жуноди²*

Келтирилган бу мисралар ҳам тўртлик шаклида бўлиб, мазмунда ҳам ўзига хос яқинлик кузатилади. Ҳар бир ишнинг бошланиши Яратган номи билан боғланади. Ҳар бир мушкулнинг ечими дуо олиш билан ахтарилади, ниятга етишда ақл-идрок билан ҳаракат қилинади.

Баходир Саримсоқов «Эпик жанрлар диффузияси» мақоласида ёзади: «Фольклористикада диффузия термини бирор жанр, мотив ёки образнинг иккинчи бир жанр, мотив ёки образга кириб бориши, сингиши натижасида уларнинг табиатида содир бўла-

¹ Фитрат. Энг эски турк адабиёти намуналари. – Т.: «Mumtoz so‘z», 2008. 70-бет.

² Булбул тароналари. 2-том. Далли, Равшан. – Т.: «Фан», 1972. 524-бет.

диган структурал, семантик ҳамда функционал ўзгаришларга нисбатан қўлланади».¹

Ҳақиқатан ҳам, халқ оғзаки ижодидаги жанрлараро муносабат илдизиди миф, афсона, ривоят тизими аниқ кўзга ташланади. Қадимги мифдаги унсурлар ҳаётга яқинлашиш жараёнида афсонага ва афсонада акс этган реалликка мойил белгилар ривоятга мерос бўлиб ўтиши натижасида оғзаки ижоддаги диффузия аввалги жанрларда ҳам аниқ, ҳам яққол тарзда намоён бўлади. Аммо ижоддаги кейинги тараққиёт босқичлари нисбатан мураккаб ўтган. Мақол, топишмоқ, қўшиқ, эртақ ва яна бошқа-бошқа жанрлар вужудга кела бошлаган.

Уйғур олими Турғун Олмос «Хунларнинг қисқача тарихи» асарида эрамиздан аввалги туркийлар қўшиқларидан мисол келтиради:

*Узотти йироққа мени туғқанлар,
Ўттиг қилишин Уйсун хонга.
Урлайди пизоним юртни эсласам,
Қуш бўлип юртимга учупла кетсам.*

Муаллиф бу қўшиқнинг ёзиб олинган манбасини кўрсатмаган. Аммо мисралар мазмунидан ифодаланиб турган қахрамон ички кечинмалари лирик қўшиқлардаги умумий хусусиятлар доирасида экани сезилиб турибди. Махмуд Кошғарий «Девону луғотит турк» асарида юзлаб мақоллардан намуналар келтиради. Топишмоқ ҳақида ҳам маълумот бериб, «табзуқ» атамасини қўллайди. Шунингдек, девонда эртақ, афсона, ривоят жанрларига оид далиллар ҳам берилган. Демак, X асргача халқ оғзаки ижодида жанр тизими, асосан, шаклланган экан-да, деган мулоҳаза билдириш мумкин.

Аммо ўзбек дostonларининг вужудга келиши юзасидан аниқ фикр билдириш учун ўнлаб-юзлаб вариантдаги асарларни синчиклаб ўрганиш, уларни қиёслаш, айниқса, тарихий аҳамиятга эга лавҳаларни аниқлаган тарзда тадқиқот юритиш талаб этилади. Бу ўринда таниқли фольклоршунос олим Е. М. Мелетинский-

¹ Саримсоқов Б. Эпик жанрлар диффузияси // Ўзбек фольклорининг эпик жанрлари. – Т.: «Фан». 1981. 99-бет.

нинг куйидаги гаплари эпосимизнинг шаклланиш босқичларини аниқлаш бўйича умидли натижаларга эришиш мумкинлигидан дарак беради: «Сибирлик ва қисман ўртаосиёлик туркийлар фольклорида кенг намоён бўлган туркий халқлар фольклори эпоснинг фақат архаик намуналаригагина эмас, балки қаҳрамонлик эпосига мансуб муайян бошқа турли-туман шаклларга бойлиги билан ҳам машҳурдир. Шунинг учун туркий халқлар эпик ижоди ўзида қаҳрамонлик эпоси ва унинг шакллари ўртасидаги муносабат генезисини тадқиқ этиш учун хаддан ташқари унумдор майдонга эга».¹ Ҳақиқатан ҳам, 1947 йилдаёқ В. М. Жирмунский ва Х. Т. Зарифов ўзларининг «Ўзбек халқ қаҳрамонлик эпоси» («Узбекский народный героический эпос») китобларида Маҳмуд Кошғарийнинг «Девону луғотит турк» асаридаги айрим тўртликларда халқ дostonларида кўплаб учрайдиган лавҳалар мазмуни мужассам эканини қайд этганлар.² Кейинчалик Ҳоди Зариф ўзининг «Ажойиб дoston» мақоласида шундай ёзади: «Маҳмуд Кошғарий тўплаган дoston намуналарида шундай бир парча бор:

*Боши анинг ойиқти,
Қони юзиб ториқти,
Болиқ бўлиб тоғиқти,
Энди они ким емар.*

Яъни:

*Яраси оғирлашди,
Қони юзиб қотди,
Ярали (ҳолда) тоққа чиқиб кетди,
Энди уни ким емиради (енгади).*

Шу бир тўртликдаги тасвир «Малика айёр» ва «Кундуз билан Юлдуз»да Авазнинг, «Далли ойим» дostonида Ҳасаннинг душман билан олишганида яраланиб тоққа чиқиб кетишининг айни ўзидир».³

¹ Мелетинский Е. М. Происхождение героического эпоса. – М.: Издательская фирма «Восточная литература» РАН. 2004. 365-бет.

² Жирмунский В. М., Зарифов Х. Т. Узбекский народный героический эпос. – М.: 1947. 11-бет.

³ Зариф Ҳоди. Ажойиб дoston // «Фозил шоир» – Т.: 1973. «Фан». 46–47-бетлар.

Аввалги илмий тадқиқотларда Фитрат, Ҳоди Зариф, Б. Саримсоқов, кейингиларида Ш. Турдимов¹ халқ дostonларининг, хусусан, «Гўрўғли» туркуми дostonларининг яратилиш даврини, асосан, XII–XVI асрлар билан, дoston сифатида вужудга келишини яна бир неча аср қадим билан боғлаганлар ва илмий далиллар билан исботлаганлар. Чингизхон саройида бахшичилик санъати, Амир Темур ҳузурида дoston айтиш анъаналари ҳақидаги маълумотларни бевосита халқ дostonлари генезисини аниқлаш йўлидаги саъй-ҳаракат, деб баҳолаш мумкин. Шунингдек, Алишер Навоий шеърларида:

*Эй йиров, сен ҳам ишингни кўргуз,
Ётуғон бирла улуг ирни туз,*

– мисраларини учратамиз. Бу байтдаги «йиров», «ётуғон», «улуғ ир» атамалари фольклоршунос Охунжон Сафаровнинг изоҳига кўра «улуғ ир» – дoston, «ётуғон» – дўмбира «йиров» – бахши маъноларини англатади ва атоқли шоиримиз Алишер Навоий ҳам ўз вақтида дoston тинглашга мушарраф бўлганидан дарак беради.² Эҳтимол, Самарқанддаги ҳаёти давомида Булунгур бахшилари ҳузурида қаҳрамонлик эпоси намуналарини севикли шоиримиз ҳам эшитгандир, деган фикр уйғонади. Ана шу жиҳатдан, Ҳоди Зарифнинг «Гўрўғли» дostonларидан баъзиларининг дастлабки яратилишини VIII–XII асрлар орасидан излаш мақсадга мувофиқдир,³ деган хулосасида илмий мантиқ бор.

Қадимги туркий халқлар эпосига мансуб «Ўғузнома», «Дада Қўрқут китоби», «Ирк битиги»да ҳам ўзбек дostonларининг илдизлари туташган ўринларни кузатиш мумкин. Насимхон Раҳмонов ҳозирги ўзбек тилига ўгириб, чоп эттиргани «Ўғузнома ёки Ўғуз хоқон ҳақида дoston» («Шарк юлдузи»,

¹ Турдимов Ш. «Гўрўғли» дostonларининг генезиси ва тадрижий босқичлари. – Т.: «Фан». 2011.

² Сафаров Охунжон. Халқ ганжинасига меҳр (Алишер Навоийнинг фольклоршунослик қарашларига доир) // «Фольклор – бебаҳо ҳазина». – Т.: «Мухаррир» нашриёти. 2010. 289-бет.

³ Зариф Ҳоди. Ажойиб дoston // «Фозил шоир». – Т.: 1973. «Фан». 47-бет.

1987 йил, 4-сон) ва Бахтиёр Исабеков томонидан нашрга тайёрланган «Ўғузнома» (Т.: «Ўзбекистон», 2007) ушбу асар билан боғлиқ мулоҳазаларимизга асос бўлди. Нашрга изоҳ берган Н. Раҳмонов шундай ёзади: «Ўғузнома» гарчи XV асрда кўчирилган бўлса-да, бу унинг шаклланиши ҳам шу даврга тааллуқли деган фикрга асос бермаслиги керак. Чунки асардаги образлар, сюжет, мотивлар қадимги турк даврига ишора қилади». Ҳақиқатан ҳам, адабиётшунослик мезони билан ёндашганда гап таҳлил қилинаётган асарда кўрсатилган қайсидир эпизодик воқеа ёки унинг тафсилоти билан ўлчанмайди. Асосий эътибор йирик ифодаларга, баён усулига, ғояга, тасвирдаги умумийликка қаратилади. Шунинг учун ҳам «Алпомиш», «Рустамхон», «Гўрўғли» туркуми дostonлари билан яқиндан танишган ўқувчи «Ўғузнома», «Ирқ битиги», «Дада Қўрқут китоби»даги руҳий яқинликни сезмаслиги мумкин эмас. Доимий мотив сифатида эса фарзандсизлик, кейинчалик узоқ қутилган фарзандга эга бўлиш, бу фарзанд эса катта авлод кўниккан ҳаётга кескин янгиликлар киритувчи кучга эга бўлиши, жанг лавҳалари, мағлубиятдан ўқинч, ғалабадан завқ каби унсурлар бўлиб, асар мазмунига сингдирилади. Шу билан бирга, дostonларимизда яна шундай фазилатлар ҳам борки, улар фақат қадимги туркий ёдгорликлар билангина чегараланиб қолмайди.

Умумтуркий халқларнинг маданий меросини ташкил этувчи ноёб асарлардан яна бири «Дада Қўрқут китоби» ҳақида турк олими Муҳаррам Эргин жуда илиқ фикрлар билдирган.¹ Олим китобни «туркий халқлар маданиятининг тамал асарларидан ва балки биринчисидир», деб атайди. Асар XV аср охири ва XVI аср бошларида ёзувга кўчирилганлиги ва қўлимиздаги матн майдонга келганлиги айtilган. Адабиётшунос Абдумурод Тилавовнинг маълумот беришича: «Баъзан Қўрқут ота, деб ҳам тилга олинган бу шахс, айрим маълумотларга қараганда, Ҳазрати Муҳаммад алайҳиссалом замонларида Сирдарё атрофида яшаган ўғузларнинг Баёт ёхуд Қайи бўйига мансуб Қога Хўжа исмли ўта ақлли, доно, олим ва каромат соҳиби бўлган

¹ Ergin Muharrem. Dede Korkat kitabi. Metin – Suzluk. Istanbul. 1986. s-5–6.

бир зотнинг ўғлидир».¹ Алишер Навоий бу шахсни «Кўркут ато а.р» деб атади ва у ҳақда шундай ёзади: «Турк улуси аросида шуҳрати андин ортуғроқдурки, шуҳратқа эҳтиёжи бўлғай. Машхур шундоқдурки, неча йил ўзидан бурунқини, неча йил ўзидан сўнгги келурни дебдурлар. Кўп мавъизаомуз мағизлик сўзлари арода бор».²

Кўркут ота ҳақида нисбатан кенгроқ маълумот бераётганимизнинг сабаби шундаки, «Дада Кўркут китоби»нинг Дрезденда сақланаётган нусхасида «Қам Пуренинг ўғли Бамси Бейрек» боби бор бўлиб, бу саҳифалардаги воқеалар тафсилоти кўп жихатдан «Алпомиш» достонидаги тасвирларни эсга солади. Ўз вақтида В. М. Жирмунский ва Ҳ. Т. Зарифовлар «Ўзбек халқ қаҳрамонлик эпоси» китобларида «Алпомиш» достони билан «Бамси Бейрек» ўртасидаги исмларда, фарзандсизлик мотивида, кейинчалик фарзандларнинг туғилиши ва бешик керт қилинишида, бош қаҳрамоннинг асирга олинишида, хотини тўйи куни қайтишида жуда кўп ўхшашликлар борлигини таъкидлайдилар.³ Уларнинг фикрича, достоннинг пайдо бўлиши ўғузларнинг анча қадимги замонларда Ўрта Осиёда истикомат қилган пайтларига тўғри келади. Фақат Салжуқийлар замонидagina (XI–XII) асар сюжети Кавказорти ва Кичик Осиё худудига кўчган ва «Дада Кўркут китоби»га киритилган бўлиши мумкин. «Бамси Бейрек» эса Қўнғирот «Алпомиш»ининг бошланишига асос бўлган қаҳрамон эмас, балки кўхна манбадан ўрин олган параллель нусхадир.

Халқ эпоси генезисига оид эътиборга лойиқ қайдлар профессор Насимхон Раҳмоновнинг «Ўрхун-Энасой ёдгорликлари ва туркий эпослар»⁴ деб номлаган докторлик диссертацияси-

¹ Тилавов Абдумурод. Дада Кўркут ҳақида мухтасар сўз // Дада Кўркут хикоялари. Т.: 2010. 5–6-бетлар.

² Алишер Навоий. Насойим ул-муҳаббат // Мукамал асарлар тўплами. 17-том. – Т.: «Фан» 2011. 421-бет.

³ Жирмунский В. М., Зарифов Х. Т. Узбекский народный героический эпос. – М.: 1947. 72–75-бетлар.

⁴ Раҳмонов Насимхон Асқарович. Орхоно-Енисейские памятники и тюрские эпосы. Автореферат на соискание ученой степени доктора филологических наук. – Т.: 1991.

нинг моҳиятини ташкил этади. Олим VII–VIII асрларда вужудга келган ижтимоий-тарихий шароит бир қатор ўзига хос сюжет тизимининг вужудга келишига асос бўлганини таъкидлайди. Айниқса, халқнинг дастлабки ижод маҳсулида асос мифологик дунёкараш бўлса, кейинги босқичда эпос марказида қаҳрамон шахс турганлигига гувоҳ бўламиз, деган мулоҳазаси айнан туркий эпоснинг шаклланиши билан боғланади. Бинобарин, халқ дostonларининг вужудга келиш жараёнида муайян ҳаёт тақозоси билан рўй берган юрт мустақиллиги учун кураш, мамлакатда давлат тизимининг ривож, фавқулодда пайдо бўлган халқ қаҳрамонларининг ҳаётидаги мардлик лавҳалари уйғунлашиб дostonларнинг яратилишида туртки вазифасини ўтаганини алоҳида кўрсатиш мумкин бўлади.

Маълум бўладикки, ўзбек дostonларининг генезисини VII асрда ёзиб қолдирилган Ўрхун-Энасой битиглари, Маҳмуд Кошгарийнинг «Девону луготит турк» асаридаги тарихий, қаҳрамонлик, маросим қўшиқлари, «Ўғузнома», «Ирк битиги», «Дада Кўрқут китоби» каби ўта қадимги адабий ёдгорликлар заминидан ахтариш мақсадга мувофиқдир. Бизнингча, ҳозирги Қашқадарё, Сурхондарё вилоятларида Шомурод бахши, Абдуназар бахши, Қахҳор бахши, Абдумурод бахши каби беназир санъаткорларнинг халқ дostonларини соатлаб ички овозда ижро этишларида ҳам (Олтой ўлкаларидаги шомонларнинг овозларига ўхшаш равишда) узоқ қадим замонлар садоси мавжудлиги бежиз эмас.

Фарида
ИҶЛДОШЕВА

(1942 йилда туғилган)



Фарида Йўлдошева 1942 йил 2 октябрда Тошкент шаҳрида туғилган. Тошкент давлат педагогика институтининг филология факультетида ўқиган (1959–64). ЎзР ФА Алишер Навоий номидаги Тил ва адабиёт институтининг Фольклор бўлимида кичик илмий ходим, илмий ходим бўлиб ишлаган (1965–92). Тошкент Алоқа институти (ҳозирги Тошкент ахборот технологиялари университети) да ўқитувчилик қилган (1992–2003). «Халқ қаҳрамони Насриддин Афанди образини типиклаштириши муаммоси» мавзусидаги номзодлик диссертациясини ёқлаган (1975). Афанди латифаларини, шунингдек, Ғози Олим Юнусов, Отажон Ҳошим, Элбек, Миёнбузрук Солиҳов, Буюк Каримов каби фольклоршуносларнинг асарларини нашрга тайёрлаган (1987–88). «Ўзбек латифаларида Насриддин Афанди образи» номли китоби чоп этилган (1979).

**НАСРИДДИН АФАНДИ ОБРАЗИ ВА
ЛАТИФАНИНГ ЖАНР ХУСУСИЯТЛАРИ**

Шарк халқларининг суюкли қаҳрамонига айланган, уларнинг характери, психологиясидаги барча фазилатларни маълум даражада қамраб олган Хўжа Насриддин образи узоқ тарихга эга. Унинг юзага келиш тарихини ўрганиш кейинги йилларда кенг тус ола бошлади. Биргина Туркияда 1955–1965 йиллар ичида

Хўжа Насриддин образининг келиб чиқишини ўрганиш муаммосига бағишлаб ўтгиздан ортиқ монография ва илмий ишлар ёзилган¹.

Таниқли шарқшунос олим Н. Османов «VII–IX асрларда бир қанча латифалар Мавлон Қутбиддин ва Насриддин номлари билан айтилган»², деб ёзади. Унинг фикрича, Насриддин ўша даврда яшаган ва бир қанча латифаларда иштирок этган тарихий шахсдир. Бундан кўринадики, Насриддин шахсияти билан боғлиқ латифалар VII–IX асрларда ҳам мавжуд бўлган. Лекин муаллиф бу фикрини қайси манбаларга суяниб айтгани хусусида маълумот келтирмайди. Насриддин ҳақида гап борар экан, турк тадқиқотчилари унинг XIII асрда яшаганлиги ва қабри Оқшаҳарда эканлиги ҳақида фикр юритадилар.

Турк ёзувчиси Зиёбей ўзининг «Қунияга саёҳат» номли китобида шундай ёзади: «Шайхнинг (Насриддин кўзда тутилаяпти – Ф.Й.) Оқшаҳардаги мақбарасини зиёрат қилишга бордим. Мақбаранинг деворига қуйидаги сўзлар ёзилган эди:

«Бу мақбара шафқатли Олло-Таолонинг марҳаматига муҳтож марҳум Насриддин Афандининг мақбарасидир. Туғилган йили ҳижрий 386». Бу тарихнинг ёзилиши мени ҳайрон қолдирди, чунки шайх 386 ҳижрий йилдан кейин туғилган эди. Кейин юқоридаги ҳижрий йилнинг тескарисига ёзилганига тушуниб қолдим. Бу иш наққошнинг нўноқлигиданми ёки атайин қизиқчилик қилиш учун рақам шундай кўчирилганми, буни билмадим»³.

Демак, қабр тошида «Насриддин» эмас, балки «Насриддин Афанди» деб ёзилган.

Бурсали Тохир тадқиқотларида кўрсатилишича, Хўжа Насриддин Сивриҳисор (Анқарадан жануби-ғарбда жойлашган кичкинагина шаҳар)нинг Хорто қишлоғида 1208 йилда туғилган, отаси Абдуллоҳ Афанди шу қишлоқ имоми бўлган. Вафотидан сўнг, Маҳмуд Ҳайроний ва Саййид Хўжа Иброҳим Султон гувоҳлигида Хўжа Насриддин отасидан қолган имомлик вазифа-

¹ Türk Folklor Araştırmaları. – İstanbul, 1965.

² Османов Н. Персидские анекдоты. – М., 1963, стр. 13.

³ «کلیات جناب نصرالدین «مناقب اسلام» (усмонли турк тилида, ЎзССР ФАШИ қўлёзмалар фонди, тошбосма, инв. 3885).

сини Махмуд исмли халифасига қолдириб, ўзи Оқшаҳарга кўчиб кетади ва у ерда 638/1283 йилда вафот этади¹. Шу фактни В. А. Гордлевский ҳам ўз тадқиқотида келтирган².

Халқ орасида Хўжа Насриддин номи билан шуҳрат қозонган латифалар қаҳрамони баъзи ҳужжатларда Насриддин Хўжа, қабр тошидаги ёзувда эса Насриддин Афанди эканлиги маълум бўлди. Шу боисдан халқ қаҳрамони образининг номланиши ҳам ҳужжатларда Насриддин Афанди бўлиб, баъзи тадқиқотларда Шайх Насриддин ва Хўжа Насриддиндир.

Қабр тошида «Насриддин Афанди 386» деб ҳижрий йил ёзилган. Кўринадики, XIII асрда Оқшаҳар, Қуния, Сиврихисор, Хорто каби жойларда Хўжа Насриддин қабри бўлгани эслатиб ўтилади. Булар, албатта, ҳаётий фактлар. Шу асосда ҳамда ўрганиб чиқилган латифаларга таяниб, Хўжа Насриддин тарихий шахс бўлмаганлигига ишонч ҳосил қила оламиз. Эронлик тадқиқотчилардан айримлари эса Мулла Насриддиннинг яшаган жойи сифатида Ҳамадон шаҳрини кўрсатишса, айримлари Ироқни таъкидлайдилар³.

Айрим озарбайжонлик адабиётшунослар Насриддиннинг прототиби машҳур астроном олим Насриддин Тусий бўлса керак, деб тахмин қиладилар. Лекин бу фикр шу кунгача исботланмаган. Озарбайжон Фанлар академиясининг қўлёзмалар фонди директори М. Султонов: «Кўпгина қўлёзма, литография, Мулла Насриддин ҳақидаги латифа ва қизиқ-қизиқ ҳикояларда оддийгина Насриддин», «Латоиф ва зароиф» китобининг 10–12-саҳифасида эса Насриддин Тусий учрайди⁴ деб ёзади. «Мулла» сўзи Тусийга тегишли бўлиб, «Мавлон» исмининг қисқа шакли эканини айтади. Умуман, Хўжа Насриддиннинг прототиби сифатида Насриддин Тусий кўрсатилса ҳам, уларнинг фикридан Насриддин Тусий XIII асрда яшаган реал шахс, халқ у ҳақда бир неча латифалар яратган бўлиши мумкин, деган тахминий маъно келиб чиқади.

¹ TORKIYE ANSIKLOPEDIISI. CILT IV. – ANKARA, 1957 (Nasredin Noca, cf 287–288).

² Гордлевский В.А. Изб. соч. Том II. – М., 1961, стр. 341.

³ ضعیفه تلاش – Техрон, 1971, 33-сон. 14-бет. ЎзССР ФАШИ қўлёзмалар фонди, инв. 17786.

⁴ Молла Насриддин. Составитель Тахмасиб. – М., Баку, 19...7, стр. 13.

Демак, XIII асрнинг ўзида Насриддин Афандининг Оқпахардаги қabri ва Марага обсерваториясига асос солган астроном олим Насриддин Тусий билан бир даврда яшаганлиги маълум бўлади. Ундан ташқари, Н. Осмоновнинг фикридан ҳам, М. Султонов кўрсатган манбалардан ҳам Насриддин исми билан боғлиқ латифалар учрагани маълум. Насриддин исми ҳар бир тарихий шахс халқ қаҳрамони ҳақидаги латифаларнинг кўпайишига сабаб бўлиши, ҳар бир давр Хўжа Насриддин образи учун прототип бериши, тарихий шахслар характеридаги фазилат ва хусусиятлари Хўжа Насриддин образи ўзига қамраб олиши эҳтимолдан холи эмас [...].

Маълумки, олим, файласуф, шоир, рассом, доно шахсларнинг муҳим, характерли хусусиятлари типиклаштирилган ҳолда Хўжа Насриддин образига сингдириб юборилган, ўзаро савол-жавоб, ҳазил-мутойиба ва насиҳатлар мужассамланиб, латифаларга айланган бўлиши ҳам мумкин. Айтайлик, масалчи-ёзувчи XIV асрнинг бир гуруҳ одамлари билан суҳбатлашяпти. Суҳбатда савол-жавоб турли хил руҳда кечаяпти... Одамлар ана шу суҳбат асносида кўнглига яқин савол-жавобни, суҳбатни бошқа бир гуруҳга етказди, улар эса, ўз навбатида, бошқа яна бир гуруҳ одамларга шу суҳбат мазмунини айтади. Маълум бир шароитга баҳо беришда бирор бир шахс (албатта, халқ вакили) бутун бир халқнинг кўнглидагини топиб гапиради. Ана шундай гаплар енгил юмор ва сатира билан йўгрилган бўлса, латифага айланиб кетиши табиийдир. Халқ эса уни бир ном остига жамлаган ва ниҳоят, Насриддин Афанди латифалари келиб чиқмаганмикан деб ҳам фарз қилиш мумкин [...].

Ишонч билан айтиш мумкинки, Хўжа Насриддин учун асос бўла олувчи биография халқ яратган латифалардир. Насриддин ўз ақли, донолиги, ўтқир зехни, ҳозиржавоблиги, уддабуронлиги билан ҳатто бутун бир армияни енгади. Хўжа Насриддин камбағал ва қашшоқ оддий ва содда халқ орасида вужудга келган энг севимли ва оммавий халқ қаҳрамонидир. У ўз табиати ва фазилати билан эзилган, аламзада халқ оммасининг ўй-фикрларини, орзу-умидларини, хуллас, хокисор халқ ҳаётини ифодалайди. У, гарчанд ҳамёнида сариқ чакаси йўқ эса-да, мушоҳадакор қобилияти, ақл бовар қилмайдиган тафаккури билан не-не ўзига

бино кўйган олимларни, катта ер эгаларини, подшоларни, вазирларни, қози ва имомларни, хуллас, битмас-туганмас бойлик эгаларини мағлуб қилади.

Ҳақиқатан ҳам, Хўжа Насриддин образи халқ психологиясини, характери ва муҳим хусусиятларини ўзида мужассамлаштирган «жамловчи образ»дир. Лекин бу билан Хўжа Насриддин образининг ягона индивидуал характерини инкор қилиб бўлмайди. Чунки бундай нозик дидли, ўткир сўз, доно, иродали, олижаноб, зукко, серфаҳм Хўжа Насриддин образини халқ оғзаки ижодидаги бошқа қаҳрамонлар билан алмаштириш, унинг ўзига хос хусусиятларини инкор этиш мумкин эмас [...].

Демак, ижодкор халқ оммаси табиатидаги барча хусусият, фазилат ва одат-хулқ нормаларини мана шу образда умумлаштириб, энг муҳим томонларини жамлаб, Насриддиннинг типик образини яратишга муваффақ бўлган. Турк олимларининг Насриддин учун ёзган «биография»ларини латифалар сюжетига солиштириб кўрилса, ҳамма маълумотлар латифа мағзидан олинган эканлигига шубҳа қолмайди. Гўё у Оқшаҳарда қозилик, Сивриҳисорда хонлик қилади, бошқа жойда мударрис, яна бир ерда имом ва-зифасини бажаради. Замонанинг буюк шахслари, ҳокимларини писанд қилмай, халқни маърифатга чақиради.

Насриддин учун биография тўқиётган тадқиқотчилар ҳам Насриддин халқ томонидан яратилган образ эканлигини онгли равишда тушуниб турсалар-да, бундай ажойиб халқ қаҳрамони ўз юртларидан, ўз ораларидан чиққан, деб кўрсатишга интилиш хисси билангина ишониш қийин бўлган тахминларни ўртага ташлайдилар. Насриддин турклар орасидан эмас, балки форслар, озарбайжонликлар, қрим татарлари орасидан чиққан, деган фикрлар ҳам йўқ эмас. Хўжа Насриддинни ҳар ким, ҳар миллат ўз қаҳрамони сифатида танир экан, мана шунинг ўзи образнинг халқ томонидан қанчалик халқчил, типик умумлашма даражасида яратилганлигининг ёрқин далилидир. Дадил айта оламизки, латифалар қаҳрамони Насриддин образи халқ яратган ижод маҳсули, у типик қаҳрамондир.

«Фольклор асарида инсон образи – деб ёзади таниқли рус фольклоршунос олими Н. К. Кравцов, – адабий асардаги образ

билан қиёсланганда шу жиҳатлари фаркланадики, унда индивидуаллаштиришга нисбатан умумлаштириш кўпроқ бўлади. Бирок фольклор образида ҳам, адабий образда ҳам тиниклаштириш психологик тасвирга қараганда кенгрокдир... Психологик тасвир типиклаштиришнинг муҳим томонларидан бири бўлиб, қаҳрамоннинг ўзига хос конкрет характери, маънавий қиёфаси қандай ҳолатда намоён бўлишининг очилишига имкон беради»¹. Кўринадики, фольклорнинг ёзма адабиётдан фарқи фақат индивидуаллаштиришга нисбатан умумлаштиришнинг муҳимлигида эмас. Чунки бу ҳол бадиий адабиётдаги образларда ҳам бўлиши мумкин.

Хўжа Насриддин образида умумлаштириш билан индивидуаллаштириш муттасил биргаликда кўрсатилади. Демак, бунда гап типиклаштириш усулининг ўзидадир. Адабиётда бадиий образнинг типиклиги вақт, муддат ва шароит жиҳатдан маълум даражада чегараланган бўлади. Фольклорда эса қаҳрамон образини яратишда умумлаштириш, типиклаштириш маълум давр билан чегараланмайди. Фольклордаги қаҳрамон образида табиатидаги у ёки бу жиҳатлар, умумлаштирилган энг характерли хусусиятлар адабиётдаги каби бир йил, ўн йил ёки бирор давр билан чекланмайди. Насриддин Афанди образида бўлганидек, юз йиллаб, баъзан минг йиллаб давом этиши мумкин. Хўжа Насриддин образи халқ ҳаётининг муҳим хусусиятларини умумлаштириш, ўзида жамлаш процессида бошқа илк фольклор қаҳрамонларининг характерли хусусиятларини ўзлаштирди ва ўз қиёфасида намоён этди.

Эртак, дoston, кўшиқ, афсона, ривоят, мақол, топишмоқлар каби латифалар ҳам фольклорнинг мустақил жанрларидан биридир. Латифа оғзаки ижод маҳсули бўлиб, эпик турга кирувчи тарихий, ижтимоий ва ҳаётий мазмунга эга.

Латифалардаги Насриддиннинг кечинмаларини халқ кечинмалари, Насриддиннинг бошидан кечирганларини халқнинг бошидан ўтказганлари, мудҳиш подшолик замонларини халқ кузатган, билган замонлар деб тушунадиган бўлсак, латифаларда ҳам бошқа драматик ҳамда лирик жанрларда рўй берувчи инсон

¹ Кравцов Н. К. Проблемы славянского фольклора. М., 1972. стр. 55.

фаолиятининг тарихи, ички кечинмалари, хатти-ҳаракатлари намоён бўлади. Ниҳоят, юқорида айтилганларга асосланиб, латифалар драматик ва лирик тур хусусиятларидан ҳам ниманидир ўзига олган синкретик санъат туридан иборат экан, деган хулосага келамиз.

Латифалар ўз хусусияти билан драматик жанрга яқин туради. Латифанинг драматик характериға Насриддиннинг ҳаракатчанлиги жуда мос келади. Драматик асарларда халқ латифалари, поэтик монологлар, аския, кичик ҳажмли кулгили ҳикоялардан фойдаланилади. Бундай ҳикояларни ифодалаш формаси – ижрочининг мимикаси, хатти-ҳаракати, актёрларға хос маҳорат усуллари каби хусусиятлар сахна асарларининг яратилишида муҳим восита бўлиб хизмат қилади. Шу жиҳатдан латифаларға ҳам драматик асарнинг муайян бир парчасидек қараш тўғрироқ бўлади. Латифаларни айтиш жараёни уни ижро этувчидан актёрлардагидек етук маҳорат талаб этади. Латифаларни ўқиган пайтда уни ижрочи айтаётганидагидек мароқланиш, сўзлаш усули, психологияси, ҳаракат, юзида содир бўлаётган ўзгариш, мимика, овоз оҳангидаги ҳайратға солувчи, ҳузур бағишловчи ёки дашном берувчи истехзо, ўзига хос оҳанг ва сўз урғуси кабилар кўринмайди. Латифаларнинг таъсирчанлиги, уларда ички кечинмаларнинг ифодаланиш йўллари ҳақида умумий тасаввурға эға бўлиш учун камида уч-тўрт хил латифани эшитиш талаб қилинади. Ўзбек латифалари сўз ўйини, комик ҳолатлари, аскиячилик, сўзлаш оҳанги, диалог шаклларининг ранг-баранглиги билан ҳам кишиларни ўзига ром этади. Насриддиннинг кулгиси баъзан енгил, баъзан эса аччиқ кинояли, сатирик кулги бўлади. Чунки у ижтимоий ноҳақлик, адолатсизлик, ҳукмдорлар, дин вакиллари ва бойларнинг ҳасислиги, ахлоқий нопоклиги, тубанлиги устидан кулади.

Латифалар Насриддин Афандининг тезкор зеҳни, кулгилчилиги ва баъзан эса омадсизлиги, қувноқ ва тушқунликка тушмайдиған кайфияти, бир вақтнинг ўзида ҳам кулгили, ҳам кайғули хаётий вазиятға тушиш ҳолатини кўрсатади.

Латифа қаҳрамони образининг юмористик бўёғи латифа жанрининг хусусияти билан белгиланған. Насриддин характе-

ри, психологик ҳолатлари эса асарнинг жанр хусусияти билан тўғридан-тўғри боғлиқлик касб этади. Латифа жанрининг ўзига хос хусусиятлари қаҳрамондан усталик ва моҳирликни, тафаккурнинг ўткирлиги ва чуқур идрокни, уддабуронлик билан иш тутишни талаб қилади. Насриддин Афанди образида ана шу жиҳатлар мукамал даражада намоён бўлишини кўрамиз. Айтиш керакки, Насриддиннинг соддалиги унинг нуқсони эмас. Бу соддалик унинг донолиги, камтарлиги ва самимийлиги, ўткир зеҳни ва инсонпарварлигини кўрсатиб туради. Бу образни типиклаштириш принципларининг мураккаблиги ҳам шундан келиб чиқади.

Ўзбек тилида нашр этилган латифалар орасида ранг-баранг тасвир усулларига бой шундай новеллалар ҳам борки, уларни латифа жанрига киритиб бўлмайди. Улар латифа каби лўндалик-қисқаликка эга эмас. Латифада қаҳрамоннинг портрет тузилиши тасвирланмайди. Латифа хусусиятига қараб унда ички ситуация, ҳаёт шароити, воқеа, образ характерини очишга ёрдам беради. Ҳажм жиҳатидан кичик бир асарда катта социал ёки тарихий воқеа-ҳодиса тасвирланади. Латифалар шакл, мазмун ва қаҳрамонларнинг ҳаракат доираси жиҳатидан турлича бўлади. Латифалардан айримларининг сюжети кутилмаганда ўткир сўз ўйини билан тугалланса, бошқалари чуқур фалсафий хулосалар билан яқунланади ва ҳоказо.

Фольклор қаҳрамони Насриддин Афанди образи хилма-хил темалардаги жуда кўп латифалар орасида кўчиб юриши билан бадий асар қаҳрамонларидан ажралиб туради. Бу билан темаларро кўчиб юриш фақат латифа қаҳрамони учунгина характерли экан, деган фикр тугилиб қолмаслиги керак. Чунки бундай ҳолат латифадан бошқа жанр қаҳрамонлари учун ҳам тааллуқлидир.

Барча латифаларда Насриддиннинг асосий хусусияти ўзгармайди. Фольклорга хос характер ўзгаришсиз давом этади. Ҳар бир латифада Насриддин Афанди турли-туман қиёфада, характерда намоён бўла боргани билан охири ўша хусусиятларнинг бир бутун бўлиб жамланишидан кейингина ягона умумлашган, яхлит образ юзага келади. Бир латифада Насриддин характеридаги уддабуронлик, иккинчисида серфаҳмлилик, учинчисида

лақмалик ва донолик, бошқасида ҳазил ва ҳар қандай юмористик ҳолатлар билан бир қаторда инсоннинг юксак, мураккаб шакллардаги психологик ҳолатларигача очила боради.

Латифалардаги воқеалар тасвири унда илгари сурилган фикрнинг санъаткорлик билан ижро этилишини талаб қилади. Кучлилик ва кучсизлик, қаҳрамонлик ва ожизлик, ачинарлилик ва кулгилилик, ақллилик ва аҳмоқлик, ижобийлик ва маълум даражада салбийлик каби хусусиятларнинг доимо параллел келиши латифа жанрининг ўзига хос принципларидандир [...].

Насриддин Афанди образида комик ҳолатлар кўп учрайди. Лекин фақат шу комик ҳолатлар билангина халқ яратган образнинг моҳияти тўла очилмайди. Насриддин образида комикликка нисбатан психологик ҳолатлар анча мураккаб ва кўп қирралидир. Мана шу томонлари билан Насриддин Афанди тарихий шахс сифатида эмас, балки тамоман тўқима образ, халқ орзу қилган қаҳрамон сифатида гавдаланади. Шу сабабли уни умумхалқ характери ва психологик ҳолатларини акс эттирувчи типик тўқима образдир, дея оламиз.

Латифаларда ёзма адабиётдаги каби бадий тасвир усуллари, образ характерини ифодаловчи портрет яратишдек ҳолатлар кўринмайди. Лекин шунга қарамай, қаҳрамоннинг кечмиши, хусусияти, унинг муайян латифада қандай қиёфада иштирок этаётгани рўй-рост кўз олдимизда намоён бўлади. Насриддин Афанди ва подшо, Насриддин Афанди ва ҳоким, Насриддин Афанди ва хотини ва шунга ўхшаш аниқ персонажлар орасидаги мунозаралар фақат латифаларга хос бўлиб, уларнинг ҳар бири ҳаётда юз берган ҳодисаларни ифодалаётгандек туюлади.

Насриддин Афанди бадий асар қаҳрамонлари сингари эмас, балки фақат фольклорга, тўғрироғи, латифага хос ниҳоятда содда тил билан гапиради. Бу ҳолат, айниқса, Насриддиннинг подшо ва унинг аъёнлари билан бўлган диалоглари ва суҳбатларида аниқ кўзга ташланади. Масалан, Афанди подшонинг «одиллигини», «лоф» қилиб айтиши ва аксинча, подшонинг Афандини суҳбатдоши хузурида хижолатда қолдириш учун «қандай ёлғонларни валақлаяпсан», деган сўзларида икки қарама-қарши синф кишиларининг бир-бирига зид фикрлари кўзга ташланади.

Подшо калтакнинг бир учини Афандига йўналтираётганида иккинчи учининг зарби ўзига тушишини кутмаган. Латифа Афандининг тантанаси билан тугайди.

«Афандининг эътирофи» латифаси эса қуйидаги етакчи мазмунга эга: «Подшо бир куни катта зиёфат берди. Унда Афанди ҳам бўлиб, ёнидаги киши билан қуюқ суҳбатлашар эди. Подшо уни хижолат қилиш учун ёнига келиб:

– Ким билади, қандай ёлғонларни валақлаяпсан, – деди.

– Нима қилай, шоҳим, – жавоб берди Афанди, – лоф аралашмаса бўлмас экан, дўстимга сизнинг одиллигингиз ҳақида гапириб беряпман».

Фикр тиниқ баён этилган бу латифада асосий ғоя ўзининг наштадек ўткирлиги билан Афандининг рақибига санчилади. Рақиб Афандини камситиб «валақлаяпсан» деса, Афанди унга мулойимгина оҳангда, «нима қилай шоҳим, лоф аралашмаса бўлмас экан», дейишида унинг қандайдир чекиниш каби ҳолати сезилса-да, аслида, сатирик ғояга ишора очиқ-ойдин кўзга ташланади. Подшонинг «одиллиги»га «лоф» сўзини кўшиб ишлатиш билан унинг адолатсизлиги очиб ташланади. Жумланинг лўндалиги, фикрнинг тўла ифодаланиши ва ортиқча фигураларнинг иштирок этмаслигида латифанинг ўзига хос хусусиятини кўриш мумкин.

Латифаларда икки ёки уч-тўрт шахс иштирокида воқеа ривожланади ва тугалланади. Латифалар фақат шундай шаклда эмас, балки Афанди ва халқ, бир гуруҳ одамлар иштирок этган шаклда ҳам учрайди. Баъзан эса Афандининг ўзи воқеанинг бошидан охиригача танҳо иштирок этади.

«Афанди ростини айтади» латифаси қуйидагича: «Подшо бир куни Афандига дўқ қилди:

– Менга маълум бўлишича, кеча бир ўтиришда менинг одил ҳукмдорлигимни одамлар мақтаганлар, сен у ерда бўлганинг ҳолда, менинг яхши фазилатларимдан бир оғиз ҳам гапирмагансан!

Афанди совуққонлик билан жавоб берди:

– Шоҳим, бу ёлғон! Фақат кечагина эмас, мен умрим бино бўлиб, сизнинг одиллигингиз ҳақида сўз бўлган ўтиришда бўлган эмасман».

Афандининг жавобига диққат қилсак, шоҳни лаганбардорлар ва сарой аҳллари, умуман, унинг ҳамтовоқларигина мақташи мумкинлигини тушуниш қийин эмас. Шу билан бирга, Афанди умр бўйи шоҳнинг адолатсизлиги, золим ва қонхўрлиги тўғрисида суҳбат кечган зиёфатларда бўлганлигини ҳам тасдиқлайди.

Бунда ҳам подшоҳнинг зардали муомаласи, Афандининг эса хотиржамлик билан ҳаққоний жавоб беришида бир-бирига зид икки характернинг ўзига хос бўлган хусусиятларининг очилиш жараёни билан танишамиз. Афанди сиймосида бутун халқнинг фазилати, фикр-мулоҳазалари, ҳис-туйғулари мужассамлашган. Подшо олдидан биргина Афанди иштирок этаётгандек туюлса-да, унинг заҳарханда жавобидан халқ овози, халқ мақсади эшитилиб туради. Афанди ҳар қандай шароитда соф қалби, юрак амри билан иш тутади. У иштирок этган йиғинларда шоҳлар мақталмайди, балки қораланади, лаънатланади. Саройда шоҳга якин юргани билан Насриддин Афанди шоҳни ёқламайди. Шоҳ билан бўлган қулай вазиятлар, суҳбатлар, «апоқ-чапоқликлар»дан фойдаланиб, халқ юрагидаги гапларни унга очик-ойдин айтиб олади. Хўжа Насриддин қахрамон бўлган латифалар мазмунига ана шундай рух сингдирилган.

Халқ қахрамонининг феъл-атвори, хатти-ҳаракати латифада ифодаланган ғоя билан чамбарчас боғлиқ. Латифалардаги воқеалар эса халқ руҳини, орзу-умидларини, интилишларини, умуман, халқ психологиясини акс эттиради. Халқ ўз қахрамони Насриддинни машҳур бир қиёфада асрлар давомида меҳр-муҳаббат билан намуна тарзида латифаларда яратган. Шу жиҳатлари билан ҳам у типик қахрамондир. Латифаларнинг ижодкори халқ, бадийий образ воситасида Насриддин шахсига жонлилик, бадийийлик ва ҳаётийлик бахш этган, унга халқ психологиясининг энг характерли хусусиятларини сингдирган.

Лекин бу ҳолат халқ қахрамони Насриддин Афанди образининг индивидуал такрорланмас характерини сира инкор этмайди. Бу хушчақчақ ва самимий, ниҳоятда оддий ва ўткир зеҳли, доно ва зийрак, халқ манфаатларини ҳимоя қилишда ҳеч кимга бўйсунмайдиган жасур одамни фольклордаги бошқа бирор қахрамон билан алмаштириб бўлмайди.

Насриддин Афандининг ўзбек фольклоридаги бошқа қахрамонлардан фарқи шундаки, у меҳнаткаш халқнинг кундалик турмуши, ғам-ташвишларига анча яқин. Насриддин эртаклар ва қахрамонлик эпосидаги персонажлардан фарқли ўларок, сеҳрлилик, мўъжизакорлик, илохийлик сифатларидан бутунлай маҳрум, аксинча, ҳатто у айрим латифаларда даҳрий тарзида тасвирланган.

Қахрамоннинг қандай бўлиши маълум маънода асарнинг жанр хусусиятлари билан ҳам белгиланади. Насриддиннинг ҳазил-мутойибага усталиги, меҳнаткашларга жабр-зулм келтирувчи ҳар қандай шахсларни масхаралаб, улар устидан кулиши ва шу каби бошқа сифатларининг ҳаммаси латифанинг жанр хусусиятларига боғлиқ.

Насриддин Афанди ҳақидаги ҳар бир латифа ўз шаклига кўра тугуни, воқеаларининг тез ривожланиши, кульминация ва ечими, бир лаҳзада ҳал этиладиган ўзига хос конфликт билан ажралиб турувчи композицион бир бутун ва бадий тугал асардир.

Латифа жанри қаттиқ тўқнашувлар ва қарама-қарши фикрларнинг аёвсиз курашида нозик ва ўткир ақллилик, ҳушёрлик ва ҳозиржавобликни талаб қилиш билан чекланмай, фикрлар ва конфликтли ҳолатларни юксак санъат шаклида ифодалашни ҳам тақозо этади. Насриддин образининг ҳар томонлама чуқур ва мураккаблиги ҳамма асрлар давомида санъаткорлар ва китобхонларнинг унга қизиқишлари сўнмай келаётганлигининг сабаби ҳам шунда. Бу эса фольклорда Насриддин Афанди сингари қахрамонни яратган ўзбек халқининг буюк даҳосини кўрсатувчи факторлардан биридир.¹

¹ Ушбу мақола қуйидаги манба асосида нашрга тайёрланди: Йўлдошева Ф. Ўзбек латифаларида Насриддин Афанди образи. – Тошкент, Фан, 1979.

Баҳодир
САРИМСОҚОВ
(1944–2007)



Баҳодир Исоқович Саримсоқов 1944 йил 1 апрелда Андижон вилояти Шаҳрихон шаҳрида туғилган. Фарғона Давлат педагогика институтини (ҳозирги Фарғона давлат университети)нинг филология факультетини битирган (1970). Ўзбекистон Республикаси ФА Алишер Навоий номидаги Тил ва адабиёт институти фольклор бўлимида кичик илмий ходим (1970–76), катта илмий ходим (1976–88), етакчи илмий ходим (1988), бош илмий ходим (1989) бўлиб ишлаган. Шу институтда Адабиёт назарияси бўлими мудури (1991–2007). «Кулса гул – йигласа дур» (1983), «Юсуф ва Аҳмад» (1988), «Ўзбек халқ мақоллари» (1989), «Ўзбекские народные пословицы» (1981), «Донишманд Искандар» (1994), «Нурали» (1989), «Афанди латифалари» (1990), «Абу Муслим жангномаси» (1-китоб, 1992), «Абу Муслим жангномаси» (2-китоб, 1995) каби китобларини чоп эттирган. «Ўзбек адабиётида сажъ» (1978) «Ўзбек маросим фольклори» (1986), «Бадийлик асослари ва мезонлари» (2004) номли рисола ва монографиялар муаллифи. 2007 йили Тошкент шаҳрида вафот этган.

ФОЛЬКЛОРИЗМЛАР ТИПОЛОГИЯСИ МАСАЛАСИГА ДОИР

Кейинги йилларда ўзбек адабиётшунослигида фольклор ва адабиёт муносабати масалаларига қизиқиш анча кучайди. Бу

нарса фақат адабиётшуносликнинг тараққиёт даражаси билангина эмас, балки бадий-адабий тажрибада фольклоризмларга мурожаат этишнинг кучайганлиги билан ҳам изоҳланади. Шунга қарамай, фольклор ва адабиёт муносабатларига доир аксарият тадқиқотларда бирёқламалик кўзга ташланади: айрим ишларда асосий диққат ёзма адабиёт билан боғлиқ муаммоларга йўналтирилиб, фольклоризмлар фақат бадий восита сифатида қаралса, айримларида фольклоризмлар доираси шу даражада кенг тушуниладики, натижада индивидуал ижодкор маҳорати фольклоризм соясида қолиб кетади. Фольклор ва адабиёт муносабатларини тўғри ҳал этиш учун бу муносабатларнинг кўринишлари, ҳар бир кўринишнинг ўзига хос хусусиятлари, уларни ҳаракатлантирувчи қонуниятлар ва бу қонуниятларнинг эволюцияси каби масалалар конкрет ҳал қилинмоғи лозим.

Адабиёт тараққиётининг барча босқичларида [...] фольклоризмларнинг тутган ўрни катта. Шундай экан, фольклоризм тушунчаси, унинг доираси қандай белгиланади?

Маълумки, фольклор ва адабиёт муносабати ўз характери жиҳатидан икки хилдир.¹ Булар а) фольклор ва адабиёт ўртасидаги генетик (бевосита) алоқадорлик; б) ҳар иккисининг билвосита – фольклоризмлар орқали алоқаси. Агар фольклоризмлар орқали алоқадорлик индивидуал ижодкор томонидан фольклор материаллари ёки фольклорга хос поэтик воситаларни онгли тарзда – изчил ғоявий-бадий мақсадларда қўлланиши орқали амалга ошиб, ҳаммавақт фольклор ва адабиёт муносабатларини тадқиқ қилувчиларга конкрет фактлар асосида фикр юритишга имкон берса, генетик алоқадорлик бунинг аксидир. Унда воқеликни бадий образлар воситасида акс эттириш соҳасида сўз санъатининг икки типи ўртасидаги тажриба алмашилиш хусусида сўз юритилиши лозим. Оғзаки ижоднинг нисбатан қадимийлиги бу тажрибаларнинг кўпроқ фольклордан ёзма адабиётга ўтганлигини кўрсатади. Бироқ ёзма адабиёт томонидан қабул қилинган ҳар қандай тажриба кўп йиллик адабий ижодий жараёнда шу даражада ривожлантирилиб, шу қадар ўзлашиб кетдики, ҳозир ана

¹ Емельянов Л. И. Методологические вопросы фольклористики. – Л.: Наука, 1978. – стр. 171–197.

шундай «адабиётлашган» тажрибаларни фольклоризм доирасига киритишга мутлақо асос йўқ. Шунинг учун ҳам рус фольклоршуноси Л. И. Емельянов фольклор ва адабиёт ўртасидаги генетик алоқадорлик масаласи фақат назарий жиҳатдан ҳал қилинмоғи лозим деганда, тўла ҳақли эди.¹

Фольклор ва адабиёт ўртасидаги генетик алоқадорлик масаласи махсус тадқиқот объекти бўлганлиги сабабли мазкур мақолада фақат билвосита алоқадорликни таъминловчи воситалар – фольклоризмлар типологияси масаласига тўхталамиз, холос.

Ўзбек маданиятининг ривожиди фольклорнинг тутган ўрни ва аҳамияти беқиёсдир. Чунки фольклор ҳар бир халқ маданиятининг таркибий қисмларидан бири сифатида ҳаммавақт муҳим ғоявий-бадий функция бажариб келган ва бу функция маданиятимизнинг барча соҳаси юксак профессионаллашган ҳозирги ҳолатида ҳам ўзининг белгиловчилик ролини йўқотган эмас. Бунинг асосий сабабларидан бири шундаки, фольклор воқеликни халқчил шаклда мукаммал акс эттириш хусусияти билан ҳақиқий ижодкорга кенг имкониятлар яратиб беради. Бинобарин, ўзбек адабиётининг барча тараққиёт босқичларида фольклоризмларга мурожаат этиб келинганлигини кўрамиз. Бундан маълум бўладики, фольклоризмлар фольклор ва адабиёт муносабатларини белгиловчи асосий омил ҳисобланади. Бироқ шу кунга қадар фольклор ва адабиёт муносабатларига оид ишларнинг аксариятида «фольклор» ҳамда «фольклоризм» тушунчалари тенг тушунча сифатида қўлланилиб келинади, ҳолбуки, улар бир-бирларидан кескин фарқ қилади.

Маълумки, оғзаки адабий-тарихий жараёндаги табиий ижодий акт фольклор маҳсулини юзага келтиради. Аммо бу маҳсул ўз-ўзидан фольклоризм ҳисобланавермайди. Рус фольклоршуноси К. В. Чистов ифодасига кўра, фольклор воқеликни акс эттиришдаги «биринчи шакл», фольклоризм эса «иккинчи шакл»дир.² К. В. Чистовнинг фикрига қўшилган ҳолда шуни

¹ Ўша асар. – 279-бет.

² Қаранг: Чистов К. В. Проблема «вторичных форм» в фольклористике и этнографии // Расы и народы. V. – М., 1975. – стр. 32–41; Яна ўша. Фольклор и культура этноса // Этнография. – 1979. – №4. – стр. 3–11.

алоҳида таъкидлаймиз. Ҳар қандай фольклор маҳсули фольклоризм ҳисобланмайди. Шунинг учун бу атамани фақат у ёки бу санъат тури томонидан қўлланилган фольклор маҳсулига, фольклорга хос бадиий-гасвирий воситаларга нисбатан қўллаш маъқулдир. Фольклор мустақил санъат тури сифатида ўзига хос табиий ижодий акт, жонли яшаш ва оммалашиш тарзига эга. Бинобарин, бундай типологик ижод тури ўз-ўзидан профессионал санъатнинг бошқа турлари билан муносабатга кириша олмайди. Унинг ижод маҳсулидан профессионал ижодкор ўз мақсади, кизиқиши ва билим доирасига яраша фойдаланади. Демак, бирор ижодкор асарига бирор мақсад билан киритилган фольклорга хос барча материални фольклор деб эмас, балки фольклоризм атамаси билан юритиш лозим, чунки унга ижодкор томонидан муайян бир «ишлов» берилган бўлади.

Фольклоризм атамаси профессионал санъаткор томонидан замонавий санъат ва адабиётга олиб кирилган фольклор материалининг табиатини жуда аниқ ифодалайди. Чунки ёзма адабиёт ёки бошқа санъат турлари таркибидаги фольклорга оид барча материал энди ўзининг табиий равишдаги яратилиши, жонли яшаши ва функция бажаришидан иборат бўлмай, балки ўша материалнинг профессионал ижодкор томонидан, биринчи навбатда, давр талаби, қолаверса, унинг ижод манераси ва услуби кабилар билан боғлиқ ҳолда ижодий мақсади асосида изчил йўналтирилган, иккинчи марта жонлантирилган шаклидан иборат. Иккинчи жонланиш, бошқача айтганда, қайта жонланиш ва функция бажариш эса доимо фольклоризмларнинг биринчи табиий яратилиш ҳамда функция бажаришидан маълум даражада фарқланиб туради. Шу жиҳатдан қаралса, ёзма адабиёт таркибида фольклор йўқ, балки фольклоризмлар мавжуд деб хулоса чиқариш мумкин.

Ўзбек адабиётшунослигида «фольклор» ва «фольклоризм» тушунчалари изчил фарқланмаганлиги сабабли фольклоризмлар типологияси чуқур ўрганилмай келинади. Фольклоризмлар табиатини чуқур тадқиқ этиш уларга хос типология масаласини ойдинлаштиришдан бошланмоғи лозим. Бу нарса, ўз навбатида, фольклор ва адабиёт муносабатининг ҳам тарихий тадрижи, ҳам

у ёки бу давр учун хос бўлган характери белгилашга, умуман, бу муносабатларнинг актив ёки пассив кўринишларини тўғри белгилашга имкон беради.

Фольклоризмлар типологиясини белгилашга уриниш 70-йилларнинг бошларида бошланди. Аммо хозирга қадар у кутилган натижа берганича йўқ. Шундай уринишлардан бири сифатида фольклорист О. Собировнинг «Ўзбек адабиётида фольклор ва фольклор анъаналари»¹ мақоласини келтириш мумкин.

Мақола муаллифи «фольклоризм» атамаси ўрнига «фольклор анъанаси» каби ўта умумий атамани қўллайдики, «фольклор анъаналари» атамаси, айти пайтда, «фольклоризм» тушунчаси доирасига кирмайдиган кенгрок тушунчаларни ҳам ўз ичида қамраб олади. Агар «фольклор анъаналари» атамасига фольклор ва адабиёт муносабатларининг икки типи нуқтаи назаридан ёндашсак, у ўзида ҳам бевосита, ҳам билвосита алоқадорликни мужассамлаштиради. Бир мақола доирасида бу икки тип алоқадорлик масаласини ҳал этиш мумкин эмас. Мақолада эса ҳар икки алоқадорликка оид масалалар хусусида аралаш-куралаш фикр юритилган. Фольклор ва адабиёт муносабатлари ҳақида бундай пала-партиш фикр юритиш эса масалани ойдинлаштиришдан кўра уни тобора чалкашликка олиб келади. Бундан ташқари, О. Собиров «фольклор» ва «фольклоризм» тушунчаларини фарқлай олмаган. Оқибатда «ўзбек адабиётида фольклор» бирикмасини бемалол қўллайди. Холбуки, адабиёт таркибида ҳеч қачон фольклор бўлган эмас ва бўла олмайди ҳам. Адабиёт таркибидаги фольклор материали эса «фольклор» эмас, «фольклоризм»дир.

О. Собиров «фольклор ва фольклор анъаналаридан» фойдаланишнинг беш хил шаклини кўрсатади.² Бу шакллар фольклоризмлар типологияси масаласи билан алоқадорми ёки йўқми, деган қонуний савол туғилади. Мақола муаллифининг кўрсатишича, юқоридаги беш шакл «Ўзбек адабиётида фольклор наму-

¹ Каранг: Собиров О. Ўзбек адабиётида фольклор ва фольклор анъаналари // Ўзбек фольклори масалалари. Таджикотлар. – Тошкент: Фан, 1970. – 125–143-бетлар.

² Ўша манба. – 142–143-бетлар.

налари ва тажрибаларини ўзлаштириш, фольклор анъаналарини изчил давом эттириш»нинг конкрет кўринишларидан иборат. Маълум бўладики, мақолада фольклоризмлар типологияси масаласи конкрет тарзда эмас, балки жуда ҳам умумий, айти пайтда, мавхум тарзда қўйилган ва ҳал этилган. Бу ҳолда иш кўриш ҳеч қачон фан учун фойдали хулоса бера олган эмас. Шу нуқтаи назардан мақоладаги асосий хулосага аҳамият берсак, унда бошдан-оёқ ўзбек адиб ва шоирлари фольклор анъаналаридан фойдаланган ҳолда ижод қилмоқдалар, деган аксиома келиб чиқади. Аксиома эса исбот талаб этмайдиган ҳақиқатдир.

Хўш, фольклоризмлар типологияси О. Собиров кўрсатган «фольклор намуналари ва тажрибаларини, фольклор анъаналарини изчил давом эттириш»нинг беш шаклига мос келадими? Бизнингча, йўқ, тўғри келмайди. Чунки у кўрсатган шакллarning тартибини ўзгартирмасак, биринчи шакл билан учинчиси, тўртинчиси билан бешинчиси бир-бирини такрорлайди. Фольклоризмлар типологияси эса фольклор ва адабиёт муносабатлари ҳаракат майдонининг ҳам тарихий тадрижини, ҳам ҳар бир давр учун хос бўлган структурал хоссаларини ўзида тўла акс эттирмоғи лозим. Демак, бундай типология фольклоризмларга хос ҳар бир элементнинг моҳиятини бир пайтнинг ўзида диахроник ва синхроник аспектларда тўлиқ ёритиш имконини беради. Қолаверса, фольклоризмлар типологияси ўзаро такрорланмас типлардан ташкил топади ва улар фольклор ҳамда адабиёт муносабатларининг барча даврларида бир-бирлари билан кесишмайдилар. Чунки коллектив ижод маҳсулининг индивидуал ижодкорлар томонидан истифода этилишининг конкрет тарзи, характери ҳаммавақт услублар ранг-баранглиги билан боғлиқ ҳолда ўзига хослик касб этади.

Ўзбек адабиётида мавжуд фольклоризмларни структура ҳамда бадий асар тўқимасида бажарган функцияси жиҳатидан икки типга ажратиш мумкин.

1. Оддий фольклоризмлар. Булар бирор ёзувчи ёки шоир ижодида халқ мақол ва маталлари, юмуқ иборалари, оғзаки нутқ учун хос ифода ҳамда оборотларнинг қўлланилишидан ташкил топади. Индивидуал ижодкорларнинг асарларида қўлланилган

фольклорга оид материалнинг бадий асар таркибида яққол ажралиб туришига қараб бу типдаги фольклоризмлар «оддий» аниқловчиси билан юритилади. Аммо бу атамага қараб оддий фольклоризмлар қўллаш ижодкорнинг фольклор материалларидан фойдаланишдаги маҳоратининг пастигини билдиради, деб хулоса чиқармаслик керак. Оддий фольклоризмлар ҳам ёзувчи ёки шоирнинг халқ ижодига бўлган муносабатини, унинг фольклорни тушуниш ва билиш даражаси, бу бебаҳо хазинадан ўз ижодида фойдалана олиш маҳоратини белгиловчи мезонлардан бири ҳисобланади.

Оддий фольклоризмлар бадий асардаги персонажлар нутқининг типиклигини таъминлашда катта роль ўйнайди. Шунинг учун оддий фольклоризмлар қўллашда ижодкор вазият типиклиги меъёрини сақлай билиши лозим. Акс ҳолда, асар зўрма-зўраки тикилган мақол ва иборалар бўтқасидан иборат бўлиб қолиши ёки фольклоризмлар етишмаслигидан тасвир куруқ чиқиб қолиши мумкин. Оддий фольклоризмлардан фойдаланишнинг юксак намуналарини Абдулла Қодирий, Ойбек, Абдулла Қаҳҳор, Саид Аҳмад кабилар намойиш қилдилар.

Ўзбек адабиётшунослигида фольклор ва адабиёт муносабатлари кўпроқ оддий фольклоризмлар доирасида тадқиқ қилинмоқда.¹ Албатта, оддий фольклоризмлар ҳам фольклор ва адабиёт муносабатининг айрим жиҳатларини ёритишга, воқеликни халқ руҳига яқин қабул қилиш ва эстетик жиҳатдан баҳолаш каби масалаларда ёрқинроқ кўзга ташланади. Шунга қарамай, фольклор ва адабиёт муносабатларига доир барча масалаларни оддий фольклоризмларни тадқиқ қилиш билан ҳал этиб бўлмайди. Муайян давр адабиётининг фольклорга бўлган муносабатини белгилашда оддий фольклоризмлар билан бир қаторда мураккаб фольклоризмларнинг тутган ўрнини ҳам тенг ҳисобга олиш керак бўлади. Ана шунда фольклор ва адабиёт муносабатининг қоронғи томонлари кашф этилади.

II. Мураккаб фольклоризмлар. Булар ўзларининг табиати, бадий асарда бажарган функцияларига қараб, бизнинг кузатиш-

¹ Ҳақимов М. Ёзувчи ва халқ тили. – Тошкент: Фан, 1970; Яна ўша. Алишер Навоий лирикаси ва халқ оғзаки ижоди. – Тошкент: Фан, 1979.

ларимизча, уч типга бўлинади. Бу уч типдан қай бирига мурожаат қилинишига қараб ижодкорнинг фольклорга бўлган муносабати, уни тушуниш даражаси ва тарзи, фольклор жанрларининг бадий имкониятларидан фойдалана олишдаги ўзига хосликлари, бу масаладаги ижодкорларнинг бир-бирлари билан типологик ўхшашлик ҳамда фарқланишлари аниқланади. Мураккаб фольклоризмларнинг қуйидагича типлари мавжуд:

1. Аналитик фольклоризмлар. Аналитик фольклоризмлар асарнинг бадий тўқимаси, унинг етакчи ғояси билан органик бирикиб кета олмаслиги жиҳатдан характерланади. Ижодкор ўз асарига ўз ўрни билан фольклорга оид бирор мотив ёки сюжетни қистириб кетади ва шу орқали ўзи тасвирламоқчи бўлган эпизодга фалсафий-дидактик руҳ бағишлашга, тасвирнинг эмоционал-лигини оширишга эришади.

Аналитик фольклоризмлар асарнинг ғоявий-тематик диапозонини кенгайтиришга кўмак беради, улар бадий асарнинг ғоявий йўналиши, тематик асослари билан уйғунликда бадий тўқимага киритилсалар ҳам, бироқ бу боғлиқлик органик алоқадорлик даражасига кўтарила олмайди. Бунинг ёрқин мисоли сифатида Ўлмас Ўмарбековнинг «Одам бўлиш қийин» романидаги фольклоризмларни кўрсатиш мумкин. Асар бошида келтирилган шоҳ Муслим ҳақидаги ривоят ғояси билан романда илгари сурилган ғоя ўртасидаги рамзий алоқадорлик мавжуд. Шунга қарамай, бу фольклоризм роман тўқимаси таркибига сингишиб кета олмаган. Унинг романдаги асосий функцияси бош ғояни қабартириб ифодалаш, унга рамзий-фалсафий руҳ бағишлашдан иборат.

Романда аналитик фольклоризмлардан яна икки ўринда фойдаланилган. Улар Ғафуржон ака айтиб юрадиган ҳунар туфайли ўлимдан омон қолиб, инсон гўшти билан савдо қилувчи разил кабобфурушлар тўдасини йўқ қилган Фиръавн ҳамда най чалиш санъати туфайли аждар комидан қутулиб чиққан чўпон ҳақидаги эртақлардир. Бу икки фольклоризм ҳам асарнинг бош ғояси билан узвий алоқадорликка эга эмас. Аммо улар Ғафуржон ака шахсиятига, унинг эътиқодига хос муҳим инсоний хислатларни таъкидлаш ва шу орқали романдаги меҳнатсеварлик, касб-ҳунар

эгаллаш ҳақидаги олижаноб ғояларни фалсафий-дидактик руҳда тасвирлашга хизмат қиладилар.

Аналитик фольклоризмларнинг ҳозирги адабиётимиздаги гўзал намуналари Асқад Мухторнинг «Чинор» романида мавжуд. Ёзувчи ҳар бир қисса ёки ҳикоятни бошлашдан олдин ўша қисса ёки ҳикоятнинг мазмунига уйғун бир ривоят келтиради. Улардаги чуқур ҳикмат ўқувчини роман воқеаларига олиб киришга, асарнинг ғоявий асосини тўғри белгилашга ёрдам беради.

Аналитик фольклоризмлар ижодкорларнинг шахсий услуби, уларнинг маҳорати билан боғлиқ ҳолда ранг-баранг шаклларда, турли даражада адабиётимизнинг деярли барча тараққиёт босқичларида учрайди. Уларнинг мавқеи, айниқса, классик адабиётда сезиларлидир. Алишер Навоийнинг биргина «Ҳайратул-аброр» дostonидаги фольклоризмлар ёки «Маҳбубул-қулуб» каби фалсафий-дидактик асарида бирор масаланинг моҳиятини ёрқинроқ, таъсирчанроқ баён қилиш мақсадида келтирилган кичик-кичик ҳикоялар шулар жумласидандир.

Аналитик фольклоризмларнинг шакли масаласига келганда шуни айтиш керакки, улар ижодкорнинг мақсади, услуби, фольклор материални билиш даражаси билан боғлиқ ҳолда бадиий асар таркибида икки хил шаклда учрайди: а) фольклоризм ўзининг фольклордагидек тўлиқ шаклида; б) фольклоризм мазмунан сақланса ҳам, бироқ шаклан ўзгартирилган, кўпинча, қисқартирилган, ишлов берилган ҳолда келтирилади. Ҳар икки шаклда ҳам улар асар ғоясининг тўлиқроқ ифодаланишига хизмат қилади.

Хуллас, аналитик фольклоризмлар қўллаш аъъанаси ўзбек адабиётига классик адабиётимиздан ўтиб, ҳозирги кунда давр талаби, адиб ва шоирларимизнинг маҳорати билан боғлиқ бадиий-ижодий амалиётимизда кенг қўлланилиб келмоқда.

2. Синтезлашган фольклоризмлар. Бу асарнинг бадиий тўқимасини, унинг ғоявий-тематик асосларини белгиловчи муҳим омил ҳисобланади. Шунинг учун ҳам у ижодкордан фольклор жанрларининг етакчи хусусиятларини, уларнинг поэтик имкониятларини, энг муҳими, фольклор асарларининг асрлар давомида ўлмаслигини таъминловчи етакчи инсоний ғояларни

тўғри илғаб олиш ва уларни ўз даврининг муҳим муаммолари билан боғлай олишни талаб этади. Бинобарин, синтезлашган фольклоризмлар асосида яратилган асарларнинг поэтик табиати, ғоявий-тематик доираси бевосита фольклор руҳи билан суғорилган бўлади. Бундай фольклоризмлар табиатини аниқ тасаввур қилиш учун Омон Матжоннинг «Ҳаққуш қичқирғи» асарига мурожаат қиламиз.

«Ҳаққуш қичқирғи»да келтирилган барча ривоят, афсоналар бир мақсад – давримизнинг долзарб масалалари бўлмиш Ватанга муҳаббат, дўстлик, тинч-тотув яшаш, бахт учун кураш каби инсоният бутун тарихи давомида интилиб келган боқий мавзуларга йўналтирилган. Бу мавзулар янги давр талаблари билан йўғрилганлиги сабабли асар ўзига хос оригиналлик касб этган.

Омон Матжон асарида кўҳна Хоразм афсоналаридан бирининг мазмунини келтиради, аммо унинг мазмунини шундайича эмас, балки афсонанинг рационал мағзини яқин ўтмишимиз билан боғлаб келтиради: тонг отишидан бироз олдинроқ осмондаги юлдузлар, боғлар орасидан шарқираб оқадиган сой, баланд теракларнинг учига миниб олган ой – боринги, бутун мавжудот бир неча дақиқа сокинлик оғушида муаллақ туриб қолар эмиш. Ана шу пайтда ҳаққуш деган куш қичқирармиш. У қичқирган пайтда сокинлик сақланса, замон тинч, одамлар фаровон яшар эмишлар. Қариялар тонг отишидан олдинги мана шу пайтни интизорлик билан кутганлар, сокинлик қаъридан, боғлар ортидан янграйдиган ҳаққуш қичқирғини эшитгач, қалблари қувончга тўлган одамлар «шукр» қилишиб, хотиржам тонгги уйқунинг лаззатига чўмганлар.

Ҳаққуш қичқирғи ҳақидаги ишонч ва эътиқод нафақат Хоразм, балки бутун ўзбек халқига хос муқаддас эътиқод бўлиб, тинчлик ва бахт куши ҳақидаги халқимизнинг эзгу ишонч ва интилишларини даврнинг етакчи муаммоларига боғлаган ҳолда асар тўқимасига олиб кириш ижодкордан фольклор материалларини зукколик билан синтез қила олиш иқтидорини талаб этади [...]. Демак, О. Матжоннинг китоб номини «Ҳаққуш қичқирғи» деб аташи ҳам бежиз эмас. У тинчликсевар халқининг фарзанди

сифатида давримизнинг ягона муаммосига халқ эътиқоди орқали жавоб бермоқда.

Шоир афсонанинг рационал маъзига янада конкретлик багишлаш учун унга кичик бир тарихий деталь киритади. Аллаким ҳаққуш қичқирган пайтда уни отиб оламан, лекин ҳеч нима бўлмайди, деб қушга қарата ўқ узади. Ўша пайт 1941 йилнинг 22 июнь тонгги экан. Маълум бўладики, бу деталь чуқур рамзий характерга эга. Барча мавжудот сокинлик оғушида ором олаётган бир пайтда фақат разил, худбин кишиларгина бу сокинликни бузадилар. Албатта, халқимизнинг муқаддас эътиқодини ифодаловчи бу афсонага шоир томонидан қўшилган кичик бир тарихий изоҳ фольклоризмнинг бадий қимматига, унинг эмоционал жиҳатларига заррача салбий таъсир кўрсатгани йўқ. Аксинча, бу деталь халқ эътиқод ва ишончининг асрлар оша ўлмаслигини яна бир карра намойиш қилган.

Бу жиҳатдан асарнинг «Рухлар» қисми диққатга сазовордир. Унда рух билан боғлиқ конкрет бир афсонага таянилмай, балки ўзбек халқининг умуман рухлар ҳақидаги анимистик қарашларини ифодаловчи жуда кўп афсона ва ривоятларининг моҳияти синтез қилиб берилган.

Китобнинг бу қисмида жамиятимиздаги ҳар бир шахснинг Ватан, халқ, қолаверса, бутун башарият олдидаги инсоний бурчига лоқайд қараб турмаслиги лозим деган гоя илгари сурилган. Унда ҳикоя қилинишича, рух қабристондан чиқиб, бир йўловчининг таниши киёфасига кириб, ундан қаёққа кетаётганлигини сўрайди. Йўловчи таниши киёфасидаги рухга қараб, «Йўлдан қўйма, Мамарайимга бир кўрсатиб қўяй. Унинг гапи тўғрими, ё меники? Қаллани ишлатиш керак, қаллани», – деб ўтиб кетади. Буни кўрган рух одамлар ўз орзулари, ўз сўзлари учун курашаётган эканлар, бу яхши, деб хотиржам ўз маконига қайтади. Бир қанча вақт ўтгач, рух иккинчи бир йўловчи қаршисидан чиқиб, ундан қаёққа кетаётганлигини сўрайди. Аммо у шахс қайрилиб ҳам қарамайди: «сен менга тегма, мен сенга тегмай» дегандек лоқайд кетаверади. Одамлар ўртасида бундай лоқайдлик кучайганидан ларзага келган рух қабристонга келиб: «Ўликлар! Ернинг юзи ҳам ўзимизга қолибди!» – деб қичқиради. Кўриниб

турибдики, бу асарда ҳам катта ғоя бор. Инсоният тақдири, жамият тараққиёти учун курашда локайд қараб турадиган шахсиятпарастларни шоир ўликлар қаторига қўшадики, бу шоирнинг фольклор асарларига хос бўлган юксак ғояларни назик синтез қила билганлигидан далолат беради.

Демак, синтезлашган фольклоризмлар асосида яратилган асарда халқ эътиқоди, унинг даҳоси яратган дурдоналарнинг рационал мағзи ижодкор гоёси, унинг эстетик принциплари, давр талаби ва муаммолари билан шу қадар киришиб, уйғунлашиб кетган бўладики, аксарият ҳолларда уларнинг чегарасини белгилаш мумкин эмас.

Синтезлашган фольклоризмлар асосида асар яратиш анъанасининг илдизлари ҳам бизнинг адабиётимизда анча қадимийдир. Бу анъана Яқин ва Ўрта Шарқ халқлари адабиётининг барқарор анъаналари бўлиб, у Юсуф Хос Ҳожиб, Низомий Ганжавий, Саъдий Шерозий, Абдурахмон Жомий, Алишер Навоий, Мавлоно Али Сафий, Хожа, Мирзо Абдулқодир Бедил, Машраб каби буюк намояндалари ижодида камол топгандир [...].

3. Стилизация характеридаги фольклоризмлар ўз характери жиҳатидан иккига бўлинади: а) ижобий характердаги стилизация асосида юзага келган фольклоризмлар. Бу типдаги фольклоризмлар, асосан, фольклор материалларининг ҳам гоёвий, ҳам мазмуний жиҳатларига тўлиқ таянган ҳолда уларни янги шаклда қайтадан ишлов бериш туфайли юзага келади. Фольклор асарларидаги ўлмас ғояларни халқ оmmasига янада кенгроқ ёйиш, улар орқали халқнинг ахлоқий, эстетик талабларини тўлароқ қондириш эҳтиёжи, ижодкорнинг шахсий майли ва услуби талаблари асосида ижобий характердаги стилизация фольклоризмлари яратилади. Бу жиҳатдан Ҳ. Олимжоннинг «Ойгул билан Бахтиёр», «Семурғ», Султон Жўранинг «Зангори гилам», Собир Абдулланнинг «Тоҳир ва Зухра», Комил Яшиннинг «Равшан ва Зулхумор» каби асарлари диққатга сазовордир; б) салбий характердаги стилизация асосида юзага келган фольклоризмлар. Бу тип фольклоризмлар асосида яратилган асарларда, асосан, замонавий мавзулар қаламга олинса-да, бироқ улар традицион фольклорга хос тасвир воситалари, хулласки, шаклий компонентлар воситасида

тасвирланади. Традицион фольклорга хос тасвир восита ва усулларининг янги воқеликни бутун қирралари ҳамда мураккаблиги билан акс эттиришга қодир эмаслиги фольклор асарларининг шаклий компонентларига тақлид қилиш асосида юзага келган ҳар қандай стилизацияни муваффақиятсизликка олиб келади. Ёзма адабиётдаги жанрлар табиатида туб бурилишлар юз берди, реалистик тасвир – социал-психологик детерминизм кучайди, натижада аксарият ҳолларда фольклор асарларининг шаклий жиҳатларига стилизация қилиш ҳозирги адабий-бадий тажрибада муваффақиятсизликка учрамоқда. Бу нарса фольклоризм масаласида ҳам шакл ва мазмун мутаносиблиги қонунига тўла риоя қилиш лозимлигини яна бир қарра исботлайди.

Қисқача шунни айтиш керакки, юқорида кўрсатилган фольклоризмларнинг ҳар бир типи адабий тур ва жанрларга нисбатан турлича хосланишларга эга. Масалан, оддий фольклоризмлар деярли барча адабий тур ва жанрларда қўллаш учун қулайликлари билан ажралиб туради. Мураккаб фольклоризмлар таркибига кирувчи аналитик фольклоризмлар, асосан, эпик жанрларда қўлланишга мос бўлиб, лирик жанрлар табиати бу типдаги фольклоризмларни кўтара олмайди. Синтезлашган фольклоризмлар эса ҳам эпик, ҳам лирик, ҳам драматик турларга хос жанрларда қўллашга қулайлиги билан ажралиб турадилар; ижобий стилизация асосида юзага келувчи фольклоризмлар эса ҳозир, асосан, болалар адабиётида кенг қўлланиши мумкин.

Хулоса қилиб айтганда, ўзбек адабиётидаги фольклоризмлар типологияси, ҳар бир типнинг генезиси, эволюцияси ва ҳозирги ҳолатини аниқ илмий далиллар асосида очиб бериш келгусида катта тадқиқотларнинг объекти ҳисобланади.¹

¹ Макола «Ўзбек тили ва адабиёти» журналининг 1980 йил 4-сонидан (37–45-бетлар) олиб босилди.

Худойберган
ЭГАМОВ
(1944–2000)



Худойберган Эгамов 1944 йил 5 ноябрда Қорақалпоғистон Республикасининг Беруний туманида туғилган. Тошкент давлат педагогика институти (ҳозирги Низомий номидаги Тошкент давлат педагогика университети)ни битирган (1970). 1964–1966 йилларда армия сафида хизмат қилган. «Ўқитувчи» нашриётида муҳаррир, катта муҳаррир бўлиб ишлаган (1970–75). Тошкент давлат маданият институтида ўқитувчи, доцент, кафедра мудири лавозимларида фаолият олиб борган (1975–2000). «Туркий халқлар эртакчилик анъаналарининг типологияси ва ўзаро алоқалари» мавзусида докторлик диссертациясини ҳимоя қилган (1988). Туркий халқлар эртакларини қиёсий-типологик жиҳатдан тадқиқ этиши, қардош халқлар эртакчилик анъаналарининг қадимий асослари, уларнинг ўзаро алоқалари ва ривожланиши тамойиллари, эртаклар типологияси ва миллий ўзига хослиги, эпик сюжет, мотив ва образлар генезиси масалаларини тадқиқ этган. «Сайёр сюжетлар» (1979), «Фольклор асарлари типологияси» (1979), «Ранг-баранг олам» (1979), «Туркий халқлар эртакчилик анъаналари алоқалари тарихидан очерклар» (1982), «Туркий халқлар эртакларининг ўзига хос хусусиятлари ва таснифи» (1986), «Фольклор ва этнография» (1986, ҳамк.) каби илмий асарлар муаллифи. 2000 йили Тошкент шаҳрида вафот этган.

МОТИВ ВА СЮЖЕТ

Туркий халқлар сеҳрли-фантастик эртаклари тематикаси, мотив ва сюжетлари жиҳатдан хилма-хил бўлиб, келиб чиқиши, генезисига кўра энг қадимги даврларга мансубдир. Замирида қадимги аждодларимизнинг табиат дунёсида турли ғайритабиий кучлар мавжудлиги хусусидаги тушунчалар, тасаввурлари ётган мазкур эртакларнинг кишилар ҳали дунё мўъжизалари ҳақида деярли кам тасаввурга эга бўлган даврларда юзага келганлиги олимларимиз томонидан исботлаб берилган. Олам ҳақида тасаввури саёз қадимги Ўрта Осиё халқлари томонидан яратилган мана шу эртакларда уларнинг эзгулик, ахлоқ ва одоб, дўстлик, биродарлик каби гуманистик туйғулари, олижаноб фикрлари ўз ифодасини топган. Эртаклардаги ҳаётбахш фантастика, сеҳрли қаҳрамонларнинг мўъжизакор кучи, фаолияти, келажак ҳақидаги орзулари ундаги ёвуз кучларга қарши курашга йўналтирилган. Шу сабабдан эртакларда доим яхшилиқнинг ёмонлик устидан ғалабаси ижобий тарзда ёрқин бўй кўрсатиб туради. Бу халқимизнинг ўз фарзандларининг келажакига бўлган ишончи юксак бўлганини кўрсатади. Ўрта Осиё халқлари сеҳрли-фантастик эртакларнинг ўзига хос хусусиятлари ранг-баранг бўлиб, улардан бири ундаги шартлиликнинг мавжудлигидир. Яъни воқеаларда фантастик образлар, турли зотларнинг, қатнашиши, одамнинг ҳайвонга ёки аксинча, ҳайвоннинг одамга айланиши, қаҳрамоннинг мўъжизавий туғилиши, табиатнинг қаҳрамон тақдирини ҳал қилишда иштироки ва бошқалар.

Ўрта Осиё халқлари эртақ эпоси кўпгина жаҳон халқлари эртақларига хос хусусиятларга ҳам эгадир. Шундай хусусиятлардан бири уларнинг жанр жиҳатдан бошқа эпик жанрлар билан ўзаро яқинлик (синкретиклик) хусусиятидир. Агар диққат қилсак, юқорида эслатиб ўтганимиздай аксарият эртақлар сюжет ва мотивлари замирида бир қатор дostonларнинг («Ширин билан Шакар», «Хуршидой», «Эрали билан Шерали», «Тоҳир ва Зухра», «Саёд ва Хамро», «Шоҳсанам ва Ғариб», «Наджепўғлон», «Гулнор пари», «Зевархон» ва ҳ.к.) вужудга келганлиги, ёки аксинча, эртаклардаги баҳодирлик,

қахрамонлик тасвири дostonлардаги мотивларга жуда якин туриши фикримизни тасдиқлайди.

Эртақларда меҳнаткаш халқ аҳлининг дунёқараши, психологияси, урф-одат, интилишлари бадий тарзда, фантастик либосида берилган бўлиб, бошланишиданок кутилган мақсаднинг аниқ берилиши, уйдирма воқеаларнинг сеҳрли усулда баён этилиши, мотивларининг ранг-баранглиги, конкретлиги билан ажралиб туради. Чунки мазкур халқлар эртақларида олдиндан ўйлаб қўйилган (уйдирма воқеалар) мақсад асосий ўринни эгаллайди ва ундаги барча образлар, воситалар шу мақсаднинг ечилишига қаратилган бўлади. Эртақ айтувчи асар қахрамонларини, мотив ва тасвирий воситаларини ўз истаги, ниятига қараб тасвир этади. У қахрамонларни олдин ўйлаб қўйган воқеаларга рўбарў қилиб, эртақ мотивларини шу қахрамон фаолияти, характер мантиғига мос ижро этади. Сеҳрли-фантастик эртақлар табиати ҳаётий воқеаларни қандай бўлса шундайлигича ўзгаришсиз эмас, балки ўзига хос, бадий тарзда ифодалашни тақозо этади. Фантастика ва уйдирмалар эса халқнинг ҳаёт ҳақидаги орзуларидан келиб чиққан ҳаётбахш восита бўлиб, ижрочи учун зарур бўлган ифода формаси ҳисобланади. Шу жиҳатдан сеҳрли фантастик эртақлар сюжетини ташкил этувчи айрим мотивларнинг мифлардан ўзлаштирилганлиги, кейинги даврларда янгидан-янги функцияларнинг синдирганлиги, гайритабиий кучларнинг инсонлар устидан маълум даражада ҳомийлик қилиши, кишилар ҳаётининг маълум томонларини бошқариши, шунингдек мазкур эртақларда инсон ва табиат муносабати мураккаблиklarини акс эттирилганлигини эртақлар оиласида сеҳрли-фантастик эртақларнинг энг қадимийлигини кўрсатади. Фольклористикада туркий халқлар, жумладан, ўзбек сеҳрли-фантастик эртақларининг морфологияси (тузилиши) ханузгача жиддий ўрганилмаган, қиёсий-типологик таҳлилга муҳтож бўлган ва ўз тадқиқотчисини қутаётган актуал проблемалардан биридир.

Айниқса, эртақлардаги хилма-хил мотивлар унинг сюжет қурилишида қолипловчи, зарур ўринлардан бирини ташкил этади. Эртақ қахрамонларининг уч йўлга (борса келмас, борса келар, ё келар, ё келмас) қараб ажралиб кетишлари, кенжа бо-

тирнинг (ўғил) нуроний чолга (ёки Хизр) учраши, жодугар кампир ёки девлар билан олишиб уларни енгиб, сеҳрли буюмларни қўлга киритиши каби қатор воқеаларни кўрамиз. Шунингдек, қаҳрамоннинг аждар, дев, тимсоҳ ва бошқа ёвуз кучлар билан курашининг гувоҳи бўламиз. Эртақлар сюжетидаги бу каби кўп-лаб учрайдиган воқеалар тасвири мотивлардир. Эртақлар сюжети эса ана шу мотивлар уюшмасидан ташкил топади.

Ҳар бир эртақ қатор мотивлар занжиридан тузилган. Масалан, богда олманинг ўғриланиши, оға-иниларнинг уни излаб сафарга жўнаши, қаҳрамоннинг акалари томонидан таъқиб қилиниши, душманлик, девлар қўлидаги бандиларни озод қилиш, уларни ер юзига чиқариш, қаландарнинг фарзандсиз аёлларга олма бериши, олма еб уларнинг бола кўришлари, отанинг ўз ўғлига от тақдим этиши, от уни истаган ерига олиб бориши, сеҳрли най йигитнинг айтганларини бажариши, узукнинг қаҳрамон хоҳишларини бажариши ва ҳоказо. Булар эртақлар сюжетини юзага келтирувчи хилма-хил мотивлардир.

Ўрта Осиё туркий халқлари, хусусан, ўзбек сеҳрли-фантастик эртақларини мотивлари бўйича тубандагича тасниф қилиш мумкин:

а) оригинал мотивли эртақлар (бир халқ ичидаги, бошқа халқларда учрамайдиган);

б) бошқа жанрлардаги мотивлар билан синкретлашган мотивли эртақлар;

в) айнан ўхшаш ёки ўзлаштирма мотивли эртақлар;

г) имитацион мотивли эртақлар;

д) трансформацияга учраган мотивли эртақлар (қайта ишланган, ўзлаштирилган мотивлар).

Эртақлар мотивларини бир халқ ёки халқаро тарзда тадқиқ қилиш проблеманинг қандай қўйилиши, ўрганиш объекти ва тадқиқотчининг мақсадига боғлиқдир. Тадқиқотга оригинал, синкретлашган, қайтарма, имитацион, трансформацияга учраган каби мотивларни бир халқ (масалан, ўзбек) бир тил оиласига мансуб бўлган бир неча халқлар (туркман, озарбайжон, козоқ, қорақалпоқ) ёки тилларида тафовутлари бўлган (туркий, эрон, монгол) бошқа халқлар эртақлари асосида олиб ўрганиш

мумкин. Бу проблемалар, энг аввало, мотив ва сюжет талқини, уларнинг ўзаро муносабати, мотивнинг эртақ сюжетида тутган ўрни, вазифаси каби проблемаларни атрофлича ёритишни тақозо этади.

«Мотив сюжетни вужудга келтиради, у сюжетлар системасининг элементидир, – дейди фольклоршунос Б. Н. Путилов. – Мотив системалар таркибида маълум бир вазифани бажаради, шу ерда у ўзининг аниқ ўрнига эга, шу ерда унинг конкрет мазмуни очилади». Агар биз шу фикр асосида ўзбек халқ эртаги «Шаҳзода Баҳодир»да қаҳрамоннинг тушида бир қиздан шапалоқ ейишини мотив деб қарайдиган бўлсак, унда ҳали маълум бир тугал вазифа адо этилмаганини, ҳали у конкрет бир мазмунга эга бўлмаганини кўрамиз. Туш кўриш мотиви келгуси мотивнинг юзага келишини тақозо этгандагина, у билан мантиқан боғланиб изчил давом этгандагина конкрет мазмун касб этади. Яъни юқоридаги эртақда шаҳзоданинг тушида кўрган қизни қандай излаб топиши йўлида қилган ҳаракати билангина унинг «конкрет мазмуни» очилади. Шу сабабли алоҳида олинган айрим-айрим ҳаракатлар, воқеалар мотив бўлавермайди. Мотив аниқ ўринга, конкрет мазмунга эга бўлади, маълум бир функцияни бажариб, бошқа мотивлар билан бирга изчил боғланиб қолади. Бу хусусиятлар мотивларни биридан ажратишга, фарқлашга ҳам имкон беради.

Шуни айтиш керакки, мотивлар конкрет бир давр таъсирида вужудга келади ва аста-секин ўзгариб, бойиб боради. Сюжет эса «мотивлар комбинацияси» (А. Н. Веселовский) сифатида «Мураккаб схема каби бир қатор мотивлардан тузилган» (Б. Н. Путилов) ҳолда улар акс эттирган бутун даврлар умумлашмасини ўз ичига қамраб олади. Демак, мотив – маълум бир даврнинг маҳсули, сюжет эса босқичлар аксини топган бутун мотивлар комбинациясининг умумлашмасидир.

Шундай эртақлар ҳам учрайдики, улар ҳажм ва тасвир жихатидан эртақ жанридан кўра бошқа кичик фольклор жанрларига афсона, латифа, ҳангомаларга жуда яқин туради. Қозок халқ эртаги «Шоҳли хон», ўзбек халқ эртаги «Шоҳли Искандар», «Хўроз ва фил» эртақлари худди битта мотивдан иборатдек кўринади. Шунинг учун бўлса керак фольклоршунос Ғ. Жало-

лов ўзининг «Ўзбек халқ эртаклари поэтикаси» асарида «Шоҳли Искандар» эртагининг сюжетини мотив сифатида келтиради, шунингдек «Арпаполвон», «Хусанжон» эртакларини эса «Оригинал сюжетли этак» тариқасида талқин қилади.

Мотивларнинг функцияси жиҳатдан классификация қилган фольклоршунос олим Б. Н. Путилов «Мотив сюжетни вужудга келтирувчи элемент» деган мақоласида эпик мотивларни: мотив – ситуация, нутқ – мотив, мотив – ҳаракат, тасвир – мотив, мотив – характеристикасига ажратади. У бу кўрсатилган мотивлар ичида мотив – ситуация, нутқ – мотив, мотив – ҳаракатларни биринчи ўринга қўйиб, қолганлари бевосита юқоридаги мотивларга қўшилиб, уларни тўлдириб келишини айтади. Олим мотив – ситуация деб сюжетнинг ҳали ҳаракатсиз, қаҳрамоннинг актив фаолият кўрсатиши билан боғлиқ бўлмаган, экспозицион характерга эга бўлган ва асосий сюжет коллизиясигача бўлган даврини назарда туттади. Нутқ – мотив эса подшонинг буйруғи билан ёки бировнинг чақимчилиги, хабари билан ёки туш таъбири туфайли қаҳрамоннинг актив фаолиятга киришишидир. Ҳаракат-мотивга қаҳрамоннинг бевосита актив фаолияти, сафарга чиқиши, мусобақаларда қатнашуви, ҳар хил тўқнашувлари, курашлари киради. Агар «Шоҳли Искандар» номли ўзбек эртагини кузатсак, Б. Н. Путилов ажратиб кўрсатган уч хил мотивнинг барчаси мавжудлиги кўзга ташланади. Қадимги замонда Искандар исми шоҳнинг бўлганлиги, унинг барча сартарошларни сочини олдиригандан сўнг ўлимга ҳукм қилиши мотив-ситуацияни эслатади. Искандарнинг қари сартарошга сочини олишга буюриши ва агар шоҳим борлигини айтмасанг, ўлдирмайман, деб шарт қўйиши эса нутқ-мотивдир. Кекса сартарош Искандарга сирни сақлаш тўғрисида сўз беради. Аммо Искандарнинг шоҳи борлиги унга тинчлик бермайди. Сирни очмаса, кундан кунга шишиб кетаверишини сезган чол уни бориб қудуққа айтади. Қудуқдан эса қамиш ўсиб чиқади. Чўпон у қамишдан най ясайди. Най бутун сирни ошкор қилиб кўяди. Дарғазаб бўлган Искандар қари сартарош билан чўпонни юртдан қувиб юборади. Кўриниб турибдики, қаҳрамонлар бевосита актив фаолият кўрсатяптилар. Бу эса мотив-ҳаракатдир.

Маълумки, мотив билан сюжет яхлитлик касб этиб, эртак қаҳрамонларининг хатти-ҳаракатлари, курашлари, ўзаро муносабатлари ёинки «Характернинг ривожланиши ва юзага келиши» (М. Горький)да ўз аксини топади. Ғ. Жалолов мотив билан сюжетни алмаштириб талқин қилганлиги туфайли «Шоҳли Искандар», «Арпаполвон» ва «Хусанжон» эртакларини «оригинал» эртак деб қарайди. «Арпаполвон» эртагидаги оригиналлик унинг сюжетида эмас, балки мотивидадир. Тўғри, эртакдаги подшо қизининг арпа деб ҳомиладор бўлиши ва тугиши бошқа халқ эртакларида кам учрайди. Аммо, Арпаполвоннинг дев билан олишиши, қудуққа тушиши, девларнинг уни тортиб олмасликлари, Семурғ болаларини қутқариши, эвазига Семурғ уни ёруғликка олиб чиқиши каби мотивларни деярли кўпчилик дунё халқлар эртакларида учратамиз. Масалан, туркман халқ эртаги «Подшонинг чўри хотиндан бўлган икки ўғли» эртагининг мотиви ҳам худди шундай мотивлардан ташкил топгандир. Ўрта Осиё халқлари сеҳрли-фантастик эртакларида кўпинча бирор кампир ёки чол қаҳрамонга тушида ёхуд расмини кўриб севиб қолган қизи тўғрисида хабар қилади. Бу қаҳрамоннинг бевосита актив ҳаракатига туртки берувчи нутқ-мотив ҳисобланади. Хабар-мотив информацион характерга эга бўлиб, содир бўлган воқеа-ҳодисалардан хабар беради ва қаҳрамонни янги саргузаштларга тайёрлайди. Қаҳрамон бу актив фаолиятга (юқорида эслатганимиздай, кимнингдир хабари, чақирғи, таклифи ёки буйруғи, бўлиб ўтган суҳбат, олган хати, туш кўриши, баҳслашиши каби) маълум бир сабаблар туфайли киришади. Бундай мотивлар бу ўлка халқлари сеҳрли-фантастик эртакларининг деярли аксариятига хосдир.

«Сеҳрли-фантастик эртакларнинг сюжети доимо саргузашт асосига курилади, – дейди фольклоршунос М. Сакали. – Қаҳрамон кўпинча гўзал қизни ёки бўлмаса сеҳрли нарсани (бирор ҳайвонни ёки қушни) қидириб кетади. Масалан, «Беш қаландар» эртагида подшоҳнинг ўғли гўзал қизнинг расмини кўриб, уни излаб кетади. Бунақа мотив туркман эртакларида кўплаб учрайди». Қаҳрамоннинг бирор хабардан кейин севгилисини қидиришга отланиши, актив ҳаракатга келиши ўзбек эртаклари «Моҳистара»,

«Мукбил тошотар», Озарбайжон халк эртаги «Хотам ҳақида эртак», «Малик Мамад билан Малик Аҳмад», «Искандар ҳақида эртак», «Бахтиёр» ва бошқа кўпгина эртакларда ҳам учратамиз. Агар қаҳрамоннинг саргузашти (кўнинча шахзода) у хабар топган малика ёки пари билан боғлиқ бўлса-ю, бироқ эртакнинг сюжетида актив роль ўйнамаса, эртак сюжети янги кириб келган қаҳрамон фаолияти билан ривожланса, бу экспозицион характерга эга бўлиб, мотив-ситуацияга киради. Масалан, ўзбек эртаги «Бектемир ботир»ни олиб кўрайлик. Фарғона вилоятининг подшоҳи Одилхон кийик овлаб юрганида бир кўрғонга дуч келади. Кўрғон эгасининг қизини кўриб ошиқ бўлиб қолади ва унга уйланади. Ундан Бектемир деган ўғил кўради. Шу билан эртакка «янги қаҳрамон» кириб келади. Энди эртакнинг сюжети, асосий воқеалари ана шу «янги қаҳрамон» – Бектемирнинг саргузаштлари билан боғланиб кетади. Одилхоннинг кўрғон эгасининг қизини кўриб, ошиқ бўлиши экспозицион характерга эга бўлган мотив-ситуациядир. Эртак давомида кампирнинг Бектемирга Оқбилақдан хабар бериши эса мотив-хабар бўлиб ҳисобланади. Чунки Одилхоннинг харакатларида унга туртки бўлган хабарни кўрмаймиз. Бектемирга эса кампирнинг яхши кўриб қолган париси ҳақида хабар бериши информатив характерга эга бўлиб, қаҳрамоннинг келгуси актив фаолиятини юзага келтиради...

Фольклоршунос Ғ. Жалолов ўзбек сеҳрли-фантастик эртаклари сюжет ва мотивларининг бой ва ранг-баранглиги хусусида ибратли фикрлар айтиб, эртак сюжети ва композицияси оралиғидаги бирликни ундаги фақат ўзгармайдиган турғун мотивлар вужудга келтиради, деган хулосага келади ва мисол тариқасида «Қирон ака» эртагининг 1926 йилда Тиллабиби Дадасардор қизидан М. Алавия ёзиб олган Пискент варианты билан 1950 йилда Ф. Абдуллаев томонидан Шовот районида яшовчи Н. Иброҳимовдан ёзиб олинган «Қирон ботир» эртаги мотивларини келтиради. Бизнингча, эртак «сюжети ва композицияси оралиғидаги бирлик» ибораси ўрнига сюжетнинг асосини ташкил этувчи мотивлар дейилса, мувофиқроқ бўлур эди. Чунки унинг қарашича сюжет ривожини таъмин этувчи асосий мотивлар ўсиш-ўзгаришга молик эмасдир. Тадқиқотчи сюжетни

ташқил этган асосий турғун мотив деярли ўзгаришга учрамайди дейди-ю, бироқ ўша «турғун» мотивларнинг конкрет тарзда қайсилар эканини кўрсатмайди. Энди тадқиқотчининг мазкур фикри қанчалик тўғрилиги боисида «Қирон ака» ва «Қирон ботир» номли ўзбек эртақларининг асосий мотивларини ҳамда худди шу эртақнинг қорақалпоқ варианты бўлган «Қирон қароқчи» эртақларини бир-бирига қиёслаб кўрайлик. Бизнингча, эртақ сюжетини ташқил этувчи «турғун» мотивлар илгари айтганимиздай, асосан, «мотив-хабар, мотив-ҳаракат ва мотив-ситуацияларда намоён бўлади. Биз солиштирганда ҳам ўша уч мотивнинг қанчалик ўзгарган-ўзгармаганига эътибор беришимиз лозим бўлади. «Қирон ака» ва «Қирон ботир» эртақларининг ҳар иккаласида ҳам экспозицион характердаги мотив-ситуация – яъни бир подшонинг ёлғиз ўғли бўлади, унинг тушида бир қиз парига ошиқ бўлиб қолиши бир хилдадир. Чунки мотивнинг бу тури эртақ сюжетининг ҳали ҳаракатсиз, асосий воқеалар ривожигача бўлган давридир. «Қирон қароқчи» номли қорақалпоқ халқ эртақининг мотив-ситуацияси воқеалар ривожигача бўлган даври ўзбек эртақларига қараганда бир оз чўзиқроқ ва қисман бошқачароқ тарзда берилган. Яъни подшонинг ўғли овда юрганида чашмага дуч келади ва унинг сувида бир пари қизнинг аксини кўриб ошиқ бўлиб қолади. Қиздан хабар топгач қаҳрамоннинг қирқ хачирга («Қирон ботир»да туяга) тилла ортиб, қирқ хизматкор («Қирон ботир»да лашкарлар) билан йўлга тушиши қаҳрамоннинг кейинги саргузаштлари билан уланиб кетувчи мотив-хабардир.

Қорақалпоқ эртаги «Қирон қароқчи»да эса мутлақо бошқача тарзда келади. Подшонинг ўғли 500 навқари билан йўлга тушади. Қирқ туя тилла ёки мол-мулк умуман тушириб қолдирилган. Қаҳрамоннинг йўлда Қирон акани асирликдан қутқариши, унинг 40 кунда («Қирон ботир»да 41 кун) қутига, («Қирон ботир»да сандиқ, «Қирон қароқчи»да ҳам сандиқ) солинган парини келтириши ва бошқа воқеалар ҳар иккала ўзбек эртаги қаҳрамонларининг актив фаолияти билан боғлиқ сюжетнинг асосини белгиловчи мотив-ҳаракат ҳисобланади. Бироқ қорақалпоқ эртаги «Қирон қароқчи»да мотив-ҳаракат бошқача ривожланади. Унда Қирон қароқчининг пари қизни олиб келиш

мухлати кўрсатилмайди. Уйга боргунча сандиқни очмаслик (ўзбек вариантыдаги) шарт ҳам тушириб қолдирилган, аксинча, сандиқни очганда кўк каптарнинг бўлиши, уни оёғидан қўлига боғлаб олиши, сўнгра пешонасига чертиб уйғотиши лозимлиги уқтирилади. Шунингдек, ўзбек эртаги «Қирон ака»да «Қирон ботир» ва қорақалпоқ эртагида учрамайдиган айрим ёрдамчи мотивлар ҳам мавжуд. Масалан, қахрамонга йўл кўрсатувчи унинг мақсадга эришувига яқиндан ёрдам кўрсатувчи (қахрамонни иниси Қирон олдига юборади) кампир образига дуч келамиз. Қорақалпоқ эртагида ҳам Мастон момо образи берилади. Бироқ қахрамонга ёрдам берувчи эмас, балки захар берувчи салбий хислатга эгадир. «Қирон ака» эртагида девлар маконини шум кампирлар кўриқлайдилар. Девлар пари-қизни қафасда асрашади. Қорақалпоқ эртагида эса (девлар маконини кўриқловчи) шум кампирлар иштирок этмайди. Пари-қизни ҳам денгизнинг ўртасидаги ўтовда асрашади. Ўзбек эртақларидаги сандиқни очмаслик тақиқи қорақалпоқ эртагида қисман бошқачароқ ва ўрин алмашган ҳолда келади. Масалан, Қирон қароқчи йигит билан пари-қизни кузатиб, олдингиздан иккита йўл чиқади; «Айланиш бўлса-да тўғри» деган йўлдан юринглар, деб шарт қўяди. Бироқ улар «Тўғрида бўлса айланиш» деган йўлдан кетади. Натижада девлар қўлига тушадилар. Эртақларнинг муқоясидан маълум бўлдики, бир сюжет асосига қурилган ва айрим диалектик ўзгаришларга қарамасдан юқоридаги номи қайд этилган иккала эртақ («Қирон ака», «Қирон ботир») ҳам бир-бирининг варианты бўлиб, ўзбек эртақлари ҳисобланади. Худди шундай сюжет асосига қурилган, бироқ, бадиий тасвирда, образларнинг функцияларида, айрим мотивларида, эртақчининг индивидуал ижодкорлигида фарқли томонлар мавжуд бўлган «Қирон қароқчи» эртагини эса қорақалпоқ эртаги деб атаймиз. Юқоридаги эртақлар таҳлили шуни кўрсатадики:

Биринчидан, учала эртақ («Қирон ака», «Қирон ботир», «Қирон қароқчи») уч хил номланади. Улардаги асосий образлар бир хил (Қирон) номга эга. Бу туркий халқлар фольклори асарларига хос хусусият бўлиб, агар диққат қилсак, мазкур халқлардаги «Алпомиш», «Гўрўғли», «Тоҳир ва Зухра», «Ширин билан Ша-

кар» ва бошқа дostonлар ва шу номдаги эртаклар ҳам бир хил номланади.

Иккинчидан, мазкур эртакларда воқеалар кечган жойлар, қахрамонларнинг саргузаштлари давомидаги борган, учрашган жойлари, кишилари, географик муҳити бир-биридан қисман фарқли томонларга эга, холос.

Учинчидан, ўзбек эртаклари «Қирон ака», «Қирон ботир» ва қорақалпоқ эртаги «Қирон қароқчи» бир сюжет асосида қурилган версия («Қирон қароқчи»)нинг бошқа-бошқа вариант («Қирон ака», «Қирон ботир»)лари демакдир. Хуллас, мазкур эртакларга туркий халқлар эртақчилик анъаналари асосида яратилган икки халқнинг мустақил миллий эртаги тарзида қараш лозим. Бу иккита ўзбек ва битта қорақалпоқ халқ эртаклари мотивларида ички ва ташқи ўхшашликларнинг мавжудлигини кўрамиз. Ички ўхшашликлар фақат бир халқ, яъни ўзбек эртаклари («Қирон ака», «Қирон ботир»)даги, ташқи ўхшашлик эса икки халқ, яъни ўзбек ва қорақалпоқ халқ эртаклари ўртасида мавжуддир. Мазкур эртаклардаги ўхшаш мотивлар қахрамон функцияси ёки актив ҳаракатининг у ёки бу даражада ўхшаш йўсинда, ўхшаш фаолият ва ҳаракатлар жараёни билан бажарилиши, амалга оширилиши деб билмоқ лозим.

Қахрамон ҳаракатининг ўхшаш тарзда бажарилиши икки кўринишда содир бўлади:

а) қахрамоннинг бажариши лозим бўлган вазифаси, хатти-ҳаракатидаги умумийлик, ўхшашликлар;

б) қахрамоннинг бажариши лозим бўлган вазифанинг ўхшаш йўсинда, воситаларда бажарилишидаги муштаракликлар.

Демак, биринчиси образларнинг функцияси билан боғлиқ ўхшаш мотивлар бўлса, иккинчиси образ вазифасининг ижроси йўсини, натижаси билан боғлиқ ўхшаш мотивлардир [...].

Демак, бу эртакларда топқир қози билан боғлиқ ўхшаш мотивлар мавжуддир. Шу жиҳатдан эртаклардаги мотивлар қахрамоннинг фаолияти, ҳаракатига, сюжетида тутган ўрни ва ҳолатига кўра икки хил: актив ва пассив тарзда намоён бўлади. Пассив – мотивлар қахрамонлар бевосита иштирок қилмаган, унинг актив фаолияти билан боғлиқ бўлмаган ҳолларда учрай-

ди. Бу ҳоллар «мотив-ситуация», «тасвир-мотив», «нутқ-мотив» ва «мотив-характеристика»ларда намоён бўлади. Актив-мотивда қаҳрамонларнинг бевосита актив иштирокини, саргузаштларини, ёвуз куч ва душманлар билан олишувларини, кўзлаган мақсадга эришишдаги жонбозликларини ва унинг маълум бир натижасини кўрамиз. Бу кўпроқ мотив-ҳаракатларда юзага чиқади. Ўзбек эртаклари «Шаҳзода Баходир», «Қирон ака», «Сув қизи», «Қирон ботир» ва туркман халқ эртаги «Чўри хотиндан бўлган подшоҳнинг икки ўғли»да туш кўриш, подшонинг фарзанд кўриш истаги, «Алибек ботир» номли козоқ халқ эртагида эса бойнинг фарзанд кўришни исташи пассив-мотивлардир. Кейинги эртақдаги пассив-мотив қаҳрамонни актив фаолиятга чақирувчи характерга ҳам эга эканлигини («нутқ-мотив») кўрамиз, яъни дарвеш ўзи қўйган шартнинг бажарилишини талаб қилиб келиши ва кенжа шаҳзодани олиб кетиши билан актив-мотив юзага келади. Бу эртақнинг давомида кўздан кечирганимизда актив-мотив «мотивлар занжиридан», яъни бир қанча мотивлар тизмасидан иборат эканлигини кўрамиз. Масалан, кенжа шаҳзоданинг тўтиқушлар билан гаплашиши, Семурғ болаларини йиртқич тимсоҳдан озод қилиши ва Семурғнинг унга ёрдам бериши, кал қиёфасига кириб подшонинг кенжа қизига уйланиши ва ҳоказо. Яна шуни айтиш керакки, актив-мотив билан кетма-кет ёрдамчи мотив ҳам келиши мумкин. Масалан, юқоридаги эртақда кенжа шаҳзода пари-пахлавон томонидан қудуққа ташлангандан кейинги унинг акаси билан боғлиқ бўлган саргузаштларни ёрдамчи мотив дейиш мумкин. Актив-мотивлар каби пассив мотивлар ҳам бир неча мотивлардан ташкил топиши ва турли кўринишларга эга бўлиши мумкин. «Чўри хотиндан бўлган подшоҳнинг икки ўғли» номли туркман халқ эртагида подшонинг фарзанд кўришни исташи, ўзи ва хотини дарвиш берган олмани еганларидан кейин фарзанд кўришлари кабиларни пассив-мотив, деб атаган бўлсак, кейинроқ кенжа шаҳзоданинг тушида бир пахлавон қизни кўриши ва у билан беллашиш учун жўнаши ҳам чақирувчи руҳдаги («нутқ-мотив») пассив-мотивдир.

Актив-мотивга хизмат қилувчи, у билан ёнма-ён келувчи ёрдамчи мотивлар бўлганидек, пассив-мотивга ҳам хизмат қилувчи,

уни тўлдириб келувчи ёрдамчи-мотивлар ҳам мавжуддир. Масалан, «Шахзода Баходир» эртагида Баходирнинг туш кўриши ва тушида ғойибона ошиқ бўлиб қолиши пассив-мотив бўлса, подшо ўғлини гапиртириш учун бир кампирни ёллаши, шу кампир орқали шахзоданинг дардини аниқлаши ёрдамчи-мотив бўлиб хизмат қилади. Ёрдамчи-мотивлар доимо асосий мотивни тўлдириб, унда маълум бир вазифани бажаришга, аниқ ўрин, конкрет мазмунга эга бўлишига ёрдам беради. Эртақчиларнинг мотивлар-параллелизмидан мохирона фойдаланишларини алоҳида қайд қилиш керак. Мотивлар-параллелизми деганда қаҳрамоннинг биронта хислатини, довурак, ботир ва енгилмаслигини ёки бўлмаса эртақдаги бирор тасвирни, ҳаракатни бўрттиришга, оширишга қаратилган (такрорлаб ва қиёслаб тасвирлаш) усулни тушунилади [...].

Юқорида биз, эпик асарларда маълум бир вазифани бажариб, шу ерда ўзининг аниқ ўрни, конкрет мазмунига эга бўлган мотивлар «мотив комбинацияси», эртақ сюжетини ташкил қилишини уқтирган эдик. Хўш, мотивлар йиғиндисидан иборат бўлган ана шу сюжет қандай хусусиятга эга, унинг талқини ва танқиди қандай фикрларни мужассамлаштиради? Фольклоршунос олимларнинг таъкидлашича, «Мотив сюжетни вужудга келтирувчи элемент ҳисобланади», (Б. Н. Путилов). «Мотив ўсиб сюжетга айланади» (А. Н. Веселовский). Адабиётшунос Г. Абрамович «Адабиётшуносликка кириш» асарида «сюжет у ёки бу ҳаётий конфликтларнинг ўсиши маълум бир воқеалар системаси орқали тасвирлаш» деб қарайди. «Адабиётшунослик терминлари лугати»да ҳам шунга яқин фикр билдирилиб «сюжетда ҳаёт учун энг муҳим тўқнашувлар, қарама-қаршиликлар ва кишиларнинг ўзаро муносабати акс этади, бадий асарларнинг бевосита мазмунини ташкил этган, ўзаро боғланган ва ривожланиб борувчи ҳаётий воқеалар билан характер ўртасидаги муносабат» дейилади. Шунга ўхшаш фикрлар кўпгина бошқа қўлланма ва дарсликларда ҳам учрайди. Сюжетни қаҳрамонларнинг саргузаштлари, деб қараш туркман эртақлари тадқиқотчиси М. А. Сакалининг «Туркман эртақлари эпоси», ўзбек фольклоршуноси Ғ. Жалоловнинг «Ўзбек халқ эртақлари поэтикаси» ҳамда кўпгина бошқа олим-

ларнинг илмий асарларида ҳам mavjud. Юқоридаги луғатлар авторлари сюжет тўғрисидаги ўз фикрларини тасдиқлаш учун М. Горькийнинг «Сюжет – алоқалар, қарама-қаршиликлар, антипатиялар ва умуман, кишиларнинг ўзаро муносабати, у ёки бу характернинг ўсиши ва ташкил топиши тарихи» деган фикрини келтиришади. Сюжетни «воқеалар системасидан» иборат деб карашнинг нотўғрилигини ўз навбатида А. Эльяевич тўғри кўрсатиб ўтган эди, у «бадий асардаги характер билан боғлиқ бўлган барча тасвирий воситалар, бадий форманинг барча элементлари сюжетга киради», деб тўғри кўрсатади. Шу нуқтаи назардан Б. Н. Путилов мотивларни «мотив-ситуация», «нутқ-мотив», «мотив-харакат», «тасвир-мотив» ва «мотив-характеристика»га ажратганида ҳақли эди. Чунки мотив сюжетни вужудга келтирувчи, умумтасвир (сюжетнинг – Х.Э.) минимал мазмунли компоненти, сюжетнинг кичик бир қисмидир. Шунинг учун мотивлар эртак сюжетига кирган бадий тасвирнинг барча воситаларини минимал даражада ўз ичига олган, қахрамоннинг кўзлаган мақсадсари интилишида қилган (тасвир-мотив ва мотив характеристикалар) ҳаракатларнинг маълум бир натижасидир. Эртакларда такрор қайтарилган ҳаракатлар алоҳида мотив эмас, яхлит бир мотивлар сифатида қаралиши лозим. Турли халқлар эртаклари (трансформацияга учраган) ўртасидаги фарқ образларнинг ўзига хослиги ёки тасвирий воситаларнинг ҳар хиллигида эмас, балки қахрамонлар бажараётган вазифанинг ва унинг натижасининг ўзгачалиги, ҳар хиллигидадир. Мотивлардаги бир хиллик (муштараклик) эса қахрамонлар хатти-ҳаракатларидаги ва шу ҳаракатлар натижаларининг (қайтарма мотивлар) бир хиллигидадир.

Юқорида таҳлил қилинган эртаклар, келтирилган факт ва қарашларга асосланиб шунини айтиш мумкинки, мотив эпик сюжет арсеналида муҳим ўрин тутувчи, уни вужудга келтирувчи уруғ сифатида бадий форма ва воситаларнинг тугал таркиб топган минимал бир қисми ва образлар (қахрамонлар) хатти-ҳаракатининг маълум бир натижасидир.¹

¹ Ушбу мақола қуйидаги манбадан олиб чоп этилмоқда: Эгамов Х. Шарқ туркий халқлари эртакчилик анъаналари алоқалари тарихидан очерклар. – Тошкент, 1980.

Қаюм
МАМАШУКУРОВ
(1945–1992)



Қаюм Мамашукуров 1945 йил 9 апрелда Сурхондарё вилояти Шўрчи тумани Оққўргон қишлоғида туғилган. СамДУнинг филология факультетида ўқиган (1962–67). Шўрчи туманидаги 8-ўрта мактабда бошланғич синф ўқитувчиси бўлиб ишлаган (1961–62). Термиз шаҳар жисмоний тарбия билим юртида дарс берган (1967–68). Термиз давлат педагогика институти «Ўзбек адабиёти» кафедрасида ўқитувчи, катта ўқитувчи бўлиб ишлаган (1968–1991). «Нурали туркуми дostonларининг зоявий-бадийий хусусиятлари» мавзусида номзодлик диссертациясини ёқлаган (1986). Сурхондарёлик бахшилардан «Малла савдогар», «Нурали», «Санам Гавҳар», «Авазхон» дostonларини ёзиб олган. «Малла савдогар» дostonининг вариантлари» номли рисоласи (1980) чоп этилган. 1992 йили Термиз шаҳри вафот этган.

«НУРАЛИ» ТУРКУМ ДОСТОНЛАРИ ҲАҚИДА

Маълумки, «Гўрўғли» туркумига кирувчи дostonларнинг муайян қисмини унинг невараси (Авазнинг ўғли) Нурали ҳақидаги дostonлар ташкил этади. Бу дostonлар «Гўрўғли» туркумига нисбатан наслий туркумлик принциплари асосида яратилган бўлсалар-да, улар ўзаро «Нурали» биографик туркумини ташкил этади. Кейинги пайтларгача ўзбек фольклористикасида Нурали

ҳақида бир сюжет дoston ва унинг вариантлари тарқалган деган фикр мавжуд эди. Бироқ кузатишлар ва ёзиб олинган материаллар шуни кўрсатадики, Нурали ҳақидаги дostonлар ўзбек бахшилари ўртасида, хусусан, Қашқадарё ва Сурхондарё воҳаларида жуда кенг тарқалган экан.

«Нурали» биографик туркуми уч дoston (уч сюжет) ва унинг вариантларидан иборат деган хулосага келиш мумкин. Кейинги текширишлар уларнинг бундан ҳам ортиқлигини кўрсатар. Лекин ўзбеклар ўртасида «Нурали» биографик туркумлиги мавжудлиги ҳақидаги хулосага жиддий тузатиш кирита олмайди, балки уни янада тасдиқлайди.

«Нурали» биографик туркумига кирувчи биринчи дoston «Нуралихон» дostonидир. Унда Гўрўглининг невараси Нуралининг ёр излаб ўзга мамлакатга бориши ва турли қийинчиликларни енгиб, ёрга етишиши ҳамда қайтиши тасвирланади. Бу дostonнинг энг мукаммали ва бадий жихатдан юксаги Фозил Йўлдош ўғли вариантидир. Уни 1937 йилда Буюк Каримов ёзиб олган. Кейинчалик унинг яна етти варианты ёзиб олинди. Жумладан, 1945 йилда Омонниёз Оллоберди ўғлидан (Сурхондарё вилояти, Шеробод тумани, ёзиб олувчи Т. Рустамов), 1957 йилда Умир Сафар ўғлидан (Қашқадарё вилояти Дехқонобод тумани), 1958 йилда Тош Чоршанба ўғлидан (Қашқадарё вилояти Шаҳрисабз тумани, ёзиб олувчилар М. Афзалов ва М. Саидов), 1960 йилда Муҳаммадраҳим Муҳаммадсодиқ ўғлидан (Сурхондарё вилояти, Жарқўрғон тумани, ёзиб олувчи Т. Мирзаев), 1972 йилда Юсуф Ўтаган ўғлидан ва Хушвақт Мардонакуловдан (Сурхондарё вилояти Шеробод тумани, ёзиб олувчи Қ. Мамашукуров) дostonнинг вариантлари ёзиб олинди. Дostonнинг магнитофон лентасига ёзиб олинган яна бир неча вариантлари мавжуд.

Шунингдек, 1965 йилда М. Муродов янгикўрғонлик Раззоқ Қозоқбой ўғлидан «Нуралибек» номида бир дoston ёзиб олган эди. Бироқ бу асарни «Нурали» туркуми доирасида қараб бўлмайди. Чунки унда «Малика айёр» дostonидаги Гўрўғли функцияси Авазга, Аваз функцияси эса Нуралига кўчирилади. Шунда ҳам мотивлар комбинациясида кўп мантқиқсизликларга йўл кўйилади. Бу ҳол, биринчидан, дostonчиликда Аваз образининг

машҳур бўлиши ва Гўрўғлининг иккинчи планга сурилишини (бундай жараённи Сурхондарё ва Қашқадарё достончилигида яққол кузатиш мумкин) кўрсатса, иккинчидан, бахшининг эпик традицияни бузганлиги билан изоҳланади.

Биографик туркумнинг иккинчи достони «Нуралининг ёшлиги»дир. Бу асар бахшилар ўртасида «Нурали» номи билан машҳур. Унда Нуралининг ўқиши, ёшлигида асирга тушиши ва отаси Авазхон томонидан қутқарилиши тасвирланади. Унинг 1947 йилда Раҳматулла Юсуф ўғли (Самарқанд вилояти, Нурота тумани), 1957 йилда Кўзи Рўзиев (Қашқадарё вилояти, Чирокчи тумани, ёзиб олувчи М. Алавия), 1959 ва 1973 йилларда икки марта Мўмин Раҳмон ўғли (Сурхондарё вилояти, Денов тумани, ёзиб олувчилар Т. Очилов ва Т. Мирзаев), 1972 йилда Бозор Омонов (Қашқадарё вилояти, Қамаш тумани, ёзиб олувчи Т. Мирзаев) вариантлари ёзиб олинган. Булар ичида Б. Омонов варианты нисбатан мукамал ва бадий пишиқ асар ҳисобланади.

Авазхон Чамбилда бўлмаганлигида Аҳмад Сардорнинг ифвоси билан Нурали, Гулнор ва уларнинг онаси Интизор (вариантларда Жузумкўз, Гулқиз)нинг сотиб юборилиши ва воқеалари тасвирига бағишланган учинчи достон «Малла савдогар»дир. Бу асар бахшилар ўртасида «Малла савдогар», «Майда савдогар», «Нуралининг сотилиши», «Гулгун пари», «Нурали билан Гулнор», «Аваз билан Ойзайнаб» каби номларда тарқалган. Достоннинг вариантлари 1945 йилда М. Афзалов томонидан Жўра Эшмирза ўғлидан ва Қ. Муҳамедов томонидан Боймурод Боймамат ўғлидан (Сурхондарё вилояти, Шеробод тумани), 1956 йилда О. Собиров томонидан Худойқул Яхшиевдан (Қашқадарё вилояти, Деҳқонобод тумани), 1958 йилда З. Хусаинова томонидан Тошмурод Тўрабой ўғлидан (Сурхондарё вилояти, Денов тумани), 1970–1971 йилларда Қ. Мамашукуров томонидан Хушвақт Мардонақуловдан ва Юсуф Ўтаган ўғлидан (Сурхондарё вилояти, Шеробод тумани) ёзиб олинган. Булардан Юсуф Ўтаган ўғли варианты нисбатан тўлиқ ва мукамалдир.

Нурали номи билан боғлиқ яна бир достон бор. Унинг бир варианты 1974 йилда Сурхондарё вилояти, Жарқўргон туманлик Шодмон Холлиевдан ёзиб олинган. Унда Гўрўғли Авазга отини

бермаганлиги учун унинг Чамбилдан аразлаб кетиши ва Нуралининг отасини қайтариб келиши тасвирланади. Бироқ у Авазнинг аразлаши сюжети билан боғлиқ бошқа дostonлардан кам фарқ қилади. Шунинг учун ҳам уни «Нурали» туркумига киритишни ўйлаб қўриш керак бўлади. Дostonнинг бошқа, нисбатан мукамал вариантларини топиш бу масалани янада ойдинлаштиради.

Хуллас, Нурали ҳақидаги дostonлар ҳам ўзбек халқи ўртасида кенг тарқалган бўлиб, уларда турли воқеалар акс эттирилса ҳам, бу дostonлар асосида бош қаҳрамон Нурали образи орқали бирлашади. Шунинг учун ҳам биз бу туркум дostonларни «Нурали» кичик биографик туркуми деб номлашни лозим топдик. Шунингдек, Нурали ҳақида айрим маълумотлар «Қундуз билан Юлдуз», «Аваз билан Зулфизар», «Балхувон», «Авазнинг ўлимга ҳукм этилиши» каби қатор дostonларда ҳам учрайди.

«Нурали» туркуми дostonлари бошқа дostonларга нисбатан жуда кам ўрганилган. Унинг фақат Фозил Йўлдош ўғли варианты фольклорист М. Саидов томонидан нашр этилган.¹ Бу нашр ўзининг пухта тайёрланганлиги, халқ оғзаки ижодини нашр этиш принципларига риоя қилинганлиги билан ажралиб туради.

«Нурали» дostonи ҳақидаги дастлабки маълумотни атоқли фольклорист Ҳ. Зарифов «Равшан» дostonига ёзган сўз бошисидан берган эди.² Автор ўз мулоҳазаларини профессор В. М. Жирмунский билан ҳамкорликда яратган асарида янада кенгайтди. Унда олимлар дostonнинг сюжети, жанр хусусиятлари ҳақида асосли мулоҳазаларни баён қилган эдилар. Уларнинг фикрича, дoston соф романтик дostonлар жумласидан бўлиб, унда ўрта асрларнинг реал ижтимоий ҳаёти ҳам акс этган.³ Фозил Йўлдош ўғлининг «Нурали» дostonи ҳақидаги махсус ишлардан яна бири О. Собировнинг «Икки дostonнинг ғоявий мундарижаси номли мақоласидир.⁴ Унда автор дostonнинг ғоявий мундарижасини

¹ Интизор. Нурали. Ўзбек халқ ижоди. Кўп томлик. – Тошкент, 1964.

² Эргаш Жуманбулбул ўғли. Равшан. Нашрга тайёрловчи Ҳоди Зариф. – Тошкент, 1941. – 265–270-бетлар.

³ Жирмунский В. М., Зарифов Х. Т. Узбекский народный героический эпос. – М.: ГИХЛ, 1947.

⁴ Собиров О. Икки дostonнинг ғоявий мундарижаси // Фозил шоир. Ўзбек халқ ижоди бўйича тадқиқотлар. 3-китоб. – Тошкент: Фан, 1973. –

текширар экан, дostonда қахрамоннинг табиатнинг стихияли кучларига қарши кураши асосий ўрин тутишлигини алоҳида таъкидлайди.

Шунингдек, баъзи бир тадқиқотларда йўл-йўлакай фикрлар мавжуд бўлса ҳам, бироқ бу дostonлар ҳақда унинг бошқа дostonлар билан қиёсловчи, у ёки бу вариантнинг афзалликларини, бадий камолотини кўрсатувчи махсус илмий тадқиқотлар ҳалигача яратилган эмас. Бу ҳол «Нурали» туркуми дostonларини махсус ўрганишни тақозо қилади. Бу туркумни тадқиқ этиш, биринчидан, Самарқанд, хусусан, Булунғур дostonчилик мактаби билан Сурхондарё вилояти Шеробод дostonчилик мактаби ўртасидаги яқинлик ва тафовутларни бир қадар ойдинлаштирса, иккинчидан мазкур вариантларнинг ғоявий-бадий хусусиятларини, у ёки бу дostonнинг тарқалиш ўрни ва яшаш шароитлари ҳақидаги маълумотлар билан эпосшунослигимизни бойитади.

«Халқ дostonларида вариантлилиқ традиция ва импровизация билан, фольклор текстидаги барқарорлик ва ўзгарувчанлик билан маҳкам боғлиқ».¹ Бу хусусият Сурхондарё ва Қашқадарё бахшиларининг эпик репертуаридан кенг ўрин олган «Нурали» биографик туркумига мансуб дoston – «Малла савдогар», «Майда савдогар», «Нуралининг сотилиши», «Гулгун пари», «Нурали билан Гулнор», «Аваз билан Ойзайнаб» номлари билан айтиб келинган дoston ва унинг вариантларига ҳам тўла дахлдордир. Нурали эпик биографиясининг болалиқ даврини акс эттирувчи мазкур дoston вариантларини бир-бирига қиёсласак, ҳар бир айтувчининг дунёқараши, иқтидори ва маҳорати, эпик традицияга муносабати, ижтимоий-иқтисодий шарт-шароитларнинг у ёки бу вариантга кўрсатган таъсири, уларга хос бўлган умумий ва хусусий томонлар яққол кўзга ташланади. Бу беш вариантга хос умумий томонлар куйидагиларда намоён бўлади: Бешала вариантда ҳам Нуралининг Аҳмад Сардор томонидан кул сифатида сотиб юборилиши ва унинг Аваз томонидан озод қилиниб, Чамбилга олиб келиниши воқеалари тасвирланади. Демак, бу вариантлар

59-67-бетлар.

¹ Мирзаев Т. Халқ бахшиларининг эпик репертуари. – Тошкент: Фан, 1979. – 71-бет.

асосида ётган конфликт Аҳмад Сардорнинг Гўрўгли ва унинг асранди фарзанди Авазга бўлган анъанавий душманлиги туфайли юзага чиқади. Вариантларнинг барчасида асосий қаҳрамон Нурали бўлса ҳам, бироқ у болалиги, ёшлиги сабабли воқеалар ривожидан анча пассив ҳаракат қилади. Уларда эпик баён жуда ҳам қисқа бўлиб, бошқа, романик дostonлардан фарқли ўлароқ фантастиканинг роли сезиларсиздир, яъни воқеалар реал ҳаётий тасвир характериға эға. Бу умумий томонлар уларға асос бўлган бобо сюжетнинг нисбатан қадимий ва кенг тарқалганлигидан дaлолат беради.

«Нурали» биографик туркумининг учинчи достони бўлган «Малла савдогар» вариантлари орасидаги тафовутлар ҳақида сўзлаганда, энг аввало, уларнинг турлича номланганлигини қайд этишға тўғри келади. Бу вариантларнинг Хушвақт Мардонакуловдан ёзиб олингани «Гулгун пари», Жўра Эшмирзадан ёзиб олингани «Аваз ва Ойзайнаб», Тошмурад Тўрабоевдан ёзиб олингани «Майда савдогар», Юсуф Ўтаган ўғлидан ёзиб олингани «Малла савдогар», Худойқул Яхшиевдан ёзиб олингани «Нурали билан Гулнор» номлари билан юритилади.

«Малла савдогар» достони вариантларининг барчаси Авазнинг бошқа мамлакатға ёр излаб сафарға чиқиши мотиви билан бошланади. Ёр излаб сафарға чиқиш ўзбек халқ эпоси учун жуда ҳам характерли ва қадимий анъаналар билан боглиқ мотивлардан бўлиб, дoston қаҳрамоннинг ўз ёрини олиб келиши билан якунланар эди. Бироқ «Нурали» биографик туркумлигига мансуб бу дostonда эса бу мотив етакчи бўлмай, балки у дoston асосида ётувчи воқеаларға замин ҳозирлаб берувчи сюжет бўлаги ҳисобланади, мана шунинг учун ҳам у асар композициясидаги биринчи босқич бўлиб, асосий воқеалар иккинчи босқичда бошланади. Асосий воқеаларға замин ҳозирлаш функциясида ми ёки дастлаб дostonлар сюжети билан мустаҳкам алоқада келмаганиданми, ҳар ҳолда асар композициясининг биринчи босқичи кейинги воқеалар билан жуда ҳам узвий киришиб кетолмаганға ўхшаб туради. Шунга қарамай, биз дoston композициясининг биринчи босқичининг мазкур биографик туркумлик юзаға келишининг дастлабки даврларида ҳам мавжуд эканлигига ишонамиз.

Чунки бошқа элдан ёр излаш туркий халклар эпоси учун жуда ҳам кенг тарқалган қадимий мотив бўлиб, «Нурали» биографик туркумига мансуб дostonлар сюжетларининг яратилишида ҳам мана шу тайёр мотив асос бўлганлиги шубҳасиздир.

Дostonда тасвирланган воқеаларнинг биринчи босқичи, яъни Авазхоннинг Чамбилдан ёр излаб чикиб кетиши асар композициясининг иккинчи босқичига замин ҳозирлайди. Чунки дostonда кўйилган асосий масала Аваз фарзандларининг кул сифатида сотилиши ва бунда Аҳмад Сардорнинг душманлигини кўрсатишдир. Сюжетнинг бундай курилиши учун Авазнинг Чамбилда бўлмаслиги шарт. Шунинг учун ҳам асосий диққат Аҳмад Сардорнинг туҳмати, Нурали ва Гулнорнинг куллик саргузаштлари тасвирига қаратилган. Бу воқеалар тасвири болаларнинг кул сифатида сотилиши ва Аваз томонидан қутқарилишидан иборат умумий ўхшашликка эга бўлса-да, ҳар бир вариантга хос фарқлар, ўзгачаликлар мавжуд. Бундай фарқли томонлар куйидаги ҳолларда яққол кўринади:

Хушвақт Мардонақулов вариантыда тасвирланишича, тушининг таъбиридан кўрққан Нурали дарвозаларни маҳкам берки-тиб олади. Аҳмад Сардор ва унинг йигитларига очмайди. Бирок онаси Жузумкўзнинг илтимосига қараб, дарвозани очиб беради. Шунда Аҳмад ва унинг одамлари Жузумкўз ва Нуралининг кўлларини боғлаб, Туркман бозорига хайдайди: йўлда мактабдан келаётган ўн олти яшар Гулнорни ҳам қўшиб, учаласини бошқа мамлакатдан келган Малла савдогарга ўн тўққиз қулунли бияга сотиб юборади. Малла савдогар Нуралидан отасининг исмини сўрайди. Нурали отасининг исмини билмайди. Мана шу ўрин мазкур вариантда ишонарсиз чиққан. Чунки мактабга борадиган ўғил ўз отасининг исмини билмаслиги мумкин эмас. Жўра Эшмирза, Тошмурод Тўрабоев, Юсуф Ўтаган ўгли вариантларида эса, Нурали отасининг исмини айтишдан бош тортади. Бу билан Нуралига хос мағрурлик, тантилик янада ёрқин тасвирланган.

Хушвақт Мардонақулов, Жўра Эшмирза ўгли ва Юсуф Ўтаган ўгли вариантларида Малла савдогар образи ижобий образ, яъни у Авазга хайрихоҳ киши сифатида кўрсатилади, Тошмурод Тўрабоев вариантыда Малла савдогар Авазнинг душмани тарзи-

да тасвирланади. Бизнингча, мазкур вариантдаги Малла савдогарнинг Авазга душман сифатида берилишида ҳақиқат борга ўхшайди. Чунки, биринчидан, банди бўлган қаҳрамонларнинг поғонама-поғона тасвири орқали тобора кўпроқ жабр-жафоларга йўлиқишини кўрсатиш эпос анъанасининг ҳақиқий мезонини белгилайди. Чунки эпосда воқеаларни қуруқ баён қилишдан кўра, тасвирланаётган ҳодисаларга нисбатан тингловчиларнинг эмоциясини кўрсатиш муҳим ўрин тутаети. Бошқача айтганда, ўз даврининг ғоявий-эстетик қарашларини ифодаловчи эпос ниманидир қатъий инкор, ниманидир қатъий тасвирлаши керак. Иккинчидан, Малла савдогарнинг Авазга хайрихоҳ сифатида тасвирланишида Аваз фарзандларининг қўл сифатида сотилишига нисбатан тингловчиларнинг ачиниш ҳисси бир даражада барҳам топади, яъни ярим ачиниш, ярим таскин юзага келади.

Мазкур вариантларда Авазнинг ўз фарзандларини озод қилиши ҳам турлича тасвирланган. Жумладан, Хушвақт Мардонакулов вариантыда Чамбилдан Малла савдогар юртига келин бўлиб тушган аёлдан Аваз болаларининг қаердалигини билиб олади. Сўнг Ҳайиткул овшар юртига келиб, Нурали ва Жузумкўзни Ҳайиткул овшар қўлидан озод қилади ва унинг оиласини асир олиб, Нурали билан Чамбилга жўнатади.

Нурали Чамбилга келгандан сўнг Гўрўғли Аҳмад Сардорнинг ихтиёрини Нуралига беради. Нурали уни Чамбил шахридан чиқариб юборади. Аҳмад Сардорга бўлганга нисбатан бўлган бу муносабатда анъанадан ташқари чиқиш бор, чунки бошқа дostonларда кўп ёмонликлар қилса ҳам, у доим кечирилиб, унга енгил жазо берилади. Бу бевосита «Нурали» биографик туркумлигининг нисбатан кейин яратилганлиги билан изоҳланади. Бундай ҳолни Жўра Эшнӣёз ўғли вариантыда ҳам кўриш мумкин. Бироқ бу вариантда қадимий анъанадан бутунлай воз кечилмаган. Doston сўнгида бир эпизод киритилади. Унда Аҳмад Сардорнинг кизи Ойбаланд отасининг гуноҳини сўрайди. У Гулнор қўйган шартни бажаргач, Аҳмад Сардор банддан озод этилади. Бу эпизод қаҳрамонлик эпослари хусусиятларидан тўла келиб чиққан бўлса-да, Аҳмад Сардорга нисбатан бўлган анъанавий тасаввурни ифодалашини тасвирлаш жиҳатидан ғоятда характерлидир.

«Малла савдогар» достонининг барча вариантлари Нуралининг қуликдан озод этилиши тасвири билан яқунланади. Вариантларда воқеалар ривож, кўпчилик мотивларнинг ўхшашлиги жиҳатидан Юсуф Ўтаган ўғли варианты билан Жўра Эшмирза ўғли вариантлари бир-бирларига яқин турса, Хушвақт Мардонақулов варианты Тошмурод Тўрабоев варианты билан ўхшаш келади. Бу эса «Малла савдогар» достонининг Сурхондарё воҳасида бир неча мустақил вариантларда кенг тарқалганидан далолат беради.¹

¹ Ушбу мақола фольклоршунос олим Қ. Мамашукуровнинг 1986 йилда ҳимоя қилинган «Нурали туркуми достонларининг ғоявий-бадий хусусиятлари» мавзусида номзодлик диссертацияси асосида тайёрланди.

Фармон
РАЙҲОНОВ
(1947–1990)



Фармон Райҳонов 1947 йил 1 январда Бухоро вилояти Ғиждувон тумани Чўғолон қишлоғида тугилган. Бухоро давлат педагогика институтининг филология факультетини битирган (1968). Бухоро вилоятининг Навоий тумани газетасида бўлим мудури (1968), «Бухоро ҳақиқати» газетасида махсус мухбир (1970–71) бўлиб ишлаган. ЎзР ФА Алишер Навоий номидаги Тил ва адабиёт институтининг Фольклор бўлимида илмий ходим бўлган (1971–75). Турли вақтли матбуот нашрлари, нашриёт, полиграфия ва китоб савдоси ишлари давлат комитетида фаолият олиб борган (1975–91). «Шеър қанотидаги юлдузлар» (1986) номли китоб муаллифи. 1990 йилда Тошкент шаҳрида вафот этган.

**ХАЛҚ МАҚОЛЛАРИ ВА
ТОПИШМОҚЛАРИДА ҚОФИЯ**

Мақол ўзбек халқ оғзаки ижодининг қадимий, яшовчан ва кенг тарқалган жанрларидан бирidir. Мақоллар, асосан, ҳаётини тажрибалар натижаси ўлароқ майдонга келади. Асрлар бўйи оғиздан-оғизга ўтиб келаётган мақолларда кенг меҳнаткаш халқ оммасининг дунёқараши, жамият ва меҳнатга муносабати, ота-онага ҳурмат, Ватанга чексиз садоқат мотивлари мужассамлашган. Шунингдек, мақолларда халқ орзу-умидлари, инсонпар-

варлик ҳидлари уфуриб туради. Илм ва ҳунар ўрганиш, дўстлик ва аҳиллик, катталарга ҳурмат ва иззатда бўлиш, мардлик ҳамда тўғрисўзлик халқ мақолларининг асосий ғоявий мақсади бўлиб, халқнинг қадимий тарихи ва руҳий ҳолатини ифодалаб келади. Халқ томонидан айтилган мақоллар ғоявий пишиқ, мазмунан мукаммал, ихчам ва соддадир. Ана шу ўзига хос томонлари билан ҳам мақоллар халқ бадий ижодининг қўшиқ ёки терма, лапар ёки ёр-ёр каби кўплаб турларидан фарқ қилади. Ўтмишдаги барча санъат, адабиёт ва давлат арбоблари мақолларга қайта-қайта мурожаат қилиб келишган.

Ҳар бир халқ мақоли алоҳида тугал асар. Ўзбек халқ оғзаки бадий ижодининг кўпгина турлари каби мақоллар ҳам мавзу эътибори билан хилма-хилдир. Лекин халқ мақолларида юқорида қайд этган мотивларимиз бир ёки икки, ошиб борса, тўрт шеърий мисрада ихчам, лўнда, ўзига хос поэтик ифода ва қофияларда берилиши билан янада чуқур мазмун кашф этади, ёлқинланиб туради.

*Иш кучини елга берма, ерга бер,
Жамғармани селга берма, элга бер.¹*

Бу мақол меҳнатсеварлик ва халқпарварлик ҳақида. Поэтик мисраларда иш кучидан, вақтдан унумли фойдаланиш, тўпланган ҳосилни эса бекорга совуриш эмас, балки эл фаровонлиги йўлида сарфлаш лозимлиги уқтирилмоқда. Мақолдаги бу кенг мазмунни ихчам ва теран ифода этишда мисралардаги *елга* ва *селга* (ички қофия), *ерга* ҳамда *элга* (ташқи қофия) сўзлари ажойиб оҳангдорлик касб этган. Ёки меҳнат мавзусидаги қуйидаги бир мақолни олиб кўрайлик. Мақол икки мисрадан иборат:

*Барвақт қилинган ҳаракат,
Ҳосилга берар баракат.*

Ҳаракат ва *баракат* сўзлари – мақол қофиялари. Бу қофиядош сўзлар бир-бирига узукка солинган кўздай мос тушган. Улар бир-бирининг поэтик мисрадаги вазифасини энгиллаштириб,

¹ Ўзбек халқ мақоллари. – Тошкент: Бадий адабиёт, 1965. – Б. 17. Кейинги мисоллар ҳам шу тўпلامдан олинди (муаллиф эскартиши).

англашиладиган фикрни яхлитлаштирган. Чунки ҳар бир ишда ҳам чинакам ҳаракат қилинсагина кўзланган баракат бўлади.

Меҳнат ва меҳнатсеварликка чорловчи қуйидаги мақол тўрт мисрадан тузилган:

*Богни боқсанг бог бўлар,
Ботмон-даҳсар ёғ бўлар.
Боқимсиз бог тоғ бўлар,
Юрак-бағринг доғ бўлар.*

Бу мақол шеърӣ асарни эслатади. Тўртликда биринчи мисра билан учинчи қатор ифода жиҳатидан кўпроқ мақол талабига мойил бўлиб, иккинчи ҳамда тўртинчи мисра «*Богни боқсанг бог бўлар*», «*Боқимсиз бог тоғ бўлар*» мақоллари мазмунини теранлаштириш ва таъсир кучини оширишда катта вазифа бажаради. Мақолда мазмун теранлигини таъминлаш ҳамда таъсир кучининг ўқувчи калбига тез етиб боришида эса мисраларда кетма-кет уйғунлашган *бог-ёғ-тоғ-доғ* оҳангдош сўзларининг ўрни бекиёс.

Мақолларда қофиялар нафақат шеърӣ мисралар сўнгига, балки ўртада ёки бошда ҳам келаверади. Бундай ҳолат мақоллардаги асосий хусусият бўлиб, ана шу томони билан у халқ бадий ижодининг бошқа турларидан ажралиб туради.

*Айрон – ош бўлмас,
Нодон – бош бўлмас.*

Бу донолик ва нодонлик хусусида айтилган мақоллар сирасига киради. Маълумки, айрон ош ўрнини боса олмаганидек, нодон, яъни ҳеч нарсага ақли етмайдиган кимса ҳар қанча ўқитиб-ўргатсанг ҳам бирор ишнинг уддасидан чиқолмайди, бировга ўргата олмайди. Ана шу муҳим фикрни лўнда ифодалашда мисралар бошида келган *айрон* ҳамда *нодон*, ўртадаги *ош* ва *бош* оҳангдош сўзлари бевосита хизмат қилган.

Мақолларнинг яна бир муҳим ва халқ ижодининг бошқа хилларидан фарқ қиладиган хусусияти шундаки, уларда бир сўзнинг ўзи қарама-қарши маънода кўпроқ ишлатилади:

*Қайнонали келин қарқара келин,
Қайнонасиз келин масхара келин.*

Бу мақол мисралари икки туроқли бўлиб, улардан биринчиси «Қайнонали келин – қайнонасиз келин», иккинчиси «қарқара келин – масхара келин» ибораларидан ташкил топган. Биринчи туроқдаги дастлабки сўзлар шаклан бир хил. Бироқ у мақол маъносини келтириб чиқариш мақсадида бир-бирига ўзаро биргина «-сиз» кўшимчаси орқали қарши қўйилипти. Натижада мақолда исталган фикрни ифода этувчи қарқара-масхара қофиялари юзага келган. Бундай ҳол кўпчилик мақолларда учрайди:

*Вафосизда ҳаё йўқ,
Ҳаёсизда вафо йўқ.*

Бу мақолда классик поэтиканинг қайтариқ поэтик санъати қўлланган. Ваҳоланки, мақолдаги «вафосизда ҳаё...» ҳамда «ҳаёсизда вафо...» ибораларидан бу ҳол яққол кўзга ташланади. Бинобарин, биринчи мисрадаги вафосиз сўзининг иккинчи қаторда вафо шакли шу сатрдаги ҳаёсизда сўзининг биринчи мисрада ҳаё шаклида қайтарилиши натижасида мақолда мураккаб қофиялар ҳосил қилинган. Бу халқ мақоллари қофиясининг ўзига хос яна бир муҳим хусусиятини кўрсатадиган томонидир. Бироқ мақоллар кўпик ёки дostonлар сингари эмас, строфик жиҳатдан номукамалдир. Шу сабабли мақол қофияларида тасвирийлик суст. Шунингдек, мақоллар халқ поэтик бошқа кўпгина турларидек таркибли, жуфт ёки мураккаб қофияларда келмай, балки уларда мазмуннинг содда қофиялар орқали ифодаланиши билан ҳам тубдан фарқ қилади. Юқорида айтганимиз сингари мақоллар халқ ҳаётининг турфа томонларини қамраб олган бўлиб, улар кенг меҳнаткаш омма орасида ҳар хил вариантларда айтиб келинган. Улар ҳозиргача қандай мавзуларда айтилган бўлмасин, уларнинг барчасида халқнинг орзу-истаги ётади, оммани яхшиликка, ҳамиша хайрли иш қилишга чорлаш мотивлари уйғунлашган. Бу уйғунлик такрор-такрор айтилган мақолларнинг ҳар бир вариантыда пишиқ қофиялар орқали қолипланган, янада баркамол тус олган.

Топишмоқлар халқ оғзаки ижодининг бошқа турлари каби қофияланиш характерига эга. Бироқ топишмоқларда дурдона халқ кўшиқлари ёки дostonларида учрайдиган мураккаб ифодалар, составли образлар талаб этилмайди. Балки ўқувчиларга ўйлаб топиш учун бериладиган маълум темадаги ҳолат ёки ҳодиса ихчам шеърый шаклларда, енгил қофияларда берилади. Топишмоқлар кўпинча иккилик, учлик ҳамда тўртлик тарзида қофияланади. Демак, топишмоқлар ҳам шеърый асарларга ўхшаш вазн ва қофияга эга. Улар ўзининг ихчамлиги, ички ва ташқи қофияга эгалиги, кишилар турмушига яқинлиги жиҳатидан китобхонлар томонидан тез ўқиб олинади ҳамда хотирада узок сақланади. Мисолларга мурожаат қилайлик:

*Бостирдим икки товук,
Бири иссиқ, бири совуқ.¹*

Топишмоқ мисралари ўзаро *товуқ* ва *совуқ* сўзлари ёрдамида байт қофия ҳосил қилиб, ёз ҳамда қиш фаслларининг англатиб келмоқда. Қуйидаги топишмоқ мисраларининг биринчиси билан учинчиси ўзаро қофияланиб, «*Отаси этагини кийгунча*» мисраси оҳангдош ҳар иккала қаторда илгари сурилган фикрни бири-бирига чамбарчас боғлайди. Натижада қофиядош мисраларда яширинган «нима» саволига бутун топишмоқ мазмунидан *олов*, *тутун* деган жавоб қайтарилади:

*Тақ этди, тақолон кетди,
Отаси этигини кийгунча
Боласи боголон кетди.*

Ёки:

*Оқ ерга қора уруг,
Қўл билан экадилар,
Оғиз билан терадилар*

топишмоғини олиб қарайлик. Мазмунидан қоғоз, сиёҳ, хат ва ўқув маънолари англашилиб турган бу топишмоқ учлик шаклида

¹ Ўзбек халқ топишмоқлари. – Тошкент: Ўзадабийнашр, 1961. – 16-бет. Мисоллар шу тўлламдан олинди (муаллиф эскартиши).

кофияланиб келган. Топишмоқда кейинги икки қатор ўзаро *экадилар* ва *терадилар* сўзлари орқали оҳангдошлик касб этаётир. Бироқ, шуни таъкидлаш керакки, биринчи қатор очик қолиб, кейинги байт қофиясига уйғунлашмаган бўлса-да, у топишмоқда асосий мазмунни ташийди. Кейинги мисралар ва улардаги оҳангдош сўзлар эса ана шу мазмунни чуқурлаштиришга, топишмоқ ечимига ёрдамлашади.

Топишмоқларда дастлабки икки мисра бир-бири билан кофияланиб, асосий маъно етакловчи қатор учинчи бўлиб келиш ҳоллари ҳам кўп учрайди. Қуйидаги топишмоқда худди ана шундай ҳол юз берган:

*Узун-узун уза қоч,
Сайраб турган қалдирғоч,
Учи менинг қўлимда.*

Дастлабки сатрлар *қоч* ҳамда *қалдирғоч* сўзлари ёрдамида оҳангдошликни юзага келтириб, сўнгги учинчи мисра очик қолган. Шуниси характерлики, биринчи оҳангдош сўз келган «*Узун-узун уза қоч*» мисраси нисбий баландликни, «*Сайраб турган қалдирғоч*» сатри ҳавода муаллақ турган бирор нарсани, шу нарсанинг жилови қандайдир бир кишининг ҳукмида эканлигини учинчи «*Учи менинг қўлимда*» қатори англатиб келмоқда. Нажижада топишмоқда яширинган нарса қалдирғочга қиёс этилиши билан варрак эканлиги осон топилган.

Халқ томонидан айтилиб, асрлар оша ҳар бири жуда кўп вариантлардатажасумтопган топишмоқларда ҳам кофияланишнинг талай турларига мойиллик сезилади. Масалан, қурбақага нисбат бериб айтилган бир топишмоққа эътибор берайлик:

*Қия-қия ерларда,
Қийма султон ўтирар.
Тирноқлари кумушдан,
Ҳофиз жувон ўтирар.*

Бу ерда биринчи ва учинчи қаторлар қофиясиз қолгани ҳолда, бошқа сатрлар *султон*, *жувон* сўзлари орқали уйғунлашган. Демак, тўрт мисрадан иборат бу топишмоқда қаторора қофия юза-

га келиб, *ўтирар* такрор сўзи фикрнинг янада муайянлашувига сабабчи бўлган. Бундан ташқари тўртлик топишмоқ мисралари қофияланишнинг яна кўплаб турларида оҳангдошлик касб этадики, бу бевосита асар ғоясини ифодалашда мантиқни кучайтириб, таъсирчанликни оширишда ягона восита бўлиб хизмат қилади. Мисолларга мурожаат этайлик:

*Бир қушим бор фаранги,
Бозларда чалади чанги.
Уни топмаган одам,
Ҳам кўкнори, ҳам банги.*

*Бодом каби япроги,
Соллонади бутоги.
Ўзи ширин, туклигина,
Мазаси тотлигина.*

Ҳар иккала топишмоқ ҳам тўрт мисрадан иборат. Биринчи топишмоқ мазмунидан яширинган куш – *булбул*, иккинчи топишмоқ мазмунидан яширинган нарса – *шафтоли* эканлиги англашилмоқда. Бироқ бу маънолар ҳар иккала топишмоқда бошқа-бошқа шеърий шаклларда намоён бўлган. Яъни биринчи топишмоқда дастлабки мисралар *фаранги* ва *чанги* сўзларидан ўзаро оҳангдошлик ҳосил этиб, сўнгги тўртинчи сатрдаги *банги* сўзига уйғунлашиш натижасида *булбул* хислатини очиб берган. Иккинчи топишмоқда эса бундай эмас. Бу ерда топишмоқда яширинган *шафтоли* мисраларнинг ўзаро мустақил икки хил қофиялари ёрдамида келиб чиққан. Бу шуни кўрсатадики, топишмоқ мисралари қайси формада қофияланмасин, ўзаро уйғунлашган сўзлар топишмоқ оҳангини таъминлашда муҳим вазифа бажаради.

Топишмоқ нафақат тўрт мисрагача, балки ундан ортиқ шеърий сатрлардан ҳам ташкил топади. Биз қуйида келтирган топишмоқ гуруч ҳақида бўлиб, олти мисрадан иборат. Олтилик шартли равишда уч гуруҳга бўлинади. Ҳар бир гуруҳ мисралари ўзаро *тўдаси* – *кун-кечаси*, *тегмай-саргайгай*, *сабоқдадир-товоқдадир*

оҳангдош сўзлари орқали қофияланиб келади. Шуниси характерлики, қофия учун келтирилган сўзлар топишмоқда яширинган нарсанинг кўриниш ва ҳолатини бевосита ифодалаб келади:

*Тарам сочли қиз тўдаси,
Сувда ётар кун-кечаси.
Сувда ётиб, сувга тегмай,
Олтмишида у саргайгай.
Саксон кунда сабоқдадир,
Тўқсон кунда товоқдадир.*

Хуллас, қофия – шеър қаноти. У шеърятда жуда кўп ва хилма-хил функцияларни адо этиб, янги-янги бандлар ҳосил қилади. Шеър композициясини юзага келтиради. Поэзияда мусиқийликни ошириб, образлилик ва ҳаётийликни таъминлайди. Энг асосийси – шеърнинг гоёвий мазмунини тўлдириб, унинг ўқимишли, завқли бўлишини таъминлайди. Бу эса қофия шеърятда азалдан катта кучга эга эканлигини ва бундан кейин ҳам қофиянинг шеърдаги ўрни, қудрати шундай сақланиб қолишига тўла имкон борлигидан далолат беради.¹

¹ Ушбу мақола фольклоршунос олим Ф. Райҳоновнинг «Ўзбек тили ва адабиёти» журналида босилган «Топишмоқларда қофия» (1985. – 5-сон. – 30–31-бетлар) ҳамда «Мақолларда қофия» (1986. – 5-сон. – 26–27-бетлар) мақолалари асосида тайёрланди.

Жумабой
ЮСУПОВ
(1947–2009)



Жумабой Юсупов 1947 йил 26 февралда Қорақалпоғистон Республикаси Амударё туманида туғилган. Туркменистон Республикаси Тошхөвүз туманининг ҳозирги «Шодлик» деҳқон бирлашмасида жойлашган бошланғич мактабда (1953–56), Тошхөвүз тумани Тозабозор шаҳарчасидаги 1-сон ўрта мактабда ўқиган (1957–63). Республика Рус тили ва адабиёти педагогика институтида ўқиган (1964–69). Республика Рус тили ва адабиёти педагогика институтининг умумий тилишунослик кафедрасида ўқитувчи, катта ўқитувчи (1969); Тошкент Халқ хўжалиги институтида катта ўқитувчи, доцент, кафедра мудири лавозимларида ишлаган (1979–91). Тошкент Молия институтида доцент (1991–92), Тошкент давлат иқтисодий университетининг Урганч филиалида кафедраси мудири (1992–95), Урганч давлат университетида доцент (1995 йилдан), УрДУ қошидаги Минтақавий тил маркази (1998–2004), университет қошидаги Малака ошириш ва қайта тайёрлаш таълим маркази директори (2003–2009) лавозимларида ишлаган. «Яқин тилдан таржимада миллий ўзига хосликни акс эттириш муаммосига доир» мавзусида номзодлик (1981), «Хоразм эртаклари генезиси, асосий хусусиятлари ва поэтикаси» мавзусида докторлик (2000) диссертациясини ҳимоя қилган. «Хоразм эртаги ва ҳаёт ҳақиқати» (1997), «Хоразм эртаклари поэтикаси» (2005), «Хоразм ривоят, нақл ва эртаклари» (2005), «Адабиётишунослик ва структурал методлар» (2005), «Қайноқ қалб сурури» (2006) каби китоблар муаллифи. 2009 йил 11 октябрда Урганч шаҳрида вафот этган.

ДАФН МАРОСИМИ ВА УНИНГ ЭРТАКЛАРДАГИ БАДИЙ КЎЧИМИ

Фольклоршуносликда эртак ва маросим муносабати, қадимги ритуаллар асосида юзага келган эпик мотив, сюжет ва образларнинг бадий хусусиятлари, эртак сюжети тизимидаги маросим элементларининг поэтик вазифалари таҳлил қилинганда, асосан, тўй маросими билан эртакнинг ўзаро эстетик алоқаларига диққат қилиб келинди. Дафн маросими удумларининг эпик талқини тадқиқотчилар эътиборидан четда қолди. Биз ушбу мақолани Хоразм халқ эртакларида қадимги дафн маросимининг экс этиши масаласига бағишладик.

Ўзбек маросим фольклорининг юзага келишида Хоразмда яшаган қавмларнинг анъана ва удумлари ҳам муҳим роль ўйнаган. Қадимги хоразмликларнинг табиат кучларига сиғинишга асосланган ибтидоий тасаввурлари, магия, кейинчалик оташпарастлик инончининг яратилишига замин бўлган. Кўпгина мутахассислар ана шу эътиқодлар асосида зардўштийлик ақидалари илк бор Хоразмда юзага келган деб ҳисоблайдилар.¹

Зардўштийлик кенг ёйилган қадимги Хоразмда дафн маросимининг ўзига хос удумлари билан бирга жон, ўлим, нариги дунё, рухнинг боқийлиги, ўлиб, қайта тирилиш тўғрисидаги тасаввурлар ҳам шаклланган эди. Ислом дини ёйилиши муносабати билан бу дафн маросимларининг кўпгина узвлари унутилди. Бундан ташқари, зардўштийлик ақидаларининг такомиллашиши, бошқа халқлар мифологиясининг таъсири ва маданий-этноик алоқалари натижасида қадимги хоразмликларнинг мотам маросими исломдан аввалги даврларда ҳам кучли структурал ва мантиқий ўзгаришларга учраган эди. Шундай экан, қадимги хоразмликларнинг исломдан аввалги дафн маросимларининг дастлабки вариантларини ёзма ёдгорликлар («Авесто», қадимги грек тарихчилари асарлари)даги қайдлар, фольклор асарларидаги этнографизмлар ҳамда воҳада мавжуд бўлган маросимлар тизимидаги архаик қатламга доир материалларни ўзаро қиёслаш

¹ Толстов С. П. Древний Хорезм. – М.: 1948. – 59–61-стр.; Рапопорт А.Ю. Из истории религии древнего Хорезма. – М.: 1971. – 5–6-стр.

орқали аниқласа бўлади. Шу маънода Хоразм эртаклари қадимги дафн маросимининг шаклланиши, асосий удумлари ва ритуал вазифаларини ўрганишда муҳим манба бўлади. Масалан, «Болтакай ботир» эртагида тасвирланишича, қахрамоннинг юртига Қорахон подшо бостириб келади. Болтакай ботирнинг аскарлари енгиледи. Қорахон ҳаммани асир олиб, Болтакай ботир билан унинг хотини Гулжон сулувнинг жасадларини «Ўлигини ит, шоғоллар чакаласин», – деб йўл устига ташлаб кетади. Болалари ўлик ота-онанинг олдида қоладилар, онадан сут келади, қизи ўлик онани эмади. Бир йўловчи бобо гўр қазиб, ўликларни кўмади ва икки болани олиб кетади.

Бунда ўликларни чўлга ташлаб кетиш душманлик ифодаси сифатида бадий тарзда тасвирланган бўлса-да, унинг генезиси қадимги хоразмлик оташпарастларнинг дафн маросимига бориб тақалади. Страбоннинг маълумотларига қараганда, сўғдлар ва бактрияликлар марҳумларни ерга дафн этмаганлар. Ўлган одам жасади очик майдонга чиқариб ташланган. Агар мурдани ит ёки қарга-қузғунлар еса, яхшилик аломати ҳисобланган. Мабодо жасадга жониворлар яқинлашмаса, буни хосиятсизлик белгиси деб билганлар. Онескрит, Страбон ва Геродот бу одат бактрияликлар орасида кенг тарқалганлиги, касалликдан ўлган кишиларнинг жасади итларга ташланиши, шу мақсадда махсус кучуклар боқилиши ҳақида маълумот берганлар.¹ Мурдани жониворлар ейиши учун махсус жойда маълум муддат қолдириш удуми инсон ўлгач унинг руҳи бошқа жонзотга кўчиши ҳақидаги анимистик тасаввурларга боғланади.² Тарихий манбаларнинг гувоҳлик беришича, зардўштийликнинг дастлабки даврларида бу одат муғлар, каспийлар, бактрияликлар, гирканияликлар, парфияликлар, массагетлар, қадимги хоразмликларнинг анъанавий ритуал маросимларидан бири бўлган.³

¹ Страбон. В семнадцати книгах. Кн. Седьмая. – М.: тип. У. Мединской, 1879. – стр. 52.

² Штернберг Л. Я. Эволюция религиозных верований. Первобытная религия. – Л.: 1936. – стр. 337.

³ Рапопорт А. Ю. Из истории религии древнего Хорезма. – М.: 1971. – стр. 24.

М. Бойснинг фикрича, зардўштийлик удумича, одам ўлгач, унинг жасади чўл ёки даштга чиқариб қўйилган. Ўлаксахўр қушлар ҳайвонлар бирпасда унинг гўштини еб қўйишган. Жасадни тарк этган жон қуёш нурлари бўйлаб осмонга чиқиб кетармиш. Шундан кейин суякларни йиғиб олиб, махсус жойда сақлаганлар.¹

Хоразмда суяк эгаси деган ибора бор. Агар бирор киши вафот этса, уни ювиб, кафанлаш, лаҳадга қўйиш каби юмушлар марҳумнинг энг яқин қариндошлари «суяк эгалари» томонидан бажарилади. Бу ибора ҳам зардўштийлик динига асосланган дафн маромига алоқадор бўлиши керак. Чунки зардўштийлик дини ҳукмрон бўлган даврларда мурданинг гўшtidан тозаланган суягини йиғиб олиб, уни остадонга жойлашга ҳақ-ҳукуки бўлган кишига «суяк эгаси» дейилган.²

Зардўштийликнинг кейинги даврларида марҳум суягини гўшtidан ажратиш вазифасини махсус кишилар бажаришган. Абу Бакр ибн Жаъфар Наршахийнинг ёзишича, «бир деҳқон Бухорхудотнинг қорнига пичоқ урибди. Бухорхудот бир соат ўтгач, жон берди, унинг хизматкорлари кирдилар ва гўштини ажратиб ташлаб, суягини Бухорога олиб келдилар.³

«Авесто»нинг таркибий қисми ҳисобланган «Видевдат»да ёзилишича, зардўштий ўлгач, унинг жасади баланд тоғ устига чиқариб қўйилган. Жасадни итлар ва қушлар ейиши зарур бўлган.⁴

Бу ўринда икки деталнинг бадий талқинига эътибор бериш зарур. Шулардан биринчиси, жасад чиқариб ташланадиган тоғ (ёки унинг кейинчалик оммалашган тепалик сифатидаги шакли) детали. Хоразм халқ эртақларида бу удум тоғ устидаги бойликни қўлга киритиш учун маккорона йўл тутган бой ҳақидаги сюжетда шундай ифодаланади: Хўжа Бозиргон деган чол айёрлик қилиб, Ҳасан ўтинчини тулум ичига киритади. Сўнг тулум

¹ Бойс М. Зороасрийцы: Веровния и обычай. – М.: 1971. – стр. 24–25.

² Қиличев Т. Хоразм халқ театри. – Тошкент: 1988. – 41-бет.

³ Абу Бакр ибн Жаъфар Наршахий. Бухоро тарихи. – Тошкент, 1966. – 58-бет.

⁴ Рапопорт А. Ю. Из истории религии... – стр. 23.

оғзини маҳкам боғлаб, тоғ этагига олиб бориб кўяди. Бир бургут тулумни кўтариб тоғнинг устига олиб чиқади. Тулумни ёриб ташқарига чиққан Ҳасан ўтинчи тоғ устидаги олтинларни пастга ташлабди. Сўнг ўзи пастга қандай тушиш кераклигини сўраганида Хўжа Бозиргон: – Болам, теварагинга қара, тирик курсанг, тирик бўл, ўлик курсанг, ўлик бўл, – деб йўлига кетаверибди. Ҳасан теварагига қараса, у ер-бу ерда ярмини қушлар еб ташлаган одам гавдалари, одамнинг каллалари, суяклари сочилиб ётган эмиш.¹

Бургут кўтариб учган тулум ичидаги Ҳасан ўтинчи чиққан тоғ зардўштиларнинг дафн маросими ўтказиладиган ритуал жойининг эпик вариантыдир. Зардўштиликда бу тоғ тепаси жониворлар ейиши учун, яъни суяги гўштидан тозаланиши учун кўйилган марҳумлар жасади билан тўла бўлган. Эртақда эса бу удумнинг бадий жиҳатдан қайта идрок этилган образли ифодаси тасвирланган. Ҳасан ўтинчининг назари тушган «гавда» ва «суяк»лар Хўжа Бозиргоннинг макру ҳийласига учиб, олтинли тоғ устига чиқиб, пастга қайтиб тушиш йўлини тополмай нобуд бўлган мардикорларнинг жасади қолдиқлари сифатида талқин қилинади. Кўринадики, қадимги хоразмликларнинг дафн маросимига оид этнографик деталь трансформацияда Хўжа Бозиргоннинг ёвузлигини бўрттириб тасвирлаш воситасига айланган. Этнографик воқелик – бадий элемент сифатида ахлоқий ва эстетик вазифа бажаради.

«Хўжа Бозиргон билан Ҳасан ўтинчи» эртагининг сюжети баланд тоғдаги қуш суратли жонзот – грифонлар қўриқлайдиган олтинни қўлга киритиш ҳақидаги қадимги бақтрияликлар афсонаси асосида шаклланган.

Милоддан аввалги V–IV аср бошларида яшаб ижод қилган грек тарихчиси Ктесий ўзининг «Индика» номли асарида шундай ёзади: Бақтрия ва Ҳиндистонда олтин жуда кўп, аммо улар тиллани дарёдан излаб топиб, ювиб олмайдилар. Бу ўлкадаги улкан ва пурвиқор тоғларда тирноғи ва панжаси шерникига ўхшаш, аъзойи бадани қора пат билан қопланган катталиги нақ бўридай келадиган тимқора тусли қушлар – грифонлар яшайди.

¹ Хоразм эртақлари. – 138–139-бетлар.

Бутун аъзойи бадани қора пат билан қопланган бу қушларнинг тўшининг патлари қизил бўлади. Олтин ана шу қушлар мақо­нида бўлгани учун жуда қийинчилик билан қўлга киритилади. Бактрияликларнинг ҳикоя қилишларича, бу қуш, яъни грифлар олтин конининг посбони эмиш. Қушлар тоғлардан олтинни то­пиб, метиндек қаттиқ тумшуғи билан чўқиб, ковлаб олар ва тил­ло бўлақларидан уя қураркан. Грифлар яшайдиган тилло тоғи чўл ўртасида жойлашган. Одамлар грифлар хужумидан қўрқиб кечаси ой ёруғида бу тоққа от уловда боришар, йиртқич хуру­жидан омон қолганлар қоп тўла олтин билан қайтишар эмиш. Бактрия ва Ҳиндистонда олтин шу тариқа олинади.¹

Бу ҳикоят Филострат, Плиний каби тарихчилар асарларида ҳам қайд қилинган бўлиб, И. В. Пянковнинг аниқлашича, асли­да, Геродотнинг «грифлар олтинини ўғирлаган арима қабиласи ҳақидаги» афсонасига бориб тақалади.²

Хазинани қўриқловчи афсонавий қуш ҳақидаги мифо­логик характердаги ҳикоялар қадимги Ўрта Осиё қавмлари фольклорининг маҳсулидир. Грек тарихчилари ҳам бу ўлкада бўлиб, ўша пайтда оғзаки тарзда айтилиб юрган афсоналар­ни эшитишган ва унинг сюжетини ўз асрларида қайта ҳикоя қилишган. Грифлар олтинини олиш ҳақидаги афсона сюжети­нинг эпик трансформацияси натижасида «Хўжа Бозиргон би­лан Ҳасан ўтинчи» сингари эртақлар юзага келган. Бу эртақ сюжетининг асосий мағзи тоғ устидаги олтинни қўлга киритиш мотиви ана шу юқорида ҳикоя қилинган қадимий афсонанинг диффузиялашган кўринишидир.

Афсона сюжети турли даврларга оид диний-ахлоқий, бади­ий-эстетик қарашлар таъсирида ўзгаришга учраган. Эртақда анъанавий сюжет элементи сифатида қайд қилинган бу мо­тив бойликка ҳаддан зиёд ружу қўйиш, очкўзлик каби салбий хислатларни қоралаш «бировга чоқ қазиган чуқурига ўзи ту­шадиган» деган ҳикматни асослашга хизмат қилади. Сюжет­лар типологиясидаги бу муштараклик Хоразм эртақларининг

¹ Пянков И. В. Бактрийский гриф в античной литературе // История и культура народов Средней Азии. – М.: 1976. – стр. 19–22.

² Пянков И. В. Бактрийский гриф... – стр. 20.

шаклланиш тарихи кадимги Ўрта Осиё қавмларининг эпик ижоди анъаналарининг бадий эволюцияси билан чамбарчас боғлиқлигини кўрсатади.

«Болтакай ботир» эртагида Қорахон подшо тилидан «ўлигини ит-шоғоллар чакаласин» айтими берилган. Аслида, анъанавий қаргиш айтими бўлган бу бадий эпик формула замирида ҳам зардўштийлик дини дафн удумлари ва нариги дунё тўғрисидаги мифик қарашлар ўз ифодасини топган.

Онескрит бактрияликлар урф-одати ҳақида шундай ёзади: «Уларнинг урф-одатига кўра, қариган кишини ўлмаса ҳам тирик ҳолда итларга берилган. Бактра шаҳри ташқи томонлари тоза кўринса-да, ичида одам суяклари тўлиб ётарди. Александр бу урф-одатларни йўқ қилади».¹ Бактрияликлар хонадонида ана шу мақсадда махсус итлар сақланган.² Бой-бадавлат ўзига тўқ гирканияликлар ҳам ўзларининг охиратини ўйлаб, аввалдан уйда ит боқишган.³ Страбоннинг қайд қилишича, массагетлар марҳум жасадини қоятош устида қўйиб, кузатиб туришган. Агар мурдага биринчи бўлиб қуш яқинлашса, марҳум жаннати экан деб хурсанд бўлишган. Мабодо итлар биринчи бўлиб ея бошлашса ҳам суюнганлар. Мурдага ҳеч бир жонзот тегмаса, ўлган одам фосик, ёмон экан деб хафа бўлганлар.⁴ Худди шундай одатга Ўрта Осиёнинг қадимги туркий тили аҳолиси ҳам амал қилган экан. Н. Ф. Катановнинг аниқлашича, «Тарабагатай шаҳри аҳолиси марҳум жасади устига мой қуйиб махсус жойга чиқариб қўядилар. Чунки мой қуйилган мурда гўштини итлар тез еб кетишармиш. Итлар жасад гўштини қанчалик тез ейишса, ўлган кишининг қариндошлари шунча хурсанд бўлишармиш».

Дафн маросимларида итнинг иштирок этиши зардўштийлик дини ва мифологик қарашлар билан боғлиқ. «Авесто»да ит муқаддас ҳайвон сифатида таърифланган. Унинг «Видеват»

¹ Бойназаров Ф. Ўрта Осиёнинг антик даври. – Тошкент: 1991. – 158-бет.

² Бартольд В.В. Еще о самаркандских оссуариях // В.В.Бартольд. Сочинения. Т. IV. – М., 1966. – стр. 118.

³ Рапопорт А.Ю. Из истории религии... – стр. 27.

⁴ Рапопорт А.Ю. Из истории религии... – стр. 27.

қисмида ҳикоя қилинишича, «кимки итни урса, ҳаёти қийинчиликда ўтади. Агар ит оч бўлса, уни овқатлантириш керак. Ит боласи олти ойлик бўлганда, унга 7 яшар кизча овқат бериши керак.¹ Зардуштийлик таълимотича, бу жонивор ёвуз кучларнинг ашаддий душманидир. Айниқса, «тўрткўз» ит ёвузликни даф қилишда алоҳида магик кучга эга деб қаралган.²

«Ўлигини ит-шағаллар чакаласин» айтимининг тарихий-генетик асослари анна шу магик қарашларга боғланади. Оташ-парастлик удумлари оилавий-маиший маросимлар тизимидан тушиб қолгач, юқоридаги айтим аввалига маросим фольклори намунаси – қарғиш сифатида қўлланилган. Кейинчалик маросим фольклор ива эпик жанрларнинг ўзаро алоқалари натижасида эртакнинг анъанавий бадий формуласига айланган.³

¹ Легенды, мифы, предания. – М.: 1992. – стр. 10.

² Миллер В. Ф. Значение собаки в мифологических верованиях. – М.: 1876. – стр. 3.

³ Фольклоршунос олим Ж. Юсуповнинг ушбу мақоласи «Ўзбек тили ва адабиёти» журналининг 1996 йил 4-сонида босилган (44–47-бетлар).

Саодатхон
ИҶЛДОШЕВА
(1947–2017)



ИҶлдошева Саодатхон Назировна 1947 йилнинг 26 апрелида Фаргона вилоятининг Фаргона шаҳрида туғилган. Профессор, фольклоршунос олима, «Ўзбекистонда хизмат кўрсатган ёшлар мураббийси» (2006). Тошкент давлат университетини тамомлаган (1970). ЎзФАнинг Алишер Навоий номидаги Адабиёт музейида илмий ходим (1970–74), Абдулла Қодирий номидаги Тошкент маданият институти (ҳозирги Ўзбекистон Давлат санъат ва маданият институти)да доцент, профессор, кафедра мудири лавозимларида ишлаган (1974–2011). «Алпомиш достони поэтикаси» мавзuida номзодлик диссертациясини ҳимоя қилган (1974–1980). Унинг «Эпос халқ ўтмиши», «Алпомиш достонида хотин-қизлар образи», «Фольклор-этнографик ансамлларнинг ижрочилик усуллари» «Мучал тўйи», «Барҳайт анъаналар», «Халқ урф-одат ва анъаналари», «Аёл, оила ва ёшлар маънавияти», «Маросим ва удумларни саҳналаштириши», «Фольклор жамоа бошқарув услубиёти», «Фольклор-этнографик ансамллари», «Фольклор кийимлари ва безаклари», «Оила – бардавом ҳаёт рамзи», «Фольклор-этнографик жамоалари услубиёти» каби ўқув қўлланма ва услубий тавсияномалари ва 50 дан ортиқ илмий мақолалари чоп этилган. 2017 йил 22 сентябрда вафот этган.

«АЛПОМИШ» ДОСТОНИ – УЛУҒЛАНҒАН МИЛЛИЙ ҚАДРИЯТ

Аждодлар меросини ўрганиш, бу халқнинг турмуши, тарихи, бугуни ва келажаги, тафаккур тарзи ҳамда руҳиятини ўрганиш демакдир. Унда миллатнинг ўзини билиши, англаши, намоён этиши аждодлар мероси ва миллий қадриятлари акс этган.

Масалан, Абу Райҳон Берунийнинг «Қадимги халқлардан колган ёдгорликлар», Фирдавсийнинг «Шоҳнома», Умар Ҳайёмнинг «Наврўзнома», Маҳмуд Кошғарийнинг «Девону луғатиттурк», Алишер Навоийнинг «Садди Искандарий» асарларида аждодлар меросининг тимсоли намоён этилган.

Ўзининг қадимий ва бой маданияти билан жаҳон цивилизациясига ҳисса қўшган аждодлар мероси ва миллий қадриятлари саналмиш тафаккур дурдоналарида энг олийжаноб, улуғвор мақсадларга йўналтирилган қарашлар ўз ифодасини топган.

Ўзбек халқи жаҳондаги энг қадимий анъаналарга эга бўлган халқдир. Шунингдек, асрлар мобайнида яратилиб келинган ўзбек халқ достонларининг бизгача етиб келишида халқ бахшиларининг ўрни бекиёсдир.

Халқ орасида бахши сўзи кўп маънода қўлланган. «Достон куйловчи, қўшиқ ва достонларни ёддан куйловчи, айтувчи, авлоддан-авлодга етказувчи санъаткор. Баъзи жойларда шаман маъносида ҳам қўлланади. Достончиларни эса юзбоши, соқи, санновчи, жиров – деб айтадилар». Янги достонларнинг тури ва вариантларини ярата оладиган бахшилар шоир деб ҳам аталади. Масалан, Фозил шоир, Пулкан шоир, Ислом шоир ва бошқалар.

Бахшилар халқ достонларини миллий қадриятларимизнинг бир бўлаги бўлган созда, кўп ерларда дўмбира, айрим жойларда қўбиз ёки дуторда куйлайдилар. Хоразм бахшилари достонларни, асосан, дуторда ижро этадилар, уларга ғижжак ва буломонда созандалар жўр бўлади. XX асрнинг 30-йилларидан Хоразм бахшилари достонларни тор ва рубобда куйлай бошладилар. Шу муносабат билан айрим бахшилар ансамблида скрипкадан фойдаланиш, ансамблга доирачи, ҳатто

ўйинчи олиб кириш ҳоллари учрайди. Хоразмдаги Бола бахши ансамбли бунга мисол бўла олади.

Бахши аввал бир неча терма куйлаган, Хоразм бахшилари эса терма сифатида дostonлардан парчалар ёки Махтумкули ғазалларидан, панд-насихат мазмунидаги кўшиқлар ижро қилганлар. Зарафшон воҳаси ҳудудларида «Нима айтай?» термаси билан эшитувчиларга мурожаат қилинган. Дostonлар бир неча соат ёки кунлаб куйланган.

Ўзбек халқ қаҳрамонлик эпоси «Алпомиш» жуда узоқ тарихий тараққиёт босқичини босиб ўтган. Кўп асрлар давомида оғиздан оғизга ўтиб халқ бахшилари ҳофизаси орқали бизгача етиб келган.

Истиклол шарофати билан халқимизнинг миллий қадриятларини, хусусан, кўҳна ва ҳамиша эзгуликка, диёнатга ундайдиган, эл-юрт манфаати, унинг бирлигини тараннум этувчи «Алпомиш» дostonини изчил ўрганишга кенг имкониятлар яратилди.

«Алпомиш» қаҳрамонлик дostonлари кўчманчилик ва ярим кўчманчилик ҳаёти билан боғлиқдир. Бир қатор уруғ ва қабила-ларнинг муайян халқ сифатида ташкил топа бориши, илк давлатчилик куртакларини пайдо бўлиши муносабати билан халқлар ва элатларнинг ўз мустақилликлари учун чет эл босқинчиларига қарши мардонавор курашишлари қаҳрамонлик дostonи учун бой манба бўлган. Қаҳрамонлик дostonларидан бизгача соф ҳолда «Алпомиш» дostonи етиб келган. Бу дoston асрлар оша халқимизнинг миллий ва маънавий мероси бўлиб келмоқда.

«Ота-боболаримизнинг қадимий тасаввурига кўра, ўқ-ёй ҳокимият нишонаси ҳисобланган. «Алпомиш» етти ёшида ўн тўрт ботмон биринждан – бронзадан ясалган ўқ ёйдан ўқ отиб «алп» деган унвонга эга бўлади. Алп деган ҳокимият эгаси эканини инобатга олсак, бу дoston кўп асрлик миллий давлатчилигимизни бадиий ифодаси эканига ишонч ҳосил қиламиз».

Ватан тушунчаси тарих давомида ижтимоий-иқтисодий тараққиёт муносабати билан ўзгариб, кенгайиб ривожланиб борган. Ибтидоий жамоа тузими шароитида муайян қабила яшаган жой ўша қабиланинг ватани ҳисобланган. Жондош ва тилдош қабилаларнинг узвий иттифоқидан элат пайдо бўлган. Элат

яшаган ҳудуд эл деб аталган. «Алпомиш» достонида Бойсун-Қўнғирот элини бирлаштириш муайян ҳудуд доирасида марказий бошқарувнинг пайдо бўлиши Ватан тушунчаси элат, яъни халқ ва давлат тушунчаларини қамраб олади. Достонда Ватан меҳри, Ватан туйғуси, инсонпарварлик, муҳаббат ва садоқат, ростгўйлик, матонат, мардлик, қаҳрамонлик каби юксак инсоний фазилатлари ўз ифодасини топган. Достон тинчликсевар халқимизнинг катта маънавий мероси сифатидаги ўрни бекиёсдир. «Алпомиш» достони аждодларимиз ижодий даҳосини бебаҳо ёдгорлиги сифатида жаҳон халқлари қаҳрамонлик эпоси намуналари ичида алоҳида ўрин тутди.

Маълумки, «Алпомиш» достони жуда кўп туркий бўлмаган халқлар орасида кенг тарқалган. Унинг версия-талқини қуйидагича: биринчиси, «Қўнғирот» талқини, бунга ўзбек, қозоқ ва туркийлар ўртасида кенг тарқалган ва мукамал ҳолга келган «Алпомиш», «Алпамис» номларидаги достонлар киради. Иккинчиси, «Ўғуз» талқини бўлиб, туркий халқлар, озарбайжон, туркман, турк, ўзбек ва бошқа халқлар орасида яшаб келаётган катта-кичик асарлар, хусусан, «Дада Қўркут» достони, унинг таркибидаги «Бамси байрак» каби достонидир. Учинчиси, «Қипчоқ» талқини деб айтилиб, бунга татар, бошқирд, абхаз ва уларга яқин бошқа халқлар ижодидаги «Барчин Сулув», тоғли Олтойда тарқалган «Алп-Манаш» достонини – «Олтой» талқинига киритиш мумкин.

«Шундай қилиб, «Алпомиш» достони ва унга яқин бўлган катта-кичик фольклор намуналари ер юзига тарқалиб кетган туркий ва унга яқин бўлган халқлар орасида у ёки бу даражада кенг ёйилган ҳамда уларнинг энг сеvimли асарларидан бирига айланган». Чунки туркий халқларга алоқадор достон эртақ, афсона, ривоятлар бўлса, достончиликда мазмуни, ғоявий, бадий жиҳатдан энг мукамал нусха деб тан олингани «Алпомиш»дир.

«Бу ўлмас асарни халқимиз асрлар давомида яратган, ўз иймон-этиқодидек асраб-авайлаган, қанча авлод-аждодларимиз «Алпомиш» достони асосида тарбия топган, ўзлигини англаган, маънавий бойликка эга бўлган. Демак, халқимиз бир экан «Алпомиш» сиймоси ҳам барҳайт».

Халқ оғзаки ижодининг юксак санъат тури «Алпомиш» достонининг пайдо бўлиши тараққиёти бевосита бахшилар номи билан боғлиқдир.

Халқ дostonчилиги ва бахшичилик санъатининг тараққий этилишида Ўзбекистон Республикаси Вазирлар Маҳкамасининг буюк эпос «Алпомиш» дostonининг 1000 йиллик юбилейини ўтказиш тўғрисида»ги 1998 йил 13 январдаги тарихий қарори ва юбилейнинг ЮНЕСКО тадбирлари доирасида кенг нишонланиши муҳим амалий аҳамиятга эга бўлди.

Ўзбекистон Республикаси Вазирлар Маҳкамасининг «Алпомиш» дostonи яратганлигининг 1000 йиллигини нишонлаш тўғрисидаги қарори асосида 1999 йил 6 ноябрь куни Аму соҳилидаги қадимий шаҳар – Термизда катта тантана қилинди. Бу эса мамлакатимизда миллий-маданий меросимиз бўлган халқ оғзаки бадиий ижодиёти дурдоналарини тадқиқ ва тарғиб этишга жуда катта аҳамият берилаётганлигининг ёрқин далилидир.

Қарорда «Алпомиш» дostonининг тўла академик танланмаси, хорижий тиллардаги нашрларини амалга ошириш, унинг сюжети ва мотивлари асосида театр спектакллари, адабий-бадиий композициялари, ҳужжатли, мультипликацион, видео, телефильмлар яратиш, фольклор-этнографик кўргазмалар, замонавий дам олиш иншоотлари ва кичик спорт майдонларига эга бўлган «Алпомиш» боғларини ташкил этиш, почта маркалари, откриткалар, конвертлар туркумини чиқариш, фольклор асарлари ижрочиларининг кўрик-танловларини, миллий спорт ўйинлари – «Алпомиш» ўйинлари фестивалини ўтказиш каби турли-туман тадбирлар белгиланганлиги, уларнинг амалга оширилиши маданий тараққиётимизда улкан воқеа бўлди.

Биринчи Президентимиз Ислom Каримов таъкидлаганидек – «Халқ оғзаки ижодининг ноёб дурдонаси бўлмиш «Алпомиш» дostonи миллатимизнинг ўзлигини намоён этадиган, авлодлардан-авлодларга ўтиб келаётган қаҳрамонлик кўшиғидир. Агарки халқимизнинг қадимий ва шонли тарихи туганмас бир дoston бўлса, «Алпомиш» ана шу дostonнинг шоҳ байти, десак, тўғри бўлади. Бу мумтоз асарда тарих тўфонларидан, ҳаёт-мамот синовларидан омон чиқиб, ўзлигини доимо сақлаган эл-юртимиз-

нинг бағрикенглик, матонат, олижаноблик, вафо ва садоқат каби ўзгу фазилатлари ўз ифодасини топган».

Асрлар оша «Алпомиш» халқимиз учун миллий қахрамонлик ва фидойилик тимсоли бўлиб келган. Унинг замирида мужассамлашган асосий ғоя-халқнинг жипслиги, миллий бирлик, эл-юрт равнақи ва мустақиллиги учун кураш, ватан ҳурлиги, соф севги ва садоқат ғояси халқимизга катта руҳий қувват бериб келган.

Достонда Алпинбийдан қолган, қўлда занг босиб ётган камонини фақат Алпомишгина ота олади. Алплик камонининг қўлда занг босиб ётиши, Алпинбий ўз вазифасини охиргача бажара олмагандан, салтанатни мустақкамлашни буткул охиргача етказа олмаганидан далолат беради. Бундай вазифани янги авлод – Алпларгина охиргача етказади. Зеро, туркий халқлар дунёқарашида камон пок ният ва салтанат тимсоли бўлгандир».

«Алпомиш» тимсолида ватан истиқболи учун курашувчи мард ва жасур миллий қахрамон сурати гавдаланади. Азалдан миллий ўзликни англашнинг бадий тимсоли бўлиб келган «Алпомиш» достонида тараннум этилган ғоялар ёшлар маънавиятини шакллантиришда тарбия мактаби ҳам ҳисобланади.

Қаерда маънавий-маданий, ахлоқий камолот юксак бўлиб, маърифий-тарбиявий тадбирлар оқилона йўлга қўйилган бўлса, шу ерда жамиятнинг ижтимоий адолат мезонлари тез ривожлангани тарихдан маълум. «Алпомиш» минг йиллар мобайнида Шарқ халқлари учун қудратли маънавият манбаи бўлиб хизмат қилган.

Шунинг учун ўзбек халқ эпосининг энг сара асарлари матнларини ҳеч қандай қисқартиришлару, таҳрирларсиз тўла нашр этишга киришилди. Айниқса, «Алпомиш» достоннинг ўзбек вариантлари тўла чоп этирилганлиги эпосшунослик тарихидаги муҳим босқичлардан бири бўлди.

2010 йил 7 октябрда Ўзбекистон Республикаси Вазирлар Маҳкамасининг «2010–2020 йилларда номоддий маданий мерос объектларини муҳофаза қилиш, асраш, тарғиб қилиш ва улардан фойдаланиш Давлат дастурини тасдиқлаш тўғрисида»ги 222-сон қарори эълон қилинган эди. Мазкур қарорнинг ижросини таъминлаш мақсадида 9 бўлимдан иборат махсус Давлат дастури ишлаб чиқилди. Унинг «Номоддий маданий меросни илмий жиҳатдан

ўрганиш ва тадқиқот ишларини ташкил этиш» номли иккинчи бўлимининг бир неча бандларида қадриятларимиз ва фольклор йўналиши бўйича ҳозирги даврнинг энг долзарб вазифаларини бажариш кўзда тутилди. Бу Қарорнинг бажарилиши «Ўзбек халқ ижоди ёдгорликлари» 100 жилдлигини асар матни, нотаси ва изоҳлари билан нашрга тайёрлаш билан боғлиқ вазифалар шулар жумласидандир. Албатта, уларнинг ҳар бири босқичма-босқич ҳолатда амалга оширилиш ишлари бошлаб юборилди.

Ўзбек фольклоршунослиги тарихида илк бор яратилган «Ўзбек халқ ижоди ёдгорликлари» 100 жилдлигининг дастлабки жилдлари, хусусан, «Алпомиш», «Юсуф билан Аҳмад» каби халқ достонларининг академик нашр сифатида аввалги нашрлардан ўз мазмуни жиҳатидан тубдан фарқ қиладиган жилдлари чоп этилди.

Ўзбек халқ достончилиги, хусусан, «Алпомиш» эпоси тараққиётининг бугунги ҳолати ҳақида қуйидагича хулоса чиқариш мумкин:

Мустақиллик даврида қадимий асосларга эга бўлган ўзбек бахшичилик санъатининг изчил тараққиёти учун кенг имкониятлар яратилди. Бу, биринчи навбатда, халқ ижодкорларининг ижодий фаолиятини қўллаб-қувватланганлиги; эркин ижод билан шуғулланиш учун зарур бўлган барча шарт-шароитлар яратиб берилганлиги; жойларда бахши шоирлар ижодий мактаблари ташкил этилганлиги; устоз-шогирдлик муносабалари йўлга қўйилганлиги; эпик меросни сақлаш ва келгуси авлодларга етказиб беришга муносиб ҳисса қўшилаётганлиги; бахшилар ҳукуматимиз томонидан муносиб тақдирланаётганлиги билан белгиланади.

2003 йилнинг 13–14 март кунлари Сурхондарё вилоятининг Термиз шаҳрида Марказий Осиё республикалари бахши-шоирлари ва оқинларининг 3-анъанавий халқаро кўрик-танлови ўтказилди.

Бу кўрик-танловнинг асосий мақсади бахшичилик ва достончилик санъатини янада юксалтириш, янги истеъдодларни кашф этиш, ёш авлоднинг маданий меросимиз, урф-одатлар ва анъаналаримизга бўлган муносабатини шакллантириш ҳамда эпик санъат билан боғлиқ қадриятларимизни кенг тарғиб қилишга қаратилган эди.

Қадимий қадриятларимизнинг байрамига айланиб кетган бу танловда мамлакатимизнинг барча вилоятлари ҳамда Қорақалиоғистон Республикасида ўтказилган дастлабки босқичида ғолиб деб топилган ўттизга яқин бахши-шоир, оқин ва жировлар ўзаро ижодий беллашдилар.

Кўрик-танловда республикамызда яшаб ижод қилаётган барча эпик санъат соҳиблари ижодий фаолиятининг ўзига хос кўзгуси бўлди.

Халқаро кўрик-танлов халқ достончилиги ҳамда бахшичилик меросини ўрганиш, сақлаб қолиш, ривожлантириш ва «Алпомиш» эпосини янги ижрочиларни аниқлаш йўлидаги тадбирлардан бўлди.

«Алпомиш» эпосини аждодлар меросининг улуғланган қадрияти сифатида ўрни беқиёсдир. Достон ижрочилигида устазода ва ёш иқтидорли ижодкорларнинг маҳоратини баҳолашига «Алпомиш» достони асос бўлди. Чунки ҳар бир ижодкор достондаги қаҳрамонликни, жасурликни улуғлаб, мардлик туйғулари, ватанпарварлик ғояси билан уйғунлаштириб ижро этдилар. «Алпомиш» достонининг ғоясида ёш авлодга намуна бўладиган жиҳатлари кўп ва ҳўпдир. Улар ҳозирги кун ёшларининг маънавий салоҳиятини оширишда асос бўлиб хизмат қилади.

Зеро, «Халқимизнинг енгилмас баҳодирлари – Алпомиш тимсолида биз Ватанимизни ёмон кўзлардан, бало-қазолардан асрашга қодир, керак бўлса, бу йўлда жонини ҳам фидо қилишга тайёр бўлган азамат ўғлонларимиз – бугунги алпомишларнинг маънавий қиёфасини кўрамыз.

Ишонаманки, ҳар бир авлод мана шу қаҳрамонлик достонини асраб-авайлаб келгуси авлодларга етказди. Бу қаҳрамонлик эпосини куйлаб, уни қалбига, шуурига жо қилган миллатни эса ҳеч қандай куч енга олмайди» – деб таъкидлаган Ислом Каримов.

Шунинг учун ҳам бугунги кунда миллий ва умуминсоний қадриятлар улуғланган номоддий маданий меросга бўлган муносабат тубдан янгиланиб, аждодларимиз тарихи, маданияти, маънавий қадриятлари тизимини кенг кўламда тарғиб этишнинг мисли кўрилмаган имкониятлари очиб берилмоқда.

Ғулом
АКРАМОВ
(1947–1987)



Ғулом Акромов 1947 йили Фарғона вилояти Данғара туманида туғилган. Тошкент давлат университетининг журналистика факультетини битирган (1973). «Гулистон» журналида мусахҳиҳ (1972–73), ЎзР ФА «Фан» нашриётида кичик муҳаррир (1973–74), Фарғона вилояти газетасида маданият бўлими мудири (1974–78) вазифаларида ишлаган. Ғулом Акромовнинг мифология, миф ва фольклор алоқалари, ҳозирги ўзбек адабиёти поэтикасига бағишланган «Аниматик мифология» (1977), «Тотемистик мифлар» (1978), «Ғурўғли» туркумида мифологик образлар» (1978), «Манистик мифология» (1979), «Мифологиянинг эпик жанрларига муносабати» (1981), «Миф ва ёзма адабиёт муносабатига доир» (1996) каби мақолалари эълон қилинган. «Ўзбек фольклорига мифология» мавзусида номзодлик (1980) диссертациясини ёқлаган. Ғулом Акромов 1987 йилда Фарғона вилоятида вафот этди.

МАНИСТИК МИФОЛОГИЯ

Ўзбек халқ ижоди асарларида манистик (ажодлар ҳомийлиги, афсонавий, тарихий қаҳрамонлар тўғрисидаги) мифлар ҳам муҳим ўрин тутди. Манистик мифлар халқ ижодининг энг қадимий турларидан бўлиб, у ибтидоий инсоннинг турмуш тарзи билан боғлангандир. Г. Хмелевский бу тур мифларнинг келиб

чикиши хусусида куйидагиларни ёзади: «Мифлар куйидагича туғилган: бир вақтлар вафот этган аждодини ёдда сақлаган кексалар унинг ҳаёти ва жасорати ҳақида сўзларкан, ғайритабий, афсонавий элементлар кўшиб, ҳикоялар тўкиганлар».¹ Гарчи бу мулоҳаза манистик мифларнинг келиб чикиши ҳақида тўлақонли маълумот бермаса-да, лекин унда эътибор талаб ўринлар бор. Булар, хусусан, манистик мифларнинг реал заминида ғайритабий элементлар билан «тўлдирилиб» юзага келтирилганлиги билан боғлиқ қайдлардир. Бинобарин, бу икки белги мифнинг муҳим хусусиятларидан ҳисобланади.

Ўзбек халқ ижодида манистик мифнинг ёрқин намуналаридан бири Хубби (Фарғонада Эрхубби) ҳақидаги сюжетлардир. Асарнинг Хоразм варианты куйидагича: «Фаридун ва ҳатто Жамшид подшолик қилмасдан кўп вақтлар илгари бу дарёда бир йигит яшаган ва бу йигит дарёнинг ҳокими бўлган. Унинг исми Хубби бўлган. Хубби балиқ билан овқатланган, у бир қўли билан балиқни тутиб олар экан-да, уни куёшга узатар экан, балиқ шу ондаёқ қовурилар экан. У 700 йил давомида Амударёда яшаган ва шу вақт ичида ҳеч қандай ёвуз жин дарёга яқинлаша олмаган ва ҳатто, у вақтда чивинлар ҳам бўлмаган. Жамшид тахтга ўтирган вақтдан бошлаб, Хубби дом-дараксиз ғойиб бўлган. Уни осмон денгизи маликаси – гўзал бир қиз ўғирлаб кетган деб ўйлайдилар. У ғойиб бўлгандан сўнг Амударёда Хуббининг онаси пайдо бўлган. У узоқ вақт давомида йиғлаб, ўз ўғлини қидиради. Ана шу Хуббининг онаси биринчи қайикни қурган ва халқни дарёда сузишга ўргатган. Сўнграқ Хуббининг онаси бутунлай кетиб қолган.

Минг йиллар давомида Хуббининг онаси аза тутган ва у билан бирга дарё, саҳро, тоғ ва қоялар йиғлаган, одамлар, қушлар, ҳайвонлар йиғлаган, осмонда фаришталар, ер остида девлар йиғлаган. Хубби тирик, у қиёматгача яшайди, Хубби нажот берур, Нуҳ мадад берур. Мана, қандай куч билан бу муқаддас дарёга ҳомийлик қилади».²

¹ Хмелевский Г. Христианство и религии мира. – М.: ИПЛ, 1968. – стр. 49.

² Ғуломов Я. Ғ. Хоразмнинг сугорилиш тарихидан. – Тошкент, 1959. – 32-бет.

Мифдаги Ҳубби образида манистик қарашлар таъсири ёркин намоён бўлган. Ҳубби, аввало, кишилар ҳомийсидир. Бинобарин, мифда тасвирлангандай унинг ҳукмдорлиги даврида ҳамма осойишта яшаган, на жин, на чивин бўлган. Омманинг табиат стихияси устидан голибликка эришиш орзуси шу тариқа Ҳубби образида ўз ифодасини топади. Ҳубби образидаги маъно мантиқи шуни тасдиқлайдики, манистик мифларда ҳам табиат стихиясига қарши кураш ва унинг устидан голибликка эришиш орзулари асосий ғоялардандир.

Мазкур мифдаги Ҳуббининг онаси образи ҳам манистик қарашлар ифодасига бўйсундирилган. Унинг одамларга дарёда сузиш ва қайик яшашни ўргатиши ҳақидаги фактлар бевосита шу мулоҳазани далиллайди.

Мифнинг Фарғона варианты ҳам айрим жиҳатлардан характерлидир. Хусусан, унда бош қахрамон образи талқинида реалистик моментлар кўзга ташланади. У Сирдарёда яшайди ва кишиларга ёрдам беради. Лекин сюжет мантиқи жиҳатидан ҳар икки вариант жиддий фарқланмайди.

Ҳубби ҳақидаги Хоразм мифи бадиий жиҳатдан шаклланган, мифга хос кўтаринки, тантанали оҳангга эга. Унда, асосан, мифологик образлар иштирок этадики, бу асарни соф шаклда, турли таъсирларсиз етиб келганини тасдиқлайди. Ҳубби образида манистик, осмон қизи образида космогоник қарашлар ўз аксини топган. Шунингдек, Ҳуббининг онаси профессионал ҳомийлар ҳақидаги қадимий мифологик тасаввурлар билан боғланган.

Эпик жанрларда, хусусан, эртакларда манистик мифологиянинг рудиментлари мотивлари нисбатан кенгрок сақланиб қолган. Бундай қарашлар изларини эртакларда кенг ўрин тутган ҳомий чол образида яққол кўрамыз. Бу образнинг мантиқий йўналиши манистик қарашлар ифодасига бўйсундирилган. У халқ қахрамонига чўл-даштда ва сирли қўрғонда дуч келади, мураккаб вазиятда тўғри йўл кўрсатиб, ҳомийлик қилади. Образ асосидаги ана шу маъно бош маъно бўлиб, ундаги бошқа хусусиятлар (инсонийлик, донолик) характерни янада бойитувчи белгилардир. «Сухроб ва Мизроб» эртагида тасвирланган чол образи

юқоридаги белгилар билан бир қаторда қўшимча хусусиятларни ҳам мужассамлаштирган: у нуроний, катта ҳаётий тажрибага эга, босиқ. У девлар асиралигидан қизни қутқариш йўлларини кўрсатаркан, машаққатни ҳам яширмайди, баҳодирларни мардликка чорлайди.¹ Кўриниб турибдики, кейинги белгилар, асосан, образнинг ҳаётийлигини таъминлашга хизмат этади. Демак, чол образи манистик мифологиядан фарқли ўлароқ эпик жанрларда реализм сари трансформация қилинган.

Манистик чол образи «Воспирохун» эртагида сюжет тугунининг ечилишида муҳим роль ўйнайди. Бу сюжетда чол образи тўла мифологик аспектда тасвирланади. Эртақ қаҳрамони эпик уч йўл бошида чолга дуч келади. Чол қаҳрамонга ҳомийлик қилади, унга мақсадга эришиш йўлини кўрсатади. Халқ қаҳрамони ана шу ҳомий воситаси ва ёрдамида мурод-мақсадига етади. Асардаги манистик чол қаҳрамонга огир вазиятларда бир неча марта дуч келади ва ҳар сафар ҳомийлик қилиб, уни қутқаради. Бу образнинг мифологик характери эртақ финалида – зиёфат тасвирида ёрқинроқ намоён бўлади: чол эртақ қаҳрамонлари учун номаълум сирларни очади ва шу ўринда ўзини оддий инсонлардан фарқли эканини кўрсатади.² Чол образидаги ғайритабиий элементларнинг мифологик характерини белгилайди. «Моҳистара»³ эртагида ҳам чол образининг талқини юқоридаги тасвирга айнанлигини кўрамай.

Халқ ижоди асарларида тез-тез учраб турадиган Хизр ва чилтанлар образи ҳақида ҳам шундай мулоҳазалар билдириш мумкин. Тўғри, улардан Хизр ҳақидаги мифология илдизи аниomatik қарашлар билан (яшиллик маъбудди) боғланади. Аммо манистик мифологияда бу образ янги элементлар билан бойиган, кишилар ҳомийси сифатидаги маъноси бирмунча кучайган. Бу фикрни «Ҳасан билан Ҳурилик»,⁴ «Сув қизи»⁵ эртаклари финалидаги Хизр образи талқини тўла тасдиқлайди. Жумладан,

¹ Сув қизи. Фантастик эртақлар. – Тошкент: 1966. – 140–159-бетлар.

² Ўша манба. – 52–74-бетлар.

³ Ўша манба. – 5–51-бетлар.

⁴ Ўша манба. – 100-бет.

⁵ Ўша манба. – 124–128-бетлар.

уларнинг биринчисида Хизр Ҳурилиқонинг сувга оққан ўғли ва кесилган қўлларини аслига қайтарса, иккинчисида тошга айланган Ғайратни қутқаради. Ҳар икки сюжетда ҳам Хизр манистик чол образига жуда яқин, ҳатто вариант даражасида талқин этилади. Бу мифологик образ талқини дostonларда эртактлардан анча фарқланади. Хусусан, у бош қахрамоннинг ҳомийси ва раҳномаси сифатида тасвирланади. Эътибор берилса, эртактларда у умум, яъни кишилар ҳомийси сифатида талқин этилган эди. Хўш, эпосдаги бу ҳолнинг бирор сабаби борми?

Назаримизда, бунинг сабаби жамиятнинг иқтисодий ва ижтимоий тараккиёти, дунёқарашдаги ўзгаришлардadir. Бинобарин, эпос бизга етиб келган ҳолида мифология ва эртактлардан анча кейин шаклланган бўлиб, бу даврда ибтидоий мифологик дунёқараш ўрнини янги тушунчалар эгаллаган эди. Бу даврда шаклланган оғзаки ижод асарларига қараб ҳукм чиқарадиган бўлсак, қабила ва уруғларнинг ҳомийлари аста-секин якка шахсларнинг, буюк қахрамонларнинг раҳномалари сифатида талқин қилина бошлаганини кўрамиз. Бунга қадимий мифологик тасаввурларнинг янги шароитга мослашишининг акс этиши деб қаралмоғи лозим. «Гўрўғлининг туғилиши» дostonидаги Хизр образи ифодаси мазкур мулоҳазани тасдиқлайди. Бундай образ бошқа халқлар эпосида ҳам мавжуд.¹

Ўзбек халқ ижодидаги Хизр образи талқини ҳақидаги мулоҳазаларимизни хулосаласак, қуйидагиларни қайд этиш мумкин: образ илдизи аниматик мифологияда бўлиб, у табиат мифларида юзага келган. Манистик мифологияда ҳомий куч сифатида талқин қилинган. Эпосда эса тўлақонли манистик образ даражасига кўтарилган. Шу тариқа бу образ трансформациясида уч асосий босқич мавжуддир. Чилтанлар образи ва улар билан боғлиқ сюжетлар эртактлар орасида учрамайди. Эпосда эса чилтанлар номи кўп тилга олинади, лекин воқеаларда эпизодик образ сифатида ҳам қатнашганлигини кузатмадик. «Гўрўғли» эпосидаги далилларга асосланиб айтиш мумкинки, чилтанлар

¹ Гўрўғлининг туғилиши. Ўзбек халқ ижоди. Дostonлар. Муҳаммадқул Жомрот ўғли Пўлкан / Нашрга тайёрловчи Малик Муродов. – Тошкент: Бадий адабиёт, 1967. – 320-бет.

образи асарда бажарган функцияси жиҳатидан Хизрга мувофик келади.¹ Лекин унинг тасвирида яна бир ўзига хослик борки, бу мазкур образнинг анимистик образга яқинлиги билан боғлиқдир. Бинобарин, чилтонлар анимистик мифологиядаги хомий руҳлар образига ҳамоҳангдир. Демак, чилтанлар образи мифологияда манистик образдан анимистик образга трансформация қилинган кўринади.

Манистик мифологияда афсонавий шахслар, тарихий қаҳрамонлар ҳақидаги мифлар алоҳида қанот ҳисобланади. Ўзбек фольклорида афсонавий қаҳрамон Рустам номи билан боғлиқ сюжетлар бу турнинг яхши намуналаридир. Маълумки, Рустам Шарқ халқлари ижодида муҳаббат билан тасвирланган паҳлавондир. У ҳақдаги илк сюжетлар «Авесто»га киритилган. У «Авесто» сюжетларида ҳам ботир, девларга қарши мардона курашчи сифатида талқин этилган. Фирдавсийнинг «Шоҳнома» асарида эса «Авесто» традициялари сақланган ҳолда образнинг халқчиллик хусусиятлари қуюклаштирилади.²

Ўзбек халқ ижодидаги «Паҳлавон Рустам»³ эртаги сюжети эса, «Авесто»дан кўра «Шоҳнома»га яқинроқдир. Унда эпосдаги айрим сюжет ва мотивларнинг ўхшашлигидан ташқари, образларда ҳам бир хиллик бор (Дев Сафид, Аквон дев, донишманд чол образлари). Эртақда Рустам девларни енгиб, ҳамюртларини ҳалокатдан қутқаради. Образ талқинида мифологик оҳанг равшан сезилади. Бу ҳол дев образи талқинида ҳам, воқеалар тасвирида ҳам мавжуддир.

Шуниси характерики, афсонавий паҳлавонлар ҳақидаги мифлар орасида салбий қаҳрамон асосий фигура сифатида ҳаракат қиладиганлари ҳам мавжуддир. Авж бин Унуқ ҳақидаги миф фикримизнинг далилидир. Мифнинг мазмуни қуйидагича: Авж бин Унуқ деган паҳлавон Амударёни тўсиб Чимбойга сув бермай қўйиш мақсадида чопонининг этагига тупроқ олиб, дарёга тўкмоқчи бўлади. У қайсар бўлиб айтилган гапнинг тескарисини қилар экан. Бундан одамлар фойдаланишади. Унга «тупроқни

¹ Гўрўғлининг туғилиши. – 320-бет.

² Фирдавсий. Шоҳнома. – Тошкент: 1976.

³ Кенжа ботир. Фантастик эртақлар. – Тошкент: 1973. – 157-бет.

кирғокка тўкма» дейишади. У кирғокка тўкибди. Одамлар хатардан кутулибди.¹

Бу мифда бош қахрамон ҳаддан ташқари кучли, лекин манистик образларнинг айнан тескариси бўлиб, ўта лакма. У кишиларга онгли равишда ҳомийлик қилмайди, лекин одамлар унинг лакмалиги туфайли кучидан фойдаланадилар. Бу жиҳатлардан мазкур образ дев образи талқинига айнанлашади. Бинобарин, халқ ижодида дев образи ҳам, асосан, шу йўналишда тасвирланади. Бунинг учун «Гўрўғли» эпосидаги Ҳасан Чопсон образини эслаш кифоядир. Мазкур мифологик сюжетнинг Т. А. Жданко ёзиб олган вариантыда Авж бин Унуқ ўрнида дев ҳаракат қиладики, бу ҳам фикримизнинг далилидир.² Шу ерда яна бир мулоҳазани ўртага ташлашга тўғри келади. Бизнингча, афсонавий образнинг дев образи билан вариант даражасида қўлланиши қадимий тасаввурлар ўртасида ўзаро таъсирлар натижасидир. Хусусан, қадимда Сирдарё ҳамда Амударё бўларида яшовчи аҳоли девга эътиқод қўйганлиги маълум.³ Шундай экан, манистик ва афсонавий образларнинг кўпгина белгилари ҳомий девларга (ёки аксинча) трансформация қилинган бўлиши мумкин.

Афсонавий қахрамонлар ҳақидаги мифологияда Йима (Жамшид), Гершасп, Зардушт, Александр Македонский (халқ ижодида Искандар) каби образлар юзага келган. Шунингдек, Н. Маллаевнинг ёзишича, Сиёвуш, Эликбек ҳақида мифлар, «Авесто»даги Сом, Наримон, Зол, Гев, Бижон каби афсонавий қахрамонлар ана шу гуруҳга хосдир.⁴

Манистик мифология мотивлари эртақлар сюжетини қарамонлик ғоялари билан бойитади. «Қирон ботир», «Бунёд полвон»⁵ каби эртақларда мифология таъсирида афсонавий қахрамонлар яратилганга интилиш сезилади. Бу эртақларнинг қахрамонлари ҳам кўплаб мифологик хусусиятларга эгадир. Улар ҳам афсонавий қахрамонлар каби мифологик восита ва

¹ Ғуломов Я. Ғ. Ҳоразмнинг суғорилиш тарихидан. – 157-бет.

² Ўша асар. – 32-бет.

³ Иранские языки. – М.Л., 1945. – стр. 137–138.

⁴ Маллаев Н. Ўзбек адабиёти тарихи. – Тошкент, 1965. – 121-бет.

⁵ Кенжа ботир. – 32, 38-бетлар.

усуллар ёрдамида девлар, жодугарларни енгадилар, халкни офатдан кутқарадилар.

Манистик мифологияда тотемистик, фетишистик мифология элементлари учрайди. Бундан ташқари, мифологияга хос «айланиш» ходисаси манистик образларнинг ғайритабиий жиҳатларини изоҳлашга хизмат қилдирилади. Лекин, бу ҳолни бадий усул сифатида эмас, мифологик дунёқараш ифодаси сифатида олингандагина тўғри бўлади.

Аждодлар ҳомийлиги ҳақидаги ибтидоий тасаввурлар тотемистик ва анимистик мифологияда ҳам мавжуддир. Уларнинг биринчисида тотем-ҳомийлар, иккинчисида ҳомий – руҳлар, урут ва қабилаларнинг, гуруҳларнинг, соҳаларнинг ҳомийлари сифатида иштирок этадилар. Назаримизда, ҳомийлик ҳақидаги тасаввурлар ибтидоий қарашларнинг бир неча системасида шаклланган кўринади. Шунини таъкидлаш керакки, манистик мифологияда ҳомийлик тасаввури қаҳрамонлик мотивлари ва руҳи билан суғорилган бўлиб, бу ҳол унинг айрича хусусиятини ҳам белгилайди.

Халқ ижодидаги манистик мифология фақат фольклоршунослик нуқтаи назаридангина эмас, ибтидоий қарашларни ўзида мужассамлаштиргани жиҳатидан ҳам қимматли бўлиб, у бошқа фанлар учун ҳам ўрганиш объекти бўла олади.¹

¹ Фольклоршунос олим Ғ. Акрамовнинг «Манистик мифология» мақоласи «Ўзбек тили ва адабиёти журналининг 1979 йил 6-сонида (64–69-бетлар) бошилган».

*Рустамбек
АБДУЛЛАЕВ*
(1947 йилда туғилган)



Рустамбек Абдуллаев 1947 йил 13 декабрда Тошкент шаҳрида туғилган. Р. Глиэр номидаги Республика ўрта махсус муסיқа мактабида (1957–62), Тошкент консерваториясининг муסיқашунослик бўлимида (1962–65) ўқиди, Тошкент давлат консерваториясининг Халқ чолгулари ва муסיқа назарияси ва тарихи факультетида (1965–69), мазкур билим даргоҳи аспирантурасида (1970–75) таҳсил олди. Консерватория институтида ўқитувчи (1969–73), Санъатшунослик илмий-тадқиқот институтида илмий ходим (1975–92), Фольклор ва замонавий муסיқа бўлими мудири (1993–2006), Маннон Уйғур номидаги Тошкент театр ва рассомчилик институти Муסיқа фанлари кафедраси мудири ва илмий ишлар бўйича проректор лавозимларида (1985–87) ишлади. Ҳамза номидаги Республика муסיқа коллежи профессори (2006 йилдан). «Катта ашула жанри ва унинг намояндалари» мавзuida номзодлик (1986), «Марказий Осиё халқлари маросим муסיқаси» мавзuida докторлик (1997) диссертациясини ёқлаган. Рустамбек Абдуллаевнинг «Ўзбек маросим муסיқаси жанрларининг таснифи», «Обрядовая музыка Центральной Азии» (1994), «Марказий Осиё маросим муסיқаси» (1997), «Катта ашула – ўзбек халқининг дурдонаси» (1997), «Обрядовая практика и фольклор шаманизма Центральной Азии» (2005), «Обряд и музыка в контексте культуры Узбекистана и Центральной Азии» (2006), «Музыкально-стилистические особенности узбекских дастанов» (2006), «Календарно-песенная культура народов Центральной Азии» (2009), «Алпомииш» достони нота ёзувлари» (2015) каби илмий асарлари нашр этилган.

НОМОДДИЙ МАДАНИЙ МЕРОС ВА ЗАМОН

Маълумки, бизнинг диёримиз қадим-қадимлардаёқ маданият ўчоғи, илм-фан ривож топган замин сифатида маълум ва машҳур эди. Бу ерда етишиб чиққан буюк олимлар, шоиру бастакорлар жаҳон илм-фани, меъморчилиги, адабиёти ва санъати ривожига катта ҳисса қўшиб келганлар. Шулар катори мусика санъати равнақида ҳам ана шу инсонларнинг улуши катта ва бекиёс бўлди. Дарҳақиқат, аждодларимиз томонидан яратилган турли жанр ва шакллардаги анъанавий мусика намуналари бадийий-маънавий меросимизнинг ажралмас мулкига айлангандир. Ўзбек анъанавий мусикасининг асосларини икки йирик қатлам (фольклор ва мумтоз мусикаси) ташкил этади; уларнинг ҳар бири ўз мавқеи, жанрлар таркиби ва ижрочилиги билан ажралиб туради. Жумладан, ўзбек мусикасининг кўҳна ва ҳамиша навқирон маросим қўшиқлари, халқ ва мумтоз ашула йўллари, катта ашула, халқ ва мумтоз чолғу куйлари, дostonчилик ва мақомчилик санъатлари ҳам асрлар давомида ҳар хил кўринишларда ривожланди, тараққий этди.

Ўзининг тарихий жараёнида турли давр шарт-шароитлари ҳамда эҳтиёжлари тақозоси билан улар шаклан, услубан ва мазмунан тобора ривожлана борганини қисман тегишли манбалар ёрдамида кузатиш мумкин. Бизгача етиб келган ашула ва мақом намуналари, чолғу куйлари, бастакорлик ижодиётининг ноёб маҳсуллари росмана мусика фольклори билан узвий боғланган ҳолда шаклланиб, ривожлангандир. Айтиш мумкинки, биз бугун «Шашмақом», умуман, ўзбек мақомлари ва катта ашула дея атаб, эъзозлаётган бой анъанавий мусикамиз шаклланиши, тақомиллашуви, умумий тараққиёти ўша узоқ ўтмиш даврларда бошланган. Дастлаб ўн икки мақом туркуми, кейинчалик эса «Шашмақом» шаклидаги бу мероснинг асоси етук бастакорлар, созандаю хонандалар томонидан бунёд этилган ва тақомилига етказилгандир.

Ўзбек анъанавий мусика санъати оламининг олтин хазиналари чексиз ва дунёдаги энг қадимийларидандир. Шу ўлмас мумтоз асарлар халқимиз ўртасида профессионал ва ҳаваскор созанда-

лар, хонандалар, ансамбллар ижросида доимо янграб, асрлардан-асрларга, устоздан шогирдларга давримизгача сақланиб, яшаб келди ва халқимизнинг бебаҳо мулкига айланди. Ушбу мусиқий хазинамиз устозона созандаю ҳофизлар, бастакорлар томонидан яратилиб куйланган ва ривожланган; ўзининг турли хил йўллари, шакллари, усул ва услубларига эга бўлган ва ўз аксини ўрта аср «мусиқий рисоаларида» топган. Оғзаки анъанада сақланиб ва ривож олиб келаётган бебаҳо анъанавий мусиқамиз XX асрга келиб, тўпланиб ёзиб олинди ва бу хазинанинг янги ҳаёт ришталари амалга ошди.

Истиклол шарофати ижтимоий ва маданий ҳаётимизни ислоҳ қилиш ва янгилаш жараёнини бошлаб берди. Шу туфайли халқимиз бой маданий меросини ўрганиш, юртимиз тарихи, ўтмишини илмий ҳолис баҳолаш, миллий кадриятлар, удум ва урф-одатларимизни қайта тиклаш имконияти тугилди. Маданий-маънавий жиҳатдан бой меросимиз қадимий анъаналари, аجدодларимиздан бизгача етиб келган маънавий бойлик бўлиш – халқ қўшиқлари, йиғи-йўқловлари, алла ва лапарлари, чолғу ва ашула йўллари, дostonлари ва мақомлари ҳамда миллий маросимлари – элимиз орасида асрлар давомида сайқалланган, анъанавий ёки даврга хос замонавий услубларда ривожланган. Шу боис бугунги кун нуқтаи назаридан ўрганиш, уларни тиклаш ва авайлаб-асраш; уларга қатта ҳурмат ва эъзоз назари билан муносабатда бўлиш, келгуси ёш авлодга бекаму кўст етказишга давлат даражасида эътибор қаратилди. Минг шукурлар бўлсинки, кадриятлар қайта тикланди, миллат шон-шавкати қайта улугланди. Умумхалқ байрамлари сифатида ҳар йили нишонлаб келинаётган Мустақиллик ва Наврўз айёмларимиз бунга ёрқин мисолдир.

Ўзбекистонда маданий ва табиий мерос объектларини муҳофаза қилишни таъминлаш, уларни ўрганиш, ўзлаштириш ва аҳолини кенг қатламнинг бунга жалб этилиши давлатимизнинг энг муҳим устувор йўналишларидан бири ҳисобланади. Мустақилликнинг илк йиллариданоқ мамлакатимизда маданий ва табиий ёдгорликларни муҳофаза қилишнинг тўла ҳуқуқий ва идоравий тизими яратилди. Мазкур тизим шу соҳадаги чора-гадбирлар мажмуасини умумэтироф этилган халқаро ҳуқук

нормаларини ҳисобга олган ҳолда амалга оширишни таъминлайди. Ўзининг қадимий ва бой миллий маданияти билан жаҳон цивилизациясига улкан ҳисса қўшган аجدодларимиз хилма хил ва ранг-баранг маданият ва санъат йўналишлари ва жанрларидан иборат бой номоддий маданий меросни яратишган. Зукко халқимиз ранг-баранг маросим ва халқ қўшиқлари, мумтоз ашулаларда, бастакорларимиз яратган «Шашмақом», «Хоразм мақомлари», «Фарғона–Тошкент мақомлари», «Феруз», «Тановар», «Ушшоқ», «Сувора» туркумларида, бахшиларимиз томонидан куйлаб келинган «Алпомиш», «Гўрўғли», «Рустамхон», «Кунтуғмиш», «Ошиқ Ғариб ва Шоҳсанам» сингари дostonларда тараннум этилган бунёдкорлик ва яратувчилик, ватанпарварлик ва инсонпарварлик ғоялари ҳамиша халқимизга жуда катта маънавий қувват берувчи қадриятлар тизими бўлиб келган. Номоддий маданий мерос – бу жаҳон халқлари маънавий дунёсида юзага келган халқ ижодиёти бойликлари; жаҳон халқларининг маънавий дурдоналари ва қадриятларидир.

ЮНЕСКОнинг қабул қилинган «Номоддий маданий меросни муҳофаза қилиш» Конвенциясида (2003) номоддий маданий мерос тушунчаси ва йўналишлари берилган бўлиб, ушбу меросга – ўзликни намоён қилишнинг оғзаки шакл ва анъаналари (шу жумладан, тил – номоддий маданий меросни ифодалаш омили сифатида), анъанавий ижрочилик санъати (муסיқа, сўз, рақс, томоша, халқ ўйинлари), жамиятнинг урф-одати, маросим ва байрамлари, табиат ва коинот билан боғлиқ билим ва урф-одатлар, анъанавий ҳунармандчилик билан боғлиқ билим ва кўникмалар киритилган. Асрлар давомида эзгуликни тараннум этиб келган Ўзбекистоннинг номоддий маданий мероси дурдоналарида халқимизнинг энг олижаноб, улуғвор мақсадларга йўналтирилган қарашлари ўз ифодасини топган. Зеро, бадий салоҳияти ғоят юксак бўлган аждодларимиз муסיқий-поэтик, томоша-рақс ва умуман, юксак бадий-эстетик иқтидорини ўзида мужассамлаштирган номоддий маданий мерос дурдоналари битмас-туганмас рухий қувват манбаи бўлиб хизмат қилган. Аслида, номоддий маданий мерос тушунчаси «халқ ижодиёти»га нисбатан кенг қамровлилиги билан аҳамиятлидир.

Халкимизнинг дунёқараши, ижтимоий-сиёсий, маънавий-маданий, бадиий-эстетик ва фалсафий қарашларини ўзига хос тарзда бадиий талқин қилувчи номоддий маданий мерос намуналари юзлаб шакл ва жанрларни ўз ичига олган ғоят нодир манба ҳисобланади. Бинобарин, номоддий маданий мерос она диёримиз юксак маданиятни бунёд этган улуғ аждодларимизнинг турмуш тарзи, орзу-интилишлари, урф-одат ва маросимлари, қадрибад анъаналари, ўзбекона самимиятини мукаммал акс эттирганлиги учун ҳам қадрлидир. Номоддий маданий мерос миллий кадриятларимизнинг энг яшовчан, қадимий, ардокли ва доимо янгиланиб борадиган навқирон қатлами саналиб, шу туфайли халқимиз ўзи яратган бадиий мерос анъаналарини ҳамиша кўз қорачигидай авайлаб-асраш, такомиллашиб, бадиий жиҳатдан сайқаллантириб келган. Шунинг учун ҳам номоддий маданий мерос дурдоналари – маросимлар, урф-одатлар, байрамлар (Наврўз ва б.), оғзаки поэтик ижоди (афсона ва ривоятлар, мақол ва маталлар, эртақлар, дostonлар), халқ кўшиқлари, анъанавий мусиқаси, халқ томоша (аския, дорбозлик, кизикчи, кўғирчокбозлик) ва рақс санъати, амалий санъати, дoston, мақом ва бошқа жанрларда яратилган асарлар маънавиятимизнинг теран илдизлари баҳра олган тафаккур сарчашмаси бўлиб ва кўп асрлик тараққиёти маҳсули ўлароқ вужудга келган анъаналари кишиларда Ватанга бўлган муҳаббат, эл-юртга садоқат ва содиқлик туйғуларини тарбияладиган, одамларнинг имон-эътиқодини мустаҳкамлайдиган, миллий ғурур, хурлик ва эркинлик ғояларини ёш авлод онгига чуқур сингдирадиган манба ҳамдир.

Бу ўринда маънавий кадриятларимиз тизимининг муҳим бир қирраси сифатида ўзбек анъанавий мусиқаси, унинг мусиқа фольклори ва мумтоз мусиқа намуналари ва анъанавий ижрочиликни ҳам назарда тутилганлигини кўраимиз. Шунинг учун ҳам анъанавий мусиқа асарларини янада изчил тўплаб, уларни ёзиб олиб тадқиқ этиш, кенг ривожлантириш ва янги ижодиёт йўналишларида фойдаланиш, халқимиз орасида янада кенг тарғиб қилиш олий мақсадлардан биридир. Зеро, халқимизнинг ижодкорлик салоҳиятини узлуксиз такомиллаштириб, энг сара фольклор ва мумтоз мусиқа асарларини маҳалларда яшовчи

аҳолиси, айникса, ёшларимиз орасида оммалаштириш, халкимиз дилидаги «ботиний кучни тасаввур қилишда» янада катта қувват бахш этадиган хайрли ишлар сирасига киради.

Номоддий маданий мерос объектлари ҳақида ўқув фанлари умумтаълим мактаблари ҳамда олий ўқув муассаса (Тошкент санъат ва маданият институти, Консерватория, педагогик университет)лари ўқув жараёнига киритилмоқда, улар ҳақида талабалар учун ўқув-услубий дастурлар, ўқув қўлланмалари ва дарсликлар режалаштирилган (Тошматов Ў., Исакулова Н. Номоддий маданий меросни муҳофаза қилишнинг ҳуқуқий асослари; Абдуллаев Р. Анъанавий ўзбек мусиқаси асослари, Ўзбекистон номоддий маданий мероси. Ижрочилик санъати; Жўраев М. Наврўз байрами ва б.). Бу каби Давлат дастури бўйича амалий ишлар дунё жамоатчиликлари томонидан юқори баҳоланмоқда. Жумладан, Фарғона водийсининг ноёб жанри бўлмиш Катта ашулани асраш ва тарғиб этиш лойиҳаси АССИ ЮНЕСКО ташкилоти (Япония) томонидан Олтин медал билан тақдирланди.

XXI асрдан бутун дунё бўйича ЮНЕСКО томонидан «Номоддий маданий меросни муҳофаза қилиш» Конвенцияси қабул қилинганлиги ҳамда Ўзбекистон номоддий маданий мерос дурдоналари белгиланиб, улар умумжаҳон «Инсоният номоддий маданий мерос дурдоналари» Репрезентатив рўйхатига киритилганлиги алоҳида воқеа сифатида тарих зарварақларидан ўрин олди. Маълум ҳужжатлар асосида, хусусан, Конвенциянинг ушбу йўналиш бўйича қабул қилинган мезонлари – оғзакилиги, анъанавийлиги, қадимий илдизлари, тарихий ва маданий муҳити ноёблиги (ўзига хослиги) ва энг муҳими, ҳозирги кунда ҳам устоз-шогирд мактаби анъаналари сақланиб қолганлиги ҳамда улар ёш авлод томонидан қай даражада ўзлаштирилаётгани каби ўзига хос жиҳатлари – доирасида амалга оширилган. Ўзбекистоннинг МДХ давлатлари орасида энг кўп анъанавий маданият дурдоналари ушбу рўйхатдан жой олган. Булар Бойсун маданий муҳити (2001, 2008), Шашмақом (2003, 2008), Катта ашула (2009), Наврўз (2009), Аския (2014), Палов маданияти ва анъаналари (2016), Наврўз (2016). Ҳозирги кунда «Дорбозлик – томоша санъати» Репрезентатив рўйхатига, «Марғилон хунармандчиликлари

маркази» Реестр рўйхатига, яъни Номоддий маданий меросни тарғиб қилувчи энг яхши тажриба объекти сифатида тавсия этиш учун ЮНЕСКО ташкилотига ҳужжатлар топширилган.

Бойсун маданий муҳити илк бор жаҳон ҳамжамятлари анъанавий маданият объектларининг 19 номинантлари орасида ЮНЕСКО томонидан эътироф этилган (2001) ва 2008 йили эса ушбу ташкилотнинг умумжаҳон Репрезентатив рўйхатига киритилди. Бу ўз навбатида Бойсун халқ маданияти ва унинг бадиий анъаналарини сақлаш ва ёзиб олиш ҳамда кенг қўламда илмий тадқиқ этиш жараёнига сабаб бўлди. Бойсун Ўзбекистоннинг ўзига хос тарихий-маданий меросининг ноёб объекти бўлиб, маълум даражада асл ёдгорликларни сақлаб келмоқда, жумладан, Мачай қишлоғидаги Тешиктош ғоридаги қадимий одам-неандерталлар турар жойи; Дарбанддаги чегарадош Кушан девори ва Темир дарвоза, Қўрғонзол ва Поёнқўрғон қалъалари, Омонхона ва б. Бойсуннинг географик муҳити кўпгина халқ маданияти анъаналарининг табиий ҳолда сақланиб қолишига имкон берди – булар ўтроқ ва кўчманчи туркий ва шарқий эрон халқларининг анъанавий турмуш тарзи, ўзига хос халқ ижодиёти, унинг фольклор мусиқаси (амалий айтим йўллари – алла, меҳнат, маросим кўшиқлари; ноамалий – лирик ва маиший кўшиқлари, махсус терма, кўшиқ, лапар ва ашула; мусиқа чолғулари (дўмбира, доира, сурнай, сибизға, ғажир най, чўпон най, дапп, дотор, чанг-қўбиз) ва чолғу йўллари) ва оғзаки поэтик ижоди ҳамда халқ эпоси – дostonлар; ҳунармандчилик (каштачилик, гиламдўзлик (ғажарий, такир, оқэнли, терма, кохма, жулхирс ва ҳ.к.), кигизчилик, тўқимачилик (алача матоси), ёғоч ўймакорлиги, созгарлик, кулолчилик ва б.) ва миллий либослар; қадимий маросим (мавсумий, оилавий, диний-ибодат) ва урф-одатлар, халқ ўйинлар (кўпкари, кураш, пиёда юриш ва б.)да намоён бўлган.

Шашмақом – ўзбек ва тожик халқлари мусиқа меросида марказий ўрин тутган мақомлар туркуми; мақом – оҳанг, парда, ханг, усул, шакл, услуб каби воситалар билан ўзаро узвий боғланган мумтоз чолғу ва ашула йўллари мажмуаси. Шашмақом XVIII асрларда 12 мақом тизими (Дувоздаҳ мақом)

ва Бухоро мусикий анъаналари негизида Марказий Осиёнинг йирик маданий маркази бўлиб Бухорода шаклланган. Шашмақом – олти мақом туркуми бўлиб, Бузрук, Рост, Наво, Дугоҳ, Сегоҳ ва Ироқ мақомларидан ташкил топган: жами 250 дан ортиқ турли шаклдаги чолғу ва ашула йўлларидан иборат. Ўз навбатида, ҳар бир мақом икки – чолғу (Мушкилот) ва ашула (Наср) йирик бўлимларидан иборат бўлиб, чолғу ва ашула йўллари туркумларини қамраб олган. Шашмақом бастакор (оғзаки анъанадаги ижодкор)лар маҳсули бўлиб, етук созанда ва хонандалар томонидан ўзбек ва тожик тилларида ижро этилган (ашула йўлларида мумтоз шарқ шоирлари ишкий-лирик, фалсафий, насихатомуз, диний мазмундаги шеърлари, шунингдек, халқ шеърляти қўлланилган). Етакчи чолғу – танбур, мақомлар ушбу чолғу орқали созланган. Ҳар бир мақомнинг чолғу бўлими 5–10 қисмли бўлиб, «Тасниф», «Таржеъ», «Гардун», «Муҳаммас» ва «Сақил» (ҳамда қўшимча) чолғу йўлларидан иборат; улар анъанага кўра бирин-кетин яхлит тарзда яккасоз ёки чолғу ансамбли орқали ижро этилган. Уларнинг ҳар бири ўз оҳанги, характери, шакли, доира усуллари билан ажралиб туради. Ашула бўлимлари анча мураккаб шаклдаги ашула йўлларидан ташкил топган ва улар икки туркум яъни иккита шўъба гуруҳини қамраб олади: биринчиси асосий – «Сарахбор», «Талқин», «Наср» ва «Уфор» қисмлари (ҳамда қўшимча ашулалар) ва уларни боғловчи «Тароналар» (турли шакли, куйи ва характеридаги ашула йўллари); етакчи ҳофиз ва хонандалар ансамбли томонидан чолғу ансамбли жўрнавозлигида ижро этилган. Иккинчисига эса «Мўғулча» ва «Савт» каби беш қисмли туркумлар кирган («Ироқ» мақомидан ташқари). Шашмақом, асосан, оғзаки анъанада ижод этилган, сақланган, сайқал топган, авлоддан-авлодга «устоз-шогирд» услубида ўзлаштирилган. Ўтмишда сарой ва шаҳар маданиятлари жараёнида талқин этилган. Шашмақом таъсири ва негизида «Хоразм мақомлари» туркуми ва «Фарғона-Тошкент мақомлари» юзага келган. Ҳозирги кунда Шашмақом анъаналари Ўзбекистоннинг ҳамма ҳудудларида тарқалган. 2003 йили «Шашмақом мусиқаси» ЮНЕСКО томонидан «Инсоният номоддий маданий мероси дурдонаси» деб

тан олинди ва 2008 йилдан бошлаб умумжаҳон Репрезентатив рўйхатига киритилди (Ўзбекистон, Тожикистон).

Катта ашула ёки натнис ашула (ликобий ашула) – Ўзбекистоннинг Фарғона водийсига хос йирик ашула йўли, мустақил жанр, ўзига хос ижро услуби ва усули. Икки ёки ундан ортик (бештагача) хонанда томонидан чолғу жўрлигисиз галма-гал талқин этилади. Баланд пардаларда кучли талаффузда ижро этилиши, катта авжлар мавжудлиги, сўзларнинг тингловчиларга равон етиб бориши, таъсирчанлиги ва ҳамнафаслик катта ашулага хос бўлиб, унинг «ёввойи мақом» (Ёввойи Ушшоқ, Ёввойи Чоргоҳ), «ёввойи ашула» (Ёввойи Тановар, Ёввойи Муножот). «яккахонлик» ёки ашула-чолғу йўли (Оҳким, Гулузорим қани, Топмадим) ва чолғу йўли (Ёввойи Чоргоҳ – яккасоз най учун) каби жанрлари мавжудлигидан дарак беради. Катта ашула қадимий маросим ва меҳнат кўшиклари, марсия ҳамда аруз вазнидаги ғазалларнинг қадимий ўқитиш услублари («ғазалхонлик») заминида вужудга келган. Унинг ўтмишдаги намуналарида ишқий-лирик ва насихатомуз ғазаллар билан бир қаторда диний, тасаввуф ва замонавий йўналишдаги шеърлар ҳам куйланади. XX асрдан эркак хонандалардан ташқари аёллар ҳам катта ашулани ижро этишган (Ҳалима Носирова, Фотима Борухова, Зайнаб Полвонова). Катта ашуланинг ижрочилик маданияти юксалишида унинг ўзига хос ижрочилик маҳорат мактаблари шаклланди – Қўқон (Э. Каримов, Ҳамроқул қори, Р. Мамадалиев), Марғилон (М. Сатторов, Б. Ражабов, Ж. Султонов, М. Узоқов, ҳозирда Т. Шарипов раҳбарлигидаги «Чоргоҳ» гуруҳи), Андижон (Ф. Мамадалиев, О. Юсупов, А. Ҳайдаров, Х. Ҳасанов), Наманган (М. Ҳамидов, А. Ғозиев, И. Исоқов), Тошкент (Э. Ҳайдаров, О. Алимахсумов, О. Имомхўжаев) ва ҳозирги кунда М. Тожибоев, М. Йўлчиева, Б. Дўстмуродов, А. Иброҳимов, С. Ниёзов, Н. Пирматовалар катта ашула ижрочилари. Катта ашула 2009 йилда ЮНЕСКОнинг «Инсоният номоддий маданий мероси дурдонаси» Репрезентатив рўйхатига киритилди.

Наврўз – улуснинг улуғ куни, байрам (ўтмишда маросим), шамсий (қуёш) йили ҳисобида йилнинг биринчи куни. Яқин ва Ўрта Шарқ мамлакатларида яшовчи халқларнинг энг қадимий

анъанавий байрами. Баҳорий тенг кунликка (21 ёки 22 март), яъни Қуёшнинг Ҳамал буржига киришига тўғри келади. Наврўз деҳқончилик ишларини бошлаш байрами ҳам ҳисобланади. Наврўз байрамида оммавий халқ сайиллари уюштирилган, янги унган кўкатлардан тансиқ таомлар пиширилган (кўк сомса, кўк чучвара, сумалак, ҳалим), баъзи экинларни экиш бошланган. Маълумки, Наврўз зардуштийликдан аввал яшаган деҳқонларнинг баҳорий удумлари, кўкламни қаршилаш, қишни кузатиш, янги меҳнат мавсумини бошлаш билан боғлиқ анъаналари асосида келиб чиққан. Дарвоқе, Абу Райҳон Беруний ўзининг «Қадимги авлодлардан қолган ёдгорликлар» номли рисоласида Наврўз бизнинг ҳудудларимизда уч минг йил олдин нишонланиб келинган, яъни «Наврўз – янги кун» деб аталди, бу кун, гарчи у Жамшиддан (Наврўз оламининг вужудга келиши афсонавий Жамшид номи билан боғланади) олдин ҳам ҳурмат қилинган бўлса-да, ҳайитга айлантирилди». Тарихий манбаларга кўра, Наврўзни байрам қилиш туркий халқларда энг катта тадбирларидан бири ҳисобланган. Маҳмуд Кошғарийнинг «Девону луготит турк» асарида Наврўзга бағишланган кўплаб халқ кўшиқлари келтирилган. Наврўз ҳақида маълумотлар Наршахийнинг «Бухоро тарихи», Умар Ҳайёмнинг «Наврўзнама»сида, Алишер Навоий, Заҳириддин Муҳаммад Бобур ва бошқа алломаларнинг асарларида учрайди. Ўзбекистонимизнинг турли жойларида шароитга қараб, Наврўз байрами турлича нишонланган ва бу шоду хуррамлик бир неча кундан то бир ҳафтагача, ҳатто бир ойга қадар давом этган.

Наврўз билан боғлиқ тадбирлар ва унга алоқадор маросим ва удумларни шартли равишда иккига (байрамгача ва байрамдан кейин ўтказиладиган) бўлиш мумкин. Байрамгача бўлган тадбирларга биринчи гул маросими «Бойчечак», экин-тикинга тайёргарлик кўриш ҳамда қўй-қўзиларни ям-яшил ўтлоққа ҳайдаш (деҳқон Наврўзи, чорва Наврўзи), ҳашар ўтказиш (кўчалар, ҳовли-жойлар, мозорларни тозалаш), ободончилик (гуллар, дарахтлар экиш, янги боғлар барпо этиши), янги сарполар тикиш, «Дарвешона» ва «Ашшадарози» маросимлари, байрам билан алоқадор таомлар (сумалак, ҳалим ва б.) пишириш

ва бошқалар киради. Йилбоши киргач Наврўз байрами махсус сайилгоҳларда, қир-адирларда нишонланган. Байрам куни эрта тонгдан карнай-сурнайлар чакириқ оҳангларни чалиб, жарчилар одамларни байрамга таклиф этишган. Чавандозлар, полвонлар, кизиқчи масхарабозлар, бахшилар, кўшиқчи ҳофизлар, ўйинчи-раққослар байрам сайлига ташриф буюрганларга ўз санъатлари ҳамда томошаларини намойиш этишган. Айнан Наврўз байрамида номоддий маданий мероснинг ҳамма соҳа ва йўналишлари – урф-одатлари ва маросимлари (сумалак сайли, лола, бойчечак маросими, гул сайиллари, илк ер ҳайдаш, шохмойлар удумлари), таомлари, томоша санъати (аскиячи, дорбозлар), халқ ўйинлари (кўпкари, кураш, беллашувлар, аргимчоқ учуш), ижрочилик санъати – рақслар, мусиқа чолғу (Наврўзи бузург, Наврўзи омма, Наврўз айёми) ва айтим йўллари (Наврўз кўшиқлари – Муборакбод, Йилбоши, Салом, Наврўз; Сумалак, бахшилар термалари), фольклор ансамбллари чиқишлари каби анъаналари ушбу байрамнинг узвий таркибий қисми ҳисобланади.

Ўзбекистон мустақилликка эришгач, бошқа қадриятлар қаторида, 1992 йилдан бошлаб Наврўз байрами яна тикланди, янгича мазмун ва моҳият кашф этди. Наврўз халқимизнинг, умуман, Ўзбекистонда яшовчи ҳамма миллат ва элатларнинг энг сеvimли айёмлардан бири бўлиб, баҳорий удумлари, кўкламни эъозлаш, сув, олов, тупроқ, куёшга сиғиниш билан боглиқ маросим ва эътиқодлари асосида пайдо бўлган умумхалқ байрами сифатида нишонланади. Наврўз қадимий бўлиши билан бирга, ҳар йили биз билан бирга янгилашиб, англаниб бораётган улуг ва навқирон байрамимиздир.

Наврўз номоддий маданий мерос намуналаридан бири сифатида ЮНЕСКОнинг «Инсоният номоддий маданий мерос дурдонаси» Репрезентатив рўйхатидан жой олган (2009, Озарбайжон, Покистон, Туркия, Эрон, Ўзбекистон, Қирғизистон, Ҳиндистон). 2010 йили БМТ 21 март кунини Халқаро Наврўз куни деб эълон қилди. 2015 йили 12 та Шарқ мамлакатлари томонидан Наврўз байрами ҳақида умумий ҳужжатлар ЮНЕСКОга қайта топширилди ва 2016 йили яна дурдона сифатида умумжаҳон Репрезентатив рўйхатига киритилди.

Аския (арабча «азкиё» – ўткир зехнли, ҳозиржавоб) – ўзбек халқ оғзаки ижодининг хушчақчақ ва кулгили томоша санъатининг оммалашган жанри. У, одатда, халқ сайилларида, тўйларда ва бошқа маросим-тадбирларда ижро этилади. Ўзбекистоннинг Фарғона водийси ва Тошкент вилоятларида ривожланиб, санъат даражасига кўтарилган. Ҳозиржавоблик, зийраклик ва донишмандликни, шу билан бирга, тил ва сўз бойлигини, бадиий-эстетик дидни талаб этадиган аскияда икки ёки ундан ортиқ киши ёхуд тўла орқали мунозаралашади, бу эса фикрлар мунозараси, ҳозиржавоблик ва сўзамолликдир. Айтилаётган аския бировнинг шахсиятига тегиб кетмаслиги учун ҳар бир сўз ва иборани ишлатишда ижрочи ниҳоятда эҳтиёткор бўлиши зарур. Ёзма тарихий манбаларда аския XV–XVII асрларда кенг тарқалган.

Аскияда пайров (мавзу) сюжети алоҳида бадиий асар ҳисобланади, у аскиянинг мукамаллашган ва мураккаб усули сифатида изчил фикрлар оқими бўлиб, маълум бир мавзунинг маъносини бошидан охиригача ечиб беради. Аскиячилар мавзу доирасида четга чиқмайдилар. Унда анъанавий пайровлар бўлмиш «Ўхшатдим», «Бўласизми», «Гулмисиз, райҳонмисиз», «Афсона», «Лақаб»лардан ташқари, замонавий мавзулар «Пахта», «Оила», «Кино», «Ашула» ва ҳ. ўрин олган. Пайровда бир мавзу атрофлича ва чуқур очилиши лозим. Чунки мавзудан чекинмиш аскиячининг мағлубиятидан далолат беради. XX асрнинг иккинчи ярмидан аскияни сахнавий санъат даражасига етказишда машҳур сўз усталари орасида Юсуф кизик Шакаржонов, Ижроқомбува, Ғойиб ота Тошматов, Абдулҳай Маъсум Қозоқов ва б. ҳисса кўшганлар. Фарғона водийсининг таниқли санъаткорлари ва бастакорлари, жумладан, Жўрахон Султонов, Расул қори Мамадалиев, Ғанижон Тошматов, Сойиб Хўжаев ва б., таниқли аскиячилар сифатида ҳам танилганлар. Аскияни муҳофаза қилиш, асраш ва тарғиб қилиш ва келгуси авлодга етказишда Қўқон, Марғилон, Хонобод, Қорасувларда аскиячилар жамоалари ва гуруҳлари фаолият юритмоқдалар. Аскияни сақлаш ва тарғиб этиш мақсадида илмий тадқиқотлар, танловлар, фестиваллар, «Аския кечалари» (Тошкент, Марғилон, Хонобод), телекўрсатувлар, фильмлар, нашрлар қилинмоқда ҳамда ўқув жа-

раёнига киритилди. 2014 йили «Аския – сўзамоллик санъати» ЮНЕСКОнинг умумжаҳон Репрезентатив рўйхатига киритилди.

Палов ёки ўзбек оши – халқимизнинг энг тарқалган ва сеvimли таоми ҳисобланиб, у ўзбекларнинг бутун ҳаёти давомида йўлдоши бўлган. Унинг турли хиллари оила шароитида ҳамда оилавий тўй маросимларида – тўй оши, ақиқа оши, фотиха оши, маслаҳат оши, хотин оши, куёв оши, эҳсон оши ва б., унинг локаллик тайёрлаш услублари – бухорча софий ош, самарқандча ош, тошкент оши, фарғонача девзира оши ва б. мавжуд бўлиб, энг муҳим таом сифатида инсонларни яқинлаштирган; бирлаштирилган ижтимоий ҳодисага айланган. Ҳар бир оилада жуда бўлмаганда ҳафтасига бир (одатда, пайшанба куни) ёки бир неча маротаба ушбу таом тайёрланади ва бу таомга алоҳида ҳурмат билдириб, оиланинг барча аъзоларини бирлаштиради, жамулжамликда ейилишига алоҳида эътибор қаратилади. Ўзбекларнинг меҳмондўстлиги дунё бўйича тарқалган; ўзбек хонадонига келган меҳмон, албатта, палов билан сийланади. Яқин дўстлар йиғиладиган бўлса ҳам, албатта, ош пиширилади. Оилада ўтказилган барча тадбирларда, ҳашар, байрам ва сайилларда палов тайёрланади. Катта тўй ошлари эркаклар томонидан, айнан ошпаз – ош тайёрлайдиган мутахассис томонидан пиширилади. Унинг тайёрлашда катта маҳорат, билим ва дид талаб этилади. Ушбу касб устоздан-шогирдга, авлоддан-авлодга ўтиб келмоқда. Палов маҳсулотлари танлаш, унинг пишириш жараёнида маълум услуб ва анъанага таяниш, меъёрий усулларни қўллаш (ёғ киздириш, олов, сув, ёғ, гуруч миқдорини билиш), таомни тановул қилиш ҳам ўз анъаналарига эга. «Палов маданияти ва анъаналари» – ўзбекларнинг миллий таоми сифатида ЮНЕСКО томонидан тан олинди ва умумжаҳон «Инсоният номоддий маданий мероси дурдонаси» Репрезентатив рўйхатига киритилди (2014).

Миллий бойлик тизимида табиий захиралар ва моддий маданият ёдгорликлари билан бир қаторда, номоддий маданий мерос мажмуи ҳам ғоят муҳим аҳамият касб этиб, оғзаки анъанада авлоддан авлодга ўтиб, сақланиб, табиий ва тарихий муҳим воқеа-ҳодисалар таъсири остида муттасил ривожланиб, янги-ланиб (даврга хос ўзгариб), инсон томонидан бойитиб бори-

лади. У инсонлар ўртасида мулоқот, фикр алмашуви ва ўзаро ҳамжиҳатликнинг муҳим омили бўлиб келмоқда. Номоддий маданий мерос ўтмиш ва келажак ўртасида боғловчи восита (ҳалқа) ҳисобланиб, биз яшаётган дунёни яхшироқ англашга, уни мувофиқ шаклантиришга ёрдам беради. У ўзида билим манбаини намоён қилиб, халқнинг нодир бойлигидир. Ўзбекистон номоддий маданий меросининг етакчи соҳаси бўлган анъанавий мусиқаси ижодкор халқимиз томонидан кўп асрлар мобайнида вужудга келиб, чечан ижрочилар – созанда ва кўшиқчи, яллачи ва гўянда, халфа ва бахши, мақомдон ва ҳофизлар маҳорати туфайли авлоддан авлодга етказиб келган фольклор ва мумтоз мусиқаси асарлари миллий менталитетимизнинг ўзига хос жиҳатларини ўзида мужассамлаштирган бебаҳо ва ноёб маънавий мерос саналади. Асрлар оша олижаноб ғояларни бетакрор бадиий шаклларда ифодалаб келган маросим ва лирик кўшиқлари, турли жанрлардаги чолғу куйлари, ашула йўллари, дostonлар, катта ашула, лапарлар, мақом чолғу ва мақом ашула йўллари ҳамиша инсон қалбини эзгулик нури билан нурафшон этиш, кўнгилларни поклаш, одамларни улуғвор мақсадларга йўналтириш вазифасини бажариб келган.

Анъанавий мусиқанинг ҳар бир намунаси асрлар давомида кўплаб истеъдодли етук созанда ва хонандалар томонидан сайқалланиб, юксак санъат намунаси даражасига кўтарилган. Анъанавий ижрочиликнинг ўзига хос маҳорат мактаблари алоҳида ўрин тутган. Булар мақомчилик, бахшичилик, ашулачилик, кўшиқчилик, созандачилик каби ўзига хос мактаблардир. Ҳозирги кунда ёш авлод вакиллари ана шундай бой ва ноёб меросимизни асраш ва тарғиб қилишда фаол иштирок этмоқда.

Халқимизда кўшиқ билан кўнгил ўсади, деган нақл бор. Зотан, кўшиқ турмуш қийинчиликларини енгишда, машаққатли кураш кезларида, қувонч ҳисларини ифодалашда инсонга ҳамиша ҳамдам ва ҳамдард бўлиб, унга маънавий куч-қудрат, бардамлик, ҳис-туйғуларига таскин бағишлайди. Чинакам кўшиқнинг жон озуғи эканлиги ҳам шундадур. Бундай кўшиқлар қанча кўпайса, маънавий оламимиз шунча бой ва сермазмун бўлади. Номоддий маданий меросимиз пойдевори ҳам кўшиқчилик санъати би-

лан боғлиқдир. Зеро, қўшиқ ўзининг соддалиги ва чинакам ҳар бир инсонга етиб бориши ҳамда ўзининг саховатидан етарли баҳраманд бўлиши билан халқнинг меҳрини асрлар давомида қозониб келмоқда. Инсоннинг турмуш тарзи, унинг фазилатлари, руҳий ҳолати, орзу-умидлари халқ қўшиқларида таъсирчан ва ҳаққоний ифодаланган. Инсон қалбига сўз, тиниқ ва чуқур туйғулар, энг аввало, қўшиқлар орқали киради. Оналаримиз алласи, кекса бувиларимизнинг терма, қўшиқ ва лапарлари, аёлларимизнинг соғим қўшиқлари ва ёр-ёрлари, деҳқонларнинг майда ва суст хотин қўшиқлари, етук бахшиларимиз термалари ва ниҳоят, мақом тароналари – булар бир умрлик юрак бойлигимиздир.

Шу билан бирга, таъкидлаш жоизки, кўп асрлар давомида тўйларимизни безаб турган муборак, қутлов, ёр-ёр, ўлан, келинсалом, айтишув қўшиқларимиз, лапарларимиз бугун йўқолиш арафасида. Уларнинг ўрнига янги қўшиқлар, маросимлар билан боғлиқ бўлмаган ҳолатлар юзага келмоқда. Агар улар чинакам санъат асари сифатида қадр-қиммат топса, хазинамиз янада бойиган бўларди. Бироқ бу каби қўшиқларда мавзу майдалиги, чинакам туйғулардан маҳрумлик, бир-бирини такрорлаш, ўхшашлик, ҳатто таклидчилик ҳоллари кўпайиб бораётир. Ҳолбуки, халқ яратган қўшиқларда санъатсевар элимизнинг донишмандлигини кузатиш мумкин, уларни тинглаб тўймаймиз. Шу боис халқ қўшиқларини ёзиб олиш, уларни тадқиқ этиш ва халққа асл ҳолатида етказиш, айниқса, ёш санъаткорлар зиммасига жиддий масъулият юклайди.

Анъанавий мусиқа санъати номоддий маданий мерос сифатида тан олинди – у ҳаётсевар, мунаввар ва орзули қалбларнинг гўзал қиёфаси, халқнинг ҳаётий сиймоси. Умрбоқий қўшиқлар, бетакрор овозларини асрлардан-асрларга эшитиб турган шоиру санъаткорларимиз номлари – маданиятимиз кўрки. Уларнинг номларини нафақат фахр билан тилга олмоқ керак, балки улардан ўрганмоқ, санъатни худди ўшалар каби муқаддас сақламоқ даркор. Мусиқа санъати намуналари ёки яхши қўшиқ орқали қайноқ ҳаёт бағрида ижоднинг нашъасини юракдан ҳис этамиз, чунки ҳаётнинг ўзи бетакрор қўшиқ аслидир.

Муҳаммадали
ҚҶШМОҚОВ

(1948 йилда туғилган)



Қўшмоқов Муҳаммадали 1948 йил 19 октябрда Фарғона вилояти Фурқат туманидаги Шотўра қишлоғида туғилган. Тошкент давлат университетининг журналистика факультетида ўқиган (1965–70). «Шарқ юлдузи» журналида адабий ходим, катта адабий ходим, бўлим мудури (1969–75), Фафур Ғулом номидаги Адабиёт ва санъат наشريётида муҳаррир (1975–78), «Гулистон» журналида бўлим мудури вазифасини бажарган (1973–83). Ҳозирда «Созлом авлод учун» журналининг бош муҳаррири. «Анъана ва бадиҳагўйлик масалалари (Кўргон дostonчилик мактаби вакили Эргаш Жуманбулбул ўгли репертуари мисолида)» мавзуида номзодлик диссертациясини ёқлаган (1984). «Қоратол», «Ёмғирдан кейинги умр...», «Гулларим, Сизга...», «Али Қамбар», «Коинот умиди – Инсон», «Умид қизгалдоқлари» шеърый тўплamlари, «Шамоллар чоргоҳи» дostonи, «Гўрўгли», «Чарх – фалак» драматик дostonлари, «Чечанликда сўзга сувдайин оқиб...», «Бахшилар хазинаси», «Дарёлар уфқи – денгиз» адабий-танқидий китоблари, публицистик мақолалари, жаҳон шеърыйатидан бир қанча таржималари эълон қилинган. Айрим шеърлари рус, болгар, грузин тилларига таржима этилган. «Алпомиш» киносценарийсини, «Алпомиш» радиофильми сценарийсини, «Алпомиш» ҳужжатли фильми сценарийсини (шу уч ишни Ш. Турдимов билан ҳаммуаллифликда) ёзган. Ўзбекистон Ёзувчилар уюшмаси аъзоси, Ўзбекистон Журналистлари ижодий уюшмаси аъзоси, филология фанлари номзоди. 1999 йили «Дўстлик» ордени билан тақдирланган.

МУЛЛА ЭРГАШ – БУЛБУЛ ЭРГАШ

Эссе

Мен шоирман: шундай айтсам ярашар!

Эргаш Жуманбулбул ўғли

Оқтов билан Қоратов оралиғидаги қадимий тупроққа майсалар от узангисига чопадиган бўлиб қолган баҳор вақтларида зиёратга борсангиз, ўт-ўланларнинг хидларидан маст бўлиб, кенгликларга тикилсангиз, юрагингиз ёзилгандай, бутун оламини ўзига сиғдирадигандай туюлади. Ана шунда узоқларга тикилиб, тўниб турганда, йиллар давомида етилган хаёлингиз, тушларингиз чинга, ўнгга айланади. Узоқдан сиз томонга ўрта ёшлардаги бир зот кела бошлайди. Унинг қадамлари шахдам... Сиз у томонга боряпсиз, у сиз томонга қараб келяпти. Лекин ўртадаги масофа ҳеч қисқармайди. Бу одамнинг кўзлари шу қадар ёруғ, шу қадар ўткир. Бу ёруғ кўзларнинг нури Сизни эсанкиратиб кўяётганга ўхшайди. У кўк нурнинг ичида келаётганлигини кўрасиз. Бу кўк нурнинг ичига кириш, бу муҳтарам зотнинг суҳбатдоши бўлиш насиб қилармикан?

Бу одам – мулла Эргаш. Жуманбулбул боласи. Ёдгор бахшининг, Тилла кампирнинг, Султон кампирнинг, Жоссоқ шоирнинг, Ёрлақабнинг, Жуманбулбулнинг изи.

Улуғларнинг изи бўлиш қийин.

Ўзи ҳам улут бўлмаса, нури билан етти пушти кўнглини ёритмаса, улуғларнинг изи бўлиш қийин.

Эргаш Жуманбулбул ўғли асрлар давомида булоқдай қайнаган Қўрғон дostonчилик мактабининг намояндаси. Қўрғон дostonчилик мактаби миллий бадий тафаккурнинг авжи муҳаййирига кўтарилган. Туркий дostonчиликнинг қалбига айланган. Жаҳон эпосининг дарёлари қўшиладиган маънавий уммондир. Бу сўзларнинг муболағаси йўқ. Эндиликда ўзбек маънавияти заҳматкашлари Қўрғон, Булунғур, Нарпай, Шеробод ва бошқа ўзбек дostonчилик мактабларининг умуммиллий, умумтуркий,

умумжаҳоний аҳамиятини илмий кўрсатиб беришга масъулдирлар. Ана шунда Қўрғон дostonчилик мактабининг шеърий эпопеяси – «Гўрўғли» туркум дostonлари ўзининг ҳакконий баҳосини – чинакам қадрини топади. Ҳинд «Рамайна» ва «Маҳабҳарат»и, Ҳомернинг «Илиада» ва «Одиссея»си; «Минг бир кеча» эртаклари, Фирдавсийнинг «Шоҳнома»си, Жалолиддин Румийнинг «Маънавийи маснавий»си, Лев Толстойнинг «Уруш ва олами»и сингари улуғ эпопеялар силсиласида ўзбек шеърий эпопеяси «Гўрўғли»нинг муносиб ўрни маълум бўлади. Романий тафаккур ривожига ўзбек халқи қўшган ҳиссанинг салмоғи ва миқёси аниқ билинади.

Эргаш шоир мана шундай худо ёрлақан муҳитда – ўзбек халқининг маънавияти булоқдай қайнаб чиқиб, нахрлар бўйлаб оққан жойда туғилган эди. Гўрўғли ҳақидаги дostonларни ёд билган ва ўз юрагида ёшартириб, янгилаб ижро қиладиган дostonчилар ўзлари ҳам кўнгил авжида яшайдиган кишилар эдилар.

Маънавиятнинг юраги ва ҳусни муҳаббатдир. Жуманбулбулнинг Анорхолга муҳаббати Лайли ва Мажнунлар, Тоҳир ва Зухралар, Вомиқ ва Узролар, Фарҳод ва Ширинлар, Гўрўғли ва Юнус парилар даврасида ҳам ярқираб кўринадиган ишқномадир. Бу ишқноманинг бадий ижроси Жуманбулбулдек бир шоирни кутяпти. Лекин Жуманбулбулнинг Анорхолга бўлган муҳаббати «Равшан» дostonида «Равшан»нинг ишқий авжларида рўёбга чиққан. Шунинг учун ҳам «Равшан» дostonини «Жуманбулбулнинг уч ҳайдалган шудгори» деб эъзозлайдилар.

Эргаш шоир Гўрўғли ва Юнус пари муҳаббати муҳитидагина эмас, Жуманбулбул ва Анорхол муҳаббати бағрида ҳам ўсди. Анорхол Эргашни туғмаган бўлса ҳам, тукқанидан ортик тарбиялади. Маънавиятдаги ва мавжуд турмушдаги буюк муҳаббатлар Эргаш шоир тақдирида бирлашди.

Эргаш Жуманбулбул ўғли ўзининг устозларидан мерос бўлиб қолган муҳаббат талқинларини мислсиз юксакликларга кўтара олгани бежиз эмас. Шу ўринда Ҳомердан, Ҳофиздан ва Эргаш Жуманбулбул ўғли ижросидаги «Равшан» дostonидан эпизодларни эслайлик.

Ҳомер тасвирлайди: оксоколлар гурунглашиб ўтиришибди. Улар Елена учун икки мамлакат жанг қилаётганини қоралаптилар. Шу маҳал Елена ўтиб қолади. Воҳ-воҳ!.. Қариб чуриган чолларнинг кўнглига ёшлиқ шахди, шижоати қайтади. Еленанинг ҳусни уларнинг ақлини ҳам чархлайди. Бундай гўзал учун икки мамлакат жанг қилса арзийди, деган хулосага келади улар. Гўзалликни бундан ортиқ бадиий тасвирлаб бўларканми?

Ҳофизнинг лирик қаҳрамони эса:

*Агар он турки шерози ба даст орад дили мору,
Ба холи ҳиндуяш бахшам Самарқанду Бухороро.*

Яъни:

*Агар кўнглимни шод этса ўшал Шероз жонони,
Қаро холига бахш этгум Самарқанду Бухорони, –*

(Хуришид таржумаси)

дейди.

Муҳаббатнинг кучини, гўзалликнинг таърифини бундан ўтказиб бўлармикан?

Жуманбулбул – Эргаш Жуманбулбул ўгли талқинидаги Равшан деган ошиқ йигит эса Зулхуморни кўрганда оламни унутади, оламдан баландга, руҳий арши аълога кўтарилади.

*Юринглар, Чамбил кетамиз,
Туринглар, Чамбил кетамиз, –*

деб жунуний туғён аро кўшиқ айтади.

Зулхуморнинг ҳусни Равшанни маиший ҳаёт меъёрларидан маънавий ҳаёт юксакликларига етказди. Муҳаббат шевасини бу қадар ичкин, ёрқин ифодалаб бера олиш маҳорати Кўрғон дostonчилик мактабига хос бадиий тафаккур даражасининг жаҳоний бадиий тафаккур тўлқинлари билан узвийлигини далиллайди.

Равшан жўш-хурушга киради. Хаёлида ўз муҳаббати ила, Зулхумор ҳусни юксаклиги даражасига кўтарилади. Бу маънавий мақом эса Жуманбулбул – Эргаш Жуманбулбул бадиий даражасини акс эттиради.

Лессинг деган мутафаккир Ҳомернинг биз юқорида эслаган тасвирини таҳлил қилиб, шоирлар бўлаклаб ифодалаб бериш мумкин бўлмаган нарсани одамнинг ҳиссиётига гўзаллик қилган таъсир орқали ифодалаб беришларини таъкидлайди. Равшаннинг кўшиғи ҳам шунинг шаҳодатидир. «Ёр айланай, калпоқ тиккан кўлингдан» кўшиғи ҳам мана шундай бадиий авж – асрларга та- тигулик кашфиётдир.

Эргаш Жуманбулбул ўғли ўзбек дostonларининг хазинабо- ни эди. У Қўрғон дostonчилик мактабининг устози – қарийб ҳамма дostonларни билувчи ва шогирдларга ўргатувчи Жоссок шоирнинг вориси эди. Қўрғон дostonчилари маҳорати, ибрати – Жуманбулбул ўғлида давом этди. Дostonларни билиш, улар- нинг гоаявий-бадиий бедахлигини ва равнақини таъминлаш унинг умри мазмунини ташкил этар эди. Бунинг устига, у мулла одам эди. Ундан ёзиб олинган ёки ўзи ёзиб топширган анъана- вий дostonларни мутолаа қилганда, бу, асарларни ичдан ёри- тувчи ҳиссий алангаларни аytувчининг – халқ дostonчисининг ақл алангалари жўнаштириб, қўллаб-қувватлаб турганлигини сезасиз.

Эргаш Жуманбулбул ўғли дoston айтганда хамиша жўш- хурушга кириб, шундай бедахлик ва маънавий юксаклик да- ражасига эришадик, у бутун коинотни кафтига симобдек қў- йиб, кузатиб турганга ўхшайди. Бир ўринда жанг манзараларини мохируна тасвирлаб бергандан кейин, буларни «казо осмонда кўриб, оғзини енги билан тўсиб кулар эди» дейди. Бу эса руҳ- нинг олий мақомида қувватга кирадиган бадиий образдир.

Эргаш Жуманбулбул ўғлининг илҳоми селдек келади. Унинг тасвиридаги ўзбек тўйларининг ўзи бир дoston. Унинг тасви- рида кизлар жўнашининг ўзи бир дoston. Эргаш Жуманбулбул ўғлининг эстетик идеали Қўрғон дostonчилик мактаби эстетик идеалини тўла-тўқис мужассам этади, деб айтиш мумкин.

Бу шоирнинг ижодини: анъанавий дostonларни ва индивидуал асарларини тадқиқ қилиш йўлида устод Ҳоди Зариф қаватидаги бир қанча ўзбек фольклоршунос олимлари эътиборга лойиқ иш- ларни амалга оширдилар. Ундан ёзиб олинган дostonлар ўзбек тилида беш жилдда, рус тилида уч жилдда нашр этилди. Унинг

ижоди бўйича номзодлик ва докторлик диссертациялари ёқланди ва ёқланмоқда. Албатта, бу қилинган катта ишлар бундан ҳам катта ишлар кутиб турганлигини аён қилмоқда. Мустақиллик муҳотида Эргаш Жуманбулбул ўғли ижоди ўзбек миллий бадиий хазинаси сифатидагина эмас, фалсафий, ахлоқий, ҳуқуқий хазинасининг ҳам самараси сифатида бундан-да теранроқ ўрганилишга лойиқдир. Зеро, Эргаш Жуманбулбул ўғлининг устозлари ва ўзи тараннум этган Гўрўғли Чамбил деган утопик давлатни курган, Гиркўкдай тулпорни парваришлаб ўстирган, Райҳон араб қирқ минг шаҳарга тилаганда – сотиб олмоқчи бўлганда, «номи туркман уввос солиб жилаган». Яъни Гиркўк Чамбилнинг номус-орига айланган. Гўрўғли ариқлар қаздириб, сув чиқарган, юртини обод, элу халқи ҳаётини фаровон этган.

Гўрўғли мана шундай – ҳамиша халқ орзусидаги идеал қаҳрамон экан, Эргаш Жуманбулбул ўғли ҳам бугуннинг қатордаги шоири бўлиб қолаверади. Гўё у ушбу терма-қўшигини бизнинг даврамизда ўтириб айтаётгандай:

*Қаридимми десам кўнглим қоласи,
Тобора ортади ёшлик ҳаваси...*

Абийр
МУСАКУЛОВ
(1951–2011)



Абийр Мусақулов 1951 йил 3 январда Самарқанд (ҳозирги Жиззах) вилояти Фаллаорол тумани Найман қишлоғида туғилган. Тошкент давлат университети филология факультетида тахсил олган (1967–73). Ҳарбий хизматда бўлган (1974–75). ЎзР ФА Алишер Навоий номидаги Тил ва адабиёт институти Фольклор бўлимида лаборант (1971–74), катта лаборант (1974–84), кичик илмий ходим (1984–85), илмий ходим (1985–88), катта илмий ходим (1989–97) бўлиб ишлаган. Тошкент давлат аграр университетида Тиллар кафедрасининг мудири (1997–2002). «Соғлом авлод учун» журнали бўлим муҳаррири (2002–2004). ЎзР ФА Алишер Навоий номидаги Тил ва адабиёт институти Фольклор бўлимида етакчи илмий ходим вазифасида ишлаган (2004–2011). «Ўзбек фольклорида терма (жанр хусусиятлари, классификацияси, поэтикаси)» мавзуида номзодлик (1984), «Ўзбек халқ лирикасининг тарихий асослари» мавзуида докторлик (1995) диссертациясини ҳимоя қилган. «Ўзбек халқ мақоллари» тўплами (ҳамк. 1978–2009) чоп эттирилган. «Ўзбекские народные пословицы» (ҳамк. 1983) тўплами ҳамда 2 жилдли «Ўзбек халқ мақоллари» академик нашрининг тузувчиларидан биридир. «Остонаси тиллодан» халқ қўшиқлари тўпламини (ҳамк. 1993) чоп эттирган. «Ўзбек халқ қўшиқларининг тарихий асослари» (1994), «Ўзбек халқ қўшиқларининг қадимий асослари» (1998), «Ўзбек халқ лирикаси: тарихий асослари ва бадиияти» (1995), «Ўзбек халқ лирикаси» (2010) номли монографиялар муаллифи. 2011 йил 14 декабрда Тошкент шаҳрида вафот этган.

ХАЛҚ ЛИРИКАСИДА СОЧ ОБРАЗИНИНГ ТАРИХИЙ-ЭТНОГРАФИК АСОСЛАРИ

Жаҳон халқлари этикодларида кенг тарқалган, рудиментлари, ҳозиргача яшаб келаётган магия кўринишларидан бири соч магиясидир. Бу инончнинг ғоявий асосида контагиоз (мулоқот) магияга инонч ётади. Соч магияси асрлар бўйи маиший турмуш ва жаҳон халқлари фольклорида шаклланган ўзига хос бир тизим бўлиб, фақатгина инсон бошидаги сочлар эмас, балки одамлар, жониворлар танасидаги қош, соқол, мўйлов, ёл, думдаги тола-лар, жун ва улар билан боғлиқ тарок, рўмол, дўппи, ўсма, сурма кабилар соч магияси тизимининг элементларидир. Соч магиясининг ўзбек халқ лирикасидаги бадиий ифодалари жуда серқирра:

*Дарёдан оқиб келоди,
Шода-шода марварид.
Рўпарамда ўлтироди,
Қоши қаро, барно йигит.
Қоши қаро, барно йигит,
Хурсанд этолмайсан мени.
Кокилим қимматбаҳо
Ташлаб кетолмайсан мени.¹*

Тарихий асосларига кўра, дарё сув култи объектидир. Марварид, дарёнинг ҳосиласи, бўлғуси ҳосилдорлик рамзидир. Тўлқинларнинг марваридга ўхшатилишида сийрат маъносида фарзанд ғояси ҳам бор. Кўшиқдаги шода-шода марварид жуфтлик ифодаси, оила асоси. Рўпарада ўтирган барно йигит дарёнинг поэтик параллелидир. Кокил эса соч магияси билан боғлиқ.

Дунё халқлари тарихида ёвуз кучлар соч толаси ва тирноқлар орқали ҳам унинг эгасига зиён етказиши мумкинлиги инончи кенг тарқалган.² Чунки қадимги одамлар дунёқарашида: «Сочлар

¹ Гулёр. Фарғона халқ кўшиқлари. – Тошкент: Адабиёт ва санъат нашриёти, 1967. – 15-бет. Мақоладаги барча мисоллар ана шу тўплам ва муаллифнинг дала материалларидан олинди.

² Тайлор Э. Б. Первобытная культура. – М.: ИПЛ, 1989. – стр. 94.

жон ёки инсон магик кучларининг макони ҳисобланган».¹ Соч олиш, тараш, тозалаш – оби ҳавога таъсир қилиши, улар орқали соч ёки тирноқ эгасига исталган масофадан ўз ҳукмини ўтказиш мумкинлигига дунёдаги барча қадимий халқлар ишонганлигини эътироф этган.² Инсон сочи қадим тасаввурларда осмон ғояси билан боғлиқ бўлганлиги учун жаҳондаги кўпгина халқларда туғилиш, никоҳ, ўлим маросимлари билан бир қаторда, илк бор гўдак сочини олишни ҳам инсон ҳаётидаги магик-ритуал аҳамиятга эга ҳодиса деб биладилар.³

Ўзбекларда илк бор соч олиш маросими **соч тўйи** ёки **ақиқа** дейилади. Ўрта Осиёнинг кўпгина жойларида гўдакнинг олинган сочини мевали дарахтга илиб ёки тагига кўмиб қўйганларки, бу магик аҳамиятга эга бўлиб, бахт ва ҳосилдорлик ғоялари билан боғланган.

Халқимиз маиший турмушида соч билан боғлиқ кўплаб иримлар, одатлар, тасаввурлар ҳозир ҳам кўп учрайди. Масалан, бировнинг бош кийимини кийиш тақиқланади, ялангбош юриш айб саналган. Аёлларнинг сочини ёзиб юриши фалокат, сочини қирқиши беҳаёлик рамзи ҳисобланган. Шу сабаб қўшиқларда шундай куйланади:

*Оқсув юзли, қаламқош,
Чиқма ёрим, ялангбош.*

*Даричадан қараманг, бошим яланг,
Қарасанг, қарамасанг қошим қалам.*

*Сочимни қирқай десам,
Уволидан қўрқаман... ва ҳ.к.*

Тарихий тараққиёт натижасида инсон сочлари, унинг ҳолати маиший турмуш ва халқ оғзаки ижодида турли функциялар касб этиб борган.

¹ Пропп В. Я. Исторические корни волшебной сказки. – Л.: Изд-во ЛГУ, 1986. – стр. 41.

² Фрэзер Дж. Дж. Золотая ветвь. Исследование магии и религии. – М.: ИПЛ, 1986. – стр. 43.

³ Этнография детства. Традиционные формы воспитания детей и подростков у народов Южной и Юго-Восточной Азии. – М.: Наука, 1988. – стр. 32.

Тарихчи К. Шониёзов қадимги қипчоқ жангчилари узун соч кўйганликларини, олган тақдирларида тепаси ёки орқасида кокил қолдирганликларини айтади. Шунингдек, унинг аниқлашича, ўзбекларда қизлар анъанага кўра сочини майдалаб, келинчаклар ва жувонлар эса жуфт қилиб ўрганлар. Келинчаклар кокиласи **гажак** деб юритилган.¹

*Қизил гулнинг чечаги,
Нима бўлди кечаги?
Нақш олмадай юзига,
Ярашибди гажаги.*

Кўшиқда келинчак ҳақида сўз кетаётганлиги гажақдан маълум. Шу билан бирга унда келин-куёвларнинг тунги интим муносабатларига нозик қочирим ҳам бор.

XIX аср сўнгида Олтойдаги туркий халқларда аёллар ва қизларнинг соч ўримларидан ҳам фарқланишига алоҳида эътибор берган В. В. Радлов аёллар сочини иккита ёки учта, қизлар майдалаб ўрганликларини айтади.² Бизнингча, сочнинг учта ўрилиши фарзанд гоёси билан боғлиқ бўлса керак. Бу одат ўзбекларда ҳам бўлганлигини мана бу кўшиқ тасдиқлайди:

*Қора қулоч сочимни,
Уч ўрдилар, ёр-ёр.
Ота-онам шаҳридан,
Кўчирдилар, ёр-ёр.*

Туркий халқларда соч ўримининг жуфтлиги жуда қадим замонлардан аёлларнинг турмуш қурганлигини ифодалаб келган. Жумладан, Н. Я. Бичурин қадимда Амударё бўйларида яшаган халқлар ҳақида шундай ёзади: «Аёллар турмушга чиқишдан аввал сочларини парваришлаб, икки ўримга ажратиб ўрадилар».³

¹ Шаниязов К. Ш. К этнической истории узбекского народа. – Ташкент: Фан, 1974. – стр. 268–269.

² Радлов В. В. Из Сибири. – М.: Наука, 1989. – стр. 294.

³ Бичурин Н. Я. Собрание сведений о народах обитавших в древней Средней Азии в древние времена. Т. 1. – М.-Л.: Изд-во АН СССР, 1950. – стр. 243.

Қизиғи шундаки, жаҳоннинг кўшгина халқлари, шу жумладан, Европада ҳам қизлар, аёллар, турмуш қурмай маиший бузилган жувонлар ҳам соч ўримидан фарқланганлар.¹

Соч ўримларининг оилавий ҳаёт, маиший турмуш билан боғлиқ турли маънолар англатиши бизнинг кунларимизда ҳам маълум даражада сакланиб қолган. Сочнинг икки ўрилиши қизликдан аёликка ўтиш рамзи эканлиги халқ кўшиқларида ҳам ўз бадий ифодасини топган:

*Ўримнинг қора сочи,
Иккига бўлгудек бўпти.
Шу дамда ўйин қилсам,
Қараб кулгудек бўпти.*

Юқоридаги мулоҳазалардан сўнг аён бўладики, ёр сочининг иккига бўлгудек бўлиши унинг балоғатга етганлиги рамзи, энди оила қуриш мумкинлигига ишорадир.

Республикамизнинг баъзи туманларида бир одат ҳозиргача учраб туради: тўй куни никоҳ ўқилиб, чимилдиқда соч сийпатар, ойна кўрсатар, қўл ушлатар ва бошқа рамзий қовушишгача бўлган барча маросимлар бажарилгач, куёв чимилдиқдан чиқиб кетади. Шундан сўнг серфарзанд бир аёл ёки янга келинчакнинг сочини икки ўрим қилиб ўриб қўяди.

Халқ лирикасидаги соч поэтик образи тарихий асосига кўра соч магияси орқали ҳосилдорлик культлари билан ҳам боғланади. Мутахассислар фикрича, туркий халқлар оғзаки ижодида ҳам соч ва унинг аналоглари – қил, қош, киприк, мўйлов, соқол, от ёлларининг бўлиқ-қалинлиги ҳосилдорлик рамзи бўлиб, фаровон турмуш ва серпуштликка магик таъсир кўрсатади, деб билинган.² Шу сабабли халқ кўшиқларида соч ва унинг аналоглари фақат гўзаллик рамзи бўлмай, сийрат маънода балоғат, севги, оила, фарзанд ва бахтли-тўкин турмуш ғояларини ҳам ифодалайди. «Соч-

¹ Богатырев П. Г. Вопросы теории народного искусства. – стр. 334–335; Проблемы мифология и верований народов Дагестана. – Махачкала, 1988. – стр. 57.

² Тюркология: К 80 летию академика А. Н. Кононова. – М.-Л.: Наука, 1986. – стр. 240.

лар, – дейди Н. И. Гоген-Торен, – шубҳасиз ва доим иккинчи жинсий белги бўлиб хизмат қилган. Иккинчи жинсий белги онгда сочининг ҳосилдорлик культлари билан боғлиқлиги ҳақидаги тасаввурларга магик функция нисбатини бериш билан боғлиқ».¹ Сочнинг балоғат рамзини англатиши ўзбек халқ лирикасидаги «Сочингни узун дейдилар...», – мисраси билан бошланувчи композицион жиҳатдан диалог асосига қурилган қўшиқларда, айниқса равшан кўринади. Унда инсон аъзолари – қош, кўз, бел, юз таърифлари соч поэтик образи билан уйғунлашиб, барчаси лирик қаҳрамоннинг жинсий балоғатга етганлигини рамзий ифодалашга хизмат қилади. Бунда сочпопукнинг сочга, қошинг қалдирғоч канотига, кўзнинг гул ғунчасига, юзнинг қизил олмага, белнинг чумоли белига ўхшатилиши маълум даражада қадим тасаввурлар, ҳосилдорлик культлари билан боғлиқ.

*– Сочингни узун дейдилар,
Доно укам, ёр-ёр,
Қорасоч укам, ёр-ёр.
Кўрсат сочингни мен кўрайин,
Беҳол укам, ёр-ёр.*

Қўшиқда ёрнинг қоши, сочи, бел, юзларини кўрсатишни сўрашдан мақсад унинг балоғатга етганлигини аниқлашдир. Умуман, халқ қўшиқларида сочининг узунлиги, белга, қошга тушиши ҳамиша балоғатни англатади:

*Олма пишганда келинг,
Тагига тушганда келинг.
Орқа сочим жамалак,
Белимга тушганда келинг.*

Мисолимизда олма пишиши билан сочининг белга тушиши поэтик маъно жиҳатидан тенглаштирилган, яъни лирик қаҳрамон сочим белимга тушса, мен ҳам олмадай етиламан демоқда.

Қўшиқларда сочга хос магик хусусиятлар унга уланадиган нарсалар учун ҳам тегишли бўлади. Соч ва унинг аналоглари

¹ Поэзия и обряд. – М.: Изд-во Прометей МГПИ, 1989. – стр. 92.

– қош, мўйлов, соқол поэтик образлари эрларни ҳам ёш ҳамда жинсий жиҳатдан фарқлаши ўзбек халқ лирикаси учун характерли хусусиятдир.

Халқ лирикасида ўспиринлик, йигитлик, боланинг балоғатга етганлиги – қош, мўйлов, ўрта ёш ва кексалик – соқол поэтик образлари билан ифодаланади:

*Тогдаги барра қиёқдек,
Қошларингдан ўргилай.
Янги чиққан майсадек,
Мўйлабларингдан ўргилай.*

Қўшиқдаги барра қиёқдек қош ва майса йигитнинг жинсий балоғати рамзи бўлиб, қош маълум даражада соч магияси билан, мўйлаб ҳосилдорлик ғояси билан боғлиқ.

Қўшиқларда мўйловнинг аналоги бўлган майса – баҳор, ёшлик; похол – куз, кексалик рамзларидир. Соч образи борасидаги кузатишларимиз бизни жаҳон халқлари қадимдан йил фасллари-ни турли маросимлар, байрамлар билан нишонлагани каби инсон умрининг фасллари ҳам соч ва унинг аналоглар воситасида ифодалаган деган хулосага олиб келади.

Қўшиқларда магик инонч излари турлича даражада, кўпинча поэтик кўчимларнинг сийрат маъносида яширин бўлади:

*Қизил гул новдасидан, алла,
Камар қилай белингга, алла.
Сочларим толасидан, алла,
Боғич қилай тўнингга, алла.*

Гул ҳосилдорлик култи билан боғлиқ бўлганлиги учун тасавурда унинг новдасидан камар қилиш мумкин. Камар ҳам магик ҳимоя кучига эга. Шунингдек, халқ лирикасида гул, одатда, хотин-қизларни, белбоғ образи эрларни англатади. Шу сабабли юқоридаги алла ўгил болага айтилган ва она унинг улғайиб, оила қуриши, уйланишни орзу қилмоқда.

Қўшиқдаги соч толаси тумор ўрнини босганлигини, биз сочининг магик функцияларидан маълум даражада хабардор бўлганимиздан кейингина билиб оламиз. Магик қарашларда инсон

сочи унинг боши каби осмон ва жон ғояси билан боғлангани учун халқ оғзаки ижодида соч поэтик образи жуда қудратли куч сифатида талқин қилинади. Эртақларда сочнинг аниқловчиси бўлмиш тароқ ташланганда ўтиб бўлмас тўқайлар пайдо бўлади. Ўз ёлидан тола берган от, бўри, шер каби жониворлар қаерда бўлишларидан қатъи назар, эпик қахрамон бу толани тутатиши билан етиб келадилар. Чунки улар ушбу тола ҳукмидадирлар. «Алпомиш» достонида Бойчибор қахрамонни чоҳдан думи билан тортиб чиқаради. Романик дostonларимизда ярадор бўлган қахрамонни оти ёли билан суяб, жанг майдонидан хавфсиз жойга олиб келади.

Магик инончга кўра соч жонли ва қудратлидир. Кўшиқларда соч поэтик образининг соч магияси билан боғлиқ хусусиятларидан бири шундаки, уларда лирик қахрамон ўз сочи билан севгилисини мафтун этади, ўзига қаратиб боғлаб олади:

*Мен борай кўча билан,
Теракзор ичи билан.
Йигит қўли боғлансин,
Қизларнинг сочи билан.*

Халқ лирикасида соч каби унинг атрибутлари – қош, киприк, кокил, гажак, зулф, ҳайдар, жамалак, қил, тароқ ва ҳ.к. – барчаси соч эга бўлган магик хислатларга эга бўлиши мумкин. Шунингдек, соч ҳолатлари лирик қахрамоннинг қалб кечинмалари, ёқтириш ёки ёқтирмаслигини ифодалашга ҳам хизмат қилади:

*Мен ёримни соғинсам йўлга қарайман,
Сочларимни авайлаб, силлиқ тарайман.
Қошимга ўсмалар қўйсам келарми, ёр-эй,
Кўзимга сурмалар сурсам келарми?*

Соч магияси туфайли соч толасини муқаддас деб билиш, соч толасидан туморлар тақиб юриш жаҳон халқлари тарихида жуда ривожланган. Жумладан, бундай одат ҳақида Имом ал-Бухорий тўплаган ҳадисларда ҳам маълумотлар бор. Пайғамбар саҳобаларидан бири шундай дейди: «Менда Расулаллоҳ ва салламнинг бир тола сочларининг борлиги дунё ва ундаги бор нар-

салар меники бўлиб қолганидан ҳам севинчлироқдир».¹ Қизиғи шундаки, лезгинларда ҳозиргача соч ёкиш, худди эртаклардагидек, ёрдамга чақириб маъносини англатар экан. Туркий аждодларимиз соч рангига қараб, инсон ва унинг авлодлари келажакда бахтли ёки бахтсиз бўлиши ҳақида ҳукм юритганлар.²

Ўзбек халқ лирикасида соч магиясининг ифодалари ҳосилдорлик культлари каби магиянинг бошқа кўринишлари, хусусан, жинсий ва из магияси билан уйғунлашиб кетади. Халқ кўшиқларида соч ва из магиясига инончининг уйғунлашиб кетганлигини кўриш учун яна бир машҳур кўшиқни таҳлил қилайлик:

*Оқ, ойдин кечалар,
Оппоқ, ойдин кечалар,
Гул билан райҳон буркайди,
Ёр юрган кўчалар.*

*Ёр юрган кўчаларни,
Супурай сочим билан.
Чанги чиқса, сув сепай,
Кўздаги ёшим билан.*

*Ёр юрган кўчаларнинг,
Чанги бор, тупроги йўқ.
Бормикан дунёда ошиқ,
Дилда асло доғи йўқ.*

Кўшиқ таҳлилига ўтсак, биз унда дастлаб ойдин кечалардаги салқин ва гул ҳиди чўлғанган кўчаларни, бу кўчаларда ёр юрганлиги учун сочи билан супуриб, кўз ёши билан сув сепадиган ишк фидойисининг лирик образини тассавур қиламиз.

Магик тафаккур натижасига кўра мисолимиздаги ёр юрган кўчаларда гулу райҳонлар атри қолади. Ойдин кечалар ҳам ёруғлик ва шодлик рамзидир. Тарихий асосига кўра бу кўшиқда лирик қахрамон магик кучга эга бўлган сочи ва кўз ёши билан севгили-

¹ Абу Абдуллоҳ ибн Исмоил ал Бухорий. Ҳадис. Т. 1. – Т.: Қомуслар Бош таҳририяти, 1991. – 61-бет.

² Традиционные мировоззрение тюрков Южной Сибири: Знак и ритуал. – Новосибирск: Наука, 1990. – стр. 79.

сини ўзига қаратиб олишни истади. Чунки ёр юрган кўчаларда унинг изи қолади.

Магиянинг кўринишлари қанчалик кўп бўлмасин, магик ҳаракатлар, асосан, яхшилик ёки ёмонликка қаратилади, фанда улар позитив-негатив, халқ тилида оқ-қора магия, деб тасниф қилинади. Шунингдек, магияга ишонган одам исталган нарса, ҳаракатга магик вазифа юклаши, кўпинча турли магик предмет ва ҳаракатлар уйғунлашиб кетиши мумкин. Қўшиқдаги соч, чанг, супуриш, кўз ёши, из бунинг мисолидир.

Из магияси ҳақида тўлароқ тасаввур ҳосил қилиш учун вақтинча мисолимизни унутиб, халқ лирикасининг бошқа намуналари ва из магияси билан боғлиқ инончларга тўхталсак:

*Бугун хафалик етди,
Меҳрибон ёрим кетди.
Боққа кирсам изи бор,
Менинг сабрим тамом битди.*

Сиртдан қаралганда оддийгина кўшиқ: ёр кетибди. Лирик қаҳрамон боғда унинг изини кўриб қаттиқ қайғурибди. Аммо халқ лирикасидаги бог образи ҳаётдаги бог тушунчасидан анча кенгдир. Қўшиқларда бог оилани, ёрни, учрашув жойини, оламнинг кичик моделини англатиши мумкин. Агар кўшиқдаги бог образини оила рамзи деб тасаввур қилсак, ёр уйдан кетган, аммо ҳар бир нарса уни эслатиб туради. Лирик қаҳрамоннинг ёр изини кўриб, ўзини тута олмай қолиши тарихий асосига кўра из магияси билан ҳам боғлиқ.

Туркий аجدодларимиз гўдакларнинг туғма холларини ҳосилдорлик ва гўдаклар ҳомийси – илоҳа Умайнинг изи деб билганлар. Гўдаклар ўзича кулиб, ўйнаб ётганларида у Умай билан ўйнашапти, йиғлаганда Умай болани ташлаб кетибди, деб ўйлаганлар.¹

Халқ кўшиқларида соч поэтик образининг қирраларидан бири унинг ёзиқ ҳолати билан боғлиқ:

¹ Традиционные мировоззрение тюрков Южной Сибири: Пространство и время. – Новосибирск: Наука, 1988. – стр. 278.

*Соқолинг саватдек чиқма тўшакка,
Нега зое бўлай сендай эшакка?
Сенга топилмасми бир сочи ёзиқ,
Менга қурибдими бир бахти ёруғ.*

Соқол – кексалик рамзи, сочи ёзиқлик-бевалик. Халқда якин кишиси вафот этган хотин-қизлар соч ёзиб йиғлайдилар. Умуман, сочининг ёйиклиги ўзбекларда тарихан азадорлик, бузуқлик, ёмонлик маъноларини англатиб, магик инонч билан боғлиқ бўлган.

Соч магияси ва соч поэтик образининг қирраларидан бири **кокил** ва **хайдар** деб аталувчи соч ҳолатлари билан боғлиқ. Этнограф Г. П. Снесарев шундай этнографик фактни келтиради: узок вақт фарзанд кўрмаган эру хотинлар бўлажак фарзандларини муқаддас жой ёки бирор эшонга атаганлар. Бу назр дейилган. Бола туғилиб, илк бор сочи олинганда назр белгиси сифатида бир тутам соч қолдирганлар. Ана шу соч толалари **кокил** ёки **хайдар** деб юритилган. Бола 7–9 ёшга тўлгач, назр қилинган жой ёки эшон хонадонига топширилган. Унинг **кокил** ёки **хайдари** ота-онада қолдирилган. Бола уйда қолганда кокил назр қилинган жойга кўмилган. Ўтмишда бу одат рамзий бажарилмай, унга қатъий амал қилинган.¹

Бу мулоҳазалардан сўнг «Кокилим қимматбаҳо, ташлаб кетолмайсан мени...» кўшиғининг сийрат маъноси анча ойдинлашади. Қизнинг хурсанд бўла олмаслиги, йигитнинг уни ола олмаслигига сабаб **назр** одатидир. Лирик қахрамон (қиз) ёшлигидан бировга аталган. Шунинг учун қаттиқ хафа. Аммо соч магияси қудрати туфайли йигит қиздан воз кечиб ҳам кетолмайди.

Биз соч магияси ва унинг халқ лирикасидаги бадий ифодалари борасидаги баъзи хулосаларни баён қилдик. Дастлабки кузатишлармиз соч магиясининг бадий ифодалари жаҳон халқлари, жумладан, ўзбек халқи фольклорининг барча жанрлари учун хослигини ва махсус тадқиқ этиш зарурлигини кўрсатади.

¹ Снесарев Г. П. Реликты домусульманских верований и обрядов у узбеков Хорезма. – М.: Наука, 1969. – стр. 92–96.

Мунаввара
ЁҚУББЕКОВА

(1952 йилда туғилган)



Мунаввара Муҳамедовна Ёқуббекова 1952 йил 19 декабрь, Андижон вилояти, Андижон тумани, Хакан қишлоғида туғилган. Андижон давлат педагогика институтининг Тарих-филология факультети Ўзбек тили ва адабиёти бўлимида ўқиган (1970–1974). Андижон шаҳридаги 15-ўрта мактабда ўзбек тили ва адабиёти фанидан дарс берган (1974–75). Андижон давлат педагогика институти (ҳозирги Андижон давлат университети)нинг Ўзбек адабиёти кафедрасида катта лаборант, ўқитувчи, катта ўқитувчи, доцент, кафедра мудири лавозимларида хизмат қилган (1976–2000). 2000 йилдан ЎзР ФА Алишер Навоий номидаги Тил ва адабиёт институтининг Фольклор бўлимида катта илмий ходим сифатида илмий тадқиқот ишлари билан шугулланган. Ҳозирги кунда Республика «Алла уйи» маданий-маърифий марказининг раҳбари. «Ўзбек халқ аллаларининг жанр табиати ва бадиий хусусиятлари» мавзусида номзодлик (1990), «Ўзбек халқ кўшиқларининг лингвопоэтик хусусиятлари» мавзусида докторлик (2005) диссертациясини ҳимоя қилган. «Бешиқлар олиб келайин, алла» (1993), «Ўзбек халқ кўшиқларида ўхшатиш» (2003), «Ўзбек халқ кўшиқларининг лингвопоэтик хусусиятлари» (2005), «Аллаларда оиланинг оппоқ орзуси» (2009) каби китоблар муаллифи.

ХАЛҚ ҚЎШИҚЛАРИДА СЎЗ СЕҲРИ

Янги аср дунё микёсида барча фан соҳаларида мисли кўрилмаган янгилик ва кашфиётлар асри бўлиши кутилмоқда. Фан ва техниканинг бу кунги тараққиёти таъсирида давримиз илм-фан олдига қўяётган мақсад ва талаблар барча фан соҳаларида шу кунгача эришилган ютуқларнинг бирлаштирилиши, таҳлил этилиши, барча соҳалар учун самарали услуб ва технологияларнинг оммалаштирилишини кўзда тутмоқда.

Бадий асарнинг, шу жумладан, фольклор қўшиқларининг турли инсоншунослик фанлари ҳамда математика, семиотика, кибернетика, информатика каби соҳалар талқинидаги янгича таҳлиллари янги-янги йўналишларни келтириб чиқариши табиий. Олий таълимнинг филологик йўналиши тизимида мантик, информатика, семиотика фанлари ҳақида тушунчалар берилаётгани; «Бадий матннинг лингвистик таҳлили», «Адабиётшуносликда структурал таҳлил методи», «Социолингвистика» махсус курслари ўқитилаётгани, *лингвопоэтика*, *лингвофольклористика*, *герменевтика* каби атамалар фаол қўлланила бошлагани фикримизнинг далили бўла олади.

Тилнинг таъсир кўрсатиш вазифаси бадий адабиёт тилида ёрқин намоён бўлади. қўшиқ матнида ҳар бир сўз ижодкор мақсади ва маҳоратига кўра турлича жилваланади. Халқ қўшиқларининг лингвопоэтик хусусиятларини аниқлаш мақсадида ўтказилган алоҳида таҳлилгина қўшиқлардаги сеҳрловчи, турли-туман ҳис-туйғулар туғдирувчи ўзига хос тасвирий воситалар тизимини яхлит ва ички ўзаро мутаносиб муносабатда ўрганиш имкониятини беради.

Халқ қўшиқларининг лисоний бадиияти таҳлили, биринчидан, халқ қўшиқлари билан узоқ вақт шуғулланганлик малакасини талаб этади. Бунингсиз қўшиқ матнидаги ҳар бир сўзнинг маъно товланишлари, рамзий ифодалари борасида фикр юритиш мушкул. Қолаверса, халқ қўшиқларининг ҳудудий ва тарихий-тадрижий вариантлилиги масаласида ҳам фольклор қўшиқшуносининг узоқ йиллик билим ва тажрибаси керак бўлади ва ундан бу соҳадаги илмий янгиликлар билан яқиндан таниш бўлиши талаб этилади.

Иккинчидан, тадқиқотчи «лингвофольклористика», «лингвопозитика», «бадий матннинг лисоний таҳлили», «лексикология», «семасиология», «грамматика», «стилистика» каби филологик фанлардан етарлича билимга эга бўлиши, бу фан йўналишларидаги эришилган охириги ютуқлардан бохабар бўлиши керак. Учинчидан, тадқиқотчи методик ва методологик, мантиқий-психологик ва амалий тайёргарлик доирасида фалсафа, психология, семиотика ҳамда информатика соҳаларидаги билимдонликка таяниши жоиз.

Халқ қўшиқларини лисоний бадиияти нуқтаи назаридан ўрганиш борасидаги ҳар учала таъкидни назарда тутган ёндашув ўзбек халқ қўшиқларининг дастлабки лингвопозитик таҳлили тамойилларини ишлаб чиқишимиз учун имкон беради.

Ҳар қандай янги ва пухта ишланмаган илмий йўналиш тамойиллари тақдим этилаётганда жиддий нуқсонлар, хато ва камчиликлар, уларнинг устидаги баҳс ва мунозаралар бўлиши табиий, лекин бу илмий мубоҳаса энди *халқ қўшиқларининг лингвопозитик таҳлили* билан шуғулланувчи янги бир йўналишнинг фойдасига илмий мулоҳаза ва хулосалар беради. Бу эса ушбу йўналишнинг фольклоршунослигимиздан ўз ўрнини топиши ва кенг қўламда тараққий этиши учун имкон яратади. Биз тавсия этаётган тамойилларнинг илмий истифода учун қабул қилиниши ёки қилинмаслигини эса бу соҳанинг келгусидаги тараққиёти кўрсатади.

Халқ қўшиқларининг лингвопозитик таҳлили қўшиқ жанрининг ўзига хос хусусиятларидан келиб чиқиб амалга оширилади. Таҳлил тамойиллари таҳлил матнига муносабатда, таҳлил жараёнини амалга оширишда, таҳлил хусусиятини белгилашда амал қилади.

Ўзбек халқ қўшиқларининг лингвопозитик хусусиятларини аниқлаш учун биз тавсия этаётган *халқ қўшиқларининг лингвопозитик таҳлили тамойиллари* қуйидагича:

– таҳлилга олинаётган халқ қўшиғига матни кўпинча тўрт, баъзан олти, саккиз ва ундан ортиқ мисрали шеърӣ бандлардан ташкил топган, вариантлари мавжуд бўлган бадий нутқ бутунлиги сифатида қаралади;

– бу бадий бутунликнинг лисоний бадиияти таҳлилига қиришилар экан, қўшиқ матнининг тарихий-генетик ва ижтимоӣ

мансубияти эътибордан соқит қилиниб, таҳлил фақат матн ичида, шу матннинг лисоний бирликлари мантиқи ва бадиий мезонларидан келиб чиққан ҳолда олиб борилади;

– матнга ўзбек халқ оғзаки поэтик ижодиётидаги яхлит бадиий тизим сифатида қаралади;

– матннинг воқе бўлиши ҳодисасидан келиб чикувчи, ахборот берувчи моҳиятга эътибор қаратилади;

– матндаги сўз, тимсол, рамз, барча лисоний бирликларни қўллашдан мақсад кўзда тутилган мазмунни етказиш экани назарда тутилади;

– мазмун, ўз навбатида, шеърий тизимга солинган тугалланган бадиий нутқ орқали узатилиши эътиборда тутилади;

– кўшиқнинг яхлитлигини ташкил этувчи ҳар бир узвга бадиий тизимнинг таркибий қисми сифатида қаралади;

– таҳлил жараёни таҳлил амалларидан таркиб топади;

– таҳлил амалларига: ўқиш, ўрганиш, талқин ўтказиш, масаланинг қўйилишини аниқлаш, матннинг кенгайтирилган – ёйиқ (барча таг маъноларни назарда тутган) мазмунини баён қилиш ва шу мазмундан келиб чикувчи янги моделни тузиб чиқиш киради;

– янги моделнинг келиб чиқишида роль ўйнаган узвларнинг ўзаро муносабати кўриб ўтилади;

– узвларнинг ўзаро *тобелик*, *тенглик*, *зидлик* ёки *ҳукмронлик* муносабатларидан қай бири асосида алоқага киришгани аниқланади;

– якуний натижа сифатида таҳлил этилган бадиий бутунлик билан назарий ўриндош бўлган модель тақдим этилади.

Юқорида келтирилган тамойиллар асосида таҳлилга тортилган кўшиқ матнида қандай лисоний бирликлар иштирок этганига қараб таҳлил жараёни турлича қуршов ва қамровга эга бўлади. Таҳлил сайлаб олинган матн устида олиб борилганда, ундаги ҳар бир лисоний бирлик бадиий бутунликни ташкил этувчи узвнинг таркибий унсури сифатида олиб қаралади. Биз лисоний бадиият таҳлили тамойилларига асосланиб ўзбек халқ кўшиқларидаги кўчимларнинг лингвопоэтик таҳлилини ўтказдик. Ўрганиб чиққан кўшиқларимизда истифода этилган *ўхшатишлар* юзга бир нисбатда ҳисоблаганимизда: аллаларда – 26; ёр-ёрларда – 24; йиғи-

йўқловларда – 19; келинсаломларда – 29; лирик кўшиқларда – 8 миқдорда қўлланилган. Бу ўртача – 23 тани ташкил этади. *Метафоралар* юзга бир нисбатда ҳисобланганда: аллаларда – 48; ёр-ёрларда – 16; йиғи-йўқловларда – 43; келинсаломларда – 17; лирик кўшиқларда – 30 миқдорда қўлланилган. Бу ўртача – 31,2 тани ташкил этади. *Сифатлашлар* юзга бир нисбатда ҳисобланганда: аллаларда – 43; ёр-ёрларда – 61; йиғи-йўқловларда – 33; келинсаломларда – 48; лирик кўшиқларда – 51 миқдорда қўлланилган. Бу ўртача – 47,2 тани ташкил этади.

Ўзбек халқ кўшиқларидаги сермаҳсул бадий тасвир воситаси бўлган ўхшатиш бир-бири билан белги-хусусиятларига кўра, мос келувчи шахе, жисм, хусусият, тушунча, воқеа, ҳодиса, ҳаракат ва ҳолатнинг мантикий муқояса қилиниб, анологик ёки ассоциатив хулосага кўра эмоционал ёхуд сентиментал тарзда таққосланишидир.

*Ёнаману куяман
Ўчоққа тушган чоладек.
Заъфарондек саргаяман
Бандида қолган олмадек.*

Бу мисолимизда ҳам *сезгилар қиёсига асосланган ўхшатишлар ва тасаввур қиёсига асосланган ўхшатишлар* биргаликда қўлланилган. Улар ўртасидаги фарқ эса яққол кўзга ташланиб турибди.

Бу таркибли мураккаб ўхшатишда *асос* (мен) тушиб қолган ва у лирик қахрамоннинг ўзи. Тимсол эса 3 та.

Тимсол сифатида келтириляётган уч хил предмет ўртасидаги ўхшашлик нимада? Улар *асосга қайси жиҳатдан ўхшайдилар?*

Лирик қахрамон куюнчак бир инсон. У ҳаётда ўз ўрнини топиш, кимгадир керак бўлиш учун ҳаракат қилади. У ўзини талабгорга фидо қилишни истади. Бироқ унинг фидойилигини қабул қилмайдилар:

1. Уни ўчоққа тушган чоладай охиригача керак қилмай, чала ёнган жойида олиб ташлайдилар. Кейинги сафар эса у ёниб кул бўлиш ўрнига, куйиб кўмирга айланганча тураверади. Ёниб кул бўлиш иштиёқида алангаланиб, ёнишни кутганча тутаб куяверади. Ўчоқдаги чола, янги солинган ўтиндай ёниб кета қолмайди. Анчагача тутаб, куйиб туради.

2. У заъфарондек сарғаяди. Заъфарон ўсимлигидан сарик бўёк оладилар. Заъфарондек сарғайиш кутиш изтиробларидан сарғайиш бўлиши мумкин.

3. У бандида қолган олмадек. Бу олма ҳеч кимга керак эмас. Уни вақтида узиб олмадилар. Талабгорини кутиб, бандида қолиб кетган олма сап-сарғайиб кетган.

Кўринадики, ҳар учала тимсол учун хос белги интизорлик изтиробидир. Бу изтиробнинг кучи «ёнаману куяман» сўзлари билан таъкидланса, изтиробнинг чуқурлиги бандида қолиб, заъфарондек табиатига кўра даставвал 2 хил турга бўлинади. Бу бўлиниш ўхшатишнинг қандай муқоясага асосланганига кўра юзага чиқади.

Халқ кўшиқларидаги мавжуд ўхшатишлар мантиқий, лисоний ва бадий хусусиятлар бирлигидан таркиб топган. Уларни: а) мантиқий таркиби; б) лисоний хусусиятлари; в) поэтик табиатига кўра ўрганиб чиқиш мақсадга мувофиқ.

Кўшиқ матнидаги ўхшатишларнинг лингвопоэтик хусусиятларини ўрганиш – бадий тасвир воситасининг вужудга келиши, шаклланиши, воқе бўлиши, таъсир кўрсатиши масалаларини камраб олиши билан алоҳида аҳамият касб этади.

Ўзбек халқ кўшиқларининг лингвопоэтик таҳлили халқ кўшиқларида қўлланилган ўхшатишларнинг қирқдан ортиқ турини фарқлаш ва изоҳлаш имконини беради.

Метафоранинг поэтик моҳияти ўзбек халқ кўшиқлари мисолида шахс, нарса, воқеа-ҳодиса, ҳаракат ва ҳолатни ўзига хос баҳо билан номлашдан иборат. Бунда янги ном «гапирувчи»¹ бўлиши керак. «Гапирганда» ҳам, кўшиқ матни шеър ҳолатидами, мусиқа жўрлигидаги ижро тарзидами маънавий-эстетик истифода этилганда бу иккиламчи номлаш барчага баробар тушунарли ва таъсирчан бўлиши керак. Кўшиқ матнида метафора бадий моҳият касб этиши учун:

1) одатдаги аталишлардан мақсадлилиги билан фарқланиши керак;

2) бу фарқ қабул қилиниши ва маъқулланиши керак;

3) метафоризация ҳодисаси завқ уйғотиши керак.

¹ Теория метафоры. – М.: Прогресс, 1990. – С. 45.

Агар шу шартлар бажарилмаса, бу метафора узоқ яшамайди ва эҳтимолки, бошқа ёрқинроқ тасвирий восита билан алмашади. Халқ кўшиқларидаги метафоранинг поэтик моҳияти кўшиқ мазмунига, ғоявий йўналишига, умумий пафосига мос бўлиши керак.

Қизил гул метафораси асар қаҳрамони – маъшуқа, ёр, фарзанд ёки бошқа қадрдон шахсни билдириб келиши мумкин. Бунда метафорада англашаётган персонаж, образ ёки нарсага меҳр, ардоқ ва ихлос сезилиб туради. Кўпинча «қизил гул» -им эгалик кўшимчасини олади. Халқ кўшиқларидаги метафораларда:

*Қизил гулим, қизил гулим,
Ажаб бевақт хазон бўлдинг.
Мени чўллар аро ташлаб,
Ўзинг йўлга равон бўлдинг, –*

дея куйланиши; «суйганим қизил гулдир», «қизил гулим сўлмасин» дейиш билан бир қаторда, қаҳрамонни гулнинг қисмлари билан ҳам аталади: «қизил гулнинг бутоғи», «қизил гул ғунчасисан», «қизил гулнинг япроғи», «қизил гулнинг ичида ғунчамисан, нормисан» ва ҳ.к. Халқ кўшиғида:

*Дарёдан оқиб келади шода-шода марварид,
Рўпарамда ўтиради қоши қоро, барно йигит.
Шода-шода марварид юзига қўнган гарди бор,
Рўпарамда оҳ уради, шу йигитнинг дарди бор, –*

дея куйланади. Кўшиқ матнидаги шода-шода сифатлаши марвариднинг бир неча шодадан иборат эканини билдиради. Табиийки, шодалар марвариднинг катта-кичиклиги, товланиши, сони жиҳатидан бир-биридан фарқланади. Ҳар бир шоданинг ўз латофати бўлганидек, барно йигитнинг ҳам қатор ёқимли томонлари бор. Қомати келишган (барно), қоши қора, кўзлари порлаган (чунки барно), менга мойил (рўпарамда ўтирибди). Дарёдан оқиб келган марваридни нима қиладилар? Яна шода-шода бўлса. Ердан топиб олганда, шу яқин орадан эгаси чиқиб қолар эди. Узоқдан шу ерга оқиб келган бўлса, уни тутиб олиб, тақиб юрса, ўзлаштирса бўлади.

«Шода-шода» сифатлаши марваридга таъриф бериб бўлгач, йигитга алоқадор тушунчага ҳам таъсир ўтказа бошлайди. Шода-шода – қатор далилларга кўра йигит ҳам марвариддай маъқул келиб турибди. Аввал у рўпарага келиб ўтирибди, қадди келишган, қоши қаро, кўзи олов. Шода-шода марвариднинг гарди (сувдаги лойқалардан бўлса керак) бор. Йигитнинг (оҳ уришидан кўриниб турганидек, турмуш уринишларидан оширган шода-шода) дарди бор.

«Шода-шода сифатлаши ўзи бирикиб келган сўзда бўёқдорлик тугдиришдан ташқари, йигитнинг кўрки ва фазилатларининг кўплигига, юрагида қатор-қатор ҳасрату армонлари борлигига билвосита ишора бериш вазифасини ҳам бажаряпти. Бу уйғунлик қўшиқ давомидаги «марваридни тутиб олсам, тақиб олсам бўлади», «шу йигитни ошиқ қилиб, тегиб олсам бўлади» тариқасидаги мантиқий хулоса учун ҳам замин яратади. Қўшиқ, дарҳақиқат, «Қоши қаро барно йигитнинг мен ёри бўлсаммикин» мисрали банд билан тугайди.

«Шода-шода марваридлар бўйнингизда», «ёрим айтинг, не гаплар бор кўнглингизда» дейилганда ҳам шода-шода сифатлаши кўнгилдаги гаплар ҳажмини ҳам билвосита белгилаб кўрсатади.

Кўриниб турганидай, сифатлаш халқ қўшиқларида образлик, эмоционал-экспрессив таъсирчанлик, ассоциатив таассуротлар тугдириш йўлида танланган махсус тафсил ёки образнинг шу асардаги мотивация учун муҳим бўлган белги ва хусусиятларини таъкидлаб кўрсатади.

Хулоса қилиб шуни таъкидлаш мумкинки, қўшиқ матнларида намоён бўлган поэтик ҳодисаларнинг моҳиятини, уларнинг ўзаро ички муносабатларини ўрганиш, лисоний бирликларнинг халқ шеъриятидаги эстетик таъсир кўрсатиш вазифаси асосидаги уюшуви қонуниятларини ойдинлаштириш лингвопоэтик таҳлилнинг бош вазифаси саналади. Қўшиқ матнидаги ҳар бир сўз қўшиқ ижодкорлари мақсади ва маҳоратига кўра маълум поэтик мавқени эгаллайди. Халқ қўшиқларидаги оммабоплик, жанглик, оҳангдорлик, соддалик бағридаги чуқур рамзийлик, таъсирчан экспрессивликни ҳосил қилувчи ўзига хос тасвирий воситалар тизимини яхлит ва ички ўзаро мутаносиб муносабатда ўрганишга лингвопоэтик таҳлил жараёнида эришиш мумкин.

Ботир
МАТЁҚУБОВ

(1953 йилда туғилган)



Ботир Матёқубов 1953 йил 12 январда Хива шаҳрида туғилган. М. Харратов номидаги Урганч musiқа билим юртида (1968–72), Тошкент давлат консерваториясида ўқиган (1972–78). Урганч musiқа билим юртида ўқитувчи (1978–82), Хоразм вилоят ўқитувчилар ма-лакасини ошириш институтида Musiқа-эстетика кабинети мудури (1983–89) бўлиб ишлаган. Маданият ишлари вазирлигининг Республи-ка методика хонасида услубчи, олий даражали мутахассис сифати-да фаолият олиб борган (1990–1996). Шу вазирликнинг Фан, кадрлар тайёрлаш ва қайта тайёрлаш бошқармасининг бошлиги вазифасини бажарган (1996–97) фаолият юргизган. Маданият ишлари вазирли-ги Истиқболни белгилаш, услубият ва ахборот Республика Маркази директори (1997–2000), Ўзбекистон Республикаси Президенти дево-нининг маъсул ходими вазифасида ишлаган (2000–01). «Хоразм дос-тонларининг musiқий хусусиятлари» мавзуида номзодлик диссертаци-ясини ҳимоя қилган (1996). Хоразм воҳаси бахшилари репертуаридан ўрин олган «Авазхон», «Базиргон», «Хирмондали», «Ошиқ Ғариб ва Шоҳсанам» достонларининг тўлиқ матнини ёзиб олган ва бу асарлар-нинг ижроси пайтидаги musiқасини нота ёзувига туширган. «Достон наволари» номли мажмуада «Авазхон», «Бозиргон», «Хирмондали», «Ошиқ Маҳмуд», «Ошиқ Ғариб ва Шоҳсанам» каби достонларни нас-рий, назмий, musiқий-нота матнлари ва аудио диск ёзувлари билан биргаликда чоп эттирган (2009). «Достонларнинг musiқий хусусият-лари» (1997), «Бахшлар санъати» (1997), «Достон наволари» (2009) каби илмий асарлар муаллифи.

ЎЗБЕК ДОСТОНЛАРИНИНГ МУСИҚИЙ ХУСУСИЯТЛАРИ

Халқнинг маданий турмуш тарзи, маънавий меросини тадқиқ этишда миллий достонларнинг мусиқий анъаналари ва ифода воситалари жуда муҳим манбадир. Хусусан, туркий халқлар орасида достон кўшиқларига жўр бўлувчи бир қанча чолғу асбоблари қўлланилиб, шулардан асосийлари кўбиз, дўмбира, дутор, тор (Хоразм бахшилари XX аср бошларида ўзларига қабул қилган чолғу), гармон (кам ҳолларда), соз, (Кавказолди халқларининг тирнама чолғуси) ҳисобланади. Бундан ташқари, бахшилар ансамбли таркибига жўр бўлувчи буломон, ғижжак ва доира каби чолғулар ҳам жалб қилинади. Шундай бўлса-да, достон ижрочиларининг қадимий чолғуларидан бўлган кўбиз ва дўмбира созлари ҳақида қисқача маълумот бериш ўринли. Кўбиз чолғуси жуда қадимий бўлиб, турк ўзонлари ва жи ровларининг асосий жўрнавоз сози ҳисобланган. Бу камончали чолғу ҳозирги даврда қоракалпоқ жи ровларида сақланиб қолган. Унинг пайдо бўлиши ҳақида турли афсоналар мавжуд. Жумладан, Дарвеш Али Чангийнинг «Тухфат-ус-сурур» номли мусиқий рисолида элхонийлардан султон Увайс Жалойир (1356–1374) кўбизни рубоб дастасини узайтириш орқали ясаганлиги, унинг тарихий негизлари ва ижро хусусиятлари ҳақида айтилади.¹

Кўбиз косаси ва дастаси жийда, тут ва ўрик дарахтларидан ўйиб ишланган бўлиб, торлари ва камончасининг иплари отнинг ёлидан тараб тортилади. Дастасига парда бойламлари боғланмаган. Ижро пайтида чап қўл бармоқлари қил(тор)га салгина босиб, дастага теккизмасдан (флажолет услубида) чалинади. Товуши инсон овозининг бўғиздан чиқариладиган турига ўхшаш ва дастага теккизмасдан чалингани учун янада майинрок эшитилади.

Дўмбира чолғуси, асосан, Қашқадарё, Сурхондарё, Самарқанд ва Навоий вилоятларида кенг тарқалган бўлиб, бахши-шоирларнинг асосий жўрнавоз чолғусидир. Унинг яратилиши ҳақида ҳам

¹ Кароматов Ф. М. Узбекская домбровая музыка. – Ташкент, 1966. – стр. 34.

жуда кўп афсона ва ривоятлар мавжуд. Дўмбира арча ёғочидан ясалиб, қопқоғи косасига елимланмасдан ичакдан эшилган чил-вир ип билан таранг тортиб бойланади. Торлари эчкининг ин-гичка ичагидан эшиб тайёрланади. Дастасига парда бойламлари боғланмаган. Товуш кўлами 1,5 октавани ташкил қилади.

Шимолий Ўзбекистон ҳудудида истифода этиладиган чолғулар хусусида бир оз тўхталадиган бўлсак, буларнинг тури хилма-хил бўлиб, шулардан бири дутордир. Унинг жуда қадимийлигидан дарак берувчи далиллар Қўйқирилган қалъа (милоддан аввалги IV–III асрлар)дан топилган икки торли чолғуларнинг кейинчалик дутор, дўмбира ва қўбиз шаклида та-комиллашганлигини кўрсатади.

Хоразм дostonчилиғида икки хил дутор қўлланилиб, улар-нинг бири калта (узунлиги 970–1040 мм), иккинчиси узун (бўйи 1300 мм ва ундан ортик) дуторлардир. Бу чолғулар тут ёки ўрик ёғочидан ясалади. Улар қовурғали «дилма дутор» ва ўйиб иш-ланган – «қазма дутор» деб юритилган. Қопқоғи (декаси) эса тут ёғочидан юпқа қилиб ишланади. Дуторларнинг иккаласини ҳам зир (юқори созланувчи) тори кичик октава ре ва бом (паст созла-нувчи) торлари катта октава соль ёки ля баъзан кўштор қилиб ҳам соланади. Дутор икки хил созланишининг бахшилар тили-да ўз атамаси бор бўлиб, улар очиқ торнинг бир-бирига нисба-тан квинта созини «Алиқамбар дузум», кварта созини «Мискин дузум» деб юритадилар. Дасталаридаги парда бойламлари қўй ичагидан тайёрланган иплар билан боғланган. Пардаларнинг сони иккала дуторда ҳам бир хил ва диатоник товушқаторни ҳосил қилади.

Халқ орасида дoston куйлари қанчалик кенг тарқалган бўлса, дутор ҳам шу даражадаги оммавий чолғу ҳисобланган. Бу ҳақда кексалар ўртасида жуда кўп ривоятлар мавжуд, шулардан бири «Хоразм мусиқий тарихчаси» китобида берилган: «Чингизхон Кўхна Урганчни ҳарб қилмасдан илгари у ерда яшаган одамлар-нинг аксарияти мусиқани ўзларина бир хунар ва касб қилғонлар. Мунинг орқасинда ўз оилалари ўнгишиқларини таъмин этган-дурлар. Ҳатто шаҳарда дутор созина эшак (харрак) йўнуб сотиб ўнгушиқларини шул хунарлари бирла ўтказадурғон кишилар-

нинг миқдори бир мингга етишадур».¹ Юқорида келтирилган маълумотлар дутор нафақат бахшиларнинг жўр бўлувчи сози, балки кўпчилик аҳолининг энг севимли чолғу асбоби бўлганлигидан далолат беради.

Бахшилар ансамбли таркибига кирувчи буламоннинг ҳам ўрни ўзгачадир. Фикримизча, буламон форсча «Болобом» сўзидан келиб чиққан бўлиб, «боло» – баланд, юқори; «бам» – паст, яъни баланд ва пастки пардаларда бирдек жарангловчи, демак, товушлар кўлами кенг чолғу эканлигини билдиради. Бахшилар кўшида ғижжакка қараганда ҳам буламоннинг ўрни сезиларлидир. Айниқса, «Бозиргон», «Гўрўғлининг ўлими» ва бошқа дostonларни бахшилар буломон жўрлигисиз айтишга рози бўлмайдилар. Чунки ғамгин кайфиятни ифодалашда, дostonдаги фожеали воқеаларни таъсирчанлик билан очишда буламон тенгсиз жўрнавоз чолғудир. Ҳатто эроний услубдаги якка дутор жўрлигида дoston айтадиган бахшилар ҳам юқорида номлари зикр этилган дostonларни буламон жўрлигисиз айтмайдилар. Бу чолғу табиати жиҳатидан ички овоз тусига жуда яқин, бахши овозига ҳамоҳанг ва ҳамнафасдир.

Бахшилар кўлида буламон билан биргаликда, ғижжак чолғуси ҳам жўрнавоз соз сифатида иштирок этади. Қадимда уч ва тўрт торли ғижжак, кейинчалик онда-сонда ғижжак ўрнида скрипка чолғулари қўлланилган. Бир ансамблнинг ўзида буламон ва ғижжакни жўрликда қўллаш ҳоллари ҳам учрайди.

Дostonчиликнинг ширвоний услубида доиранинг тутган ўрни жуда муҳимдир. Ушбу услубга мансуб бахшилар кўлига жўр бўлувчи «доирачи» ёхуд «доирадаст», «дафчи» ёки «дапчи» деб юритилади. Улар кўпинча марака доира деб аталувчи айланаси 300–350 мм келадиган, яъни ҳозиргиларидан кичикроқ доирадан фойдаланганлар. Ушбу доира садоларининг дутор ва буламонлар овоз кучига мос келадиган майинлиги бўлган. Бахшиларнинг доирадастлари номалар нақоратларида ҳамнафас, баъзан эса дostonнинг айтим қисмларида кези келганда ҳикоя қилувчи бахши вазифаларини ҳам бажарганлар.

¹ Mulla Bekchon Rahmon o'g'li. Muhammad Yusuf Devonzoda. Xorazm musiqiy tarixchasi. – Toshkent: «MUMTOZ SO'Z», 2014. – 39 б.

Бу янглиғ соз амалиёти жиҳатидан тараққий этган Хоразм дostonчилигида табиатан жўшқин, ўйноқи мусиқий воситаларни қўллаш ва очик овозда куйлаш орқали дoston номалари воқеалар ривожини ёркин, ўзига хос тарзда очиб беришга хизмат қилади. Маълумки, номалар дostonларнинг мусиқий асосини ташкил килувчи омиллардан ҳисобланади. Шарқ мусиқа истилоҳида «нағма» ва «нома» тушунчалари кенг қўлланилади. «Нағма» атамаси турлича изоҳланади: «Нағма, нағам – наво, оҳанг, куй, тарона» луғавий маъноларда таъриф этилса. Абдурауф Фитратнинг фикри куйидагичадир: «Мусиқий олимларимизга кўра бир оз узаниб (бир муддат давом этиб) сузаниши (чўзилиши) ҳис этилган товуш нағмадир. Нағма бир замон давом этган товуш бўлғоч унинг бош томони албатта бўладир. Нағма маъносидаги товушни чиқармоқ учун чолғуни чертмак керак. Чолғуни чертганимиздан бошлаб, товуш чиқарадирда, бир муддат узаниб колгач, нағма бўладир».¹

Ўтмишда нағмалар юнонча ва арабча иборалар билан ифодаланган. Арабча атамалари, асосан, нағомот дейилган. Нағмалар халқ орасида куй-оҳанг маъносида ҳам қўлланилади. Уларнинг куй ёки мусиқий асар маъносида қўлланилиши жуда кўп манбааларда келтирилган. Шулардан бири «Хоразм мусиқий тарихчаси» китобида «Ферузнинг мақомларга боғлаган нағмалари, Ризо бахши нағмалари, Суяв бахшининг дoston шеърларига боғлаган нағмалари» тарзида ёзилган. Ушбу далиллардан маълум бўлишича, якин ўтмишда дoston куй ва кўшиқлари «нағма» деб ҳам аталган.

Дoston куй-номаларини бахшиларнинг ўзлари куйидагича таърифлайдилар. Қамай мактаби намоёндаси Қаҳҳор бахши Раҳимов дostonларда ишлатиладиган чолғу куйлар баъзида бахши куй, дўмбира куй, кўпинча ўз номлари билан «Чўпони нома», «От ҳайдаш номаси», «Номабоши» деб юритилишини ва агар бу куйлар дoston сўзларига солиб ўқилса «номалар» дейилишини таъкидлайди. Туркман, қорақалпоқ бахши ва жиรวлари тилида ҳам дoston куй ва кўшиқлари «номалар» деб

¹ Абдурауф Фитрат. Ўзбек классик мусиқаси ва унинг тарихи. – Тошкент, 1993. – 6-бет.

юритилади. (қаралсин: О. Халимов тўплаб нашр қилдирган «Қорақалпоқ номалари». А. Хайриддинов тўплаган «Қобуз номалари», М. Жийемуратов ноталаштирган «Жиров номалари»). Шунингдек, Уйғур муқомларида ҳам «нома боши» ва «достон» номалари мавжуд.

Ўтмишда достон айтувчиларни гўянда, улар ижро этадиган йўлларни «нома» деб юритилиши «Бобурнома»да учрайди: «Созандалар соз чалдилар, гўяндалар нома айтдилар»¹ дейилади.

Эргаш Жуманбулбулнинг куйидаги шеърида эса Нурота (Кўрғон кишлоғи) мактаби услубига оид достон номалари санаб ўтилади:

*Йигирма хил оҳанг билан сўз айтиб,
Йигирма хил нома дўмбира чертиб,
Хоҳ катта, хоҳ кичик эшитса,
Ҳар қандай одамни балқитиб эритиб.*

Шеробод мактабининг машҳур бахшиси Умир шоир Сафар ўғли ижодига мансуб асарда эса Қамай мактаби номалари сони келтирилади:

*Эй дўмбирам гажакдор,
Ўттиз икки номанг бор.
Ҳаммаси ҳам мафтункор,
Бирин чалсам бири бор, –*

деб номалар сони қайд этилади. Умир шоирнинг ўғли, Ўзбекистон халқ бахшиси Қора бахши Умировнинг ахборот беришича, мазкур номалар сони Қодир бахши Раҳимов томонидан олтимиш тўрттагача етказилган. Бундай ривоятлар ва достонлардаги сўз устуворлигидан келиб чиқиб «нағма» эмас, балки «нома» деб юритилган бўлиши эҳтимолдан ҳоли эмас.

Олимларнинг фикрича, достончилик анъаналарида «нома» ва «нағма» аллитерацион ўзгаришга учраб мазмунан умумлаштириб юборилганлиги эҳтимол. Аслида, «нома» (форсча) ва «нағма» (арабча) ҳам луғавий, ҳам истилоҳий жиҳатлардан турлича, алоҳида ва мустақил тушунчалар бўлиб, маъно жиҳатидан фаркланади. Чалкашликлардан ҳоли бўлиш учун мазкур ибора

¹ Захириддин Муҳаммад Бобур. Бобурнома. – Тошкент, 1989. – 319-бет.

бахшилар тилида қандай аталган бўлса биз ҳам худди шундай, яъни «нома» тарзида ишлатишни маъқул кўрдик.

Хоразм дoston номалари ўзининг тугал шакли, очиқ овозда куйланиши, халқ кўшиқларига яқинлиги, дoston воқелигига боғлиқлиги, хуллас, ўзига хос ёрқин услуби билан ажралиб туради. Шунингдек, унинг заминида ўзбек, озарбайжон, туркман, қорақалпоқ, қисман қозоқ халқларининг ижодий алоқалари ҳам ўз аксини топган. Маданиятларнинг бундай кесишуви соз санъатининг бошқа турларига қараганда дoston куйларида изчилроқ намоён бўлиши диққатга сазовор. Бу ерда бахшиларнинг кўпчилиги туркман ва қорақалпоқ дoston куйларининг парда тузилиши, оҳанги, қочирим ва зарбларини моҳирона бажаргани ҳолда ўз санъатини кўшни халқларга манзур қила олганлар. Бундан кўришиб турибдики, бахшилар нафақат туркий тил лаҳжаларининг кўпчилигини билиши, балки уларнинг оҳанглари, бошқа мусиқий услубда бўлган дostonлар бадий воқелигини очиб берадиган куй номалар табиатини ҳамда пардаларини ўзлаштириши лозим бўлган.

Хоразм дostonчилигининг улкан намояндаларидан Бола бахши, Турсун бахши, Қамай мактаби таниқли вакиллари Қора бахши, Қаҳҳор бахши Раҳимов ва бошқа бахшиларнинг фикрича, мусиқий салоҳиятига кўра ширвоний услуб 72, эроний услуб 32, Қашқадарё–Сурхондарё воҳаларининг Қамай мактаби дoston куйлари эса 64 куй-номадан иборатлиги қайд этилади.¹

Ўзбек дostonларида қўлланиладиган номалар мақом ва ўзга мумтоз куй йўллари каби ўзига хос номланишга ва туркумланишга эга. Куйларнинг ички тузилиши, табиати, туркумларида ишлатиладиган ўрни ҳамда вазифасига қараб куй-номаларнинг мантиқий аҳамиятини белгиланиши ва улар барқарор сақланиб келинаётганлиги аниқланди.

Куйида баъзи номаларнинг номлари, дoston қаҳрамонларининг исmlарига нисбат берилганлиги, бастакор, бахши, созанданинг исми ёки тахаллуси билан боғлиқ нуқталарига қисқача изоҳ ва таъриф бериб ўтамиз. Шундай номалардан энг машҳури «Илғорлар» туркуми булиб, «илғор» – илдам, шахдам,

¹ Муаллифнинг дала ёзувлари. Қора бахши Умиров ахборотидан. 1991 йил.

олдинда борувчи маъноларини билдириб, доира усулларидаги зарбларида от туёқларининг йўрға юришидан тезроқ суръатдаги ҳаракати акс этади. Улар дoston куйлари ичида етакчи номалар қаторига киради. Бахшилар эшитувчилар диққатини кўлдан бермасдан, дoston воқеалари зерикарли бўлмаслиги учун, мазмуни ва шакли мос келадиган шеърларда «илғор»лардан бирини кўллайдилар. Бу билан тингловчиларда жўшқинлик кайфиятини тиклайдилар. «Илғор»ларнинг беш хили мавжуд бўлиб, «Тўрғўгли» туркумидаги «Қирқ минглар» дostonига нисбат берилган «Қирқ минг илғор», Суяв бахши ижодига мансуб «Илғор» ва «Илғор сарпардаси», эроний услуб номаларидан «Кўшим полвон илғори», шунингдек, «Илғор I» ва «Илғор II» номалари мавжуддир. «Қора дали» – қора ёлли, тусли отга нисбат берилган бўлиб, бу нома ҳақида кекса созандалар орасида ҳар хил ривоятлар мавжуд.

«Тўрғай» – куш номига берилган нисбат. Унинг бошқа бир тури ҳозирги даврда Хоразм сурнайчилари томонидан ижро этилади. Бу куй «Тўрғай чириллама» деб ҳам аталади. Ривоятларга қараганда, тўрғай Оллоҳнинг минг бир номини такрорлашга ҳаракат қилиб учиб сайрар, аммо тепага кўтарилганда мингтасини айтиб, биттасини эсидан чиқарар ва ерга қайтиб эсига тушириб, учиб сайраганида яна эсидан чиқиб қолар ва бу жараён тинмасдан такрорланар экан. Сурнай тўрғайнинг ана шу зайлдаги сайрашига тақлид қилиб чалинади. Бу куйнинг давомига устоз сурнайчилар «Зувоний», яъни тўрғайнинг забон – тил очиши ёки тилга кириши, «Ротолло» – роҳи Оллоҳ, яъни «Оллоҳнинг йўли», «Бироллойим» – «Оллоҳим ягона» куйларини улаб ижро қилганлар. Кўшиқ шаклларида эса уларнинг ҳар бири тасаввуф йўлидаги ғазалларга айтилган. Кейинги пайтларга келиб бу асарларнинг суръатлари тезлашиб, масхарабозларнинг ўйинларига жўр бўлувчи рақс куйларига айланган. Раққослар ва масхарабозлар ҳаракатларида, асосан, кушларга тақлид қилиш ва тотемизм унсурлари сезилади. «Эшвой» – XVIII аср охири – XIX аср бошларида яшаган машхур Эшвой бахши исмига нисбат берилган куй бўлиб, унинг шоғирди Муҳаммаднийёз Гуржа ижодига мансуб дейилади. Бу туркумининг «Курд эшвойи», «Фарғона эшвойи – I», «Туркман эшвойи»,

«Эшвой урганжий», «Қоракалпоқ эшвойи» каби йўллари мавжуд. «Эшвой» ва «Курд эшвойи» саккиз бўғинли шеърларга боғланади.

«Хоразм мусиқий тарихчаси» китобида айтилишича, «Суяв бахшининг ўз тарафидан чиқарган 7–8 нағмаси бўлиб, ҳар бирлари ҳам халқ тарафидан ғоят мақбул ва сеvimли нағмалардур» деб, унинг еттита асари каторида «Эшвой» ҳам санаб ўтилади. Фикримизча, бу машҳур кўшиқни дастлаб ўша Эшвой бахшининг ўзи басталаган, қолганлари эса унинг шоғирдлари томонидан яратилган нома турлари бўлиши мумкин.

Бу ўринда қиёсий таққослаш учун Қамай дostonчилик мактабига мансуб дўмбира куйлари ва жиром номаларни келтириш қизиқарли бўлиб, булар Бекмурод бахши Соатов, Қора бахши Умиров, Бойкул бахши Мирзаев, Қахҳор бахши Раҳимов, Жовли бахши Тангиров, Абдумурод бахши Раҳимов, Муҳаммади бахши Даминов, Алихон Рўзиевлар ижро қилган куй йўллари дир. Қамай дostonчилик мактабида 32 нома бўлганлиги юқорида айтиб ўтилган эди. Қодир бахши ва бошқа бахшилар куй яратишда мавжуд номаларни асос қилиб олганлар ва уларнинг йиғиндисидан туркумлар келиб чиққан. Мисол сифатида «Келиной» туркуми ўз ичига қирққа яқин номани бирлаштиради, булар: «Норгулой», «Ўғилой», «Ойпари», «Гулдона», «Гулойим», «Иқболой», «Қиз юриши», «Келин нома», «Хадича» ва ҳ.к. «Чўпони» туркуми ҳам «Кўйнинг кавш қайтариши», «Кўзи маъраш», «Чўпонлар баҳси» каби номаларни ўз ичига олади. От таърифи эса «От ҳайдаш», «Отни безаш», «Отни чақириш», «Отнинг келиши» ва бошқа номалардан ташкил топган. Шунингдек, баъзи номалар билан боғлиқ воқеа ва ривоятлар ҳам жуда қимматли дир. Булардан бири «Лақай жилаш» (йиғлов, йиғлаш) чолғу йўли бўлиб, бу нома Амир Музаффар замонидаги воқеаларга тегишли эканлиги нақл қилинади.

Ўзбек халқ дostonчилигида шеърлар солиб айтила диган номалардан ташқари соф чолғу мусиқаси, яъни дўмбира куйлари («бахши куй») ёки махсус мўлжалланган куй ва номалар мавжуд. Бу куй йўллари дoston воқеалари мантиқий ривожини шакллантиришда муҳим омил бўлиб хизмат қилади. Дўмбира куйлари-

нинг кўпчилиги заҳматкаш устоз Файзулла Кароматлининг «Узбекская домбровая музыка» китобида ўз аксини топган.

Хоразм дostonларининг ҳар бир қўшиқ-номаси, энг аввало, муқим, тугал куй шаклида гавдаланади. Шунга эътиборан мазкур номаларни муайян мусиқий воситалар мажмуи сифатида ҳам баҳолаш мумкин. Бошқача айтганда, унда воқелик ва мазмун изми билан бир қаторда, ўзига хос мусиқий мантик, асос анъана тарзида барпо этилган шеърий-мусиқий тузилма қад кўтаради.

Достон номаларининг баъзилари маълум пардадан бошланиб, бошқасида тугайдиган ҳоллар учрайди. Бундай номаларга иккала парда ҳам тоник асос бўлиб хизмат қилади. Агар Оврупо лад тизимига киёслайдиган бўлсак, бунда кўпчилик номаларнинг лад тузилмалари миксолидийсига тўғри келади. Айниқса, мақомларга ўхшаб кўша ладларнинг учраши диққатга сазовордир. Булар, асосан, дорий-миксолидий, эолий-дорий, миксолидий-ионий ва бошқалар. Номаларнинг бундай кўша ладларда келишини уларнинг авжлари ҳам ўзгартира олмайди. Авжларга уланадиган оҳанглар ёки шеър тўртликлари ўртасидаги чолғу нақоратлари ва кўпинча номалар якунидаги туширимлар асосий лад чизиғини бошқа тонга ўзгартирувчи парда сифатида келиши кузатилади.

Халқ куй ва қўшиқлари сингари номалар ҳам турли ҳажмда шаклланган бўлиб, дoston қаҳрамонлари киёфаларини очиб беришга, воқеалар ривожи ва зиддиятларни ривожлантиришга, шеърий матнлар ва дostonнинг умумий таъсирчанлигини оширишга хизмат қилади. Уларнинг ҳар бири катта ёки кичиклигидан қатъи назар зукко бахшиларнинг бадийий, жумладан, мусиқий тафаккури маҳсули сифатида турлича шакллангандир. Буларни нафақат адабий-бадийий, балки умри боқий мусиқий хазинамиз дурдоналаридан десак янгилишмаймиз. Хоразмча қўшиқ, куйларнинг узоқ ва яқин ўтмишда, ҳозир ҳам ўйноқи, жозибадор, ҳаётбахш, кишини ўзига оҳанрабодек тортишининг боиси ҳам ана шу воҳа мусиқасининг туб заминидан дoston қўшиқларининг, хусусан, ширвоний номаларнинг етакчи ўринлардан бирини эгаллашида бўлса ажаб эмас.

Достон қадимда кўчманчи, ярим кўчманчи ва ўтроқ туркий элатлар ўртасида, асосан, чорвачилик билан шуғулланувчи аҳоли

орасида пайдо бўлиб, касбий бадий ижодиётнинг илк кўринишидир. Бизгача етиб келган намуналарни мавзу мазмунига кўра шартли равишда бир неча тоифага таксимлаш мумкин. Ижро услублари, шаклланиши, ҳудудий ўзига хосликлари жиҳатидан эса турли мактаб ва бахшилиқ марказларига ажратилади.

Истиқлол шарофати ила миллий қадриятларимиз қайта тикланиб, халқ достонлари, достон мусикасига ва ижрочилигига қизиқиш тобора ортиб бормоқда. Достонларнинг бадий намуналари ҳозирги давримизда ҳам ўз маънавий ва тарбиявий аҳамиятини йўқотгани йўқ. Уларни кундалиқ турмушимизда радио тўлқинлари, «ойнайи жаҳон» оркали хонадонимизда янграб турадиган кўркем ва умри боқий ижодиёт дурдоналари эканлиги барчага аён. Бу мерос ёшларимиз маънавиятини шакллантиришда, уларни ҳар томонлама комил инсон қилиб вояга етказишда салмоқли маънавий озуқа бера оладиган ғоявий ва руҳий битмас-туганмас манба эканлигига шубҳа йўқ. Ушбу маънавий меросни кўз қорачигидек авайлаб асраш, бойитиш, раванқ топтириш, тарихий–назарий–амалий асосларини янада кенгрок ва чуқуррок ўрганиш, ижодий ўзлаштириш муҳим вазифалар каторида туради.

Аббос
ТУРСУНҚУЛОВ

(1955 йилда туғилган)



Аббос Турсунқулов 1955 йилда Жиззах вилояти Бахмал тумани Лойқа қишлоғида туғилган. Самарқанд давлат педагогика институтининг Ўзбек тили ва адабиёти факультетида ўқиган (1971–75). ЎзР ФА Алишер Навоий номидаги Адабиёт музейи лаборанти (1975–77), Қўлёмалар институти Фольклор бўлимининг кичик илмий ходими, катта илмий ходими (1977–1987), ЎзР ФА Алишер Навоий номидаги Тил ва адабиёт институти Фольклор бўлимининг катта илмий ходими (1987–88) бўлиб ишлаган. Тошкент Қишлоқ хўжалик институти (ҳозирги Тошкент давлат аграр университети)нинг тайёрлов бўлими ўқитувчиси, Кутубхона директори, Ўзбек ва рус тиллари кафедраси мудири бўлиб ишлаган (1989 йилдан). Ҳозир Жиззах давлат педагогика институтида доцент вазифасида фаолият олиб бормоқда. «Ўзбек фольклорида биографик ва автобиографик асарлар ҳамда уларнинг зоявий-бадиий хусусиятлари» мавзuida номзодлик диссертациясини ёқлаган (1985). «Кунларим дostonида бахши-шоир образи» (1977) «Ўзбек фольклорида автобиографик дostonлар» (1977), «Эргаиш шоирнинг «Таржимаи ҳол» дostonи ҳақида» (1981), «Фольклор асарларини ёзиб олиш методи-каси» (1982) «Автобиографик дostonларнинг жанр хусусиятлари» (1983), «Ўзбек халқ дostonлари каталоги» (1986, ҳамк.), «Фольклор практикаси» (1993, ҳамк.) каби илмий асарлар муаллифи.

АВТОБИОГРАФИК ДОСТОНЛАРНИНГ ЖАНР ХУСУСИЯТЛАРИ

Ўзбек халқ бахшилари кексайгач чоғида, достончиликда бадий камолот чўққисига кўтарилгач, ўтган кунларини эслаб автобиографик асар яратиш учун ўзларида руҳий эҳтиёж сезадилар. Фозил шоирнинг 80 ёшда, Эргаш шоирнинг 60 ёшда, Ислом шоирнинг 77 ёшда, Абдулла шоирнинг 82 ёшда, Саидмурод Паноҳ ўғлининг 80 ёшда ўз таржимаи ҳолларига оид асар яратишлари фикримизнинг исботидир. Чунки автобиографик асар яратиш учун бахшилардаги кучли қувваи-ҳофизасининг ва беқиёс бадиҳагўйликнинг ўзигина етарли эмас. Булардан ташқари, яратиладиган асарнинг бадий материалларини бахши ўз бошидан кечириши ва шулар асосида бадий асар яратиш учун ўзларида руҳий эҳтиёж, ижтимоий масъулият сезишлари ҳам зарур. Шу сабабли автобиографик достонлар учун энг муҳим ҳаётий материал бахшининг ҳаёт йўлидир, бу йўлнинг ибратли томонларини бошқаларга юқтира билиш маҳоратидир.

Автобиографик достонлар автобиографик образнинг фаоллиги билан бошқа жанрлардан фаркланиб туради. Асарда тасвирланган барча воқеа-ҳодисалар автобиографик образ атрофида умумлаштирилади, образлар, персонажлар, унинг тушунчасида, мақсадига мувофиқ шакллантирилади, портретлаштирилади. Тасвирланадиган ҳаётий ҳақиқат ва бадий тўқималар, образ ва персонажлар автобиографик образ томонидан тартиблаштирилади. Шу асосда унинг «Мен»и асарнинг асосий жанрини белгиловчи функция даражасига кўтарилади.

Автобиографик достонлардаги бахшининг «мен»и анъанавий достон ва термалардаги қахрамонларнинг «мен»идан мазмунан фарқ қилади. Чунки бахшининг «мен»и унинг ҳаётини тасвирловчи бадий фигура экан, янги тарихий давр, унинг ўзига хос асосий хусусиятлари билан муайян боғлиқликда ҳаракат қилади. Шу сабабли янги ҳаётдаги ўсиш-ўзгаришларни лиро-эпик кечинмаларда акс эттирувчи «мен»и нинг ҳам вазифаси ўзгаради, такомиллашади. Янги инсон характерида рўй бераётган ўзгаришларни типик шароитда акс эттириш ва шу асосда мавжуд тарихий

даврнинг энг характерли томонларини очиб бериш унинг асосий мавзу доирасини белгилайди. Бахшининг «мен»и билан тарих, шиддатли замона ўртасида муайян таркибий боғлиқлик вужудга келади. Чигиртка воқеаси билан (1898–1909) Эргаш шоир оиласининг ҳалокати ўртасидаги боғлиқлик, Фозил шоирнинг Кенагас ариғини қазишга мажбуран бориши ва унинг қалбида жамиятга қарши норозилик уйғониши мавжуд давр ва бахши «мен»ининг муайян бирлиги ифодасидир. Бу икки бирликнинг (яъни объектив борлиқ ва субъектив «мен») таркиб топиши ва амалга ошиши жанр табиатининг такомилидан, жанр хусусиятининг янги йўналишидан дарак беради.

Бахшилардан ёзиб олинган автобиографик дostonларни танланган объектларни қандай эпик кўламда ёрита олишларига ва ҳикоя қилиш услубларига қараб уч турга ажратиб таҳлил этиш мумкин. Ана шу таҳлил жараёни ҳар бир бахшининг бутун ижодий репертуарига хос ўз «йўл»ини, услубини ҳам ёритишга имкон беради. Бахшилар ижодида кўзга ташланиб турадиган ижодий унсурлар, ўзларига хос белгилар анъанавий репертуарга нисбатан автобиографик дostonларида яна ёрқинлашиб, қабариб кўрилади. Чунки автобиографик асарлар ҳар бир бахшининг ижодий эволюцияси, унинг инсон ва бахши бўлиб шаклланишига таъсир кўрсатган объектив ва субъектив омиллар ҳақида ҳикоя қилади.

Биринчи турдаги автобиографик дostonларда бахши ҳаётининг маълум бир даври ажратиб олинади ва шу давр, имкони борича, тўлиқроқ, ёрқинроқ ёритилади. Бу турга биз Эргаш Жуманбулбул ўғлининг «Таржимаи ҳол» дostonини киритишимиз мумкин. Бу дostonда тасвирланган воқеалар тахминан шоирнинг 40 ёшларигача бўлган ҳаётини ўз ичига олади. Лекин муҳими унинг ёшида эмас. Бу давр Эргашни инсон сифатида шакллантирган, ижодкор сифатида «оёққа турғизган» ва донғини оширган, шунинг билан бирга ситамкор ҳаётнинг ёвуз гирдобларига отган, ҳаётини энг фожиали из қолдирган давр эди. Шоир дostonда ҳаётининг ана шу даврини тасвирлар экан, мавжуд тузум биографиясини ўз оиласи талқинида очади. Дostonга ўз оила аъзоларининг фожиасини (укалари, икки синглиси, энаси вафо-

ти, вабо касали, очлик, ниҳоят, ўзининг дарбадар кезиши) олиб кирар экан, бу даҳшатли воқеалар ўқувчи кўз ўнгида давр фожеаси сифатида намоён бўлади.

«Таржимаи ҳол» достонида Қўрғон дostonчилик мактабининг ўтмиш вакиллари ҳақида ҳам бой маълумотлар келтирилган. Эргаш шоирнинг беш ота-бобоси (Ёдгор, Уста Лафас, Мулла Тош, Мулла Холмурод, Жуманбулбул) ва чечан бахши бўлиб етишган икки укаси (Абдужалил ва Абдужамил) билан боғлиқ воқеалар, уларнинг дostonчиликдаги ўрни, дoston куйлаш маҳорати, соз ва сўзга бўлган муносабатлари, умуман, дoston куйлаш санъати ҳақида қизиқарли маълумотлар баён қилинган. Шу асосда дostonда бахшининг ижодкор оиласи билан боғлиқ автобиографияси бири иккинчисидан ажралмас ҳолда тасвирланади, ўрни билан баъзи ҳолларда бири иккинчисини тўлдиради ва шу орқали мавжуд тузумнинг биографиясини тўлиқроқ ёттишга имкон яратилади. Дoston Эргаш шоир ва у мансуб бўлган Қўрғон дostonчилик мактабига хос «чуқур лирик тасвирлар, шеърӣй безаклар, тафсилотларни кенг ва атрофлича ишлаш, нозиклик ва ёқимлилиқ» хусусиятлари бўртиб туради.

Иккинчи турдаги автобиографик асарларда бахшининг туғилганидан тортиб то дoston яратилган вақтгача бўлган ҳаётининг муҳим қирралари тасвирланади. Бу типдаги дostonларда бахши ҳаётида муҳим из қолдирган воқеалар нисбатан кенгрок ёритилиб, бошқа даврларни йўл-йўлакай изоҳ тарикасида эслатиб ўтиши мумкин. Бундай дostonлар турига Фозил шоирнинг «Кунларим» асарини мисол қилиб келтиришимиз мумкин. Бунда бахшининг 80 ёшгача бўлган ҳаёти тасвир объекти қилиб олинган. Шоирнинг ёшлиқ даври (тахминан 20 ёшларча бўлган) атрофлича, кенг кўламда тасвирланади. Чунки бу давр Фозил шоир қалбида ўчмас из қолдирган, гўдаклигиданок ҳаётнинг зулмкор тўлқинлари уни ҳар томон итқитган, халқ дардини ва халқ ғамини куйловчи бахши қилиб шакллантирган, ҳам ситамкор ва жаҳолатли, ҳам тарбиячи ва мураббий бўлган мураккаб бир давр эди.

Фозил шоир «Кунларим» достонида конфликтни кучайтириш мақсадида айрим ҳолларда ўз ҳаётига оид бўлмаган факт-

ларни ҳам «ўзиники» қилиб тасвирлайди. Достонда тасвирланишича, дин, шариат пешволаридан бири – мулла Қорабой исмли қозининг ҳукми билан ҳеч бир асоссиз, куруқ тухмат билан Фозил шоир қамалади. Аслида эса Фозил шоир ҳеч қачон қамалмаган. Лекин халқ ғамини, халқ дардини куйлаган эрқарвар бахшиларнинг ҳаёти ўтмишда доим таҳликали эди. Бундай фактлар бошқа халқ шоирлари биографиясида қўплаб учрайди. Масалан, Хўжаназар бахши 1916 йил қўзғолонида иштирок этгани учун жазо отряди томонидан отиб ташланган. Нурмон шоир Номоз ҳақида достон куйлагани учун Каттақўрғон турмасига қамалган. Булардан яхши хабардор бўлган Фозил шоир ўз биографиясида бўлмаган, лекин муайян умумийлик касб эта оладиган фактни «ўзиники» қилиб тасвирлаш орқали достондаги конфликтни кучайтирган, бадийлигини оширган, муҳими, даврнинг тасвирини реаллаштирган.

«Кунларим» достони икки қисмдан иборат бўлиб, биринчи қисмда бахши образи ҳикоя қилинаётган воқеа-ҳодисаларнинг иштирокчиси сифатида кўринса, иккинчи қисмда ҳикоя қилинаётган воқеа-ҳодисаларнинг жонли гувоҳи тарзда намоён бўлади. Автобиографик образ қай тарзда намоён бўлмасин, унинг ҳикояларидаги воқеалар тизимида Булуғур достончилик мактабининг донғини оширган қаҳрамонлик достонларига хос хусусиятларнинг белгилари қабариб туради.

Учинчи тур автобиографик достонларда бахшиларнинг ҳаёти умумхалқнинг ҳаёт тарзи билан шу қадар боғланиб, қўшилиб кетадики, натижада уларнинг индивидуал ҳаёт йўли ёрқин кўринмайди. Автобиографик образ эса индивидуал қаҳрамон сифатида камолга етмайди. Ислом шоирнинг «Бахтиёр авлодлар», Саидмурод Паноҳ ўғлининг «Кунларим» достонлари ана шулар жумласидандир. Бу типдаги достонларда автобиографик образнинг ҳаёт йўли мавжуд давр биографиясини ёритишга восита бўла олмайди. Айниқса, давр тасвирида автобиографик образнинг айрим хиралашган белгилари кўзга ташланади. Ислом шоирнинг «Бахтиёр авлодлар» достонида давр тасвири лирик-романтик жўшқинликда акс эттирилади. Автобиографик ҳикоячи эса жўшқин нотик сифатида намоён бўлади. Хоҳ ўтмишнинг чир-

кин томонларини, хоҳ совет турмушини бўлсин, ёркин, рангдор бўёқларда акс эттирилиш ва шу орқали тарғибот ундовни кучайтириш бу дostonга хос хусусият ҳисобланади. Лекин бу хусусият қахрамоннинг аниқ фаолиятини ва конкрет тарихийлигини хиралаштириш, унинг ўрнига умумий фаолиятни ошириш, бўртириш эвазига пайдо бўлганлиги асарнинг камчилигидир.

Автобиографик дostonлар маълум бир бахшининг ҳаёти, ижод йўли, дунёқараши, хуллас, индивидуал хусусиятларни акс эттирилганликлари учун шогирд томонидан анъанавий репертуар сингари устоз бахшидан ўзлаштирилмайди, балки шундай асарлар яратиш йўли ўрганилади. Ўтмишда яшаган бахшилар репертуарлардаги автобиографик асарларнинг бизгача етиб келмаганлигига ва улар ҳақида маълумотларнинг йўқлигига ҳам сабаб анъана шу. «Бироқ етакчи бахшининг муайян ҳаёт йўлини ўтгач, ўз турмуши ва дostonчилик фаолияти ҳақида автобиографик асар яратиши анъанаси илгаридан бўлганлигини тахмин қилиш мумкин. Бизнинг мулоҳазамизни бир қатор термалар («Дўмирам», «Нима айтай?», «Кунларимни» каби), айрим фольклор намуналаридаги қадимги эпик куйчи образи (Қўрқут ота каби), баъзи дostonлардаги («Юсуф билан Аҳмад», «Хирмондали» «Ошиқ Ойдин», «Ошиқ Алванда», «Нажаб ўғлон» ва бошқалар) бахши типи ва ниҳоят, «Мулла Ғойиб», «Маҳтумқули», «Оллоназар Олчинбек» сингари асарларнинг дostonчилик репертуарида мавжудлиги ҳам тасдиқлай олади... Устоз бахшилар асос солган ва оғзаки давом эттириб келган йўл ва анъаналар Эргаш шоир, Фозил шоир, Абдулла шоир, Ислom шоирларнинг ҳаёт йўли, шахси мисолида «янгиланган».

*Исомиддин
ЁРМАТОВ
(1956 йилда туғилган)*



Исомиддин Тургунович Ёрматов 1956 йил 5 апрель, Тошкент вилояти, Оҳангарон туманида туғилган. Тошкент вилоят давлат педагогика институтининг филология факультетида (1973–1977), ЎЗР ФА Алишер Навоий номидаги Тил ва адабиёт институтининг аспирантурасида ўқиган (1984–1986). Тошкент вилоятининг Оҳангарон туманидаги М. Уйғур номи 30-ўрта мактабда ўқитувчи бўлиб ишлаган (1977–1979). Тошкент вилоят давлат педагогика институти Ўзбек тили ва адабиёти кафедрасида ўқитувчи (1983–1987), доцент (1987). Ҳозирги кунда Ангрэн шаҳридаги ихтисослашган академик лицей раҳбари. «Ҳозирги ўзбек адабиётида фольклоризмлар типологияси» мавзусидаги номзодлик (1985), «Алпомиш» достони поэтикаси» мавзусида докторлик (1994) диссертацияларини ҳимоя қилган. «Алпомиш» достони поэтикаси» (1993), «Илоқ тарихи» (2005), «Юқори Оҳангароннинг табиати, тарихи ва маданияти» (2008), «Қорасув ёқалаб» (2010), «Саодат водийси» (2014) каби монографиялар муаллифи.

**ЎЗБЕК ХАЛҚ ИРИМ АЙТИМЛАРИНИНГ
ЖАНР ХУСУСИЯТЛАРИ**

Маълумки, халкимиз турли табиий ҳодисаларни мунтазам кузатиб келган, об-ҳаво ўзгаришларини маҳаллий белгиларга

қараб аввалдан аниқлашнинг йўлларини излаган, жониворлар, ўсимликлар ва осмон жисмларининг муайян ҳолатига қараб яқин ёки узоқ муддатда рўй бериши мумкин бўлган табиий ходисаларни, қурғокчилик ёки ҳосилдорлик аломатларини чамалаган, қолаверса, одамларнинг гавда ва юз тузилишларига, хатти-ҳаракатларига ёки кўрган тушига қараб тақдирларини аниқлаган. Шу сингари билимларнинг амалий натижасини кузатгани учун кейинги авлод вакиллари унга нисбатан табиий эҳтиёж сезган ва ўрганиб ўзлаштирган. Халқнинг асрлар мобайнида оғзаки тарзда яратиб, сақлаб келган мақол, матал, афсун, дуо, қанотли сўзлар, аниқ ифодалар (грегория), мантиқий ва ғайримантиқий иборалар (парадокслар), йиғи, йўқлов, олқиш, қарғиш, топишмоқ ва образли (юмуқ) ибора, фол ва ирим сингари кичик ҳажмли фольклор асарлари паремиологик жанрлар, деб юритилади¹.

Шу ўринда бир тушунчага аниқлик киритиб ўтиш лозим бўлади. Масаланинг моҳияти шундан иборатки, юқорида саналган жанрлар барча халқларнинг кундалик маиший ҳаётида алоҳида ижрочи, ижро ўрни ёки фурсатини танлаб ўтирмай қўлланаверадиغان айтимлардир. Халқ ижодиётининг дoston, эртақ, ривоят, афсона, ўлан ва бошқа жанрлари учун эса махсус тайёргарлик кўрган шахслар маҳорати, алоҳида вақт ва жой талаб этилади. Шундай экан, ҳажман катта ва соф бадиий вазифани ўтовчи жанрлардан фарқлаш мақсадида биз грекча «*ragemia*» атамасига «айтим» сўзини синоним ҳолда қўллаш таклифини киритамиз. Соф бадиий вазифани адо этмайдиган кичик жанрларни тадқиқ этган бир қатор ўзбек фольклоршунослари ҳам «айтим»ни умумлаштирувчи маънода қўллаганлар. Мисол: «Чақалокни бешикка белашда айтиладиган айтим-олқишлар турли жойларда

¹ Бу ҳақда қаранг: Гусев В. Е. Эстетика фольклора. – Л., Наука, 1967. – стр. 98–163; Пропп В. Я. Принципы классификации фольклорных жанров // Фольклор и действительность. – М.: Наука, 1976. – стр. 34–45; Путилов Б. Н. Историко-фольклорный процесс и эстетика фольклора // Проблемы фольклора. – М.: Наука, 1975. – стр. 12–21; Мирзаев Т., Саримсоқов Б. Ўзбек фольклорининг жанрлар состави // Ўзбек фольклори очерклари. 1-жилд. – Тошкент, 1988. – 126–134-б.

турлича бўлса ҳам, ...мазмунан яқин»¹. «Биз халқ йиғилари атамасини мотам маросимларида ижро этиладиган айтимлар маъносида ишлатамиз»². «Мотам маросими бир неча ички маросимлардан ташкил топган бўлиб, унинг ҳар бири ўз айтим-қўшиғига ҳам эгадир»³.

Турли тадқиқотлар учун объект вазифасини ўтаган айтим-олқиш, айтим-дуо, йиғи-айтим, айтим-қўшиқ сингари ўзбек фольклори жанрлари мавжуд бўлгани ҳолда кундалик оғзаки нутқимизда, эҳтимолки, улардан фаолроқ қўлланувчи ирим-айтим деган жанр нега бўлмаслиги керак, деган ҳақли савол туғилади. Бу жанр тўғрисида сизнинг аниқ тасаввурингиз ҳосил бўлмоғи учун учун баъзи мисолларни келтириб ўтамиз: «Турналар осмонда доира ҳосил қилиб ўйинга тушса, кунлар исийди»; «Кечкурун тирноқ олинса, оиласидан кимдир ўлади»; «Қозонни кечки овқатдан сўнг сувга тўлдириб қўйилса, эгасига ризқ тилаб туради»; «Қизлар овқат пишираётганида кафтгирни қозонга урса, қайнонаси эзма бўлади»; «Ёстикқа ўтирса, боши оғрийди»; «Дастурхонда калит турса, жанжал чиқади»; «Сигирнинг думи узун бўлса, серсут бўлади».

Кези келганида «айтим» тушунчасининг халқ ибораларидан фарқи масаласига тўхталиб ўтиш жоиздир. «Ибора бирор тушунча ёки фикр ифодаловчи сўзлар бирикмаси; таъбир. Образли ибора... Фразеологик ибора маъно жиҳатдан яхлит бир бутунликни ташкил этувчи бир неча сўзлардан иборат бирикма»⁴.

Халқ айтимлари ибора ёки сўз бирикмасининг ҳажми ва мазмун доираси билан чегараланмайди. Айтайлик, дуо, сўқиш, олқиш ёки йиғи-айтимлар бир неча содда ва кўшма гаплардан ташкил топиши мумкин. Жонли ижрода эҳтиёж туғилганида ай-

¹ Кўчқоров Н. Ўзбек халқ олқишларининг жанр хусусиятлари ва бадиияти: Филол. фанлари номзоди диссертацияси. – Самарқанд, 1994. – 73-б.

² Музаффарова С. Ўзбек халқ йиғи-йўқловларининг жанр таркиби ва бадиияти: Филол. фанлари номзоди диссертацияси. – Тошкент, 2000. – 42-б.

³ Ўраева Д. С. Ўзбек мотам маросими фольклори (жанрий таркиби, генезиси ва бадиияти: Филол. фанлари доктори диссертацияси. – Тошкент, 2005. 29-б.

⁴ Ўзбек тилининг изоҳли луғати. Икки томли. 1-том. – М.: «Рус тили», 1981. – 78-б.

тимлар ибораларни ўз ичига синдириб юборади. Мисол учун «Илоё бошинг тошдан бўлиб, сафаринг бехатар ўтсин» олқиши ёки «Икки оёғинг бир этикка тиқилмай, ўл!» қарғишининг таркибига кирган турғун иборалар буни тасдиқлайди. Шу боисдан ибораларни ўзбек халқ айтимлари билан тенг қўймаслик зарур.

Демак, биз ўзбек фольклорининг кичик жанрлари қаторида олиб ўрганаётган ирим айтимлар неча минг йиллардан буён фаол истеъмолда қўлланилиб келади ва ўзга паремик жанрларга ўхшаш ҳамда фаркли бўлган бир қатор хусусиятлари билан ажралиб туради. Энди ўрганилаётган жанр номидаги «ирим» сўзининг маъноси хусусида ҳам тўхталиб ўтсак. Унга «Ўзбек тилининг изоҳли луғати»да қуйидагича таъриф берилган: «Бирор мақсад, ният билан қилинган хурофий тадбир, мас. тўйдан яхши ният билан бирон нарсани олиб кетиш, дард-балони қайтариш, зиён-заҳматдан, кўз тегишдан сақланиш учун учун бирон нарсани бошдан ўгириб ташлаш...»¹

«Ўзбекистон миллий энциклопедияси»да ҳам «ирим» истилоҳига ўрин ажратилган бўлиб, қуйидагича изоҳланган: «Кишиларга ғайритабиий ҳодисаларнинг таъсир қилишига ишониб, бирор ният билан қилинадиган хурофий иш, хатти-ҳаракат. Ирим кишиларнинг ўзларини эҳтиёт қилиш, бировларга яхшилик тилаш ёки зиён етказиш ва б. ниятларда қилинади. Иримнинг турлари жуда кўп ва жаҳондаги деярли ҳамма халқларда учрайди. ...Илгари фарзандларга исм қўйишда ҳам ирим қилинарди. Мас. йўлда туғилган болага Йўлчи, сафарда туғилган болага Сафар деб исм қўйилган. Ирим бир томондан, кишиларнинг эзгуликка интилишлари... билан боғланиб кетади, иккинчи томондан, табиат ва жамиятда қандайдир ғайритабиий сеҳрли кучларнинг борлигига ишонишга асосланади... Кишиларнинг амалда табиий ва ижтимоий кучларни тобора ўзларига бўйсундириб боришларига қараб, иримлар йўқолиб боради»².

Кўринадики, ирим-айтим тушунчаси рус тилининг В. Даль, В. В. Радлов, С. Ожегов ва бошқа олимлар томонидан тузилган

¹ Ўзбек тилининг изоҳли луғати. Икки томли. 1-том. – М.: «Рус тили», 1981. – 146-б.

² Ўзбекистон миллий энциклопедияси. 2-жилд. – Тошкент, 2000. – 165-б.

изохли луғатларида келтирилган «предзнаменование», «нерушимое наставление», «предвестье», «изреканье» ёки «поучение» сўзлари англадиган умумий маънога тўғри келади. Сўз ва унинг сеҳр-қудратига асосланган фольклор жанрлари рус фольклоршунослигида В. Я. Пропп, В. Е. Гусев, Б. Н. Путилов, С. Г. Лазутин, К. В. Чистов, Е. Мелетинский, Ф. Миклошич ва бошқа олимлар, ўзбек фольклоршунослигида эса Ҳ. Т. Зарифов, М. Алавия, Т. Мирзаев, Б. Саримсоқов, З. Ҳусайнова, К. Имомов, М. Жўраев, О. Сафаров, С. Р. Мирзаева, Д. Ўраева, Б. Соатов, Н. Кўчқоров, Н. Қосимов, С. Музаффарова, М. Ёқуббекова, Ф. Эшбоева ва бошқа олимларнинг тадқиқотларида атрофлича ўрганилган. Аммо халқимиз минг йиллардан буён кундалик турмушда қўллаб келаётган анъанавий ирим айтимларни синчиклаб ўрганишга фольклористик эътибор энди бошланмоқда.

Халқимиз ирим-сиримларни унутгани йўқ. Ирим айтимлар эса янги авлод томонидан бобо ва момолар нутқидан ўзлаштирилмоқда, нима учун шундай дейилишининг туб сабаблари суриштирилмоқда. Уларда халқимизнинг асрий қадрияти образли ва таъсирчан тарзда ўрин олганлиги кўпчилик ёшларни хайратга солмоқда. Бошқа паремиологик жанрлар каторида ирим айтимларни синчиклаб ўрганишга бўлган эҳтиёжнинг ижтимоий-маиший сабаблари мана шунда. Бинобарин, ўзбек халқ ирим айтимларининг паремик жанр сифатидаги хоссаларини батафсил ёритиш, халқнинг айтим руҳиятига мойиллигини келтириб чиқарувчи ижтимоий-маиший сабабларни аниқлаш, айтимлардаги структурал барқарорликни таъминловчи поэтик унсурлар табиатини очиб бериш, ўзбек халқ айтимларидаги образлар тизими ва бадий деталнинг вазифаларини белгилаш, айтимлардаги интонацион, тасвирий ва таъсирчан воситаларни таҳлил қилиш, анъанавий ирим айтимларининг ўзбек халқ олқиш, йиги, афсундуо, қарғиш ва бошқа паремик жанрлар билан умумий ва фарқли жиҳатларини аниқлаш масалалари долзарб бўлиб турибди.

Ирим айтимлар асрлар мобайнида огзаки ҳолда яратилиши ва айтиб келиниши жараёнида вариантилилик, ўзгарувчанлик, оммавийлик, анонимлик, кўп элементлилик ва анъанавийлик хусусиятларини орттирганлар. Кимдир ирим айтимлар ўзбек халқ огзаки

бадий ижодиётининг жанрларига қўйиладиган юқоридаги хусусиятларга эга бўлганлари билан адабиётга қандай алоқаси бор, фольклор бу – оғзаки бадий ижод-ку, – деган саволни бериши мумкин. Тўғри, бадийлик – оғзаки ва ёзма адабиётнинг бош мезони. Ижодкорлар туғма истеъдоди, тажриба ва маҳоратига қараб имконият даражасида гўзал бадиият намуналарини яратишга интиладилар, албатта. Лекин адабиётнинг шундай жанрлари борки, уларнинг вазифадошлиги ҳамма вақт юксак бадиият талаблари билан белгиланмайди. Мисол учун очерк, йиғи-йўқлов, афсундуо, туш таъбири, фол, сўкиш ва ҳоказо жанрлар ўқувчи ёки тингловчига эстетик завқ беришдан кўра ахборот ташиш (коммуникатив) ёки маиший-амалий (утилитар) функцияни адо этадилар. Т. Мирзаев: «Халқ ижоди (фольклор) тушунчаси халқ оммасининг бадий, ижодий-амалий ва ҳаваскорлик фаолияти билан боғлиқ бўлган анъанавий моддий ва номоддий маданиятнинг халқ оғзаки бадий ижоди (фольклор), халқ мусиқаси (мусиқа фольклори), халқ театри (томоша санъати), халқ ўйинлари (ракс), қўғирчоқбозлик, дор ва ёғочоёқ санъати (халқ цирки), халқ тасвирий ва амалий-безак санъати, халқ архитектураси (қурилиш амалиёти) ҳамда бадий ва техникавий ҳаваскорлик каби ижодиёт турларини ўз ичига қамраб олади»¹, – деб ёзган эди.

Ирим айтимларни халқ ижодининг мана шундай кенг қамровли доирасига киритмасак, қаерга қўямиз? Ҳолбуки, улар юқорида айтилганидек, диний ақидалар сингари эскираётгани йўқ, замонлар синовидан ўтиб бугун ҳам хизмат қилмоқда. Уларнинг бағрида сақланиб келаётган маърифий таъқиқ ва башоратларга келажак авлод ҳам амал қилиши шубҳасиздир. Яна мисол келтирамиз: «Тароққа илашган соч думалокланса, бош оғрийди»; «Ит олдинги оёқлари билан бетини ёпса, ёмғир ёгади»; «Овқат ейишни катталардан аввал бошласа, улардан олдин ўлади»; «Дастурхоннинг йиртиғи бўлса, савоб оёқ остида қолиб кетади»; «Сумалакнинг тоши дарвоза устига осиб қўйилса, омад келтиради».

Маълумки, ўзбек халқ ирим айтимлари, асосан, сочма нутқ (насрий баён) орқали ифодаланади. Таниқли фольклоршунос

¹ Мирзаев Т. Фольклор ва унинг асосий хусусиятлари // Ўзбек фольклоршунослиги масалалари. 1-китоб. – Тошкент, 2006. – 14-б.

М. Жўраев ўзбек халқ насрий жанрларини тасниф қилар экан, куйидаги беш туркумга ажратади: «1. Жанрнинг функционал-семантик қамрови; 2. Тингловчи ва айтувчининг баён қилинаётган ҳикояга муносабати; 3. Жанрнинг бадийлик даражаси ва образлар силсиласининг талқини; 4. Жанрнинг воқеликка муносабати; 5. Воқелик тасвирининг замонавий талқини ёки жанрнинг анъанавий эпик вақтга муносабати; 6. Воқелик баёнининг маконий қамрови; 7. Воқеликни баён қилиш усули»¹.

Эътибор берсангиз, ирим айтимлар табиати юқоридаги таснифнинг барча бандларига мос келади. Халқ қўллаётган ирим айтимлар вазифадошлиги, ифодадаги усул ва маъно товланишлари, айтувчи билан тингловчининг ундаги таъқиқ ёки башорат мазмунига муносабати, матн қатига синган сўзамоллик санъати, унда иштирок этган образ ва тамсил (детал)лар туркуми, ирим айтимда муҳрлаган воқеликнинг эмпирик вақт ва макон жиҳатидан қамрови сингари тадқиқини кутиб турган жиҳатлари бизни ўзига жалб қилади.

Ўзбек халқи қадимдан «Сўзнинг дами қиличдан ўткир», «Таёқ этдан ўтар, сўз – суякдан» каби мақолларни айтиб келади. Рус халқи оғзаки ижодиётида эса «Не спроста и не спуста слово молвится и до веку не сломится» деган ажойиб айтим бор. Улардаги доно фикр ирим айтимларнинг асрлар синовидан ўтиб келган бадий-эстетик қувватига бевосита алоқадордир. Халқимиз ирим айтимларни бошқа паремик жанрлар сингари оғзаки, аноним, коллектив, анъанавий ва вариантли ҳолда яратган. Анъанавий ирим айтимлар, маълумки, конкрет шахс томонидан яратилмайди. Улар яратувчиси ким эканлиги номаълум бўлгани ҳолда оғиздан оғизга ўтиб ривожланиб келган. Мисол учун, куйидаги айтимлар мазмунидан ижодкор шахсини аниқлаб бўлмайди, албатта: «Сочикни тўшакнинг бош томонига илса, душмани бошига чиқиб олади»; «Қайси қиз қошларининг ораси узоқ бўлса, узоққа турмушга чиқади»; «Товони қичиса, меҳмонга боради»; «Қайси қизнинг бўйнида холи бўлса, чиройли куёвга тегади»; «Бешикнинг бош томонига нон қўйиб қўйса, чақалоқ ризқли бўлади».

¹ Жўраев М. Ўзбек халқ насрининг жанрларини тасниф қилиш мезонлари // Ўзбек тили ва адабиёти. – Тошкент, 1996. – 5-сон. – 29–33-б.

Ўзбек халқ ирим айтимларини генетик жиҳатдан кузатадиган бўлсак, анимистик, тотемистик, фетишистик, сеҳр-магия ва шомонлик тасаввурлари билан боғлиқ ҳолда тарихан уч компонентли кўринишга эга эканлиги ойдинлашади. Биз уларни моҳиятига кўра қуйидагича номладик:

а) сабаб компоненти (шартли белгиси – С);

б) оқибат компоненти (шартли белгиси – О);

в) чора-тадбир компоненти (шартли белгиси – Т).


Бу тушунчаларни тасаввур қилмоғингиз учун даставвал қуйидаги мисолларни келтириб ўтамыз:

1. Дикқат билан нигоҳ солинса (С), гўдак кинналайди (О). У хасталанмаслиги учун юзига туфлаб қўйилади (варианти: чақалоққа кўзмунчоқ тақиб қўйилади) (Т). Белгиси: С + ОТ.

2. Боқувдаги от совутилмай минилса (С), терлаб шамоллайди (О). Уни иситмасидан тушириш учун қирда бошини пастга қаратиб, орқасидан қорни тикиш керак (Т). Демак, С + ОТ.

3. Саримсоқ пиёз барглари саргая бошласа (С), пояси говлаб кетади (О). Тагидаги ҳосили катта бўлиши учун поясини қайириб туғиб қўйиш лозим (Т). Бу учликда ҳам С + ОТ формуласига мос ҳолатни кузатамиз.

Тугал (уч компонентли) мисоллардан кўриняптики, ирим айтимлар таркибидаги сабаб компоненти (узви) оқибат билан ҳам, чора-тадбир билан ҳам бевосита боғланади. Шу боисдан унинг шаклий кўринишини қуйидагича белгилаш ҳам мумкин:



Схемага эътибор берсангиз, учта содда гапдан ташкил топган ирим айтимнинг сабаб узви (С) доминант мавқега эга бўлиб, унинг иштирокисиз оқибат ҳам, чора-тадбир ҳам мазмунини йўқотади. Сабаб компоненти тушириб қолдирилган ирим айтимларга аҳамият беринг: «...гўдак кинналайди. У хасталанмаслиги учун юзига туфлаб қўйилади»; «...терлаб шамоллайди. Уни иситмасидан тушириш учун қирда бошини пастга қаратиб, орқасидан


қорни тикиш керак»; «...пояси ғовлаб кетади. Тагидаги ҳосили катта бўлиши учун поясини қайириб тугиб қўйиш лозим».

Демак, уч узвли ирим айтимлар негизини сабаб компоненти ташкил этиб, унинг семантик риштаси ҳам оқибат, ҳам чора-тадбир узвларига боғланган ҳолда жанр спецификасини юзага чиқарар экан.


Тугал ирим айтимлардаги оқибат компонентининг синтактик-самантик вазифасини ҳам рад этиш мумкин эмас. Унинг мантиқий ўрнини англаш учун юқоридаги икки мисолнинг оқибат узвларини (О) қолдириб ўқиб кўрамиз: «Чин дилдан суюб тикилса... У хасталанмаслиги учун юзига туфлаб қўйилади»; «Боқувдаги от совутилмай минилса... Уни иситмасидан тушириш учун қирда бошини пастга қаратиб, орқасидан қорни тикиш керак»; «Саримсоқ пиёз барглари сарғая бошласа... Тагидаги ҳосили катта бўлиши учун поясини қайириб тугиб қўйиш лозим».

Анъанавий ирим айтимлар таркибидаги чора-тадбир компоненти ишонувчан ёки турмуш ҳодисалари туфайли тушкунликка тушган одамларга руҳан бўлса-да, таскин бериш ва оғир кўргуликлар юзага келишининг олдини олиш учун ўйлаб топилган. Унда оқибат компонентига қарама-қарши маъно мавжуд бўлиб, юзага келган оқибатни бартараф этишнинг йўллари баён этилади. Аждодларимиз ҳаётий тажрибаларга асосланиб чора-тадбирнинг ҳар қандайини эмас, балки салбий ҳодисанинг содир бўлишига йўл қўймайдиган, уни ортига қайтарадиган фикр-жумлаларни яратганлар. Салбий воқеа-ҳодисанинг олдини олиш учун кўпгина йўллардан фойдаланилган, олдини олувчи тадбирни ўйлаб топишда сабаб компонентига доир воқеа-ҳодиса белгиларидан четга чиқиб кетмаслик йўлларини қидириш талаб қилинган. Қуйидаги мисолларда бунинг исботини кўришимиз мумкин:

Қизлар хонтахта бурчагига рўпара ўтирса,



Супурги одамга тегса,



Ирим айтимларнинг сабаб ва оқибат узвларига хос бўлган вариантлик хусусияти чора-тадбир компонентиға ҳам хосдир. Лекин уларнинг вариантлари сони, асосан, учтадан ошмайди. Бунинг сабаби асрлар давомида баъзан чора тадбир мазмуни бутунлай йўқолиб, ирим айтим икки узви ҳолатга келиб қолиши ҳоллари билан изоҳланади.

Ирим айтимларнинг халқ хотирасида сақланиб қолган сабаб ва оқибат узвлари парвоз қилаётган қушнинг қанотлари сингари биргаликда ва тенг иштирок этади. Улар синтактик жиҳатдан сабаб эргаш гапли қўшма гап ҳолида бирикиб, тингловчига муҳим маиший ахборотни етказади. Уларни алоҳида қўллагудек бўлсангиз, ахборот мазмуни йўқолиб, ирим айтим жанрига мансуб бўлмаган оддий содда гапга айланади. Шундай ҳоллар ҳам бўладики, баъзи ирим айтимларда оқибат узви унутилиб, бир компонентли ҳолга келиб қолади. Оқибат компонентининг асл мазмуни йўқолиб, унинг ҳақидаги хира тасаввур сақланганида «яхши бўлади» ёки «ёмон бўлади» деган сўз бирикмалари қўлланилаверади. Масалан: «Кечқурун тирноқ олса, ёмон бўлади»; «Эркак кишининг олдини кесиб ўтса, ёмон бўлади»; «Супургини тик холда қўйса, ёмон бўлади»; «Ўнг кўзи учса, яхшиликка бўлади»; «Бойўғли сайраса, ёмон бўлади».

Ушбу кўринишдаги ирим айтимлар ижрочилари биринчи мисолдаги «яқин қариндоши ўлади», иккинчи мисолдаги «ўғил тугмай ўтади», учинчи мисолдаги «душмани оёққа туради», тўртинчи мисолдаги «яхши кўрган одами билан учрашади», бешинчи мисолдаги «кимдир ўлган бўлади» қабилдаги оқибат мазмунини унутганлар.

Ирим айтимларнинг икки узви намуналари тугал (уч узви) кўринишларига нисбатан кўп сақланиб қолганини айтиб ўтган эдик. Уларнинг кўзга яққол ташланувчи жиҳатларидан бири сабаб ва оқибат компонентларининг вариантлилигидир. Бунинг сабаби, бизнингча, оқибат компоненти мазмунининг унутилиши натижасида бир нечта сабабга бир оқибат узви маъно жиҳатидан уйқаштирилган. Мисол учун:

1. Камбағал бўлади:

- а) остонага ўтирса;
- б) сочини ерга ташласа;
- в) кемтик идишда овқатланса;
- г) кечкурун бировга пул берса;
- д) ўқлокни тик қўйса.

2. Кимдир ўлади:

- а) юлдуз учса;
- б) кошининг ўртаси қичишса;
- в) мушук кечкурун миёвласа;
- г) ит осмонга қараб увласа.

3. Меҳмон келади:

- а) йиғилган тўшак қуласа;
- б) икки бурда нонни тишлаб қўйса;
- в) чойга шама тушса;
- г) мушук юзини ювса;
- д) ёш бола кўчага қарайверса;
- е) зағизгон сайраса;
- ё) чойни тўкворса.

4. Узоққа турмушга чиқади:

- а) кошининг ораси узоқ бўлса;
- б) кечкурун ойнага қараса;
- в) пешонаси катта бўлса.

Хулоса қилиб айтганда, ирим айтимлар халқимизнинг ўтмишдаги миллий кадриятлари, урф-одат ва тарбиявий тақиқлари ҳамда орзу-армонларидан дарак берувчи ўзига хос поэтик шаклга, композицион хоссаларга эга бўлиб, юқоридаги уч муҳим компонент иштирокида юзага чиқар экан. Уларни эпик, лирик ва драматик адабий турлар доирасига кирмайдиган бошқа паремик жанрлар қаторида халқ оғзидан кўплаб ёзиб олиш ва синчиклаб ўрганиш фольклоршунослар ва тилшунослар олдида турган долзарб вазифалардан бири саналади.

Ўмрзоқ
ЖУМАНАЗАРОВ

(1956 йилда туғилган)



Ўмрзоқ Жуманазаров 1956 йил 20 апрель, Жиззах вилояти, Бахмал тумани, Лойқа қишлоғида туғилган. Самарқанд давлат педагогика институтида ўқиган (1973–77). Шу институтнинг Тилишунослик кафедрасида лаборант-ассистент (1977–79). ЎзР ФА Алишер Навоий номидаги Тил ва адабиёт институти Фольклор бўлимида лаборант, кичик илмий ходим (1979–84). Ҳозир Жиззах давлат педагогика институтида доцент, кафедра мудири вазифаларида ишлайди (1984 йилдан). «Ўзбек халқ тарихий қўшиқлари (жанр хусусиятлари, таснифи ва поэтикаси)» мавзуда номзодлик (1982), «Ўзбек тарихий фольклори» (жанр спецификаси, таснифи ва поэтикаси) мавзусида докторлик (1991) диссертациясини ҳимоя қилган. «Тарих, афсона ва дин» (1989), «Ўзбек фольклори ва тарихий воқелик» (1991), «Топонимика ва халқ прозаси» (2005), «Халқ тарихи саҳифаларини варақлаганда» (2006), «Халқ прозаси ва ижтимоий ҳаёт» (2006), «Эл суйган бахшининг эпик олами» (2007) каби монографиялар ҳамда «Ўзбек фольклорида тарихий қўшиқ жанри» (1987), «Тарихий фольклорнинг дастлабки намуналари (1987), «Ўрта мактабда Эргаиш Жуманбулбул ўглининг ҳаёти ва ижодини ўрганиш» (1988), «Ўзбек болалари ўйин фольклори» (1999, ҳамк.), «Топонимика ва халқ прозаси» (2005, ҳамк.), «Халқ прозаси ва ижтимоий тарихий ҳаёт» (2006), «Ўзбек халқ прозаси» (2006), «Болалар адабиёти ва фольклор» (2009, ҳамк.) каби ўқув-услубий қўлланмалар муаллифи.

АФСОНА ВА РИВОЯТ ЖАНРЛАРИНИНГ ЎЗARO МУНОСАБАТИ

Афсона халқ оғзаки ижодининг кичик ҳажмли насрий жанрларидан бири бўлиб, у тарихий илдизлари нуқтаи назаридан жуда ҳам қадимий даврлардаги воқеа ҳамда ҳодисаларга бориб тақалади. Қадимги аждодларимизнинг табиат ҳодисалари, ижтимоий воқеликдаги фактлар ҳақида фантастик қобикда хабар бериш халқ афсоналарининг етакчи функцияси саналади. Афсоналарда акс этган воқелик, гарчи фантастик уйдирмалар қобиғида баён этилса ҳам, бироқ уларда реал тарих излари маълум даражада сақланиб қолади. Мана шунинг учун ҳам афсоналар халқ тарихини, унинг иқтисодий, сиёсий ва маданий ўтмишларини, унинг дунёқараши, урф-одатлари ҳамда рухий кечинмаларини ўрганишда муҳим манба вазифасини ўтайдилар. Афсоналарда акс этган тарих масаласига ўтишдан олдин ушбу жанрнинг атамаси, жанр табиати ва унинг ўзига яқин жанрлардан фарқли жиҳатлари, турлари масаласида қисқача тўхталиб ўтамиз.

Маълумки, «афсона» атамаси форс-тожикча афсун (افسون) ёлғон, уйдирма сўзидан олинган бўлиб, жанр атамаси сифатида уйдирма гапга асосланган ҳикояни англатади¹. Демак, афсона фольклор жанри сифатида ўтмиш ҳақида хабар берувчи уйдирма характеридаги кичик ҳикоячаларни англатади. Туркий халқларда ҳам ушбу жанрни англатувчи махсус сўз мавжуд бўлиб, XI асрнинг машҳур қомусчиси Маҳмуд Кошғарийнинг хабар беришича, қадимги туркий тилдаги سؤ – сав сўзи шулар жумласидандир. Унинг изоҳларидан маълум бўладики, сав қўп маъноли сўз бўлиб, унинг биринчи маъноси – оталар сўзи (мақол); иккинчиси – қадимги воқеалардан хабар берувчи қисса; учинчиси – бирор воқеани айтиб берувчи ҳикоя; тўртинчиси – рисола, хат, кичик китобча; бешинчиси – сўз, нутқ каби маъноларни англатган².

¹ Таджикско-русский словарь. – М., 1954. – стр. 35; Фарҳанги забони тоҷики. – М., 1969. – стр. 101; Алишер Навоӣ асарлари тилининг изоҳли луғати. Тўрт томлик. Т. 1. – Тошкент, 1983, 142-бет.

² Маҳмуд Кошғарий. Девону луғатит турк. Уч томлик. Т. 3. – Тошкент, 1963, 168-бет.

Бизнингча, Маҳмуд Кошғарий кўрсатган маънолардан учинчиси афсона жанрига нисбатан қўлланган соф туркий атамадир.

Афсоналарнинг жанр белгилари хусусида мавжуд илмий адабиётларда турлича фикрлар билдирилади. Масалан, таниқли рус фольклоршуноси В. Я. Пропп рус халқ афсоналари доирасини маълум даражада чегаралаб белгилайди. Унинг фикрича, афсоналарга фақат диний персонажлар ҳақидаги, яъни давлат дини сифатида юзага келган православие ҳақидаги тасаввур ҳам қарашларни, бевосита ана шу дин учун жонини тиккан фидойилар ҳақидаги ҳикояларни киритади¹.

Балки, бундай қараш рус афсоналари табиатига тўла мос келади, лекин бундай қараш ўзбек халқ афсоналарининг ғоявий-бадий табиатига тўла мос келмайди.

Ўзбек халқ афсоналарини жиддий тадқиқ этган фольклоршунос К. Имомов мазкур жанрнинг муҳим белгиларини аниқлашда, унинг поэтикасини ёритишда диққатга сазовор ишларни амалга оширди. Бироқ у жанрга умумий таъриф беришда бироз чалкашликларга йўл қўйди. Масалан, бир ўринда, у «...афсона хаёлан тўқилган воқеа ва қаҳрамонлар ҳамда тарихий факт ва ҳодисаларни хаёлан ва ҳаётий уйдирмалар қобиғида ҳикоя қилувчи бадий асар» дея тўғри таъриф берса, иккинчи бир ўринда «...афсона тўқима ёки фактик воқеалардан ташкил топган бўлиб, ҳодисаларни хаёлий уйдирмалар воситасида ҳикоя қилувчи бадий асар...»² деб таъриф беради. Юзаки қаралса, ҳар икки таъриф ҳам нуқсонларсизга ўхшаб кўринади, лекин диққат билан қаралса, биринчи таърифда объект ҳам хаёлий, ҳам ҳаётий уйдирмалар воситасида баён этилиши тўғри таъкидланган. Иккинчисида эса объектнинг фақат хаёлий уйдирмалар воситасида баён қилиниши айтилади, холос.

Маълумки, уйдирмаларнинг ўзи мазкур тадқиқотчи томонидан ҳаётий ва хаёлий каби икки турга бўлингани³ ҳолда нега афсоналар таърифида у бир ўринда ҳам хаёлий, ҳам ҳаётий уй-

¹ Пропп В. Я. Жанровой состав русского фольклора // В. Я. Пропп. Фольклор и действительность. – М., 1976. – стр. 51–52.

² Имомов К. Ўзбек халқ прозаси. – Тошкент, 1981, 66–68-бетлар.

³ Ўша асар. 10-бет.

дирмаларни тилга олса, яна бир ўринда фақат хаёлий уйдирмаларнигина тилга олади? Бизнингча, бу катта бир мантиқий қарама-қаршиликнинг натижаси бўлмай, балки оддий эътиборсизликдан бошқа нарса эмас.

Афсоналар, асосан, информатив (хабар бериш) функциясини ўтайди, бинобарин, уларда эстетик функция иккинчи ўринда туради. Мана шунинг учун ҳам халқ ижодкорлари ва ижрочилари ўртасида профессионал афсона айтувчилар йўқ: ушбу жанр кенг оммавий ижро этилиш хусусиятга эга.

Айрим тадқиқотчилар эса ривоятлар махсус ижрочилар, яъни профессионал айтувчилар томонидан айtilган ва улар «ровий» лар деб аталади, – дейдилар¹. Бизнингча, ривоятлар айтиш билан шугулланган махсус айтувчилар бўлмаган. Ровий эса арабча сўз бўлиб, у умуман ҳикоя қилувчи маъносини англатади. Демак, ровий фақат ривоят айтувчи эмас, у бошқа прозаик жанрларни ҳам айтаверади. «Ровийлар андоқ ривоят қилурларким» ёки «ровийлар андоқ нақл қилурларким» деб ҳикоятлар ҳам, қиссалар ҳам айтаверади. Бу ўринда шуни ҳам айтиш керакки, ривоят атамаси ўзи кенг маънода кимлардир томонидан тўқилган ҳикоятлар, қисса кабиларни англатади.

Ўзбек фольклоршунослигида эса бу атама оғзаки прозанинг бир жанригагина нисбатан қўлланади, холос. Ривоят ва ровий сўзларининг ўзаги бир бўлиб, улардан биринчиси, шартли қўлланганлигини ҳисобга олмаслик С. Умаровни юқорида кўрсатилган нотўғри хулосасига олиб келган. Аслида, махсус ривоят айтувчи профессионал айтувчилар бўлмаган.

Бошқа халқларда бўлганидек, ўзбек халқ оғзаки ижодида ҳам ўзларининг шаклий, таркибий, ижро ва функционал хоссалари билан афсоналарга яқин турувчи жанрлар мавжуд. Ана шундай жанрлардан бири ривоят ҳисобланади.

Дарҳақиқат, ташки шакл, структура ва функционал хоссалари жиҳатидан ривоятлар афсоналарга жуда яқин тўради. Мана шунинг учун ҳам айрим пайтларда афсонани ривоятдан фарқлашда чалкашликларга йўл қўйишади. Чунки бу икки жанр ўртасида

¹ Умаров С. Ривоят ва ҳаёт. – Тошкент, 1988, 3-бет.

жуда ҳам кўп муштарак жиҳатлар мавжуд. Аслида, ривоят ҳам афсонага ўхшаб каноник поэтик шаклга эга эмас. Афсонадагига ўхшаб ривоятда ҳам воқелик кенг тарихий миқёсда, бутун муайян жамият миқёсида акс этмайди. В. К. Соколова ҳақли кўрсатганидек, ҳар икки жанрда тарихнинг кичик, лоақал парчаси акс этади, холос¹.

К. Имомовнинг ривоятга берган таърифидан шу нарса маълум бўладики, ривоят афсонадан ҳаётий воқеаларни уйдирмалар воситасида акс эттириши билан фарқланади. У шундай ёзди: «Ривоят ҳаётий воқеаларни бадиий уйдирмалар воситасида ҳикоя қилувчи фольклорнинг реалистик характериға эга бўлган алоҳида туридир»².

Ушбу таърифға айрим тузатишлар киритган ҳолда қабул қилиш мумкин. Бу тузатишлар эса, *биринчидан*, воқелик ҳаётий уйдирмалар воситасида акс эттирилади. *Иккинчидан*, ривоятда акс этган воқелик қай даражада ҳаётий бўлмасин, барибир, тасвирда реалистик характер эмас, романтик характер етакчилик қилади.

Афсона ва ривоят жанрларини фарқлашда рус фольклоршуноси С. Н. Азбелев ўзига хос йўлдан боради. У дастлаб фольклордаги ижодни онгли ва онгсиз каби икки турға ажратиб олади. Бинобарин, ижодкор ўзи айтаётган ҳикоянинг ёлғонлигини билиб турса, бундай ижод онгли ижод саналади. Агар у ўзи айтаётган тўқима ҳикоянинг ёлғонлигини билмай, унга реал тарих деб қараса, бундай ижод онгсиз ижод саналади. Демак, унинг фикрича, афсона онгсиз ижод маҳсули бўлса, ривоят онгли ижод маҳсули саналади³.

Албатта, бундай фарқлаш маълум даражада мазкур жанрларни объектив фарқлашға кенг имконият берса ҳам, бироқ у амалиётда жуда ҳам самарали эмас. Чунки, *биринчидан*, айтувчи

¹ Соколов В. К. Изображение действительности в разных фольклорных жанрах // Фольклор и историческая действительность. Русский фольклор. Т. XX. – Л., 1981. стр. 40–41.

² Имомов К. Кўрсатилган асар, 88-бет.

³ Азбелев С. Н. Отношение предания, легенды и сказки к действительности // Славянский фольклор и историческая действительность. – М., 1965. стр. 18–20.

Ўзи айтаётган воқеликнинг тўғри ёки нотўғрилигини ҳамма вақт изоҳлаб ўтирмайди.

Иккинчидан, асардаги воқеаларнинг рост ёки ёлғонлигини баҳолашда айтувчининг ўзи ҳам янглишиши табиий. Чунки афсона ва ривоятларнинг барчасида ҳам акс эттирилган воқеликка нисбатан айтувчининг субъектив қараши мавжуд бўлади.

Ўз фикрини давом эттириб олим куйроқда афсона ва ривоятнинг асосий фарқларини нисбатан тўғри кўрсатади. Унингча, ривоят афсонадан реал ҳаётий фактларга асосланиши, ривоятлар ижтимоий функциясининг соф билиш, изоҳлашдан иборатлиги, афсонанинг эса фақат билиш, балки эстетик вазифа ўташи билан фарқланишини кўрсатади¹.

Юқорида биз афсона ва ривоятларнинг бир-биридан фаркли жиҳатлари ҳақида турли тадқиқотчиларнинг билдирган фикрлари билан танишиб чиқдик. Биз ҳам уларнинг айрим фикрларига қўшилган ҳолда куйида шу масала борасида ўзимизнинг фикр-мулоҳазаларимизни билдириб ўтишга жазм этдик.

Маълумки, В. Я. Пропп фольклор жанрларини тасниф этишнинг энг мақбул принципларини фольклоршуносликда биринчи бўлиб ишлаб чиқди. Ҳамма биладикки, адабий жанрлар ҳаётий камров ва поэтик система яхлитлиги нуқтаи назаридан тасниф этиб келинади. Унинг кўрсатишича, фольклор жанрини тасниф этишда ана шу икки предметга қўшимча ҳолда жанрнинг қўлланилиш ўрни, ижро шакли ва мусиқага муносабати ҳам ҳисобга олиниши лозим². Биз ҳам бу қарашни тўла баҳам кўра-миз ва афсона билан ривоятларнинг ўзаро ўхшаш ҳамда фаркли жиҳатларини белгилашда ана шу нуқтаи назардан туриб иш кўра-миз.

Ҳаётий камров жиҳатидан қаралса, афсона ва ривоятларни бир-биридан фарқлаш қийин. Чунки уларнинг ҳар иккаласида ҳам ўтмишда бўлиб ўтган эпизодик воқеалар, у ёки бу жойларнинг номларини изоҳловчи ёхуд улкан шахслар ҳаётидаги му-

¹ Азбелев С. Н. Кўрсатилган мақола. – 25-бет.

² Пропп В. Я. Принципы классификации фольклорных жанров // В. Я. Пропп. Фольклор и действительность. – М., 1976. стр. 38–39.

ийян воқеалар соф информатив планда акс этирилади. Бундан ташқари, мазкур икки жанрда ҳам кичик, лоақал бир эпизодик воқеагина акс этади, холос.

Поэтик система нуқтаи назаридан қаралса, ҳар икки жанрнинг асосий функцияси, асосан, ахборот бериш бўлганлигидан уларни ўзаро фарқлаб турувчи поэтик воситанинг ўзи йўқ. Бинобарин, афсона ва ривоят айтувчи профессионал ижодкор ҳам, ижрочи ҳам йўқ. Бу икки жанрнинг ижодкори ҳам, ижрочиси ҳам яхшигина хотира қувватига эга бўлган шахслар дейиш мумкин. Албатта, бу гапнинг ўзи нисбий. Аниқроқ қилиб айтганда, афсона ва ривоятлар авлоддан авлодга ўтиб келади. Ўтиб келаётган ана шу материални ўз қизиқиши доираси билан хотирада сақлаб қолиш, уни бошқаларга, кейинги авлодларга етказишда улкан ҳаётий таърибага эга бўлган кишиларнинг роли катта. Шунда ҳам ушбу жанрларнинг профессионал ижрочиси йўқ. Демак, афсона ва ривоят жанрлари поэтик системасининг яхлитлиги жиҳатидан фарқланмайди.

Жанрнинг маиший қўлланилиши жиҳатидан қаралса, афсона ва ривоятлар оддий суҳбатларда бирор жой ёки нарса, воқеа ёки ҳодисаларни изоҳлаш лозим бўлганда; айрим ҳолларда ўтмишдаги айрим шахсларнинг хатти-ҳаракатлари, қаҳрамонликлари ёхуд ҳайратомуз ишларини бошқаларга нисбатан ибрат қилиб кўрсатиш эҳтиёжи тугилгандагина оддий оғзаки баён қилинади. Мазкур жанрлар махсус айтиладиган бирон-бир маросим ёки тадбир йўқ. Демак, мазкур жанрларнинг айтилиши ўрни, яъни маиший қўлланиш доираси жуда ҳам кенг ва улар бу масалада бир-бирларидан фарқланмайдилар.

Муסיқага муносабат масаласида ҳам афсона ва ривоят ўзаро фарқланмайди, чунки уларнинг иккиси ҳам куйга солинмай, оддий сўзлашув нутқида баён этилади.

В. Я. Пропп кўрсатган тўрт критерий жиҳатидан афсона ва ривоят ўзаро фарқланмас экан, демак, уларни икки мустақил жанр шифатида қарашга қандай эҳтиёж бор, ёки улар бир жанрнинг икки хил номланишидан иборатми каби саволлар туғилиши табиий. Ҳа, юзаки қаралса, афсона ва ривоятлар бир-бирларига ҳам шакл, ҳам мазмун жиҳатидан жуда яқин. Бироқ улар мустақил

жанр сифатида бир-бирларидан фарқланадилар. Бу фарқлар, бизнинг назаримизда, куйидагилардан иборат:

1. Афсона асосидаги воқелик фақат хаёлий уйдирмалар орқали фантастика билан йўғрилган ҳолда, кучли муболагалаштирилиб тасвирланади. Ривоятда эса воқелик хаётий уйдирмалар орқали фантазиясиз тасвирланади. Маълум бўладики, мазкур жанрларни ўзаро фарқлаш эҳтиёжи туғилганда уйдирма характери, фантастика ва муболага нисбатига аҳамият бериш лозим.

2. Маълумки, баён этилаётган воқелик ё хотира, ё бутунлай тўқима сифатида айтилиши мумкин. Ана шу воқелик тингловчи томонидан, хотира, яъни меморат ёки ярим меморат сифатида қабул қилинса, бу жанр ўз-ўзидан ривоятни ташкил этади. Агар воқелик ўзининг тарихий асосларидан узилса, бундай материал соф фабулатни ташкил этади. Фабулат эса афсонани ташкил этади.

Бу ўринда шуни ҳам айтиб ўтиш керакки, ушбу жанрлар ўртасидаги алоқада афсоналар мудом ривоятлар ҳисобига бойиб боради. Шунинг учун ҳам Н. Ҳатамов ва Б. Саримсоқовлар афсоналар, кўпинча ривоятлар асосида юзага келади, деганларида ҳақли эдилар. Бунда ривоятлардаги конкрет тарихий элементлар йўқолиб, уларнинг ўрнини хаёлий уйдирмалар эгаллаб бориши жараёни кечади¹. Бошқача айтганда, афсона ва ривоят ўртасидаги муносабатда меморатнинг фабулатга айланиш жараёни етакчи роль ўйнайди. Чунки мавжуд тарих унутилишга маҳкум, аммо асоси йўқ уйдирманинг реал тарихга айланиши мумкин эмас. Бинобарин, ривоят афсонага айланса ҳам, бироқ афсона ривоятга айланмайди.

Афсоналар мифлар ҳисобига ҳам ўз сафларини тўлдириб боради. Бунда муҳим бир нарсага аҳамият бериш лозим. У ҳам бўлса, миф ва афсоналарнинг функционал ҳамда шаклий жиҳатидан бир бирига яқинлигидан иборат. Айрим тадқиқотчиларнинг кўрсатишича, мифлар космос ва хаос ўртасидаги доимий курашни акс эттирадилар, бошқача айтганда, улар нарса ёки ходисаларнинг пайдо бўлишини изоҳловчи этио-

¹ Ҳатамов Н., Саримсоқов Б. Адабиётшунослик терминларининг русча-ўзбекча изоҳли луғати. – Тошкент, 1979, 159-бет.

логик, уларнинг йўқ бўлиши ёки вайрон бўлишини изоҳловчи эсхатологик ҳикоячалардан иборат¹.

Афсоналарда ҳам муайян воқеа-ҳодисалар, нарсалар ва жойлар ҳақида ахборот берилади. Демак, миф ва афсона ўртасида функционал яқинлик мавжуд. Шунга асосланиб айтиш мумкинки, мавжуд мифлар кишиларнинг оламга мифологик дунёқарашлари тугагач, фақат афсона шаклидагина сақланиб қолган. Бироқ афсонадаги информатив функция ўзининг поэтик табиати, фантастикага бойлиги ва муболагали характери билан – эстетик руҳи билан мифдаги информатив функциясидан фарқланиб туради.

¹ Саримсоқов Б. Эпик жанрлар диффузияси // Ўзбек фольклорининг эпик жанрлари. – Тошкент, 1981, 97–148-бетлар.

*Маматқул
ЖҲРАЕВ
(1956 йилда туғилган)*



Маматқул Жўраев 1956 йил 1 октябрда Бухоро вилояти Қорақўл тумани Жигачи қишлоғида туғилган. Тошкент давлат университети тугатган (1978). 1978 йилдан ЎзР ФА Алишер Навоий номидаги Тил ва адабиёт институти Фольклор бўлимида лаборант, стажёр-тадқиқотчи, катта лаборант, кичик илмий ходим, илмий ходим, катта илмий ходим, докторант, етакчи илмий ходим, Фольклор архивининг мудири лавозимларида ишлаб келган. Ҳозирда шу ерда Фольклор бўлими мудири вазифасида ишламоқда (2003 йилдан). «Ўзбек халқ эртақларидаги «сеҳрли» рақамларнинг тарихий асослари ва поэтик вазифалари» мавзуида номзодлик (1987), «Ўзбек халқ самовий афсоналарининг тарихий асослари» мавзуида докторлик (1996) диссертацияларини ҳимоя қилди. 2006 йилда профессор унвони берилган. Ўзбекистон Республикасида хизмат кўрсатган маданият ходими (2011). М. Жўраев «Етти иқлимдаги «етти»лар» (1989, ҳамк.), «Сеҳрли рақамлар сири» (1991), «Ўзбек халқ эртақларида «сеҳрли» рақамлар» (1991), «Ўзбек халқ тақвими ва мифологик афсоналар» (1994), «Ўзбек халқ самовий афсоналари» (1995), «Ўзбек мифологияси ва араб фольклори» (2001, ҳамк.), «Остонаси тиллодан: «Остонаси тиллодан» номли фольклор экспедициясининг илмий сафарномаси» (2003, ҳамк.), «Миллий истиқдол гоёси ва фольклор санъати» (2006), «Наврўз кўшиқлари: Наврўз байрами ва баҳорий удумлар билан боғлиқ ўзбек халқ кўшиқлари» (2007), «Маросимнома: ўзбек халқининг урф-одат ва маросимлари ҳақида маълумотнома» (2008, ҳамк.), «Наврўз байрами» (2009), «Ўзбек фольклорида ҳаёт дарахти» (2010, ҳамк.), «Ўлан айт-

гали келдик» (2013, ҳамк.), «Миф, маросим ва эртак» (2014, ҳамк.), «Миф, таълим ва тарбия» (2014, ҳамк.), «Ўзбек миллий фольклор санъати ва этномаданий қадриятлар» (2014, ҳамк.), «Ўзбек фольклори тарихи. 1-жилд. Мифология. Маросим фольклори» (2015), «Ўзбек бахшилари» (2015, ҳамк.) сингари монография ва илмий рисолалар муаллифи. «Эл деса Навоийни. Ҳазрат Мир Алишер Навоий ҳақида ривоятлар» (1991), «Кенжа ботир. Ўзбек халқ эртаклари» (1991), «Наврӯз: Наврӯз билан боғлиқ қўшиқлар, афсоналар, одатлар ва иримлар» (1992, ҳамк.), «Ипак йўли афсоналари. Жой номлари билан боғлиқ афсоналар» (1993), «Әлишир Навоӣ haqqında rəvayətlar» (Бакы, 1994), «Боболардан қолган нақллар: афсона, ривоят, ирим-сирим ва халқ тақвими» (1998, ҳамк.), «Қизил гулнинг гунчаси: келинсаломлар» (1999, ҳамк.), «Ой олдида бир юлдуз. Ўзбек халқ маросим қўшиқлари» (2000), «Улуғ ой умидлари: Ё рамазон» қўшиқлари» (2001, ҳамк.), «Бу-хоро афсоналари: тадқиқот ва матнлар» (2002, ҳамк.), «Тулумхўжа: достон» (2006, ҳамк.), «Наботот ва ҳайвонот оламига оид ўзбек халқ мақоллари» (2006, ҳамк.), «Қадимий Кармана ривоятлари» (2013, ҳамк.), «Доно Алишер: Алишер Навоий ҳақидаги халқ ривоятлари» (2016), «Қошу кўзи пиликдай: «Келинсалом»лар» (2016) каби фольклор тўпламлари, шунингдек, «Мактаб адабиёти: хрестоматия. «Равиан» достони» (2015), «Мактаб адабиёти: хрестоматия. «Кунтуғмиш» достони» (2015) китоблари чоп этилган. «Ўзбек халқ ижоди ёдгорликлари» 100 жылдигининг иккинчи («Юсуф билан Аҳмад» достони: Муҳаммадқул Жонмурод ўгли Пўлкан ва Фозил Йўлдош ўгли варианты» (2015), учинчи («Қиронхон» достони: Муҳаммадқул Жонмурод ўгли Пўлкан ва Жолғош Жоссоқ ўгли варианты» (2015), бешинчи («Ширин билан Шакар» / достонлар: Фозил Йўлдош ўгли вариантлари» (2015), еттинчи («Алибек билан Болибек»: достонлар» (2015), саккизинчи («Соҳибқирон» / достонлар: Исломо шоир Назар ўгли, Умир шоир Сафаров, Бўри бахши Аҳмедов вариантлари (2016), тўққизинчи («Кунтуғмиш» / достонлар: Эргаш Жуманбулбул ўгли, Нурмон Абдувой ўгли, Исломо шоир Назар ўгли вариантлари» (2016) жылдлари М. Жўраев томонидан сўзбоши ва илмий изоҳлар билан наширга тайёрланган. Олий ўқув юртлири талабалари учун «Фольклор практикаси» (1993, ҳамк.), «Ўзбек мавсумий маросим фольклори» (2008), «Фольклоришуносликка кириши» (2008), «Фольклоришунослик асослари» (2009) каби ўқув қўлланмаларини яратган.

ЎЗБЕКЛАРНИНГ ШАМОЛ БИЛАН БОҒЛИК МИФОЛОГИК ТАСАВВУРЛАРИ

Ўзбекларнинг шамол чакириш билан боғлиқ ирим-сиримлари ва бу эътиқодий инончлар тизими билан алоқадор магик айтим матнларида шамолнинг афсонавий ҳомийси – Ҳайдар ёки Мирҳайдар номи тилга олинади. Ҳайдар култи билан боғлиқ мифологик тасаввурлар Ўрта Осиёда истиқомат қиладиган туркий халқларнинг деярли барчасига маълумлиги илмий адабиётларда қайд қилинган¹. Шамол пирини Ҳайдар деб аташ Ўрта Осиёда яшовчи туркий халқлар мифологияси ва маросим фольклорининг муштарак анъаналаридан бири бўлиб, қачонлардир бу афсонавий ҳомийга мурожаат қилиб шамол чакириш маросимини ўтказиш кенг расм бўлган. Кейинги пайтларда бу маросимни ўтказишга ҳаётий эҳтиёж қолмаганлиги сабабли бу ритуал унутилиб кетган. Б. Саримсоқовнинг фикрича, бу маросим чоғида ижро этилган қўшиқлар ҳам унутилиб кетган, ўзбеклар орасида фақат бир тўртлик сақланиб қолган, холос².

Биз томонимиздан кейинги йилларда Самарқанд, Навоий ва Бухоро вилоятларида олиб борилган текширишлар натижасида тўпланган фольклор ва этнографик материаллар бир замонлар бободехқонларимиз томонидан ҳар йили буғдой ўрмидан сўнги хирмон созуриш мавсумида ўтказиб келинган анъанавий шамол чакириш маросими фольклори ҳақидаги тасаввурларимизни бирқадар бойитиш имконини берди.

¹ Джикиев А. Традиционные туркменские праздники, развлечения и игры (на материале Южного и Восточного Туркменистана). – Ашгабад: Наука, 1983. – стр. 15; Кармышева Дж. Х. Земледельческая обрядность у казахов // Древние обряды и культы народов Средней Азии. – М.: Наука, 1986. – стр. 63; Демидов С.М. К вопросу о некоторых пережитках домусульманских обрядов и верований у юго-восточных туркмен // Труды Института истории, археологии и этнографии АН Туркменистана. Вып. VI. – Ашгабад: Наука, 1962. – стр. 201; Оразов А. О земледельческих традициях в долинах Сумбара и Чандира в конце XIX – начале XX вв. // Очерки по истории хозяйства и культуры туркмен. – Ашгабад: Наука, 1973. – стр. 30.

² Саримсоқов Б. Ўзбек маросим фольклори. – Тошкент: Фан, 1986. – 135–136-бетлар.

Навойи вилоятининг Нурога туманидаги Сойкечар қишлоғида яшовчи Тоштемир Турдиевнинг айтишича, хирмон совураётганда ҳаво дим бўлиб, сомон юришмаса, сопол ёки чинни идишларни тақиллатиб, ҳуштак чалишган. Шундаям шамол эсавермаса, ҳуштак чалиб туриб:

*Шамолингни қўйвор,
Сомони сендан,
Бугдойи мендан,
Ҳайдаро, Ҳайдар,
Боланг сувга оқди,
Югур ушлаб ол!*

Шофирконлик Турсуной Ўрунованинг эслашича, бобоси хирмон совураётганда:

*Ҳайдар-о, Ҳайдар,
Шамолингни қайтар,
Боланг қудуққа тушиди,
Уйинг қайғуга тўлди,
Ҳайдар, Ҳайдар, келақол,
Шамол бўлиб эсақол,
Бугдойи менга фойда,
Сомонини олақол! –*

деб хитоб қилиб, ҳуштак чалишар экан.

Шамол пирига мурожаат қилаётган деҳқон агар Ҳайдар ўз марҳаматини дариф тутмаса, уни махсус неъмат – сомон билан сийлаяжagini айтади. Чунки хирмон совураётганда деҳқон қўлидаги паншахаси (Бухоро вилоятининг Қоракўл туманидаги Жиғачи қишлоғида бу асбобни *бодёвоқ* дейдилар) билан янчилган бугдойни тепага қаратиб отади. Бугдой дони оғир бўлгани учун хирмонга тўкилади, сомонни эса ғир-ғир эсаётган шамол учуриб бориб, сал нарироқдаги тўсиқ олдиға йиғади. Шу боис, деҳқонлар Ҳайдар донни деҳқонга қолдириб, сомонини ўзи олиб кетади, деб ўйлаганлар.

Айрим жойларда деҳқонлар шамол пирига хирмондаги дондан ҳам «улуш» чиқарганлар. Бухоро вилоятининг Олот туманидаги Банги кишлоғида яшовчи Эшон бува Абдиевдан ёзиб олинган куйидаги айтим фикримиз далилидир:

*Ҳайдар ога, Ҳайдар ога,
Шамолнингни қайтар, ога,
Отиздаги буғдойимнинг
Ярмини қилдим садога.*

Бу айтим замирида халқимизнинг Ҳайдар культига сиғиниш удумининг ўзига хос бир кўриниши – шамол чақириш маросимида шамол пирига қурбонлик қилиш анъанаси ўз ифодасини топган. Назаримизда, илгарилари ҳар бир деҳқон олинадиган ҳосилнинг маълум бир қисмидан ҳосилдорлик культларини ритуал таом билан сийлаш мақсадида махсус маросим оши тайёрлашда фойдаланган. «Даладаги буғдойнинг ярмини сенга садақа қилдим» деганда олинажак дондан махсус таом пишириб, шамол пири Ҳайдар ҳақида бахш этилиши назарда тутилган. Жиззах вилоятининг Фориш туманидаги Сайёд кишлоғида шамолни тўхтатиш учун ўчоқнинг бир томонига пичоқ санчилган ҳамда: «Қўй шамол, қўй ювош, шамол ювош, Ел отага етти қумалоқ!» – дейишган.

Маълумки, *ҳайдар* – сочининг алоҳида магик қудратга эга деб тасаввур қилинган қисми – *кокил* маъносини ҳам билдиради. Айни пайтда бу рамзий детал шамол пири образининг анъанавий атрибутларидан бири вазифасини ҳам бажаради. Юқоридаги маросим кўшиқларида ҳам Ҳайдар образининг алоҳида белгиларидан бири – шамол пирининг кокили борлиги ҳақида маълумот берилган. Халқимизнинг одатига кўра, фарзанд кўргани билан боласи турмайдиган оилада чақалоқ туғилса, бола ёшига етганда унга «соч тўйи» қилинади. Бола ўсиб-унсин, зиён-заҳматлар озор етказмасин деган ниятда бошнинг энса қисмидаги «қорин сочи»дан бир тутамини қирқмасдан қолдирадилар. Ана шу кокил «*ҳайдар*» дейилади. Шамол чақириш маросими айтимларининг айрим намуналарида Ҳайдарнинг мифологик кийёфаси кокил детали воситасида

тасвирланганлигининг ҳам муайян тарихий асослари мавжуд. Аждодларимизнинг эътиқодий қарашларига кўра, деҳқоннинг мурожаатини эшитиб йўлга чиққан Ҳайдар кокилини силки-тиб келаётган пайтда, шамол кўзгалар эмиш. Бу мифологик эътиқод Навоий вилоятининг Қизилтепа туманидаги Арабон қишлоғида яшовчи М. Орзиевадан ёзиб олинган қуйидаги маросим кўшиғида ҳам яққол кўзга ташланади:

*Ҳайдар-о, Ҳайдар,
Кокилингни силки!
Хотинингни уйқу босди,
Болангни сув оқизди,
Ҳайдар-о, Ҳайдар,
Кокилингни силки!*

Демак, Ўрта Осиё халқлари мифологиясида Ҳайдар образи елкасига тушиб турадиган кокиллари қилпиратганча, қулочини кенг ёзиб келадиган асотирий персонаж сифатида тасаввур қилинган. Агар А. Диваев томонидан оммалаштирилган қозоқ маросим кўшиғида¹ ҳам шамол пирининг «қулочини кериб келиши»га истак билдирилганлигини ҳисобга олсак, бу образнинг мифологик асоси Ўрта Осиё халқларининг табиат культурасига сиғинишдан келиб чиққан қадимий культ мифларига боғлиқлигига ишонч ҳосил қиламиз.

1989 йилнинг июнида Бухоро вилоятининг Олот туманидаги Қассоббаёт қишлоғида яшовчи Дурси момо Аллашева айтиб берган тўртликда эса шамол қари ота-онасидан айрилиб, ғирт «етим»га айланганлиги, барча мерос унга қолганлиги баён қилинади:

*Ҳайдар-о, Ҳайдар,
Шамолингни қўй, Ҳайдар!
Отанг-онанг ўлибди,
Моли сенга қолибди!*

¹ Диваев А. Призыв ветра (киргизское поверье) // Туркестанские ведомости, 1892, № 41.

Шу қишлоқлик Яхши момо билан суҳбатлашганимизда, олотликларнинг шамол чақириш билан боғлиқ маросимида ижро этилган қадимий қўшиқнинг нисбатан тугал сақланган намунасини ёзиб олишга муваффақ бўлдик. Момонинг айтишича, қадимгилар бугдой созуриладиган палла шамол бўлмай қолса, дарҳол олов ёқиб, *чўп кади* (сув ковок)ларни куйдиришаркан. Сув қовокни куйдириш удуми ҳам сув култи билан боғлиқ. Аёллар Ҳайдар бобонинг ҳақиға ис чиқаришган, кади куйдираётганлар эса:

*Ҳайдар оға, Ҳайдар,
Шамолингни қайтар,
Ўғлинг ўра кетди,
Қизинг қира кетди,
Ўғлинг керак бўлса,
Арқон олиб югур.
Қизинг керак бўлса,
Кетмон олиб югур,
Ҳайдар оға, Ҳайдар,
Шамолингни қайтар! –*

деб қўшиқ айтишган.

Шамол чақириш маросимида «*чўп кади*» – «сув ковок» куйдириш одати бошқа ҳудудларда ҳам қайд қилинган. Қоракўл туманининг Жиғачи қишлоғида яшовчи чўпонларнинг айтишларича, шамол бўлмаганда илгарилари чўпон-чўликлар қўй-эчкиларнинг калла суяқларини ҳамда сув, мой солишда ишлатиладиган кадиларни тўплаб куйдиришган экан.¹ Ғиждувон туманининг Улфатбиби қишлоғида хирмон созураётганда шамол бўлмаса, кексалар шамол чақириш учун дарҳол олов ёқиб, чўп кадини куйдирганлар.² Шу тумандаги Абдухолик Ғиждувоний номли жамоа хўжалигида яшовчи кишилар эса шамол тўхтатиш учун кади куйдиришган.³ Фарғона вилоятининг Бувайда туманидаги

¹ Фольклор экспедицияси материаллари. 1981 йилда кекса чўпон Бардиш Султоновдан М. Жўраев ёзиб олган.

² Фольклор экспедицияси материаллари. 1991 йилда 77 яшар Иззат биби Мажидовадан А. Файзиева ёзиб олган.

³ Фольклор экспедицияси материаллари. 1991 йилда Аълам бобо Нуриддиновдан ёзиб олинган.

Олтинқўрғон қишлоғида шамол чақириш учун мевали дарахтга суқвоқни осиб қўйиб ёқишгач:

*Мирҳайдар, Мирҳайдар,
Шамолингни бер, Ҳайдар,
Ҳайдарали-ю! –*

деб Тангридан шамол сўрашган.¹

Шамол чақириш маросимининг Ҳайдар култи билан боғлиқ талқинида ижро этилган қўшиқлардан бирини фольклор тўпловчи Йўлдош Султонов ёзиб олиб оммалаштирган. У нашр этган матн бадий жиҳатдан анча пишиқлиги ва табиатга магик воситалар ёрдамида сирли йўсинда таъсир ўтказиш билан алоқадор қадимий халқ қарашларини ўзида сақлаб қолганлигига кўра муҳим илмий қимматга эга:

*Ғарамларни яйратиб,
Увотга босиб қўйдим,
Елкасига игна санчиб,
Қурбақа осиб қўйдим,
Ҳайдар, шамолингни олиб кел!*

*Ҳовузлар сасиб кетди,
Бақа тўн босиб кетди,
Боқ бува соқолидан,
Бир тутам осиб кетди,
Ҳайдар, шамолингни олиб кел.²*

Буғдойни ўриб-йиғиб олган деҳқон похолни обдон қуритмасдан янчмайди. Бунинг учун буғдойи ўриб олинган даланинг бир четини кетмон билан текислаб, ён-верини бегона ўтлардан тозалайди. Ўрилган буғдой ғарамларини ана шу жойга яйратиб босиб қўяди, ёйиб қуритади. Обдон қурисин учун у ёқ-бу ёққа ағдариб ҳам туради. Кейин ғарамларни ўртага йиғиб, уч-тўртта

¹ Фольклор экспедицияси материаллари. 1991 йилда Садоқат Ҳакимовадан ёзиб олинган.

² Қайнар булок. Болалар фольклори. (Тўпловчи: Й. Султонов). – Тошкент: Юлдузча, 1991. – 28-бет.

эшак ёки хўкизларни хўпга кўшиб, буғдойни янчади. Ана шундан сўнг деҳқон тезроқ шамол эсишини кута бошлайди. Баъзан бир неча кунлаб ҳаво дим бўлиб, ғир этган шабада эсавермаса, хирмоннинг таги нам тортиб, ғалла чиримаслиги учун ғарамни тез-тез ағдариб турадилар. Шу тариқа бир неча кун бесамара ўтиб, кутилган шамолдан дарак бўлавермаса, деҳқон қадимгилар одатига амал қилиб битта қурбақани тутиб олади-да, елкасига нина санчиб, хирмон устига ўрнатилган таёққа осиб қўйиб, юқоридаги маросим кўшиғини айтади. Хўш, нега энди айнан қурбақани бунчалик қийнаш керак бўлиб қолди экан?

Шарқ халқларининг деҳқончилик билан боғлиқ культларини тадқиқ этган В. В. Евсюковнинг ёзишича, *қурбақа* образи қадимги мифологияда ёмғир ва сув тимсоли сифатида талқин қилинган экан. Хусусан, кўҳна Чин асотирларида олам уммонининг эгаси бўлмиш улкан самовий қурбақа ҳақида ҳикоя қилинган. Бу миф сюжети Шимолий Америка ва Австралида яшовчи маҳаллий аҳоли фольклорига ҳам қайд қилинган: қурбақа бутун бир ховузнинг сувини бир сипқорганда ичиб қўяди, аммо одамлар уни мазах қилаётганини кўриб, ҳафсаласи пир бўлади-ю, ютган сувини тўкиб юборади. Қадимги одам тасавурида сув, ёмғир каби табиат неъматлари билан боғлиқ ҳолда муқаддаслаштирилган афсонавий қурбақа образи аста-секин ҳосилдорлик ва кут-барака рамзига айланиб кетган.¹

Ўрта Осиё худудида олиб борилган археологик қазув ишлари чоғида қурбақа шаклидаги сопол ҳайкалчалар ва турли-туман тақинчоқлар топилган. Сополлитепа кўрғони атрофидан қурбақанинг тошдан йўниб ишланган жажжи ҳайкалчаси топилган бўлса,² Тупроққалъанинг юза қатламларидаги V асрга оид қадимий ибодатхона қолдиқлари ўрганилаётганда олимлар қурбақа шаклида ясалган мунчоқ донасига дуч келишган.³ Шун-

¹ Евсюков В. В. Мифология китайского неолита. – Новосибирск: Наука, 1989. – стр. 94–95.

² Раҳманов У. Хозяйственные помещения за пределами крепости Сапаллитепа // История материальной культуры Узбекистана. Вып. 13. – Ташкент: Фан, 1977. – стр. 24.

³ Неразик Е. Е. Раскопки городища Топрак-кала // Археологические открытия. 1974. – М.: Наука, 1975. – стр. 509.

га ўхшаш топилдиқларнинг мифологик моҳияти борасида фикр юритган санъатшунос Л. И. Ремпель «Ўрта Осиё халқларининг хунармандчилик санъатида қурбақа образидан намгарчилик ва ёмғир ифодаси, бахт ва омад тимсоли, яъни бамисоли тумор сифатида фойдаланилган»лигини қайд қилади.¹

Қурбақанинг самовий ҳодисалар билан алоқадорлиги ҳақидаги халқ қарашлари ёмғир ва шамол чақириш маросимларида унга ҳосилдорлик тимсоли сифатида мурожаат қилиш анъанасини келтириб чиқарган. Шу боис Доғистонда яшовчи лак ва дарғинлар бевақт ёққан ёғингарчиликни тўхтатиш учун ўз туққан онаси, бувиси ҳамда катта момоси, яъни «уч она»си тирик бўлган аёл яшил матодан қурбақага «иштон» тикиши керак деб ўйлайдилар. Яшил либос кийдирилган қурбақани тарнов учи ёки айвон пештоқига илиб қўйиб, «ёмғир тинсин, қуёш чиқсин!» дейишган.² Тибетликлар эса қурбақани чуқурчага кўмиб қўйиб, устига таёқ суқиб қўйса, ёмғир тинади деб ирим қилишган.³ Қадимги чинликлар эътиқодича, қурбақа жуда кўп яшаб, қариса, қурғоқчиликка сабаб бўлувчи ёвуз руҳларни еб қўядиган даражада кучли бўлиб қолар экан. Агар ана шундай «каромат»ли қурбақани бешинчи ойда сояда қўйиб, қуритса, дарҳол ёмғир ёғармиш.⁴

Саян-Олтой шаманларининг чилдирмасидаги рамзий чизгиларнинг мифологик моҳиятини тадқиқ этган этнограф Л. П. Потаповнинг қайд этишича, шаман доирасининг қуйи қисми илон, калтакесак, ёмғир чувалчанги билан бир қаторда «бақа» сурати ҳам чизилган. Маълум бўлишича, «коль еези», яъни «қўл эгаси» сифатида тасаввур қилинган «бақа» шаманнинг яқин кўмакчила-

¹ Ремпель Л. И. Цепь времен. Вековые образы и бродячие сюжеты в традиционном искусстве Средней Азии. – Ташкент: Издательство литературы и искусства, 1987. – стр. 37.

² Халилов Х. М. Историческая общность и национальное своеобразие обрядовой поэзии народов Дагестана и Северного Кавказа // Дагестанский фольклор во взаимосвязи с иноэтническим фольклором. – Махачкала, 1985. – стр. 19.

³ Календарные обычаи и обряды народов Восточной Азии. Годовой цикл. – М.: Наука, 1988. – стр. 276.

⁴ Евсюков В. В. Мифология китайского... стр. 95.

ридан бири сифатида оғир беморларни даволашда ёрдам берувчи жонзот деб қаралган.¹

Бизнингча, қадимги одам қурбақани ҳосилдорлик, кут-барака тимсоли сифатида эъзозлаганлиги учун шамол чақириш маросимида ҳам бу жониворнинг магик қудратидан нажот кутганлар. Қурбақанинг елкасига игна санчиб осиб қўйиш, яъни жониворни кийнаш удуми шамол пири Ҳайдар култи тўғрисидаги халқ қарашларига боғлиқ бўлмаган ҳолда мустақил эътиқодий инонч сифатида халқ орасида аввалдан мавжуд бўлиб, маросим фольклори жанрларининг бадий эволюцияси давомида бу икки хил мифологик эътиқод бирлашиб кетган. Аслида, қурбақа – табиат ходисаларига ўз ҳукмини ўтказа оладиган ёвуз кучлар кушандаси деб қаралганлиги боис, одамлар уни қийнаш орқали шамолни эсишдан тўхтатиб қўйган деб тасаввур қилинган ёвуз кучларни жиловлашга уни мажбур этишган.

Энди Ҳайдар култи билан боғлиқ мифологик тасаввурларнинг тарихий асослари масаласига тўхталиб ўтайлик. Кўпгина тадқиқотчилар Ҳайдар ҳақидаги халқ қарашлари Муҳаммад пайғамбаримизнинг куёви Ҳазрат Али тўғрисидаги афсоналар асосида юзага келган деб ҳисоблайдилар.² Бизнинг Зарафшон водийсида олиб борган этнофольклористик кузатишларимиз эса Ҳайдар култининг юзага келиши Али ибн Абу Толиб шахсининг муқаддаслаштирилиши анъанаси билан боғлиқ бўлмасдан, аждодларимизнинг исломдан бурунги мифологик инончлари, биринчи галда, табиатга сиғинишга алоқадор эътиқодий қарашларга бориб тақалишини кўрсатди. Ўрта Осиё халқларининг қадимги мифологиясида шамол ҳомийси сифатида мўътабарлаштирилган Ҳайдар образи тўртинчи халифа Али ибн Абу Толиб шахсининг муқаддаслаштирилишига боғлиқ бўлмаган ҳолда, ўлкамизга

¹ Потапов Л. П. Шаманский бубен качинцев, как уникальный предмет этнографических коллекций // Материальная культура и мифология. – Л.: Наука, 1978. – стр. 135.

² Басилов В. Н. Заключение // Древние обряды, верования и култы народов Средней Азии. – М.: Наука, 1986. – стр. 201; Саримсоқов Б. Ўзбек маросим фольклори. – Тошкент: Фан, 1986. – 136-бет; Асогирлар ва ривоятлар. 1-китоб. (Тўплаб, нашрга тайёрловчилар: М. Муродов, М. Шайхова). – Тошкент: Ёш гвардия, 1991. – 33-бет.

ислом дини ёйилишидан анча илгарироқ яратилган мифологик персонажлар сирасига киради. Фикримиз исботи тариқасида куйидаги далилларни келтирамиз:

1) дехконлар, асосан, хирмонни совуриб, донни сомондан ажратиб олиш пайтида шамол сўраб, Ҳайдарга мурожат қилганлар. Бу эса шамол ҳомийси Ҳайдар ёки Мирҳайдар образи бевосита ҳосилдорлик, қут-барака тушунчалари билан боғлиқлигини кўрсатади. Зеро, абхаз дехконлари эътиқодича, ҳосилдорлик худоси Айтар (баъзи манбаларда Айетыр)га илтижо қилинса, ҳосил чўғи баланд бўлар эмиш.¹ **Айтар** ва **Ҳайдар** атамаларининг ўзаро яқинлиги ҳамда уларнинг ҳар иккаласи ҳам ҳосилдорлик тимсоли сифатида тасаввур қилинганлиги бу икки образнинг мифологик асослари ва этимологик талкинида муштараклик бўлиши мумкинлигини кўрсатади;

2) Ўрта Осиё туркий халқлари фольклоридаги шамол ҳомийсининг номи сифатида қўлланилувчи «Ҳайдар» атамасининг келиб чиқиши «Авесто»да номи тилга олинган шамол худоси «**Vata**» – «Вата» атамасига боғланади деб ҳисоблаймиз. «Авесто»да икки нафар шамол худосининг номи («**Vayu**» ва «**Vata**») тилга олинган. Бу мифологик атамаларнинг ўзаги «**va**» лексемаси бўлиб, қадимги хинд-эрон тилларида бу сўз «эсмоқ» (яъни шамол эсиши) маъносини билдирар экан. Б. А. Литвинский шамол ҳомийсининг исми паҳлавий матнларида «**Vat**», яъни «шабада манбаи», турк-манихей ёзма ёдгорликларида эса «**wadziwanta**» тарзида қўлланилганлигини аниқлаган. Унинг фикрича, «**Vata**» жанубдан эсадиган шамол худосининг исмидир.² Паҳлавий матнларида номи қайд этилган «**wād**» мифоними ҳам «шамол тангриси»нинг номи сифатида қўлланилган.

Шамол ҳомийси ёки худоси Vata ҳақидаги мифологик қарашлар Ўрта Осиёда яшаган қадимги элатлар дунёқарашида муҳим ўрин тутганлигини археологик топилмалар ҳам тасдиқлайди. Чунончи, қудратли Кушон империясининг ҳоқони, милоднинг

¹ Акаба Л. К. Из мифологии абхазов. – Сухуми, 1976. – стр. 41–42.

² Литвинский Б. А. Семантика древних верований и обрядов памирцев // Средняя Азия и ее соседи в древности и средневековье. – М.: Наука, 1981. – стр. 104–105.

78–123 йилларида яшаган Канишка ҳамда унинг II аср учинчи чорагида ҳукм сурган вориси Хувишка томонидан зарб қилинган мис тангаларда чоғиб бораётган одам тасвири туширилган. Тангадаги эркак киши тасвирининг кўриниши ва сурат остида Vad деган ёзув мавжудлигига асосланган мутахассислар қадимий тангаларда шамол тангрисининг тасвири туширилган бўлса керак, деб тахмин қилмоқдалар. Бу эса ўша пайтларда «Авесто»даги шамол тангриси ҳақидаги қарашлар ўртаосиёликлар орасида кенг шуҳрат қозонганлигини кўрсатади. Бунинг устига шамол ҳомийсининг сўғдча атамаси ҳам «Авесто» мифларида номи тилга олинган шамол худоси образи исмига ўхшаш экан.¹

«Авесто»да номи тилга олинган шамол худоси ҳақидаги мифологик қарашларнинг айрим талқинлари муайян ўзгаришларга учраган ҳолда бўлса-да, бизнинг кунларгача сақланиб қолган. А. З. Розенфельд томонидан ёзиб олинган бир афсона «Vata» образининг тожик фольклорида сақланиб қолган талқинлари хусусида фикр юритиш имконини беради. Панжлик тожиклар этнокодича, куёш ботаётган пайтда пайдо бўлган қуёндан Хайт деб аталувчи бир афсонавий махлуқ туғилар эмиш. Бўйи жуда дароз бўлган Хайт ғира-ширада тоғ ёнбағрида кетиб борар, бир оёғини Панж дарёсининг бир соҳилига, иккинчи оёғини эса нариги қиргоққа қўйганча, шаҳдам одим отиб, кўздан ғойиб бўларкан. «Хайт» сўзи «улкан одам», «пахлавон» маъноларини билдиради экан.² Бу мифологик образ узун бўйли, сочи тақимида тушган, оппоқ кийимли махлуқ сифатида тасаввур қилинган.³

Узун соч ёки кокил, яъни ҳайдар ўзбек маросим фольклоридаги шамол ҳомийси образининг мифологик табиатини белгиловчи ўзига хос деталларидан бири эканлигини «Ҳайдар, кокилингни силкит» айтими таҳлилида юқорида қайд қилиб ўтган эдик. Чамаси, болаларнинг сочини илк бор олганда ирим қилиб қолдирилган кокилни «ҳайдар» деб аташ анъанаси кейинча-

¹ Литвинский Б. А. Семантика древних верований... стр.105–106.

² Розенфельд А. З. Великаны в таджикском фольклоре // Фольклор и этнография. – Л.: Наука, 1973. – стр. 93.

³ Литвинский Б. А. Кўрсатилган мақола. – 104-бет.

лик урф бўлганга ўхшайди. Чунки зардўштийлик акидалари амал қилган замонларда шамол тангриси сочи узун афсонавий ҳомий сифатида тасаввур қилинган ва бу эътиқод кейинчалик Ҳайдар образининг мусулмон мифологияси талқинлари билан қўшилиши жараёнида мазкур асотирий персонажнинг исломдан аввалги халқ қарашларига алоқадор талқинлари унутилиб кетган.

«Авесто»даги шамол тангриси «**Vata**» ҳам магик қудратга эга бўлганлиги, яъни сочи узунлиги туфайли барча шамолларни ўз измига бўйсундира олган. Шамол тангриси образининг мифологик қарашлар тизимидаги тадрижий ривожидавомида «**Vata**» атамаси асосида «**Ҳайдар**» номи юзага келган. Сочнинг алоҳида магик кучга эгаллиги ҳақидаги тасаввурлар эса болаларга табаррук кокил – ҳайдар кўйиш удумида ўз ифодасини топган.

Бизнинг фикримизча, Ўрта Осиёда яшовчи туркий халқлар орасида шамол ҳомийси сифатида тасаввур қилинувчи Ҳайдар ёки Мирҳайдар образининг тарихий-мифологик асослари зардўштийликнинг муқаддас китоби «Авесто»да тасвирланган шамол тангриси – «**Vata**» ҳақидаги эътиқодий қарашларга бориб тақалади. «**Vata**» образи эса аجدодларимизнинг зардўштийликдан ҳам илгариги эътиқодий инончлари, табиат ҳодисаларини мўътабарлаштириш билан боғлиқ мифологик тасаввурлар, ҳосилдорлик культларига сиғиниш анъаналари замирида юзага келган ҳамда ҳомий куч тимсоли сифатида мифологик персонажлар тизимидан ўрин олган. Юқоридаги мулоҳазаларимизни қўйидагича умумлаштириш мумкин:

а) «**Vata**» ва «**Ҳайдар**» образлари орасидаги тарихий-генетик алоқадорлик мавжуд бўлиб, ҳар иккала образ ҳам муайян табиат ҳодисаси – шамол култи билан боғлиқдир. Қадимги деҳқонларнинг ҳосилдорлик култи билан алоқадор мифик тасаввурлари тизимида шамол тангриси сифатида талқин қилинган мифологик ҳомий образининг тадрижий ривожидатида шамол пири – Ҳайдар тўғрисидаги халқ қарашлари келиб чиққан;

б) «**Vata**» ва «**Ҳайдар**» образларининг мифологик табиати сочнинг магик қудратига ишониш анъаналарини ҳам ўзида муҳасамлаштирган;

в) «**Vata**» ва «**Ҳайдар**» атамаларининг фонетик курилиши ҳам ўзаро яқин бўлиб, ҳар иккала мифологема таркибида қадимги хинд-европа бобо тилида сўзлашган аҳоли лаҳжасида «шамол эсиши», «шамол» маъноларида қўлланилган «**va**» // «**vay**» // «**vat**» ўзаги мавжуд. Шунга кўра, Ҳайдар мифологемасининг шаклланиш босқичлари ва бу атаманинг этимологик жиҳатдан келиб чиқишини тахминан қуйидагича таърифлаш мумкин: **Va** → **Vata** → **Vayta** → **ayta** → **Hayta(+ar)** → **Haydar**. Яъни лисоний-этимологик жиҳатдан Ҳайдар атамаси икки узвдан иборат: **Hayt** + **ar**. Мифологеманинг биринчи қисми зардуштийлик мифологиясидаги шамол ҳомийси «**Vata**» атамасининг фонетик ўзгаришга учраган кўриниши бўлса, **ar** эса «одам», «эр», «эркак» маъносидаги сўздир.¹

¹ Ушбу мақола куйидаги манба асосида тайёрланди: Жўраев М. Ўзбекларнинг шамол билан боғлиқ мифологик тасаввурлари. 2. Ҳайдар култи // Ўзбек тили ва адабиёти. – Тошкент, 1997. – № 4. – 41–47-бетлар.

Шомирза
ТУРДИМОВ

(1957 йилда туғилган)



Шомирза Ғаниевич Турдимов 1957 йил 13 декабрда Самарқанд вилояти Нурота тумани Қўштамғали қишлоғида туғилган. Тошкент давлат университетининг филология факультетида ўқиган (1974–79). ЎзР ФА Алишер Навоий номидаги Тил ва адабиёт институти Фольклор бўлимида лаборант (1979–82), ЎзР ФА Ҳ. Сулаймонов номидаги Қўлёзмалар институти Фольклор секторида кичик илмий ходим, катта илмий ходим бўлиб ишлаган (1982–97). ЎзР ФА Тил ва адабиёт институти Фольклор бўлимининг катта илмий ходими вазифасида ишлаган (1997–2016). Алишер Навоий номидаги Тошкент давлат ўзбек тили ва адабиёти университети Фольклор ва диалектология кафедраси мудири (2016–2017). Ҳозир ЎзР ФА Ўзбек тили, адабиёти ва фольклор институтида етакчи илмий ходим бўлиб ишлайди. «Ўзбек халқ лирик қўшиқларида поэтик рамз ва унинг функцияси» мавзусидаги номзодлик (1087), «Гўрўғли» дostonларининг генезиси ва тадрижий босқичлари» мавзусида докторлик (2011) диссертацияларини ёқлаган. «Ўзбек халқ дostonлари каталоги» (1986, ҳамк.), «Этнос ва эпос» (2012) сингари монографиялари, «Наврўз нашидаси: Наврўз байрами билан боглиқ қўшиқлар, газаллар, шеърлар» (2009, ҳамк.), «Гўрўғли» дostonларининг генезиси ва тадрижий босқичлари» (2011), «Этнос ва эпос» (2012), «Наврўз қўшиқлари» (2013, ҳамк.), «Ҳикмат хазинаси» (2016) каби китоблар муаллифи. Ўзбекистон Республикаси Давлат мукофоти лауреати (2007).

ҚАҲРАМОНЛИК ЭПОСИДА АЛПЛИК ТИЗИМИ

«Гўрўгли» ва «Алпомиш» дostonларида куйланган эпик воқеалик замирида халқимизнинг бутун борлик тартиби, олам, ундан жой олган кучлар ва одамнинг ўрни, вазифаси ҳақидаги кўхна дунёқарашлар, тасаввур-тушунчаларнинг бадиий талкинлари турибди. Биз ушбу дунёқараш, тасаввур-тушунчаларга нисбатан алплик тизими атамасини кўлламоқдамиз¹. Ушбу тизим шу пайтгача фольклоршуносликда тадқиқотлар объекти бўлган эмас². «Гўрўгли» ва «Алпомиш» дostonлари асосида тикланган алплик тизимининг куйидаги етакчи хоссаларини санаб ўтамиз:

1. Бўлажак қаҳрамоннинг туғилмасданоқ «танланган», яъни ҳомий-эранлар назарида бўлиши. Илк кўринишда тўғридан-тўғри илоҳий ҳомила меваси эканлиги.

2. Бахтли юлдуз остида туғилувчи бўлажак қаҳрамоннинг пайдо бўлиши ҳақида душман юрт қоҳинларининг кароматлар килиши.

3. Қаҳрамон ота-онасининг «ўзга» (душман) юртда мажбуран яшаши.

4. Душманларнинг доғда қолиб, қаҳрамоннинг ўзга юртда дунёга келиши, улғайиб ўздушман юртига қайтиб бориши.

5. Қаҳрамонга исм берилиши (икки исмли бўлиш).

6. Қаҳрамоннинг улғая бориши давомида алплик дардига йўлиқиши (бу муддат уч ёшдан етти ёшгача уч бора такрорланиши). Алплик дардининг «танланган» қаҳрамон ва «танловчилар» ҳомий эранлар ўртасида бевосита мулоқот бошланганлигини бил-

¹ Бу ўринда алп сўзининг эпик қаҳрамон маъноси асос сифатида олинмоқда. «Алпомиш» дostonида: «Дунёда бир кам тўқсон алп ўтди, алпларнинг бошлиғи Рустами дoston эди, охири бу Алпомиш алп бўлсин. Тўқсон алпнинг бири бўлиб санага ўтди», деб айтилган талкиндаги алп мазмуни назарда тутилган.

² Ушбу мақола «Алплик тизими ҳақидаги тасаввурлар ва «Алпомиш» дostonи» («Алпомиш» – Ўзбек халқ қаҳрамонлик эпоси. – Тошкент. Фан, 1999. – 157–163-бетлар); «Эпос сюжетидаги таянч мотивлар талқини ва алплик тизими» («Гўрўгли» дostonининг генезиси ва тадрижий босқичлари». – Тошкент. Фан, 2011. – 11–39-бетлар) каби мақолалар асосида қайта ёзиб чиқилди.

дириши. Алплик дарди қахрамоннинг ерда туғилиб, маълум маънода «ёввойилашган» руҳи ва бу руҳга макон бўлган таннинг эранлар иқлимга мослашолмай қаршилик қилиш жараёни эканлиги.

7. Эранларнинг ўз маконида қахрамон жисми ва руҳини шлоҳий нур ва сув (шароб) билан тоблаб, эмлаб, «асов тулпор»ни жиловлаб, дарддан халос этиши. Унга алплик сиру синоатларини ўргатишлари. Қахрамоннинг руҳ – эранлар маконида алп сифатида қайта яралиши.

8. Қахрамоннинг алпликнинг магик куч-қудратига, жангчилик санъатига, билимга, мўъжизакор хусусиятлар ва белги-нишонларига эга бўлиши.

9. Қахрамоннинг эранлардан алплик курол-аслаҳаларини олиши.

10. Қахрамоннинг алп сифатида бажарадиган вазифаси, ер юзидаги бурчи ва тақдири, ҳаётининг ибтидо-интиҳосини эранлардан билиши.

11. Эранларнинг қахрамонга ҳамкор этиб ўз шерикларидан бирини тайинлашлари (эранлар Соқибулбулни Гўрўғлига устоз ва Фирқўкка сайис қилиб белгилашади. «Алпомиш»да айни вазифа Қултой образида ўз талқинини олган).

12. Қахрамоннинг ўз ғайриқутби, душман ва рақиби («дўст»)га эга эканлиги.

13. Қахрамон куч-қудратининг ҳомий руҳлар (эранларнинг) куч-қудрати билан узвий боғлиқлиги.

14. Қахрамоннинг ўз алплигини амалда намойиш этиши ва халқ (қавми) томонидан алп (соҳибқирон) сифатида тан олиниши.

15. Алпнинг ўз атрофига ғайратли, шижоатли ҳамкорларни йиғиши.

16. Алпнинг ўз юртида янги салтанатга асос солиши.

17. Қахрамоннинг янгича ном олган салтанат камолига хизмат қилиши. Бу салтанат довруғининг оламга машҳур бўлиши.

18. Қахрамоннинг умри поёнида эран мақомига эришуви ва эранлар маконига қайтиши (кетиши).

19. Қахрамоннинг халқ анъанавий тасаввурида инсоннинг ҳар жиҳатдан етук бўлишига имкон берувчи улуглик ёшига етиши (Гўрўғли 120 ёшга киради. Алпомиш эса 108 йил яшайди. Ҳар

икки рақам ҳам инсон умрининг анъанавий бир бутун ҳалқасини рамзий ифодалаши).

20. Қаҳрамонга ҳамкор жанговор отнинг ҳам алп босиб ўтган синов ва тобланиш жараёнидан бир-бир ўтиши.

21. Авлодларнинг алп ҳақидаги дostonни яратиши.

Ушбу алплик тизими тасаввурлари қаҳрамонлик эпосининг асоси, таянч умуртқаси ҳисобланади.

Халқнинг алп ҳақидаги бу яхлит тушунчалар тизими моҳиятида нима турибди?

Ер юзида издан чиққан тартибни ўзанига қайтариш оддий хом сут эмган банданинг қўлидан келмайди. Эпик талқинга кўра ердаги мувозанатнинг бузилиши, ўз навбатида, бутун олам, космосдаги тартибни ҳам издан чиқаради. Шу сабабли космос вакиллари – ҳомий эранлар бу жараёнга аралашадилар. Улар бу вазифани бажарувчи хос вакил танлашади. Ушбу вакил бутун борлик (космос, хаос, ер) кучларининг қуввати пайванд бўлган жойдан униб чиқади. Чунки унинг космос, хаос, ер дунёларида тобга келган руҳи ва тани бутун олам тартибига халал берган кучларнинг ҳар бирини ўз жойида (кўкдагисини кўкда, ердагисини ерда, ер остидагисини ер остида) ўз ўрнига қўйиш имконини беради. Шунинг учун ҳам алп оддий одамлар орасида туғилган хос – танланган киши ҳисобланади. Лекин у туғилиб алп сифатида кучга энгунига қадар кечган вақтда ўзига хос тобланиш босқичларини – инициация жараёнини яшаб ўтиши шарт бўлади. Айни шу тобланишлар ва алп сифатида тан олинлиши, ўзига юкланган миссияни адо этишга киришиш алплик тизими тасаввурларини ташкил этади.

Халқ дунёқарашидаги алплик тизими ҳақидаги тасаввурларнинг моҳиятан халқнинг яна бир танланган кишилари ҳисобланмиш шомонлар ва шомонлик тизими тушунчаларига уйғун келиши ҳам алплик тизимининг халқ дунёқарашида қадимдан яхлит тизим сифатида амалда бўлганлигини тасдиқ этади.

Туркий шомонлик тизимида руҳлар томонидан «танланган» номзод ҳақиқий шомон – одамлар ва руҳлар олами ўртасидаги воситачи бўлгунига қадар алплик тизимидагидек уч муҳим босқични яшаб ўтади. Яъни:

1. Танланганлик (руҳлар томонидан танланади).

2. Шомонлик дардига йўлиқиши.

3. Ҳомий руҳлар томонидан шомон сифатида қайта яралиши.

Энг улуғ шомонларнинг туғилмасданоқ руҳлар томонидан танланиши ва унинг туғилиб, шомон бўлгунича яшаб ўтган синов босқичлари – инициация жараёнлари, шомон бўлгач махсус шомонлик анжом ва белгиларига эгалик қилиб, сеҳрли қувват касб этишлари ҳам алплик тизими тасаввурларига уйғун. Бу эса ҳар икки ҳодиса асосида ягона, умумий тасаввурлар туришидан далолат беради.

«Гўрўғли» (Гўрўғлининг туғилиши, болалиги, уйланиши ва ғойиб бўлиши дostonлари талқинида), «Алпомиш» дostonларидаги алплик тизимига тегишли етакчи хоссаларнинг бадий талқинларини шомонлик тизими тасаввурларига қиёсан қараб чиқайлик.

1. Қаҳрамоннинг туғилмасданоқ ҳомий эранлар назарида турганлиги – назаркарда эканлиги. «Гўрўғли» дostonининг Пўлкан шоир версиясида бу воқеалар тафсилоти Хизрнинг Гўрўғлига айтган ушбу сўзларида аниқ ифодаланган:

*Тоганг билан отанг жонини сотди,
Бир бедовни иккови минди-да кетди.
Заргар элда Ҳилолойни бўзлатди,
Тоганг билан отанг Ёвмитга етди.
Ўйла ўзинг, қари чолнинг фарзанди,
Ор билан Ҳилолой оламдан ўтди...¹*

Хизр Гўрўғлини «ўғлим», «нафас ўғлим», атайди. Ҳатто дostonнинг лақай версиясида қаҳрамоннинг онаси бевосита Хизр назаридан ҳомила топади ва Гўрўғли дунёга келади. «Алпомиш» дostonида айтилади: «Қирк кун ўртадан аниқ ўтди, боз равзадан овоз келди: «Бойбўри, сенга худойим бир ўғил, бир қиз берди, ёлғиз эмас, эгиз берди; Бойсари сенга худойим бир қиз берди, эгиз эмас ёлғиз берди. Бундан борсанг, фарзандларни кўрсанг, халойиқларни йиғсанг, тўй-томошалар

¹ Гўрўғлининг туғилиши / Айтувчи Муҳаммадқул Жонмурод ўғли Пўлкан. Нашрга тайёрловчи: М. Муродов. – Тошкент: Бадий адабиёт нашриёти, 1967. – 126-бет.

берсанг, тўйда қаландар бўлиб бориб, болаларингнинг отини ўзим қўйиб келаман»¹. Ушбу ғойибдан келган хабар туғилажак фарзанднинг назаркарда эканлигидан далолат беради. Худди дostonда тасвирланганидек шомонлик амалиётида ҳам шомон дунёга келмай туриб, у маълум бир эран-руҳ назарида бўлиши мумкин. В. Н. Басилов ўз тадқиқотида бу хил мисолларни келтириб ўтган².

2. Қахрамоннинг «алплик дардига»га йўлиқиш жараёнидаги ёши. Шомонлик дунёкараши бўйича энг зўр шомон 3–5 ёшида «шомонлик дарди»га йўликади.

Гўрўғли ҳам 3–7 ёшида «алплик дарди»га йўликади. Хусусан, уч ёшдан бошлаб ошиқ ўйнаб тўполонлар кўтарса (ўзбек ва туркман версиялари), беш ёшдан бозорни (туркман версияси) талатўп қилади. Етти ёшида Бадкир полвонни ўлдиради (ўзбек версияси).

Гўрўғлининг Ёвмитга келгандан кейин, Райҳон арабга Холжувонни олдириб қўйгач, аламдан қилган «дали»ликларини ҳам ана шу «алплик дарди»нинг давоми сифатида баҳолаш керак.

«Алпомиш» дostonида алплик дарди талқини «Гўрўғли» эпосига қиёслаганда тўла бадий ечимга эврилганини кўрамыз. Одатда, қахрамон – алп халқнинг қуввати сўниб, омма инерт ҳолатга келган бир даврда уни кучга эндирувчи ўзига хос уйғотувчи сифатида пайдо бўлади. Бу даврда инерт авлод ичида пассионар авлод туғилади. Алп пассионар авлод вакилигина эмас, дарғаси, йўлбошчиси ҳисобланади. Ҳамиша пассионар авлод инерт авлод ҳаловатини бузади. Бу жараёнсиз этнос қувватга кирмайди. Яъни, янги сифат босқичига чиқмайди. «Алпомиш»даги закот мотиви ва элнинг бу янгиликдан безовта бўлиб кўчишини ана шу икки авлод кураши билан изоҳлаш керак. Дostonдаги «закот» мотиви асосида алплик дарди бадий кодлари турибди. Дostonнинг бошқа вариант ва версияларида бу мотив бошқа шаклда талқин этилган. Асос шулки, дostonдаги алплик дардини ифодаловчи воқеалар

¹ Алпомиш. Дoston. Ўзбек халқ қахрамонлик эпоси / Айтувчи Фозил Йўлдош ўғли. Тузувчи ва нашрга тайёрловчи Тўра Мирзаев. – Тошкент: Фан, 1999. – 68-бет.

² Басилов В. Н. Избранники духов. – М.: ИПЛ, 1984. – 59-стр.

тафсилоти пассионар авлоднинг кучга кириш даврида уни инерт омма қабул қила олмаслигини акс эттиради. «Алпомиш»нинг Қўрғон дostonчилари ижро этган версиясида эса қахрамоннинг алплик дардига йўлиққан вақтидаги хатти-ҳаракатининг тасвирида алплик тизимининг архаик шаклига мос келувчи бир мотив бор. Яъни, Алпомиш болалик вақтида қулкунтой қушнинг боласини ололмагач қуш уясининг оғзини беркитиб қўяди. Қуш эса: «Менинг болаларимни зиндонбанд қилдинг, сен ҳам етти йил зиндонбанд бўл», – деб қаргайди. Шу билан айна пайтда қахрамоннинг зиндонга тушиш сабаблари ҳам «тақдир» халқасида унинг хатти-ҳаракати билан боғлиқ белгиланганлигини бадий асослайди. Этноснинг савобу гуноҳи алпнинг тақдирида, алпнинг савобу гуноҳи этноснинг тақдирида намоён бўлишини кўрсатади. «Алплик дарди» нафақат алпнинг, балки этноснинг янгиланиш бўсағасидаги «дарди», уйғониш, ҳаракатга келиш «оғриқлари» ҳамдир.

Шомонлик тасаввурларида энг кучли шомонлар уч бора касал бўлиб, уч бора қайта яралган. Гўрўғли «телба»ликларидаги ана шу уч босқич алпнинг ҳам қайта яралиш жараёнидан уч бора ўтганлигига гувоҳлик беради.

3. Эпик ҳомийнинг қахрамонга алплик сир-синаотларини ўргатиши. Шомон «шомон касаллиги» дардига йўлиққан даврида эранлар (отахонлар, момолар) унга «дарс» беришган. Бу тасаввур ўзбек шомончилигида ҳам қатъий анъанага айланган. Самарқанд вилояти Қўшрабoт тумани Работ қишлоғида яшовчи Зубайда қушноч Нурмон кизи дардга йўлиқан вақти укасидан тарвуз олиб келиб беришни сўраган. Тарвузни олган Зубайда опа уйни беркитиб, ўзига-ўзи гапириб, тарвузни бўлиб, худди одамни қараётгандай (даволаётгандай) турли ҳаракатлар қилган, ҳушига келганда, укаси (у киши шифокор) нега бундай қилдингиз, деб сўраса, «сен уч йил ўқиб шифокор бўлдинг, мен ҳам уч ой ўқиб дўхтир бўляпман-да», деган экан. Чунки шу вақт давомида момолар Зубайда опага беморларни қандай даволаш сирларини ўргатишган экан. Зубайда опа қушночликни тўлиқ бўйнига олганларидан кейин момолар қийнамай қўйишган¹.

¹ Болиева Яхшигул. 1938 й.т., Самарқанд вилояти, Қўшрабoт тумани, Аймат қишлоғи.

Худди шомонлик тизимида бўлгани каби «алплик» тизимида ҳам ҳомий руҳлар қахрамонни алплик сир-саноатларига ўргатади. Жумладан, Гўрўғли Ғиротни излаб Ҳазрат Хизрга йўлиқиб, отини топган вақти, Ҳазрат Хизр ёлгондан отга эга чиқиб, мени курашиб йиқсанг отни оласан, деб шарт қўяди ва кураш усулларидан қахрамонга сабоқ беради¹.

Қахрамоннинг эранлар тарбиясини олиши «Алпомиш» достонида умумий ахборот тарзида айтиб ўтилади.

4. Қахрамоннинг ҳомий қароргоҳида оддий одамдан алп ёки соҳибқирон қилиб қайта яратилиши.

Шомоннинг «қайта яралиш»и жараёнида ҳомий руҳлар – эранлар (момолар, отахонлар) бўлажак шомонни ўз қароргоҳига олиб бориб (ғорларга, овлок жойларга, тоғ дараларига), бу ердан унинг жасадини бўлак-бўлак қилиб ейишади, баъзан қозонда қайнатишади, тоблаб яна қайта ўз ҳолига келтиришади. Натижада, киши оддий одамдан шомонга айланади.

«Гўрўғли» достонида ҳам моҳиятан айни шу жараённинг бадий тасвирини кўрамыз. Достоннинг туркман версиясида эранлар улкан чинорнинг тагида қахрамоннинг кўксини ёриб, барча аъзоларини нур билан ювиб, шароби антаҳур билан сийлашади. Ўзбек версиясида «операция» мотиви унутилган. Лекин эранлар Гўрўғлини ғорга олиб кириб, шароби антаҳур билан сийлаб соҳибқиронга айлантиришади, ўз сафларига кўшишади. Достоннинг озарбайжон версиясида эса эпик ҳомий вазифасини қахрамоннинг отаси бажаради. Али киши баланд тоғ устидаги жуфт булоқ – Қўшабулоққа ҳар етти йилнинг еттинчи жума окшоми машриқу мағриб томонда туғилувчи юлдузларнинг нури кўкнинг ўртасида тўқнашиб, нури Қўшабулоққа тўкилиб, булоқ кўпириб тошган вақти қахрамонни кўпирган сувга чўмилтириб, сувидан ичиради. Натижада, Кўрўғли дунёда тенги йўқ кучу қувватга, сеҳрли овозга эга бўлади². Достоннинг «Қороғлу-Бозоғли» вариантыда эса ушбу сувдан Ғиротга ҳам

¹ Гўрўғлининг туғилиши / Айтувчи Муҳаммадқул Жонмурод ўғли Пўлкан. Нашрга тайёрловчи: М. Муродов. – Тошкент: Бадиий адабиёт нашриёти, 1967. – 124-бет.

² Қороғлу / Тартиб едани: М. Н. Таҳмасиб. – Баки, 1959. – 36-бет.

ичиришади¹. Айни мотив ўзбек версиясида ҳам мавжуд. Чилтанлар соҳибқиронни кўтара олувчи от ҳам соҳибқирон бўлиши керак деб, Фиротга ҳам антахур майидан беришди².

Достоннинг ўзбек, туркман, озарбайжон версияларида «алпнинг қайта яралиши» мотивининг асосий таянч ҳалқалари сақланиб қолган. Ушбу мотивлар ўзаро қиёсланса, улар бир-бирини тўлдиради ва эпосдаги «алпнинг қайта яралиши» мотивининг илк кўринишини тиклашга имкон беради.

а) «алпнинг қайта яралиши» амалга ошувчи жой: ўзбек версиясида тоғ, чилтанлар ғори. Туркман версиясида чўл, улкан чинор таги. Озарбайжон версиясида тоғ устидаги сирли булок.

б) «алпнинг қайта яралиш» тафсилоти: туркман версиясида Гўрўғлининг кўкси ёрилиб, барча аъзолари нур билан ювилади. Озарбайжон версиясида юлдузлар нури тушиб кўпирган булок суви орқали сеҳрли куч-қудрат соҳибига айланади. Ўзбек версиясида: чилтанлар даврасида илоҳий ичимликни ичиб, коинот сирларидан воқиф бўлади, соҳибқиронга айланади.

Барча версияларда тасвирланган «алпнинг қайта яралиши» амалга ошган жой тасвирлари яхлитлаштирилса, туркий халқларнинг бутун коинот тузилиши ҳақидаги мифологик тушунчалар тизимидаги ернинг киндиги – маркази борасидаги тасаввурларига айнан мос келади. Айни тасаввурнинг универсал кўриниши бошқа динлар таъсирига нисбатан камроқ учраган олтой турклари дунёқарашида қуйидагича кўринишда берилади: «Тоғ, тоғнинг тепасида сутли кўл, кўлнинг ўртасида ер (орол) ва унда ер билан осмонни боғловчи – шохлари кўкка чирмашган олтин баргли терак. Бу жой ернинг киндиги деб аталган»³.

Демак, «Гўрўғли» достонининг илк босқичларида (барча версиялардаги мотивлар бунга асос бўлади) «алпнинг қайта яралиши» улкан тоғ (ўзбек ва озарбайжон версияларидаги тоғ ва тоғдаги ғор)да, сутли кўлда (озарбайжон версиясидаги булок, ўзбек

¹ Короғлу / Тартиб едани: М. Н. Таҳмасиб. – Баку, 1959. – 401-бет.

² Гўрўғлининг туғилиши / Айтувчи Муҳаммадқул Жонмурод ўғли Пўлкан. Нашрга тайёрловчи: М. Муродов. – Тошкент: Бадиий адабиёт нашриёти, 1967. – 129-бет.

³ Басилов В. Н. Избранники духов. – М.: ИПЛ, 1984. – 70-стр.

ва туркман версиясидаги шаробу антахур. Ўзбек версиясининг бир қатор вариантларидаги қаҳрамон онасининг сув қўпиги ва сувда оқиб келган олмадан ҳомила топиши), кўл ўртасидаги оролда, илдизи ер тагига, шохлари кўкка етган терак (туркман версиясидаги чинор тагида қайта яралишнинг амалга ошуви) остида – ернинг киндигида бажарилган. «Гўрўғли» достонининг қадим бобо сюжетига эранларнинг – эпик ҳомийларнинг мақоми Аскартоғ тепасидаги ернинг киндигида жойлашган деб тасаввур қилинган.

5. Қаҳрамоннинг эран – ҳомийлардан алпик қурол-аслаҳаларини олиши.

Эпосдаги ушбу мотив ҳам шомонлик тасаввурлар системасидан ўз параллелини топади.

Шомон ўзининг асосий қуроли – доира (дунгур)ни руҳлар хоҳишига кўра, улар айтган вақтдагина олади¹. Шомонлик тўнига осилувчи туморлар ҳам эранлар-руҳларнинг тури, тоифасига мос танланади². Туморлар ва доиранинг магия қудрати, билими шомон кўнглига жойланиши анъанавий тасаввур ҳисобланади.

«Гўрўғли» эпосида ҳам алпик қурол-аслаҳаларини ҳомийлар ўзлари лозим, деб билган вақтдагина қаҳрамонга беришади.³ Қаҳрамоннинг сафдоши жанговар от ҳам инициация жараёнидан ўтиб жами асбоб-анжомлар билан таъминланади⁴. Алпомиш эса Алпинбой бобосидан қолган биринч ёйга ҳақли равишда эга бўлади.

6. Қаҳрамоннинг сеҳрли қудратга эга бўлиши.

Қаҳрамоннинг сеҳрли қудрат, белги-нишонларига эга бўлиши халқнинг «алпик» тасаввурлар системасидаги таянч ҳалқалардан ҳисобланади. Бу ҳол озарбайжон версиясида қаҳрамоннинг овозида, деб талқин этилади ва у бу қудрат

¹ Басилов В. Н. Избранники духов. – М.: ИПЛ, 1984. – 77-стр.

² Басилов В. Н. Избранники духов. – М.: ИПЛ, 1984. – 117-стр.

³ Гўрўғлининг туғилиши / Айтувчи Мухаммадқул Жонмурод ўғли Пўлкан. Нашрға тайёрловчи: М. Муродов. – Тошкент: Бадиий адабиёт нашриёти. – 132, 134–135-бетлар.

⁴ Гўрўғлининг туғилиши / Айтувчи Мухаммадқул Жонмурод ўғли Пўлкан. Нашрға тайёрловчи: М. Муродов. – Тошкент: Бадиий адабиёт нашриёти. – 133–134-бетлар.

Қўшабулоқ сувидан деб айтилади. У қийин шароитга тушганда, ракибларини қудратли ҳайқириги билан енгади¹. Достоннинг ўзбек версиясида ана шундай қудратли хусусият – Гўрўғлининг кўзида, деб талқии этилади².

Гўрўғлининг ўзбек ва туркман версияларидаги яна бир сеҳрли қудрат – эранлар ҳомийлигида қаҳрамон кўнглига барча илмларнинг – илму қол ва илму ҳол, етмиш икки тилнинг жой бўлишидир³. Шомонга ҳомий эранлар берган барча белгилар магик қудратли ҳисобланади. Ҳомийлар шомонларга доира, пичок, қамчи, сирли тош ва бошқа буюмларни тухфа қилишади. Шомон бу буюмларни ўз амалиётида қўллайди.

7. Қаҳрамоннинг эранлардан тилак сўраши ва эранлар (ҳомий) нинг қаҳрамон тақдирини билдириши эпик қаҳрамон ва улуғ шомонлар ҳаётининг асосини ташкил этади. Чунки алп ва шомон танланган шахс ҳисобланади. Унинг тақдири олдиндан белгилаб қўйилган бўлиб, алпик ва шомонлик миссияси елкасига тушган шахс ўз вазифасини бажариши шарт деб тушунилган. Алп ва шомон ҳомий эранлар маконида қайта дунёга келгач, яъни алп ва шомон сифатида қайта тугилгач уларнинг кейинги ҳаёти, фаолияти ўз ҳомийлари муҳофазасида бўлади, ҳар доим уларнинг ёрдамида мақсадларига эришади.

8. Қаҳрамон куч-қудратининг ҳомий руҳлар куч-қудрати билан чамбарчас боғлиқлиги.

Ушбу хоссанинг бадий талқинлари ва шомон амалиётидаги мисоллари кўп.

9. Қаҳрамоннинг эранлар ҳузуридан қайтиб алп сифатида тан олиниши. Бу мотив эпосдаги «алпнинг тўлиқ шаклланиб бўлиши» билан боғлиқ сюжет ҳалқаларини яқунлайди. Яъни мантиқан олганда, Гўрўғлининг эранлар ҳузуридан ўз оти билан қайтиб, Чамбилда хон кўтарилиши, шомоннинг барча «саргу-

¹ Короғлу / Тартиб едани: М. Н. Таҳмасиб. – Бақы, 1959. – 33-бет.

² Гўрўғлининг туғилиши / Айтувчи Муҳаммадқул Жонмурод ўғли Пўлкан. Нашрга тайёрловчи: М. Муродов. – Тошкент: Бадий адабиёт нашриёти. – 178, 183-бетлар.

³ Гўрўғлининг туғилиши / Айтувчи Муҳаммадқул Жонмурод ўғли Пўлкан. Нашрга тайёрловчи: М. Муродов. – Тошкент: Бадий адабиёт нашриёти. – 47-бет.

заштлардан» сўнг уруғдошлари томонидан ҳақиқий шомон сифатида тан олиними билан уйғундир. Уруғда янги шомон пайдо бўлиб, ўз уруғдошларини руҳлар ёрдамида даволаб, уларнинг мушкулларини енгиллаштиргани каби алп элнинг қувватига қувват қўшиб, унга ўзлигини танитиб, таркоқ халқни бириктириб, катта бунёдкор кучга айлантиради. Атрофига йигитлар, эл оқсоқолларини йиғиб, кучдан қолган, тобе бўлган давлатчилигини қайта тиклайди. Элу халқнинг орини олиб, шаънига шаън, ғурурига ғурур қўшиб, орзу тилақларига етиштиради, ўзи мансуб бўлган авлод орқали инсоният камолининг яна бир босқичига хизмат қилади.

Биз юқорида «Гўрўғли» ва «Алпомиш» дostonлари таркибидан бу пайтгача тадқиқотчилар диққат қаратмаган «алплик» тизимининг етакчи ҳалқаларини анъанавий шомонлик тизимига қиёслаб талқин этдик. Натижа бу тасаввурларнинг ҳайратланарли даражада бир-бирига уйғун келишлигини кўрсатди. Бу ҳолат қадим туркий халқлар ўртасида «алп» ва «шомон»лик ҳақида яхлит анъанавий ўзига хос тизимлар мавжуд бўлганлигидан далолат беради. Ушбу тизимларга кўра шомон бўлмаган одам «руҳлар дунёсига» кира олмагани каби алп бўлиб, илоҳий тайёрланмаган одам ҳам алплик оламига кира олмаган. Оддий одамлардан фарқли, шомоннинг «руҳлар дунёси» билан пайвандловчи ҳомий эранлари бўлгани каби, алпни ҳам бутун борлиқ – ер ости, ер усти ва осмон дунёси билан боғлаб, бу маконларга эркин бориб келишига ёрдам берувчи, уни қўллаб-қувватловчи эран – ҳомийлари мавжуд деб англаган. Ушбу тасаввурлар илдизи одамлар ва руҳ-эранлар дунёси «танланган»лар воситасида алоқа қилади, деб қаралувчи қадим анимистик дунёқарашларга уланади. «Гўрўғли» ва «Алпомиш» дostonларидаги шомонлик тизими дунёқарашига уйғун мотивлар ушбу дostonлар ўзагида турувчи дунёқарашнинг бевосита анимистик тасаввурлар замирида шаклланган қадим мифопоэтик тафаккур маҳсули эканлигини далиллайди, исбот этади. Шомонлик тизими ҳақида бугун ҳам амал қилаётган яхлит тасаввурлар олами бўлгани каби дoston пайдо бўлган даврда халқнинг алплик тизимини ифодаловчи дунёқараш ҳам амалда

мавжуд бўлган. «Гўрўгли» ва «Алпомиш» дostonлари ўзагидаги алплик тизими ана шу дунёқарашнинг эпик талкиндаги бадий ифодасидир. Ушбу талкинга кўра, «Гўрўгли» дostonида халкка алп кераклигини сезган эранлар, уни ҳомила ҳолатига келтиришган. Ҳомила даврида огоҳ туриб, туғилиши билан қабрга чирок ёқишган. Унга бияни олиб келиб, энага қилиб, шер ҳамласидан қутқаришган. Алплик юкини зиммасига юклашган. Алп сифатида қайта яратиб, тақдирини олдиндан белгилаб, лозим кўрилган вақтгача авайлаб-асраб келишган, тилакларининг амалга ошишида қўл-қанот бўлишган. Халқ шундай англаган, талқин этган.

Алплик тизимининг шомонлик тизимидан фарқланиб турувчи кўшимча хоссалари ҳам мавжуд ва улар қахрамонлик дostonларида ўз бадий ифодасини олган ҳамда биз мақола аввалида санаб ўтган хоссалар таркибида акс этган.

Алплик, шомонликда воқе бўлувчи «танланган»лар ҳақидаги тасаввурлар яна бир хос инсонлар – тасаввуф аҳли, сўфийлар ҳаётида ҳам кузатилади. Кўпчилик сўфийлар, хусусан, маълум бир тариқатга асос солган азиз-авлиёлар таржимаи ҳолига назар солсак, уларнинг ҳаёт йўлида худди алплик ва шомонлик тизими билан айнан уйғун келувчи ҳодисалар рўй бериши маълум бўлади.

Худди эранлар маконида алп руҳининг тобланиши, яъни «ўлдирилиб, қайта тирилтирилиши» каби сўфий ҳаётидаги бу ўта муҳим жараён, уларнинг «ўлмай туриб ўлиш» ёки «асл ҳаётга қайтиш» ғоясида акс этган, мужассам топган. Идрис Шох ушбу таълимотнинг асл моҳиятини сақловчи сўфийлар ҳаётида «ўлим» жараёнидан ўтишнинг уч асосий босқичи мавжуд эканлиги ва бунда номзод ўзига хос Оқ ўлим, Яшил ўлим, Қора ўлимнинг руҳий кечинмаларини бошидан кечиришини ёзади¹.

Алплик ва шомонликдаги уч босқичли «ўлим» жараёни ва уларнинг уч олам (кўк, ер, ер ости) билан боғлиқ тарзда англаниши дoston материалларида бадий тасвир этилган.

Ушбу уйғунликлар халқ идеалидаги мукамал инсон, халоскор қахрамон – алп ва сўфий бир умумий тизимга алоқадор талқин

¹ Идрис Шах. Суфийи. – М., 2001. – стр. 413–414.

этилганлигини билдирмокда. Халқ қаҳрамонлари – Гўрўғли ва Алпомишларнинг бош ҳомийси Хизр эканлиги маълум. Айни пайтда, Хизр барча сўфийларнинг пиру комили ҳисобланади. Ушбу талқин ва умумийликлар, аввало, халқнинг комил инсон билан боғлиқ умумтасаввурларига асосланади. Чунки алп жисмонан бақувват бўлиш баробарида руҳан камолотга эришуви шарт. Худди шунингдек, руҳий баркамоллик ҳам жисмоний чиникишни талаб этади.

Иккинчидан, алп образига реал асос бўлган барча тарихий шахслар ўз имконидаги жисмоний чиникиш дастурини уйғотиш баробарида руҳий жиҳатдан ҳам юксак мақомга кўтарилганлар. Сўфийлар эса руҳий тарбия билан жисмоний қувватларини баробар ривожлантирганлар.

Қисқача хулоса сифатида айтилса, алплик, шомонлик, сўфийлик тизимлари ўртасида мохиятан уйғунлик мавжуд ва у инсон камолоти йўл-йўриғи сифатида кесишади, айна пайтда уларнинг ўз харакат, фаолият доиралари мавжуд. Гўрўғли ва Алпомиш ана шундай хусусиятларга, сифатларга эга шахс. Гўрўғли ва Алпомиш – ўзида чинакам комиллик қувватини мужассам этган образ. Уларнинг бу сифатлари, кенг феъли ўз атрофига бопқа эзгу кучларнинг жишслашувига ҳам имкон яратади.

Шорустам ШОМУСАРОВ

(1958 йилда туғилган)



Ўзбек ва араб фольклорининг қиёсий типологияси билан боғлиқ масалаларнинг изчил тадқиқотчиси Шорустам Ғиёсович Шомусаров 1958 йил 17 октябрда Тошкент шаҳрида туғилган. Тошкент давлат университетининг Шарқишунослик факультетида (1976–82), Россия Фанлар академияси Шарқишунослик институти аспирантурасида ўқиган (1984–87). Тошкент давлат университетида ўқитувчи (1982–84), кичик илмий ходим, катта илмий ходим (1988–92), Тил марказининг директори (1992–93), Тошкент давлат шарқишунослик институти «Араб филологияси» кафедраси мудири (1993–95), илмий ишлар бўйича проректор (1995–97), қирол Сауд номидаги университет профессори (Саудия Арабистони) бўлиб ишлаган (1997–2013). Ҳозирда Тошкент давлат шарқишунослик институти «Араб филологияси» кафедраси мудири вазифасида ишламоқда. Халқ оғзаки поэтик ижодиётининг ўзига хос хусусиятлари, жанрлар таркиби ва бадиияти, араб ва туркий халқлари оғзаки ижодининг типологияси ва ўзаро таъсири, араб-ўзбек фольклор алоқалари, «Минг бир кеча»нинг туркий халқлар эртақчилиқ анъаналарига таъсири каби масалаларни тадқиқ этган. Унинг «Арабский фольклор» (1992), «Очерки средневековой арабской прозы» (1992, ҳамк.), «Улуғ ой умидлари: «Ё рамазон» қўшиқлари» (2001, ҳамк.), «Ўзбек мифологияси ва араб фольклори» (2001, ҳамк.), «Араб ва ўзбек фольклори тарихий-қиёсий таҳлили» (2002), «Типология и взаимосвязь фольклора тюркских и арабских народов» (Москва, 2010), «Туркий ва араб халқлари фольклори типологияси ва ўзаро таъсири» (ар-Риёд, 2012, араб тилида) каби китоблари нашр этилган.

АРАБ ВА ТУРКИЙ ХАЛҚЛАР ЭРТАКЛАРИ СЮЖЕТИНИНГ ҚИЁСИЙ ТАҲЛИЛИ

Маълумки, ўзига хос эпик анъанага эга бўлган араб фольклори асосида юзага келган «Алф лайла ва лайла», яъни «Минг бир кеча»нинг ўзбек тилига таржима қилиниши ва халқ орасида ўзининг ранго-ранг сюжетларида баён этилган қизикарли хангомалари билан машқур бўлганлиги эпик насрларнинг мавзу қамровини кенгайтирувчи бош омиллардан бири бўлди. Араб эртаклари таъсирида ўзбек халқ эртаклари сюжетида ҳам янги мотивлар юзага келди. Айрим сюжетлар тўлалигича трансформациялашиб, алоҳида бир эртак сифатида ўзбек фольклорининг миллий бойлигига айланди. «Минг бир кеча»даги эртаклар сюжетида алоҳида мотив сифатида қайд қилинган композицион элемент ўзбек фольклори эпик анъаналари таъсирида мустақил эртакка айланган ҳолатлар ҳам учрайди. Бу эпик ҳодисанинг иккинчи бир қирраси, яъни бир халқ эртагига асос бўлган сюжет иккинчи бир халқ фольклорига сингиб кетиши жараёнида эпик асар бадиий тўқимасидаги муайян эстетик элемент (мотив)га айланиши ҳолати ҳам кузатилади.

«Минг бир кеча»нинг 509-кечасида қуйидаги эртак келтирилади: «Жоншоҳ кўп нарсаларни кўриб, уларга таажжуб қилди. Уй ичидаги саройга кирди, ҳовуз ёнидаги айвонга ўрнатилган тахтага чиқди ва тахтадаги чодирга кириб, бироз ухлади. Кейин уйғониб, сарой эшигидан чиқди, сарой эшиги олдида қўйилган курсида таажжуб қолиб ўтирган вақтида, ҳаводан кабутарга ўхшаган уч қуш келиб, кўлнинг бир тарафига тушди. Бир-бирлари билан ўйнашиб, устиларидаги пат-кийимларини ечишган эди, дунёда мисли йўқ, ойдек уч қизга айланди. Сўнгра кўлга тушиб сузишди, ўйнашди ва қулишди»¹.

Бу лавҳада дунё халқлари фольклорининг анъанавий унсурларидан бири – эврилиш, яъни эпик қаҳрамоннинг сирли қудрат воситасида ўз шаклу шамойилини ўзгартириб, бошқа қиёфага кириши мотиви ўзининг юксак бадиий ифодасини топ-

¹ Минг бир кеча. Т. 5. – Тошкент, 1962. 178-бет (Бундан кейин шу манбадан олинган мисолларга «МБК (жилд ва саҳифа рақами)» ҳаволаси берилади).

ган. Умуман, «Минг бир кеча»га киритилган араб эртақларида эврилиш мотиви кўп учрайди. Масалан, «Шоҳ Шахрамон ўгли Камаруззамон ва малика Будур қиссаси»да Даҳнаш дев «бир думалаб» бурга суратига кириши тасвирланган (МБК. 3. 146–147). «Ажиб ва Ғариб қиссаси» эртагида тасвирланишича, сеҳргар Довул деган бир моридини чақирибди-да, унга бир мискол банж бериб: «Исбонир мадоинга бор-да, чумчук қиёфасига кириб, Ғариб қасрига кириб, уни беҳуш қилиб ҳузуримга келтир!» – деб буюрибди (МБК. 6. 256–257).

Кўринадик, Даҳнаш дев ўзининг магик қудрати, яъни сеҳрли йўсинда ўзга қиёфага кира олиш амалини билгани учун бургага айланади. Довул морид эса сеҳргар берган сирли ашё ва унинг магик айтимлари воситасида ўз тусини ўзгартиради. «Ажиб ва Ғариб»даги Довул мориднинг чумчук (қуш) сувратига кириб, эртақ қахрамонининг рақиби буюрган вазифани бажариши характерли мотивдир. Бунга ўхшаш эврилиш ўзбек эртақларида ҳам учрайди.

«Мастон ва уч ака-ука» эртагида ёвуз ниятли шум кампир ботир оға-иниларни таъқиб қилиш учун ўз кўринишини ўзгартириб, қушга айланади. Бу эртақда эврилиш мотиви образлар таркибининг миқдорий белгисига монанд ҳолда уч марта такрорланади. Мастон кампир Бўронбекни калхат бўлиб, Довулбекни бойўғли бўлиб, Арслонбекни кузгун бўлиб таъқиб қилади¹.

Юқорида келтирилган етакчи мотив – қушларнинг ўз патини ташлаб, қизга айланиши ўзбек халқ дostonлари ва эртақларида ҳам учрайди. Бу мотив ўзбек фольклорига, шубҳасиз, «Минг бир кеча» эртақларидан ўтган.

«Аҳмадлар» эртагида дунёда йўқ гулни топиб келиши зарур бўлган қахрамон хотини – Дилафрўз парининг маслаҳати билан кўзига суртса, ҳеч кимга кўринмас бўлиб қоладиган ғаройиб сурмани суртиб, Боғи Эрамни томоша қилиб юради. Бир вақт «шов» этиб бир тўда чиройли каптарлар келиб, ҳовузга тушишга тайёрланибдилар. Аҳмаджон не кўз билан кўрсинки, каптарлар бир силкиниб, қип-яланғоч қиз бўлиб, бирин-кетин ўзини сувга ташлайверибди. Шу вақт яна уч каптар осмондан учиб келиб, ечиниб,

¹ Оймомода аждаҳо. Ўзбек халқ фантастикаси. 1-китоб. – Тошкент, Ёш гвардия. 1983, 91–96-бетлар.

қиз бўлиб, ўзларини сувга ташламоқчи бўлиб турганида, шу уч қиздан бирисининг бўйнида Аҳмаджон кулфни кўриб қолибди»¹.

Араб ва ўзбек эртагида қаптарларнинг қизга айланиши мотиви ўзининг баёний усули, эртақ сюжет тўқимасидаги бадий ўрни ва вазифаси, персонажлар таркиби, маконий талқинига кўра айнанликка эга. Жоншоҳ қаптар-қизлардан бирининг ҳусну жамолига шайдо бўлиб, уни севиб қолади. Аҳмаджон эса бўйнига қалит осилган қиз сеҳрли гул соҳиби эканлигини билиб олади. Ҳар иккала эртақ қаҳрамони ҳам ўз мақсадига етиш йўл-йўриқларини ёрдамчи-эпик кўмакчи воситасида билиб оладилар. Жоншоҳнинг оптик бўлганини билган шайх Наср унга шундай тадбир ўргатади: «Улар (яъни қаптар-қизлар – Ш.Ш.) келиб қўлда сузишади, ўйнашиб-қулишади. Улар кийимлари турган жойдан узоклашганда, сен ўзинг хоҳлаган қизнинг кийимини ол...» (МБК. 5. 181).

Подшо шартини бажаришга бел боғлаган Аҳмаджонни сафарга жўнатаётган Дилафрўз эрига «қаптарлар бир силкиниб, қизга айланиб сувга тушишгач, бошлаб бўйнига кулф осилган қизнинг кийимларини, кейин ҳаммасининг кийимларини» олишни маслаҳат беради. Демак, ҳар иккала эртақ қаҳрамонининг ўз мақсадига эришиш усулининг эпик талқинида ҳам муштараклик мавжуд.

Қаптарларнинг қизга айланиши мотиви қадимги одамларнинг жон ҳақидаги анимистик тасавурлари асосида юзага келган. Фольклоршунос Ғ. Акрамов ўзбек халқ эртақларида кўп учрайдиган мотивлардан бири – жониворларнинг ўз пўсти ёки терисини йиртиб инсон қиёфасига кириши «анимистик мифология»га алоқадор дейди².

Қаптарларнинг қизга айланиши араб ва туркий халқлар эртақларининг анъанавий мотивларидан бири эканлигини қуйидаги типологик муштаракликлар ҳам тасдиқлайди: «Басралик Ҳасан қиссаси» (778–831-кечалар) эртагининг бош қаҳрамони ҳовуз бўйида ўнта қуш турганини кўриб қолади. Бир пайт паррандалар ҳар бири ўз чангали билан ўз қобигини ёрибди – уларнинг устидаги териси қуш патидан ишланган чопон экан. Тери ичидан

¹ Олтин бешик / Ўзбек халқ ижоди. – Тошкент, 1985, 140–141-бетлар.

² Акрамов Ғ. Аниматик мифология // Ўзбек тили ва адабиёти. – Тошкент, 1977. – № 3. – 52-бет.

хусни ойни шарманда қиладиган ўнта қиз чиқибди. Улар кийимларини ечишиб, ҳовузга тушиб, чўмилишибди (МБК. 7. 246).

«Миср подшоси» номли ўзбек эртагида бу мотив шундай бадий ифода қилинади: Ҳамро Ҳурлиқони излаб, боққа боради. Ҳовуз бўйидаги олмазорда дам олиб ўтирса, бир гала каптарлар «дув» этиб келиб, ҳовуз лабига қўнишади. Улар бир юмалаб, дев-париларга айланибдилар.¹ Бу мотив озарбайжон эртақларида ҳам бор: каптар – парилар чўмилишдан аввал, таом ейиш ёки шахмат ўйнаш эҳтиёжи туғилганда ўзларининг «қуш либос»ларини ечадилар².

Дунё халқлари оғзаки ижодиётида эпик қаҳрамоннинг қушга айланиши ҳақидаги эртақлар алоҳида гуруҳни ташкил этади. Бу мотив жаҳон халқлари эртақлари сюжетларининг Аарне–Томпсон томонидан тузилган қиёсий кўрсаткичида АТ781 рақамли эпик сюжет сифатида тавсифланган.³ Бундай эртақларда тасвирланишича, ўғай она етимчани ўлдириб, унинг гўштини пишириб боланинг отасига едиради; етимчанинг опаси эса укасининг суякларини йиғиб қўмиб қўяди ва ана шу суяклар қушга айланиб учиб кетади; воқеалар ривожини давомида қушга айланган етим бола ёмонларни жазолаб, яхшиларни совғалар билан тақдирлайди ҳамда ўзининг асл қиёфасига қайтади.

Каптарларнинг ўз «либосини» ташлаб, қизга айланиши мотиви пари тўғрисидаги мифологик тасаввурларга ҳам алоқадор. Г. П. Снесарев тўплаган этнографик маълумотларга қўра, хоразмлик шомонларнинг хомийлари – парилар каптар суратида намоён бўлишар экан. Хоразм халқ афсоналарининг анъанавий мифологик персонажларидан бири Ҳубби ҳам каптарга айланиб, онасининг ҳузуридан учиб кетганлиги тасвирланади⁴.

Бу мотивнинг тарихий илдизларини мифологиянинг эпик жанрларга диффузияси аспектида текширган Б. Саримсоқов

¹ Гулпарни. Наманган эртақлари. – Тошкент, 1969. – 55-бет.

² Гезалов Ф. Х. Структура азербайджанских волшебных сказок. АҚД. – Ташкент, 1990. стр. 19.

³ Бу ҳақда қаранг: Бараг Л. Г. Сюжеты и мотивы белорусских волшебных сказок // Славянский и балканский фольклор. – М., 1971, стр. 231.

⁴ Снесарев Г. П. Реликты домусульманских верований и обрядов у узбеков Хорезма. – М. Наука, 1969. стр. 48, 255.

«кўк каптар қиёфасида учиб келиб, бир думалаб гўзал маликага айланадиган мифологик образ» хусусида шундай ёзади: «Агар халқ орасида юрувчи турли хилдаги ривоят ва нақлларга диққат қилинса, уларнинг барчасида ҳам парилар фақат каптар қиёфасида учрашини кузатиш мумкин. Бу нарсанинг сабаби шундаки, каптар ўзининг турли хислатлари билан инсонга яқин туради. Қолаверса, қадимги инсонларнинг анимистик қарашлари, яъни кишиларнинг жони бевосита каптар қиёфасида учраши билан изоҳланади. Кўпгина халқ эртақ ва дostonларидаги мифологик образлар (масалан, мастон, аждар, дев кабилар)нинг жони топилиши мушкул бўлган жойларда каптар қиёфасида яширинган бўлади. Қадимги инсонларнинг жон ҳақидаги тасаввурлари каптар билан боғлиқ экан, демак, тирик жон – пари образининг ҳам каптар билан боғлиқлиги ўз-ўзидан табиий ҳисобланади. Парининг каптар қиёфасидан инсон қиёфасига ёки аксинча айланиши, унинг ғайритабиий қудратга эга эканлигини англатишдан, аниқроғи, инсон тасаввуридаги парининг мифологик заминини сеҳр пардасига чулғанган ҳолда ифодалашдан иборат»¹.

Жоннинг қушга айланиши ҳақидаги анимистик тасаввурлар инсоннинг қушга ёки аксинча, қушнинг одамга эврилиши тўғрисидаги мифларни юзага келтирган. Бу миф қушнинг гўзал қизга айланиши мотиви сифатида кейинчалик эртақка трансформациялашган. Шуни айтиш керакки, тарихий-генетик асосига кўра бу мотив араб фольклорида шаклланган бўлиб, Марказий Осиё халқлари анимистик мифларининг ҳинд-эрон асотирлари орқали араб фольклори эпик жанрларининг сюжет тизимига сингиб кетиши биз таҳлил қилаётган анъанавий мотивнинг яратилиши учун эпик асос бўлган.

«Минг бир кеча» эртақлари таъсирида туркий халқлар фольклорида оммалашган бу мотив эртақлардан ташқари айрим дostonларда ҳам қаҳрамон эпик саргузаштларини бойитувчи бадиий деталь сифатида иштирок этади. «Малика айёр» дostonида Гўрўғлининг Шакарқўлда париларни учратиши тасвири юкорида келтирилган эпик мотив – каптарларнинг қўл бўйига учиб келиб,

¹ Саримсоков Б. Эпик жанрлар диффузияси // Ўзбек фольклорининг эпик жанрлари. – Тошкент, 1981. 139–140-бетлар.

патларини ташлаб, гўзал кизларга айланиши лавҳаси асосида баён қилинади. Бу мотивнинг тарихий илдиэларида эврилиш ҳақидаги қадимги мифлар ва ибтидоий маросимларга алоқадор маълумотлар жамланган. Қадимги одам магик кучга эга бўлган кишилар тотем-жонивор қиёфасига кириши мумкин, деб билганлар. Маросимларда жонивор терисини ёпиниш ўша жонзотга айланишнинг рамзий ифодаси деб қаралган. Шу маросим эртақда деярли айнан сақланган: қаптарлар пари-қизларга айланиш учун устидаги «куш либоси»ни ечишади, холос. «Тонг отгач, қизлар пат-кийимларини кийиб, яна кабутар қиёфасига кириб, учиб кетибдилар» (МБК. 5. 178).

Кўриниб турибдики, маросим ва эртақни бир-бирига боғловчи деталь – куш патидир. Ҳар иккала ҳолатда ҳам эврилиш ҳодисаси куш патидан иборат «кийим»ни кийиши натижасида амалга оширилади. Агар куш патидан қилинган либос бўлмаса, эврилиш содир бўлмайди. Шунинг учун ҳам қаптар-қизларни қўлга киритиш учун уларнинг «куш либос»ини олиш керак бўлади. Қаҳрамон шу йўл билан мақсадига эришади.

Маълумки, ҳайвонлар ҳақидаги эртақларда жониворлар (шу жумладан, қушлар ҳам) образи мажозий маъно касб этгани учун бамисоли инсонлардек сўзлашадилар. Сеҳрли-фантастик эртақларда эса қаҳрамон алоҳида магик қудратга эга бўлгани учун жониворлар билан тиллашиб, уларнинг кўмагидан фойдаланади. Ҳаётий-маиший эртақларда эса бутунлай бошқача манзарани кўрамыз. Бундай эртақ қаҳрамони сеҳр-жоду қилишга қодир эмас, унда магик хусусият ҳам йўқ. У кундалик ҳаётда кўп учрайдиган оддий бир одам, холос. Шунинг учун куш тилини биладиган қаҳрамон ҳақидаги маиший эртақларда бу мотив тадбиркорлик, устамонлик, айёрлик каби хислатларни бадий ифода этиш воситаси сифатида қўлланилади.

«Минг бир кеча»га киритилган «Шаҳзода ва етти вазир ҳикояси» эртагидаги кичик ҳикоячалардан бирида (592-кеча айтилган эртақ) шундай дейилади: «Бир одам бозорга бориб, бир қул сотиб олиб, уйига олиб кетибди. Хотинига уни яхши парвариш қилишни топширди. Бир куни у киши хотинига: «Эртага бўстонга бориб ўйнаб, томоша қилиб, кўнгил очиб кел», – де-

ган эди, хотини: «Миннатдорман!» – деди. Бу сўзни эшитган кул турли хил таомлар, ҳўл мевалар олиб, бўстонга қараб йўл олди. Тайёрланган таомини бўстондаги дарахтлар тагига яшириб қўйиб, хўжасиникига қайтди. Тонг отгач, ҳалиги киши кулига саидаси билан бирга бўстонга боришни, етарли емак-ичмак ва ҳўл мевалар олиб келишни буюрди. Бўстонга етиб боришганида, бир қарға қағиллади. Кул унга: «Рост айтасан», – деди. Саидаси унга: «Қарға нима деди?» – деди. «Эй саидам, бу дарахтнинг тагида таом бор, уни енглар деб айтди», – деди. Саида дарахтнинг тагига бориб, таомни топди ва кулга таҳсин айтди.

Бўстонни сайр қилиб юришганида, яна қарға қагиллади. Кул унга «Рост айтасан», – деди. Саидаси қарға нима деганини сўраганида, кул «Эй саидам, фалон дарахтнинг тагида бир кўзада шароб бор, деб айтади», – деди. Саидаси кўзани топиб, кулга бўлган таажжуби янада ортди. Шу тарика яна бир марта қарға қағиллаганида дарахт тагида қўйилган газак ва ҳўл меваларни топиб, тановул қиладилар. (МБК. 5. 414–416).

Ҳикоя ичида ҳикоя қилиш услубида шахзодага тухмат қилган канизак тилидан баён қилинган бу эртак эркакларнинг макру ҳийла йўли билан ўз истагини амалга оширишларининг далили сифатида келтирилади. Кул, аслида, қуш тилини билмайди, хожасининг мақсади (хотинини боғ сайрига юбориш)дан воқиф бўлган кул алдамчилик, сохта обрў билан саидасининг эътиборини қозониш ҳамда унга етишиш учун таомларни аввалдан дарахтлар тагига яшириб қўяди. Қарға қағиллаши – бу нарсаларнинг топилиши, яъни гўё кул қарға тилини тушунишига далил қилинади.

Қуш тилини билиш мотиви бу эртак сюжетини ташкил этувчи бош семантик асосдир. Ўзбек халқ эртакларида ҳам араб эртагининг бу анъанавий элементи таъсирида юзага келган муштарак мотивлар учрайди.

«Доно хотин» номли ўзбек халқ эртагида қуш тилини билиш мотиви донолик ифодаси тарзидаги бадий талқинга эга. «Кунлардан бир кун подшо боғда вазирлари билан ҳовуздаги олтин балиқларни томоша қилиб туришганида қайрағоч тепасига бир чиройли қуш келиб қўнади. Кейин подшо томонга қараб сайрай-

ди. Подшо вазирларига «Мана шу куш нима деяпти, шуни айтиб берасизлар», – деб буйруқ берибди. Ҳеч ким бу саволга жавоб беролмабди. Вазирлар касам ичишгач, подшонинг қизи куш нима сайраганини шундай тушунтиради: «Ховуз бўйидаги қайрағоч тепасида ўтирган куш: «Жинни эрни соғ қиладиган ҳам хотин, соғ эрни жинни қиладиган ҳам хотин, ҳазир бўл, хотининг сени жинни қилади», – деяпти»¹.

Худди шу мотив «Сирли туш» эртагида ҳам мавжуд. Унда кўшиқда дам олиб ётган подшонинг боши узра учиб ўтган куш икки маротаба «ғақ, ғақ» деб қичқиради. Подшонинг доно қизи Одина бу кушнинг сирли сайрашини шундай изоҳлаб беради:

«Хурматли падар, кушнинг шарқдан ғарбга учиб кетаётиб айтгани «Яхши хотин гадони шоҳ қилади», ғарбдан шарққа қайтишдагиси эса «Ёмон хотин эрни гадо қилади» деганидир»².

Ўзбек халқ эртагида куш тилини билиш, яъни подшога қараб сайраган куш нима деганини айтиб бериш, **биринчидан**, қизнинг донолигидан далолат беради; **иккинчидан**, подшо саволига жавоб тополмаган вазирларни ҳукмдор ғазабидан сақлаб қолади; **учинчидан** қизнинг қувғинга учраши ва ўз ақлу фаросати билан отасига айтган сўзи ҳақлигини исботлаши учун имкон ярагади. Бу мотив эртак сюжетининг бошланғич қисмида келади ва воқеаларнинг бундан кейинги ривожига туртки бўлади.

Араб ва ўзбек халқ эртакларидаги қарға образининг ва-зифаси эпик хабарчи функциясини бажаришдан иборатдир. «Минг бир кеча»да бу мотив маиший-новеллистик эртак сюжет қурилишига асос бўлган. «Сув қизи» эртагида эса сеҳрли эртак қаҳрамонининг магик билимини намоёиш этиш воситаси сифатида келтирилади. «Минг бир кеча»даги эртакда қарға қагиллаши (рамзий маънода бўлса-да) қул атайлаб аввалдан бекитиб қўйган таомларнинг «топилиши»га сабаб бўлади. «Сув қизи» номли эртагида уч бор қагиллаган қарға қаҳрамонни қутилаётган хавфдан огоҳлантиради.

¹ Хоразм эртаклари. – Тошкент, Ўзадабийнашр. 1961. 57–58-бетлар.

² Ўзбек халқ эртаклари. – Тошкент, Адабиёт ва санъат нашриёти. 1995. Т. 1. 7-бет.

Қарға – жаҳон халқлари мифологияси ва фольклорининг анъанавий персонажларидан бири. Хусусан, Чукотка – Камчатка, Аляска худудида яшовчи халқлар мифологиясида яратувчи қахрамон (димург) сифатида тасвирланувчи қарға билан боғлиқ асотирлар туркуми шаклланган¹.

Қарға образи қайд қилинган энг қадимий сюжет Гильгамиш ҳақидаги шумер эпоси таркибида учрайди. Унда айтилишича, бутун оламни сув босганда, улкан кемада сузиб юрган Утнапиштам куруклик бор-йўқлигини билиб келиш учун қалдирғоч, каптар ва қарғани учиради. Қалдирғоч билан каптар курукликни тополмай қайтиб келадилар, қарға бўлса қайтиб келмайди. Бунинг ўзи куруклик борлигидан далолат берар эди².

«Сув қизи» номли ўзбек эртагида ҳам қарға маълум маънода ҳомий жонивор сифатида гавдаланади. У уч марта «қағ, қағ, қағ» деб эртақ қахрамонини кутилаётган хавф – нияти бузилган отанинг фитнасидан Турсунбек ва унинг ҳамроҳларини огоҳлантиради. Демак, бу мотивнинг шаклланишида қарғанинг тотем-жонивор сифатида ҳомийлик қилиши билан боғлиқ мифологик тасаввурлар ҳам муҳим рол ўйнаган.

Қуш (қарға) тилини билиш мотивининг тарихий илдизлари ҳам қадимги тотемистик тасаввурларга боғланади. Ўтмишда тотем сифатида қадрланган жонивор (масалан, қарға) тилини биледи, у билан тиллаша олади, деб тасаввур қилинган қоҳинлар магия ва бошқа сеҳрли йўллар воситасида тотем билан мулоқотга киришганлар. Ёшларнинг жанговарлик иқтидори, руҳий ва жисмоний камолотини синаб кўриш маросими – инициация чоғида уларга тотем билан «гаплашиш», ундан мадад сўрашнинг магик усуллари ўргатилган. Дастлаб тотемистик мифнинг анъанавий сюжет элементи сифатида юзага келган бу мотив кейинчалик эпик жанрларга, хусусан, эртақларга диффузияланган. Қуш тилини билиш мотиви дунё халқлари фольклорининг типологик муштараклигига мисол бўла оладиган ҳодисалардан бири.

¹ Мелетинский Е. М. Структурно-типологический анализ мифов северо-восточных палеоазиатов (Вороний цикл) // Типологические исследования по фольклору. – М., 1975. стр. 92–140.

² Мелетинский Е. М. Палеоазиатский мифологический эпос. Цикл Ворона. – М., Наука, 1979. стр. 187.

Араб ва ўзбек халқ эртакларида қаҳрамоннинг қушлар (жониворлар) тилини қандай қилиб ўрганганлиги ҳақидаги эпик мотив учрамади. Аммо дунё халқлари фольклори материалларининг таҳлили араб ва ўзбек халқ эртакларида шундай мифологик талқин мавжуд бўлганлигини билдиради.

Қуш тилини тушуниш жониворлар тилини билиш мотивининг ўзига хос кўринишларидан бири бўлиб, Ўрта Осиё туркий халқлар эртакларида кенг тарқалган сюжет элементи ҳисобланади. Масалан, туркман фольклорида шу мотив асосига қурилган икки эртак мавжуд. «*Ҳайвонларнинг тилини тушунган бой*» эртагида ҳикоя қилинишича, бир бойнинг мушуги билан ити бўлган экан. Бир куни бой бу жониворларнинг гапига қулоқ солиб ўтириб, оти билан туясини сотиб юборади. Кейин ҳайвонлар «Бой оғир касалга чалинган, буни унинг ўзи ҳам билмайди, шунинг учун узоққа бормай вафот этади», – деганини эшитгач, бехосдан ўлиб қолади.¹

«*Жониворларнинг тилини тушунган киши*» номли туркман халқ эртагида эса Хива шаҳрига қараб йўлга чиққан бир хасис билан сахийнинг саргузаштлари ҳикоя қилинади. Хасис киши сахийнинг озиқ-овқатини еб битиргач, ноилоҳ қолган сахий изига қайтишга мажбур бўлади. Аммо йўлда бир чайлада тунаш учун ётганида кечаси ёввойи ҳайвонларнинг гапини эшитиб қолади ва бой бўлиб кетади.² Мазкур эртак сюжети «*Эгри билан Тўғри*» номли ўзбек халқ эртаги таркибида алоҳида мотив сифатида иштирок этган.

Ўрта Осиё туркий халқлари фольклоридаги бевосита араб халқ адабиёти таъсирида шаклланган сюжетлардан яна бири эшак ва хўкиз саргузаштларига бағишланган эртаклардир. Бу эртаклар сюжетининг марказида ҳам жониворлар тилини тушуниш мотиви ётади. «*Есек пен оғиз сырлари*», яъни «Эшак билан хўкиз сирлари» деб номланган қозоқ халқ эртагида воқеалар куйидагича тасвирланган: «Илгари замонда бир одамнинг бир хўкизи, бир эшаги бўлган экан. Эшак роҳат-фароғатда, саройда ўт еб, сув ичиб тураркан. Хўкиз эса ҳамиша оғир хизматда бўлиб, азоб-укубатда кун кечираркан. Кунлардан бир куни хўкиз эшак-

¹ Туркмен халқ эртекилери. 1-том. – Ашхабад, 1978, 148–149-бетлар.

² Ўша манба. 141–143-бетлар.

ка хасрат қилибди: «Хоридим, чарчадим, жамики оғир юмушлар менинг бўйнимда! Сен менга қандай ёрдам беришинг мумкин?» – дебди. Шунда эшак: «Агар сен чарчаб, ҳориган бўлсанг, менинг сенга берадиган бир-икки оғиз маслахатим бор, – дебди эшак, – сен эртадан бошлаб, ўзингни касалга солиб, ўт еб, сув ичма. Сенинг касал бўлганингни кўрган хўжайинимиз, балки, сени кўшга қўшмас».

Буларнинг хўжайини ҳайвонларнинг тилини билар экан, эшакнинг хўкизга айтган гапларини эшитиб олибди. Эрта тонгдан хўкизнинг ўтламай турганини кўриб, индамасдан эшакни кўшга қўшиш учун олиб кетибди. Далага етиб боргач, ҳар куни хўкиз бажарадиган ишларни эшакнинг бошига юклабди. Эшак бечора обдон чарчаб, кечга томон ҳолсизланиб қайтибди. Хўкиз эшакдан: «Қандай бўлди, чарчамадингми?» – деб сўрабди. Эшак: «Аҳволим яхшику-я, аммо бир кўнгилсиз гап эшитиб қолиб, мазам қочиб қолди», – дебди. «У қандай гап экан?» – деб қизиқибди хўкиз. «Хўжайинимиз далада ишлаётган одамларга хўкизим касал бўлиб қолди, энди ишга ярамаса керак. Шунинг учун уни сўйиб сотиб, пулига бошқа хўкиз олмасам бўлмайди», – деганини эшитиб қолдим», – дебди эшак. Бу гапни эшитиб калтираб кетган хўкиз: «Дўстим, энди нима қиламан?!» – деб сўрабди. Эшак: «Сен аввалгидай ўт еб, сув ичиб, касалдан тузалгандан қилиб кўрсатасан ўзингни. Ана шунда хўжайин хўкизим тузалибди, деб ўйлаб сени сўйиш фикридан қайтади», – дебди. Буларнинг ўзаро суҳбатини эшитиб турган хўжайин кулиб юборибди ва уйига кириб кетибди».¹

«Эшак ва хўкиз» номли қирғиз халқ эртагида ҳам хўжайин қушлар ҳамда жонивор тилини яхши тушунадиган киши сифатида тасвирланган. Бу эртақда ҳам воқеалар тафсилоти худди қозоқ эртагидаги каби давом этади. Хўкизнинг оғир меҳнатдан нолиганини эшитган ялқов эшак унга раҳми келгандан бўлиб, шундай маслаҳат беради: «Сени кўшга қўшганида, жойингдан қимирламай туравер». «Агар таёқ билан урса-чи?» – деб сўрабди хўкиз. «Урса ҳам чида, кейин кўзларингни юмиб, ётиб ол. Олдинга хашак, сув қўйса ҳам қайрилиб қарама. Ўзингни ка-

¹ Ертегілер. Қазак халық әдебиәти. 1-том. – Алматы, 1988, 203–204-бетлар.

салга солиб ётавер. Шундай қилсанг, уч-тўрт кун дам олиб, куч йиғасан», – дебди эшак. Ҳўкиз шундай қилган экан, икки жониворнинг суҳбатини эшитиб, тушуниб ўтирган хўжайин эшакнинг ўзини қўшга қўшибди. Шунда бу азобдан қутулиш йўлини излаган эшак, «хўжайин эртага қассоб айттириб юборди, афтидан, сени сўйдирмоқчи. Чунки касал хўкиз кимга ҳам керак бўларди», – деб хўкизни кўркитибди. Эртаси куни хўкизи «тузалиб» қолганлигини кўрган хўжайин эшакни қўйиб, хўкизни қўшга қўшишни буюрибди. Ана ўшандан буён эшак сираям маслаҳат бермайдиган бўлган экан.¹

Жониворлар тилини биладиган хўжайиннинг эшаги билан хўкизи ўртасида бўлиб ўтган хангома ҳақида ҳикоя қиладиган ушбу эртақлар сюжетининг манбаи «Минг бир кеча» эртақлариги бориб тақалади.

Араб ва туркий халқлар эртақларидаги жонивор тилини тушуниш мотиви ҳам, аслида, ана шу қадимий маросимлар натижасида келиб чиққан. Эпик сюжетлар тизимининг асрлар давомида бадий турланишлари натижасида мазкур мотивнинг ибтидоий маросим ритуллари ва мифологик тасаввурлар билан алоқаси узилиб, маиший-новеллистик моҳият касб эта бошлаган.

¹ Киргизские народные сказки. – Фрунзе, 1989, стр. 306–307.

Собит
АВЕЗОВ

(1959 йилда туғилган)



Авезов Собит Сафарович 1959 йилда Бухоро вилояти Шофиркон тумани Искогаре қишлоғида туғилган. Бухоро давлат педагогика институтини битирган (1980). Дастлаб ўрта мактабда (1980–1995), кейинчалик Бухоро давлат университетида (1995 йилдан) ўқитувчи сифатида фаолият кўрсатиб келмоқда. «Санама жанри табиати ва бадиияти» мавзусида номзодлик диссертациясини ҳимоя қилган (2004). «Санама жанри табиати ва бадиияти» монографияси (2008), «Самимийлик саодати» (2009), «Заковатдан зийнатланган ҳаёт» (2014) рисолалари, «Ўқитувчи нутқ маданияти» ўқув услубий қўлланмаси (2013), «Офтоб қон талаш кун» қисса ва ҳикоялар тўплами (2017) нашр этилган.

ВОҚЕАБАНД САНАМАЛАР

Санама – дунёдаги барча халқлар фольклорида учрайдиган шеърый жанрлардан бири. Улар шу қадар ранг-барангли, бу улар таснифидаги турли-туманликда ҳам ўз ифодасини топган. Чунончи, Г. С. Виноградов илк бор шундай таснифга қўл урар экан, дастлаб санамаларнинг луғат таркибига эътиборни қаратди. Сўнгра мавзу моҳияти ва оҳангига асосланиб, уларни куйидагича уч ички турга ажратиб ўрганди: 1. Рақам санамалар (считалки-числовки). 2. Сўкма санамалар (заумные считалки).

3. Рақам ва сўкма сўз ўрнида қўлланган ва уларга тенг келадиган сўз-санамалар (считалки-заменки). М. Н. Мельников эса, ундан фарқли ўлароқ, санамаларни биринчи навбатда композицияси, товуш ритмикаси ва воқеабанд (сюжет)лигини ҳисобга олган ҳолда тасниф қилди ва уларнинг куйидаги уч кўринишини қайд этди: 1. Сўкма санамалар (заумные считалки). 2. Воқеабанд санамалар (сюжетные считалки). 3. Кумулятив санамалар (кумулятивные считалки) М. Н. Мельников сўкма санамаларда товушнинг ритмик қўлланилиши принципи, воқеабанд санамалар – воқеа ривожининг меъёрий ва драматик ҳолатлари, кумулятив санамаларда эса турли хил ноаниқ фикрлар тизими ёки йиғмаси орқали образлар ранг-баранглиги, уларнинг лексик, синтактик воситалар асосида мантиқий ифодаланишини асос қилиб олди. М. Н. Мельников фикрича, Г. С. Виноградов маъно-мантиқийлик жиҳатидан англашилмаган санамаларни, табиийки, алоҳида гуруҳга тўғри ажратган. Шунга қарамай, олим кўпгина сўкма санамаларни рақам санамалар гуруҳига қўшиб юборади. Чунки у буларни «эквивалент» деб атайди. Тўғри, айрим сўкма санамалар товуш таркиби ва ёзилиши жиҳатидан рақам санамаларга ўхшаса-да, аслида, улар рақам иштирокига кўра ҳам юқоридаги гуруҳдан фарқ қилиши табиий. Бироқ бир илдиз, бир воқеа асосида юзага келган санамаларни ҳар хил гуруҳга ажратиш, лугат таркибига кўра гуруҳлаш тасниф тамойилига раҳна солганлигини баён этади...

Белорус болалар фольклорини ўрганган Г. А. Барташевич эса санамаларни икки гуруҳга ажратади: 1. Воқеабанд санамалар. 2. Воқеасиз санамалар. Бизнингча, бу тасниф ҳам воқеабандлик нуқтаи назаридан амалга оширилган бўлиб, унда санамаларнинг лугат таркиби, поэтик хусусияти, кумулятив санамалардаги образлилик, воқеаларнинг гоҳ мавжуд, гоҳ номавжудлиги каби хусусиятлари ҳисобга олинмаган. Бироқ тожик, татар ва бошқа қардош халқлар болалар фольклорига оид тадқиқотларда санамалар таснифига деярли эътибор қилинмаган.

Ўзбек болалар фольклорига санамаларни илк бор ўрганган Ғ. Жаҳонгиров Г. С. Виноградов таснифини асос қилиб олган. Фольклоршунос Оҳунжон Сафаров эса, гарчи М. Н. Мельни-

ков таснифига суянса-да, аслида, ўзи тўплаган умумий ҳажми 800 сатрни ташкил этувчи 106 санама табиатидан, аниқроғи, уларнинг сюжет ва композицион қурилиши ҳамда поэтик жиҳатлари ва луғат таркибига хос хусусиятларидан келиб чиқиб, санамаларнинг қуйидаги ички турларини эътироф этган: 1. Воқеабанд санамалар. 2. Кумулятив санамалар. 3. Сўқма санамалар.

О. Сафаров тўплаган 106 (800 сатр), хоразмлик Собир Эҳсон Турк тўплаган 15 (130 сатр), Й. Султонов ва бошқалар тўплаган 12 (105 сатр), Ф. Жаҳонгировнинг 8 (28 сатр), ТАИ архивидаги 54 (310 сатр), ўзимиз ёзиб олган 51 (400 сатрлик) – жами 246 санама (1775 сатр) матни табиати, композицион таркиби, мавзу ва воқеабандлиги, поэтик хусусиятлари мантиқидан келиб чиқилганда ҳам О. Сафаров таснифи тўла-тўқис ўзини оқлайди.

Ўзбек болалар фольклорида воқеабанд санамаларнинг ўрни алоҳида. Бу турдаги санамаларда воқеабандлик етакчилик қилади. Матнда воқеалар кетма-кет изчилликда бўлиб, яхлит сюжет даражасида ўсиб чиққан. Воқеалар баёни рақамлар воситасида санаш оҳангида баён этилади. Бундай санамаларнинг асосий «манбаи» рақам бўлса, гоҳида рақамлар ўрнини санок оҳангидаги сўзлар эгаллаган бўлиши ҳам мумкин. Воқеабанд санамаларда рақам ва маъноли сўзнинг ўзаро муносабати ва қай бирининг устуворлигига кўра уларнинг икки хилга ажратиш мумкин:

1. Рақам-санамалар. Бу типдаги санамаларни О. Сафаров санок ритми асос бўлган санамалар деб атайди. Уларда санаш оҳанги рақамлар асосида юзага келтирилиши инобатга олинса, бу ички турни ихчамроқ қилиб рақам-санамалар дейиш қулайроқдир. Санамаларда рақамлар шунчаки тилга олинмай, балки оҳанг ҳосил қилишда, мисраларни вазн ўлчовига солишда, рақамлардаги фонетик қатламга ҳамоҳанг қофия келтиришда (*етти-кетди, уч-куч, тўрт-мўрт* каби) сонларга алоҳида аҳамият берилади:

*Азиз кўчага чиқди,
Аробаси бузилди.*

*Унга нечта миҳ керак?
Бир, икки, уч, тўрт,
Беш, олти, етти:
– Кетди!*

Рақам-санамалар учун санаш оҳангини яратувчи табиий мезон. Шу мезон асосида жанрнинг бошқа шакллари юзага келган. Г. С. Виноградов рақам санамалар ҳақида гапира туриб, шундай хулосага келади: «Ҳеч қаерда, ҳеч қайси жанрда рақамлар бундай ранг-баранглик касб этмаган». Шу хусусиятини ҳисобга олиб, у рақам санамаларни махсус санамалар деб атайди. О. Сафаров ҳам бу санамалар хусусида гапириб: «Жанрнинг санама дейилишида ҳам шу хусусият (рақамлар – С. А.) бош таомилга айланган»лигини эътироф этади. Демак, рақам – ушбу тур санамалардаги асосий восита. У, энг аввало, санашни ўрганиш асосида болаларда ҳисоблаш туйғусини шакллантириш ва такомиллаштиришга хизмат қилади:

Эллик, олтмиш, етмиш, саксон, тўқсон, юз, юздан чиққан оппоқ қиз! Ҳаяллама, чиққин тез!

Бундай санамаларда рақам нафақат предметнинг миқдорини кўрсатади, балки шу предметга муносабатни ифодалашга ҳам хизмат қилади:

Бир буғдой, Икки буғдой, Уч буғдой, Пуч буғдой.

Санамада икки хил мазмун акс эттирилган: биринчисида – бир буғдой донаси кўпайиб, икки ва ундан ҳам кўп буғдойга айланиши ифодаланса, иккинчисида, учинчи мисрадаги уч буғдой аслида бангидевона маъносида бўлиб, у ёки бу боланинг анқовлиги, телбалиги сингари қусурларига ишора маъносини ҳам акс эттиради.

Болаларнинг мурғак қалбларида тўлқин ураётган юксак орзу-ҳаваслар, қувонч-шодликларнинг изҳори ифодаланган санамалар ҳам анчагина. Уларда замонавий руҳ балкиб туради. Бу санамалар ҳамон фаол яратилаётганидан шаҳодат беради:

*Бир, икки, ўн олти,
Ўн олти деб ким айтди?
Ўн олти санагунча,*

*Тишим бир тушиб чиқди,
Ёшим саккизга етди,
Энди мактаб бораман,
«Беш» баҳони оламан.
Онамни қувонтириб,
Шакалатни оламан.*

Рақам-санамаларда «Биру бир», «Бир икки», «Бир, икки, уч, тўрт», «Бир икки... ўн икки, Ўн икки деб ким айтди?» «Бир, икки... ўн олти...» каби анъанавий бошлама мавжуд бўлиб, худди шу бошланма ҳар гал санама учун ритмик асос вазифасини ўтайди. М. Н. Мельников бундай анъанавий бошлама ҳақида шундай дейди: «Гўёки оппоқ лента қизалоқнинг сочига тақиб қўйилганидек, матннинг асосий материали – сонларнинг лексик такрорланиши жанрнинг стихияли мусиқийлигини юзага келтиради».

2. Сўз-санамалар. Бу турдаги санамаларни О. Сафаров санок интонациясидаги сўзлар асосида яратилган санамалар деб юритади. Унда рақам чекиниб, санаш оҳангида сўз фаоллашгани ҳисобга олинса, уни ихчамроқ қилиб сўз-санамалар дейиш маъқулдир. Бунда санамаларда қўлланувчи сўзлар матнда воқеабандликни юзага келтирган. Шу тариқа санамалар маълум воқелик асосига қурилса-да, болалар ижод жараёнида бундаги воқеага аҳамият бермайдилар, балки шу сўзлар ҳосил қилган санок оҳангига эътибор қиладилар. Бу турдаги санамаларнинг ўзига хос яна бир жиҳати шундан иборатки, улар аксарият ҳолда диалог асосига қурилади:

*Назира, ҳо, Назира,
Отни қера боғладинг?
Отхонага боғладим.
Неча пақир сув ичди?
Саккиз пақир сув ичди.
Қолганини ким ичди?
Бойнинг хотини ичди.
Бойнинг хотини ўлсин,
Ҳамма ундан қутулсин.*

Юқорида келтирилган санамада ҳам конкрет воқелик мавжуд. Унда отнинг саккиз пақир сув ичиши отбоқарлик меҳнатининг ниҳоятда оғирлиги бир қадар муболағали қилиб ифода этилган. Санамадан мақсад – бойнинг хотини зулмини фош этиш. Шунинг учун бой хотин жабр-зулми отни суғориш машаққатига мувозий келтирилаётир. Қани энди, у ўла колса эди, ҳамма ундан қутуларди. Бунда ҳам бой хотинига ўлим тиловчи қарғишдан фойдаланилган. Шу асосда ижтимоий тенгсизликдан қутулишдан иборат ижтимоий орзу болалар дунёқараши ҳосиласи сифатида ўз инъикосини топган. Бундай санамалар болаларда ижтимоий онгнинг куртак отишига хизмат қилган.

Сўз-санамаларда ўйин иштирокчиларини эркалаш мотиви устувор. Бундай эркалаш замирида ўйинбошининг ўйинчиларга нисбатан ўзаро ҳурмати ва самимияти яққол сезилиб туради. Бу самимият гоҳо предметлар орқали изҳор қилинса, гоҳо эркалаш энгил ҳазил-мутойиба воситасида ифода этилади. Бундай санамалар болалар ўртасида ҳамжихатлик ва ўзаро дўстлик кайфиятларини уйғотибгина қолмайди, балки чуқурлаштиради. Ўйинга муҳаббат туйғусини тарбияловчи бундай санамалар болалар репертуарида кўпдир.

Бир қатор сўз санамаларда воқеалар драматизми сезиларли даражада бадиий адабиётдаги асарлар сингари изчил хусусиятга эга. Уларда сурат, сўз, образ, параллелизм ёки қарама-қарши қўйиш (тазод) сингари воситалар фаол учрайди. Якуни эса, албатта, эмоционал бўёққа эга: муносабат, тасвир, диалоглар ўйин иштирокчисига нисбатан хабар билдириш, маслаҳат ёки буйруқ, бериш маъносидаги оҳанг билан яқунланади.

Сўз-санамаларда маълум тарихий давр ўз аксини топади, у маълум даврнинг, замоннинг маҳсули сифатида юзага келади. Бундай санамаларда ўтмиш воқеаларидан тортиб, то ижтимоий ҳаётда содир бўлган янгиликларгача, айттайлик, тракторнинг илк бор ўлкамизга кириб келиши, қишлоқ хўжалигига оид янги техника воситаларининг пайдо бўлиши, ҳатто самолётнинг осмондаги илк ҳаракати, ракеталарнинг учиши сингари ўзгаришларгача жанр учун муҳим мавзу бўлган ва буларнинг барчаси болалар назаридан, дунёқарашидан четда қолмаган. Шу нуқтаи назардан

каралса, сўз-санамадаги поэтик нутқнинг луғат таркиби ҳам ранг-баранг бўлиб, унда ижтимоий ҳаётнинг қишлоқ хўжалиги, техника ва бошқа соҳаларига тааллуқли сўзлар кўплигига ажабланмаслик мумкин.

Куйидаги сўз-санамада эса ўттизинчи йилларда мамлакатимиз бўйлаб тракторнинг қишлоқ хўжалигига кириб келиши лаҳзалари таассуротларининг акс садоси мавжуд: *Тур-тур, трактор, / Ишни бузма, қараб тур, / Бир чеккага чиқиб тур!*

Болалар нафақат ижтимоий ҳаёт воқеаларининг кузатувчиси, балки унинг бевосита иштирокчиси сифатида унга муносабат билдиришга ҳам ҳаракат қиладилар. Улар самолёт ёки ракета-лар мавзуидаги сўз-санамаларда ўзлари учун сеvimли бўлган кишиларни энг баланд осмон қўйнида кўришни орзу қилишади. Бундай ҳаёлий тушунчалар уларнинг ҳали ўзлари ҳис қилмаган ҳаётий ташвишлардан ҳам устун бўлишига, юксак фантастик тасаввурларини ўйинга қаратилгандек туюлади:

*Ҳайло, самолёт,
Учиб кетотти.
Ичида Зулайҳо
Йиглаб кетотти.
Йиглама, Зулайҳо,
Отанг келотти.
– Отангни оти ким?
– Абдуллахўжа.
– Бултирги жўжа!*

Болалар тасавурида самолётда қилинажак парвоз – юксак эҳтиромга эришиш нишонаси. Унда учаётган Зулайҳо эса – бахтсиз. Негаки, отаси Абдуллахўжа ўз қизини суймаган бегона йигитга узатаётганини болалар яхши англайди. Лекин Зулайҳо самолётда кетаяпти. Унинг отаси Абдуллахўжа ҳар қанча бой бўлмасин, барибир «Бултирги жўжа». «Бултирги жўжа» – болалар нутқида «вояга етмаган, хом одам», деган киноя, кесатик маъносини ифодалаган.

Сўз-санамаларда тасвирий воситалар жуда фаол. Бу уларда шеърга хос тасвирий эмоционалликни кучайтирган ва тарки-

бий яхлитликни таъминлаган. Чунончи, матнларда сифатлашлар жуда кўп учрайди. Худди шунингдек, санамалардаги табиат тасвирида ҳам болаларча тасаввур таъсири сезиларли даражада: *Олма кетди думалаб, / Кўча бўйи юмалаб, / Ким олмани тутади – / У ўйиндан чиқади.*

Анҳорда олманинг қалқиб-қалқиб оқиб келишининг ўзи – гўзал бир манзара. Унинг ортидан гуруҳ-гуруҳ, болаларнинг завқланиб чувиллаб чопиши – ундан-да гўзал! Оқаётган олмани кузатиш эса – янада нашъали. Бинобарин, бундай гўзалликни ўз нафсининг қурбони қиладиган болага ўйинда ўрин йўқ. Сўз-санамада ана шу фикр ифодаланган. Унинг тугалланмасидаги буйруқ – учинчи шахс келаси замон феълида ўз аксини топган. Сўз-санамаларда ўхшатишлар бир предметнинг бошқасига қиёси орқали ифодаланса, баъзи ҳолларда шахс хатти-ҳаракатидаги хусусиятлар ҳам болалар табиатига қиёсланиб, эмоционалликка эришилган:

*Қаёққа борасан?
Тоққа бораман,
Нима қиласан?
Писта чақаман,
Пистанинг мағзи
Кўқоннинг қанти!*

Жонажон юртимиз мустақилликка эришиб, ўзбек халқига хос миллий урф-одатларнинг қайта тикланиши болалар онгига қатор ўзгаришларни олиб кирмоқда. Бундай ижобий фазилатлар нафақат катталарнинг, балки болаларнинг ҳам хатти-ҳаракатларида ўз ифодасини топмоқда. Чунончи, меҳмон кутиш одоби ана шундай фазилатлардан. Меҳмон келса, ҳовлини тоза-озода тутиш, дастурхоннинг тўкин-сочин бўлишига эътибор ҳам болаларни беҳад қувонтиради. Куйидаги сўз-санамада меҳмон кутишининг илк одоблари ўз аксини топган бўлиб, унда шу туйғунинг ифодаси учрайди:

*Ола мушугим,
Юзини ювопти.*

*Чойимда шамма –
Меҳмон келопти.
Қадамлари «дуқ-дуқ»,
Жоним сизга тасаддуқ!*

Сўз-санамадаги «Ола мушугим юзини ювопти», «Чойимда шамма» ибораларида халқимизнинг меҳмон ташрифидан башорат килишларига оид иримга ишора бор...

Сўз-санамалар қўл ёки оёқ ҳаракатларига омухта ҳолда ба-жарилади. Онабоши ижро жараёнида иштирокчилар кўксига бармоғини навбатма-навбат теккиза туриб, санаш оҳанги билан мазмуннинг мантиқан уйғунлашувини амалга оширади. Сўз-санамаларда «Абўлакам-дубўлакам», «Атола-батола», «Апшонакам-дупопонакам», «Олатой-булатой», «Зув-зув, шалоп-шалоп» сатрлари билан бошланувчи туркумлар силсиласи мавжудлигини О. Сафаров асосли равишда қайд этган эди. «Абўлакам-дубўлакам» туркумли санамалар матни воқеабандлик негизига курилади. Биз ёзиб олган қуйидаги сўз санамани ўйин иштирокчилари ерга ўтиришиб, оёқларини олдинга чўзиб, бир жойига тўплагач, ўйинбоши тўпланган шу оёқларнинг учларига бармоғини теккизиб туриб шовкин солиб айта бошлайди:

*Абўлакам,
Дубўлакам.
Читма-читон,
Қодир акам,
Қайга кетти?
Тузга кетти.
Қачон келар?
Ёз келар.
Пилон пис,
Орқага тис!*

Мохиятан бу сўз-санама ҳам бутун бошли ўйинга тенг бўлиб, асосан, қаҳратон қиш фаслида сандал атрофида ўтириб олиб, оёқларни сандали чамбарагига узатган ҳолда айтилади. Санашда оёғини чек тушгандаёқ тортолмай, бошқалардан бу соҳада

орқада қолган боланинг оёғини онабоши сандали кулдони-га босишга ҳаракат килади. У ютқизган ҳисобланиб, меровлиги туфайли шундай жазоланади. Болалар жазони шеър айтиш, «миёв»лаб ёки «вов»уллаб бериш, рақсга тушиш ёхуд қўшиқ куйлаб беришлари шарт...

Хуллас, санамаларни бундай турларида, энг аввало, жанрнинг поэтик хусусияти, композицион яхлитлигини таъминловчи ритмнинг устуворлиги асос бўлади. Ушбу санамалардаги санок ритми болаларга санокнигина ўргатиб қолмайди, балки санаш оҳангини вазнга ҳам солади, гоҳида кетма-кет, гоҳида жамловчи шаклда айтиладиган рақамлар жанрнинг асосий воситаси бўлиб хизмат қилувчи поэтик оҳангни юзага келтиради. Шу нуқтаи назардан қаралса, матндаги рақам ритмик жараёни изчил таъминлабгина қолмай, ўз навбатида, поэтик оҳангдорликнинг турли шаклларда жилоланишини ҳам намоён этади. Рақам-санамалардаги асосий хусусиятлар рақамнинг матнда ритм ва оҳангни яратишида, бунинг эса, ўз навбатида, болаларда санаш малакасини ҳамда уларнинг предметга ва табиатга нисбатан муносабатини шакллантиришида яққол кўринади. Воқеабанд санамалар замонавийлиги, ҳаётийлиги, ҳозиржавоблиги билан ажралиб туради ва ҳозирги пайтда ҳам фаол яратилмоқда.

Оқибатхон
ИСМОНОВА
(1959 йилда туғилган)



Оқибатхон Олимжоновна Исмонова 1959 йил 27 октябрда Ўш вилояти Аравон туманида туғилган. Фарғона давлат педагогика институтида ўқиган (1977–82). Аравондаги Заҳириддин Муҳаммад Бобур номли ўрта мактабда (1979–91), кейин шу туман халқ таълими бўлимнинг методисти вазифасида ишлаган (1991–94). Ўш давлат университети Ўзбек адабиёти ва журналистика кафедрасида ўқитувчи, катта ўқитувчи, доцент, сиртқи бўлим бўйича декан муовини вазифасида ишлаган (1994 йилдан). «Ўзбек тўй маросим фольклорида «келинсалом» жанри (генезиси, спецификаси, поэтикаси)» мавзуидаги номзодлик диссертациясини ҳимоя қилган (1999). «Ўш вилояти ўзбек никоҳ тўйларида «Келинсалом» (1998), «Келинсалом» қўшиқларининг жанр табиати» (1999), «Фарғона водийси ўзбек тўй маросим фольклорида ёр-ёр жанрининг ижро ўрни» (2006) каби мақолалари ҳамда «Қизил гулнинг гунчаси: «келинсаломлар» (1999, ҳамк.) номли китоби чоп этилган.

**«КЕЛИНСАЛОМ» ҚЎШИҚЛАРИНИНГ
ЖАНР ХУСУСИЯТЛАРИ**

«Келинсалом» жанри махсус тадқиқ этилмаган бўлса-да, фольклоршунослик, элшунослик ва тилшуносликка оид айрим илмий тадқиқотларда бу хусусда эътиборли мулоҳазалар билди-

рилган¹. Аммо бу жанрнинг генезиси, ўзига хос поэтик белгилари, жанр хоссалари, ижро шакли ва усуллари, образлар тизими ва бадий хусусиятлари етарли даражада ўрганилмаган. Биз ушбу мақоламизда «келинсалом» жанрининг ўзига хос хусусиятларини Ўш вилоятдан тўпланган фольклор материаллари асосида ёритишга ҳаракат қиламиз.

Анъанага кўра «келинсалом» якка ижрочи-янга, махсус чақирилган хушовоз аёл, келиннинг яқин дугонаси ёки қариндош-уруғларидан бири томонидан куйланади. Ижро жараёнида атрофдаги киз-жувонлар, келин тушириб келган қариндош-уруғлар ҳам нақаротга жўр бўлишади. Баъзи ҳолларда бир неча ижрочи барча бандларни биргаликда ижро этишади. Айрим ҳолларда эса «келинсалом»нинг барча бандлари бир ижрочи томонидан айтилади. Бу кўпроқ махсус ижрочилар томонидан куйлангандаги ҳолатдир.

«Келинсалом» кўшиқларининг банд тузилишидаги ўзига хослик ҳам унинг фольклор жанри сифатидаги специфик белгиларидан бири ҳисобланади. Кузатишларимизга қараганда, «келинсалом» бандларининг поэтик қурилиши ўзининг мисралар сонига кўра куйидаги моделларга асосланади:

а) анъанавий уч мисралик банд. Одатда, икки банд қофияланган бўлиб, охириги мисра салом қаратилган шахсни ифодалаш вазифасини бажаради:

*Хизмат бўлса бўлишган,
Ойдаё бўлиб тўлишган,
Кўшиларига салом!*

б) тўрт мисралик банд. Бунда ҳам аввалги икки мисрада асосий мазмун ифода этилади ва улар ўзаро қофияланади. Учинчи

¹ Алавия М. Ўзбек халқ маросим кўшиқлари. Тошкент, 1974. 161-бет. Мирзаев Т. Фольклор жанрлари / Ўзбек халқ оғзаки поэтик ижоди. Тошкент, 1990. 72–73-бетлар; Саримсоқов Б. Ўзбек фольклорининг жанрлар состави // Ўзбек фольклори очерклари. 1-том. Тошкент, 1988. 63–85-бетлар; Давлатов С. Қашқадарё воҳаси тўй маросимлари фольклори. Филол. фанлари номз. дисс. Тошкент, 1997. 66–67-бетлар; Исмоилов Х. Ўзбек тўйлари. Тошкент, 1992. 127-бет; Жўрабоев А. Ўзбек тилида тўй маросимлари номлари. Филол. фанлари номз. дисс. Тошкент, 1971. 183–184-бетлар.

мисра ўрнида «Ёр-ёру, чору ёр», «Салом, салом, салом», «Салом, салом, яна салом!» сингари анъанавий поэтик формулалар такрорланса, тўртинчи мисрада салом қаратилган шахсга ишора мавжуд бўлади:

*Оқсақичдай эшилган,
Маҳаллада керилган,
Ёр-ёр-у, чаҳор ёр,
Қайнонасига салом!*

Тўртлик шаклида оммалашган «келинсалом» кўшиқлари мисраларининг а-а-а-б тарзида қофияланиш ҳолати ҳам мавжуд:

*Взадаги печакдай,
Қайрилмачоқ гажакдай,
Очилган гулчечакдай,
Қайнэгачисига салом!*

в) беш мисралик банд. Бу моделнинг юзага келишига ҳам анъанавий учлик банд тузилиши асос бўлган:

*Осмондаги ойдайн,
Ёйилиб оққан сойдайн,
Амма-холаларига салом,
Салом, салом, яна салом,
Эшитинг: Сизга салом!*

г) олти мисралик банд. Бундай банд тузилишида биринчи-иккинчи мисра қофиядош бўлса, кейинги мисралар «Келинсалом ёр-ёр», «Тўй муборақ» ёки «Эшитволинг қайнотаси» каби такрорланувчи нақаротдан иборат бўлади:

*Токчадаги турган совундай,
Ичи тушган қовундай,
Салом, салом, ёр-ёр,
Келин салом, ёр-ёр,
Эшитволинг овсинлари,
Сизга салом, ёр-ёр!*

«Келинсалом» жанрига хос специфик хусусиятлардан яна бири унинг уюштирувчилик хоссасидир. Маълумки, ўзбеклар хонадонидида ўтказиладиган ҳар бир маросим қариндош-уруғ ва маҳалла аҳолисининг фаол иштирокисиз ўтмайди. Хусусан, «келинсалом» жанри ижроси учун махсус маросим уюштирилади ва янги бошчилигидаги қариндош-уруғлар фаоллигида ижро жараёни учун зарур шароитлар яратилади. Тўйдаги ҳар бир шахс жанр ижроси учун муҳим бўлган ижро шаклини танлашда ва қуйлашда фаол иштирок этади. Жумладан, анъанавий маросимда шеърӣ банд тизимидаги «келинсалом» қўшиғини айтиш учун махсус ижрочи танлаш ёки жамоа ҳолатида қуйлаш ўзаро келишилган ҳолда белгиланади. Ҳатто ижро ўринлари ҳам маросим қатнашчилари томонидан танланади.

«Келинсалом» жанрининг оддий сўзлар воситасидаги диалогик характердаги ижро – шакли мусиқа билан боғлиқлиги жиҳатидан ҳам ўзига хослик касб этади. Оддий сўзлар воситасидаги ижро усулида бирон чолғу асбоби жўр бўлмайди, бироқ ижрочи салом матнидаги айрим товушларни чўзиши ёки урғуни сўзнинг охириги бўғинига тушириш орқали мусиқийликни қучайтиради. Масалан, «келинсалом беради-ю-ю...» бирикмасидаги «ю» товуши бир неча сония чўзиб айтилади, бу эса бир неча маънони англатиб, қуда томонни келиннинг саломини қабул қилишга чорлайди.

Шеърӣ банд тузилишидаги ижро усулида доира жўр бўлиши ёки бўлмаслиги ҳам мумкин. Чунки айрим ҳолатларда чолғучи ёки мусиқа асбобининг йўқлиги қўшиқнинг якка ижрочи томонидан қуйланишига сабаб бўлади. Кузатишларимиз давомида бундай ҳолатларда «келинсалом» айтгучига тўйга қақирилган доирачи созанда ёки махсус ижрочи қақирилган бўлса, барча созандалар жўр бўлишини аниқладик. Бундай ўзига хос мусиқий ижро, одатда, тўй даврасида қуйланади ва қўшиқнинг жозибали ижро этилишига асос бўлади.

«Келинсалом» ижросидаги юмористик танқид, киноя, илтижо, пичинг, насиҳат халқ таълим-тарбия усулининг бетакрор намунаси бўлиб, халқ маънавиятидаги бадиий-эстетик тафаккурнинг шаклланишига ва ривожланишига восита бўлиши билан инсон

ақлини, ақл орқали ҳиссиётни тарбиялашда муҳим роль ўйнайди. Шунингдек, маънавиятга зид бўлган ноахлоқий хусусиятлар ҳаракат ва мимикалар орқали инкор этилади, ижобий фазилатлар амалий: кўргазмалик тарзда тарғиб этилди.

Хуллас, «келинсалом» жанри ҳам ўзига хос муסיқийликка эга – бўлган ҳаётий сахна асари бўлиб, тўйда иштирок этган кишиларнинг маънавий ҳамда юксак ахлоқий фазилатларини такомиллашувига сабаб бўлади;

Ўш вилояти ўзбек никоҳ тўйларида ижро этиладиган «келинсалом» жанрининг ўзига хос хусусиятлари, ижро ўрни ва шакли, усули ва маиший вазифасини ўрганиш асосида қуйидаги хулосага келинди:

«Келинсалом» жанри ўзбек халқ никоҳ тўйи маросими тизимидаги анъанавий жанрлардан биридир. Бошқа туркий халқлар никоҳ тўйлари маросимлари узвида келиннинг таъзим қилиш ҳаракатигина мавжуд бўлиб, бу удумни бажариш чоғида кўшиқ куйлансада, бироқ, жанр мансубиятига кўра «келинсалом»дан фарқланади ва бошқа номлар билан аталади.

Ўш вилояти ҳудудида яшовчи ўзбеклар орасида «келинсалом» жанрининг икки хил ижро шаклини кузатиш мумкин. Жанр диалогик характерда ижро этилиб, шеърӣ тузилишидаги ижро шакли анъанавий чорлов, бошлама, таърифий баён ва хотима узвларидан иборат. Жанрнинг бу ижро шакли «келин тушириш» маросимида 3 ўринда, «юз очди» маросимида ҳам 3 ўринда ижро этилади.

Одий сўзлар воситасидаги ижро шакли эса «келин тушириш», «юз очди», «келин эшикка чикди», «келин чақирди» маросимларида ўзига хос тарзда бажарилади.

«Келинсалом» кўшиқлари якка шахс ёки жамоа томонидан ижро этилиш хусусиятига эга. Якка ижрочи махсус чақирилган мохир санъаткор, келиннинг дугонаси ёки қариндоши бўлиши мумкин. Жамоавий ижрода барча бандлар биргаликда айтилиши ёки якка шахс асосий бандни куйлаб, қолганлар нақаротга жўр бўлиши мумкин.

«Келинсалом» жанри муסיқий халқ томоша санъати кўринишига эга бўлиб, якка доирачи иштирокида ёки чолғу асбоб-

ларининг жамоавий ижроси жўрлигида куйланади. Ижрочи оҳангдорлик ва мусикийликни кучайтириш мақсадида баъзан такрорланувчи қисм-нақарот ижросида ритмни ўзгартиради.

5. Мазкур жанр келинни янги оила аъзолари билан таништиришни ташкил қилиш, қадимий тушунчаларга кўра келинни ёвуз кучлардан сақлаш, тўй даврасига кўтаринки кайфият бағишлаш мақсадида ижро этилади ва психологик, бадиий-эстетик ҳамда уюштирувчилик вазифасини бажаради.¹

¹ Ушбу мақола «Ўзбек тили ва адабиёти» журналининг 1999 йилги 5-сониде (51–53-бетлар) чоп этилган.

Салима
МИРЗАЕВА
(1959 йилда туғилган)



Салима Райимжоновна Мирзаева 1959 йилда Андижон вилояти Жалолқудуқ туманида туғилган. Андижон давлат педагогика университети (1976–81) Филология факультетини ўқиган. Ўрта мактабда ўқитувчилик қилган (1981–85). Андижон давлат университети «Ўзбек адабиёти» кафедрасида ўқитувчи, катта ўқитувчи, доцент, кафедра мудири ва профессор лавозимларида ишлаб келган (1985 йилдан). «Ўзбек халқ афсун-дуоларининг жанр хусусиятлари ва бадиийлиги» мавзусида номзодлик (1993), «Ўзбек халқ романик дostonлари поэтикаси» мавзусида докторлик (2005) диссертацияларини ҳимоя қилган. «Ўзбек халқ афсун-дуоларининг тематик таснифи» (1992), «Ўзбек халқ романик дostonлари поэтикаси» (2004), «Ўзбек халқ афсун-дуоларининг жанр хусусиятлари ва бадиияти» (2006), «Ўзбегим ёр-ёрлари» (2009) каби китоблар муаллифи.

**БАРҚАРОР ЭПИК ФОРМУЛАЛАР
ПОЭТИКАСИГА ДОИР**

Халқ эпосида сақланган хотиранинг моҳиятини чуқур ва тўғри англашда барқарор эпик формулалар табиатини, уларнинг анъанавийлик даражасини, ҳар бир формуланинг дoston матнида бажарган бадиий ахборот бериш вазифаларини аниқлаб олиш катта аҳамиятга эга.

Халқ эпосида барқарор формулаларнинг тутган ўрни ва бадий вазифалари ҳақида ўзбек фольклоршунослигида бирмунча кузатишлар олиб борилган. Рус ва бошқа халқлар фольклоршунослигида эса бу масала анча жиддий тадқиқ этилган. Шунга қарамай барқарор эпик формулаларнинг бадий табиати, унинг анъана билан алоқаси каби масалалар кенг ўрганилмаган. Биз ушбу мақоламизда барқарор формулаларнинг мазмунидаги анъанавийлик ва уларнинг дoston матнида адо этадиган вазифаларини ёритишга ҳаракат қиламиз.

Барқарор эпик формулалар муайян сюжет билан боғлиқ бўлмаган, аммо халқ бахшиларининг эпик онги ва эпик хотираси асосида ётувчи, халқ дostonлари ижроси пайтида ўзига хос бошқарилувчи бадий канон, қолиплардан иборат.

Шунга кўра барқарор эпик формулалар поэтикасини ўрганишда биз куйидаги уч жиҳатга алоҳида эътибор қаратамиз.

1. Эпик формулалар услуб ва мазмун даражасидаги типиклаштириш маҳсули бўлиб, улар эпос тартибидаги ижтимоий воқеликни типиклаштириш билан алоқадордирлар. Чунки эпик формулалар ритуал ҳаёт формулаларига мос келади.

2. Жамоанинг эстетик мулки сифатида формулалар бахшининг ижодий имконсизлигини бадиҳавий имконият билан таъминлаш, матнга бадийлик бағишлашдаги эҳтиёжини қондириши учун хизмат қилувчига зарурий поэтик ҳодисалардир. Шу маънода барқарор эпик формулалар бахшилардаги ижодий ожизликни яширувчи, импровизация жараёнида уларга илҳом бахш ётувчи эстетик ҳодисалардан иборат.

3. Барқарор эпик формулалар халқ дostonларидаги шеърӣ матнлар билан уйғун, яъни у ёки бу мазмундаги тасвир ҳамда ифодалар билан семантик уйғунлашган универсал образли ҳосилалардир.

Юқоридаги уч жиҳатдан барқарор эпик формулалардан таҳлил қилиш бир мақола доирасида ҳал қилинадиган масала эмас. Шу боис ушбу мақолада биз фақат учинчи жиҳат ҳақида мухтасар фикр-мулоҳаза юритишга ҳаракат қиламиз.

Барқарор эпик формулаларнинг қадимий илдизлари патриалхал тузум даврларига – ижтимоий воқеликнинг ҳар бир

ҳодисаси фақат маросим орқали бошқариладиган ўтмишга бо-
риб боғланади. Фақат ана шу даврлардагина эпик формулаларда
акс этган маиший ҳаёт бутун жамоа учун умумийлик касб этган
ва ягона, алоҳида ҳодисалардан устун мавқе эгаллаган. Бунинг
сабаби шундаки, патриархал тартиботлар нуктаи назаридан яго-
налик эстетик қимматга эга бўлмаган.

Барқарор эпик формулалар муайян воқелик ҳақидаги анъана-
вий мазмунларни қайд этади, анъанавий моҳиятни ифодалайди,
лекин уларнинг сабабий асосларини изоҳламайди. Шу боис бах-
шилар ижро жараёнида сюжет воқеаларининг барча узвларини
тасвирлаб ўтирмай, улар ҳақидаги эпик формулаларга мурожаат
этадилар. Мана шу эҳтиёж эпик формулаларни ижро пайтида
такрор ва такрор қўллашга, ўз навбатида, бу такрорлаш уларнинг
барқарорлашувига олиб келади.

Барқарор эпик формулалар анъанавий мазмунлар мажмуаси-
дан иборат ва уларнинг ҳар бири муаян мазмуний матн билан
шу қадар бирикиб кетганлиги сабабли бирорта ҳам эпик форму-
ланинг синонимик шакли йўқ. Қисқаси, эпик формулалар бах-
шилар хотирасини мустаҳкамловчи, уларнинг онгидаги эпик
ахборотни жонлантирувчи, бу ахборотни тингловчига етказиш
шакли, мароми, оҳанги, вазни ва қиёфаси кабилар жиҳатидан
уларни бошқарувчи эстетик ҳодисалардир.

Фозил Йўлдош ўғлидан ёзиб олинган «Малика айёр» достони-
да Торкистондан Малика айёрни олиб келиш учун сафарга жў-
наётган Авазхондан отаси Гўрўғли қайтиш муҳлатини сўрайди.
Отанинг сўровига жавоб беришда бахши Авазхоннинг нутқини
фақат эпик формулалар воситасида гўзал ва таъсирчан ифода-
лашга эришган. Атиги йигирма мисрадан иборат Авазхоннинг
жавобиди барқарор эпик формулалар миқдори ўн мисрани таш-
кил этади. Бу шеърӣй парча қуйидаги барқарор эпик формула
билан бошланади:

*Тойрилмаса бошдан тожу давлатим,
Остимда ўйнаса араби отим.*

Мазкур формуланинг маъносини англаш ва тўғри талқин
этишда биринчи мисранинг кўчма рамзий маъносига эътибор

бериш лозим. Унда «бошдан тожу давлатнинг тойрилмаслиги» – омаднинг кетмаслиги, бахтнинг юз бурмаслигини англади. Дарҳақиқат, Авазхондан бахт-омад кетмаса, у, албатта, қайтиб келади. Иккинчи мисрадаги «остида ўйнаган араби от» эса Ғиротга ишорадан иборат бўлиб, агар бу тулпор доим тирик, соғ-саломат ҳаракат қилса, Авазхон, албатта, қайтади. Демак, қахрамон ўзининг маълум муддатдан кейин қайтиб келишининг муҳим икки шартини айтиб, сўнгра «ўн олти ой келар менинг муҳлатим» деб жавоб қайтарган. Атиги уч мисрадан иборат нутқ парчасида берилган эпик ахборотнинг тингловчи учун ўзига хос фалсафий, ҳаётий ҳамда ҳиссий жиҳатдан таъсирчанлигини таъминлаш мақсадида бахши барқарор эпик формулага мурожаат этган. Агар у формуласиз «ўн олти ой келар менинг муҳлатим» деб эпик ахборотни яланғоч айтганда эди эпоснинг, эпик шеърнинг бадиий таровати барҳам ейиши тайин эди.

Мана шундан сўнг ҳам бахши тингловчилар руҳиятига, ҳиссиётига янада кучлироқ таъсир кўрсатиш мақсадида яна янги эпик формулага мурожаат этади ва унинг воситасида эпик ахборотни кучайтиришга ҳаракат қилади:

*Дардлиман дардимни кимга ёраман,
Айрилиқ ўтида бағри пораман.*

Бир томондан, суюкли фарзандидан вақтинчалик айрилиб қолаётган отанинг кўнглига далда бериш, иккинчи томондан, Гўрўғлини Гўрўғли қилган, Гўрўғлинигина эмас, балки бутун Чамбил мамлакатининг, Чамбил халқининг тинчлиги ва тотувлигини таъминлаётган Ғиротдан абадий айрилиб қолишдан хавотирланаётган мамлакат сардорининг кўнгил хижиллигини ёзиш учун Авазхон юқоридаги формула орқали сўзлаяпти. Ҳақиқатан ҳам, Авазхон дардли кул, аммо ўз дардини ҳеч кимга айта олмайди. Сабаби шундаки, Зебит чўлида, Шакар кўлида Гўрўғлининг ақлу хушини олган Малика айёрни Торкистон деган номаълум ва хавф-хатарли мамлакатдан осонлик билан олиб келиб бўлмаслигини у яхши билади. Аммо жонидан яхши кўрган Гўрўғлининг дардига малҳам бўлиш учун Авазхон сўз бериб қўйди, сўзни бузиш эса эпик қахрамон шаънига тўғри келмай-

ди. Мана шунинг учун унинг бутун дарди ичида. Бунинг устига отаси ҳам асранди фарзандидан, ҳам тулпор отидан айрилиб қолишдан ҳадиксираб, қачон қайтиб келасан деб сўраб ётибди. Мана шу хавотирли ҳадиксирашдан Гўрўғлини кутқариш лозим. Бу вазифани эса формуланинг иккинчи мисраси адо этган. Агар Авазхоннинг бағри ҳам вақтинчалик айрилиқдан пора бўлса, демак, у тирик бўлса, албатта, қайтади. Мана шу эпик формуладан кейиноқ бахши Авазхон жавобига аниқ қайтиш муҳлатини, яъни аниқ эпик ахборотни қўшиб юборади. Насиб этса, ўн олти ойда келиш ҳақидаги хабар эса дoston қаҳрамони Гўрўғли ва унинг ёнидагилар кўнглини, дoston тингловчилари дилини хотиржам қилиши шубҳасиз. Демак, барқарор эпик формулалар матнга жон бағишлайди, унга кучли ҳиссий таъсирчанлик беради. Нозик руҳий кечинмаларни тингловчига етказишда калитлик вазифасини адо этади.

Демак, Авазхон ўзини қийнаётган кечинмаларни эпик формула воситасида баён этгач, кейин аниқ қайтиб келиш муҳлатини айтади. Бироқ у олдида турган сафарнинг хатарли эканини, ундан қайтиб келмаслик мумкинлигини чуқур ҳис этади. Мана шу гумонни Гўрўғлига етказишни у унутмайди. Мана шу ҳолатни қаҳрамон ўз нутқи воситасида етказиши учун мос келадиган бошқа барқарор эпик формулани бахши усталик билан Авазхон монологуга қўшиб юборади:

*Жаҳонни сайр этиб ўйнаб келмасам,
Нор кесар олмосин белга чолмасам...*

Сафар хатарли бўлса ҳам, беҳатар бўлса ҳам, барибир, сафар. Чунки сафар чоғида нотаниш юртларга борасиз, турли-туман воқеа-ҳодисаларга дуч келасиз, турли кишилар, жондорлар билан тўқнашасиз. Мана шу маъно барқарор эпик формуланинг биринчи мисрасида ўз ифодасини топган. Иккинчи мисрадаги нор кесар олмосин белга боғлаш эса қаҳрамоннинг сафар пайтида ҳар қандай хавф-хатарга тайёр эканлигидан, уларни олдиндан билганлиги ва сезганлигидан далолат беради. Демак, барқарор эпик формула бахшини ҳам, тингловчини ҳам эпик вазият ичига олиб кириш баробарида ижодкор куйлаши учун ритмик, метрик

ва эвфоник, энг мухими, эпик баён учун қолип ҳам тайёрлади. Шу боис кейинги мисралар эпик формула қолипида янги эпик ахборотни ифодалаш йўлида давом этади:

*Ўн олти ойда Торкистондан келмасам,
Авазжоннинг зўр билаги толди де,
Ҳам отингни, ҳам ўелингни ўлди де,
Якка мазор бўлиб шунда қолди де.*

Авазхон тилидан айтилган бу сўзлар вазият драматизмини кескинлаштириб юборди. Буни пайқаган Аваз аста-секинлик билан Гўрўғли кўнглига, онгига чўккан хавотирни бироз пасайтириш учун янги эпик формула воситасида ўз мурожаатини давом эттиради:

*Ота, эшит менинг айтган ноламни,
Тўкарман кўзимдан қонли жоламни.*

Мазкур формула Авазнинг ўз отасига айтган юқоридаги сўзлари фақат эҳтимолдан йироқ бўлмаган нарсалар эканлигини англатишга хизмат қилади. Нима бўлганда ҳам бу формула янги эпик ахборотни тингловчига етказишнинг эпик парадигмаси вазифасини ўтайди. Шу боис формуладан кейин куйидаги «хабар»лар баён этилади:

*Ўн олти ойда Торкистондан келмасам,
Чамбил белда тўйрай беринг ошимни.*

Авазхон ўзининг қайтар муҳлати аниқлигини, аммо хавфхатарга тўлалиги, бинобарин, сафардан қайтмаслиги ҳам мумкинлигини билдиргач, ўз монологи ниҳоясида Гўрўғли ва бошқа йиғилганларни хотиржам қилиш мақсадида, албатта, қайтажаклигига тўхталади. Бу нарса тингловчи қалбига ҳам бироз хотиржамлик бағишлайди. Мақсад ва ниятини аниқ билдириш учун сўз очар экан, унинг нутқига янги барқарор формула киритилади:

*Ҳар нима матлаб бўлса, Ҳақдан тилагин,
Ўн олти ойда (қайтишни) Ҳақдан тилагин,*

*Ўн олти ойда келар менинг муҳлатим,
Ўн олти ойда йўл-йўлима қарагин.*

Асосан, бир мисрадан иборат тузилишга эга бўлган бу барқарор эпик формула қаҳрамоннинг қайтиш-қайтмаслиги ўз ихтиёри билан юз бермаслиги, балки Яратган томонидан белгиланганини билдиришга хизмат қилади. Инсон қисматининг Ҳақ томонидан белгиланганини эшитган кузатувчилар, дoston тинглаб ўтирган аудитория ҳам тақдирга тан бериб тинглайдилар. Мана шундан сўнг Авазхон қайтиш муҳлатини яна аниқ қилиб ўн олти ой деб таъкидлайди.

Юқоридаги йигирма мисралик шеърый монологнинг тенг ярми барқарор эпик формуладан иборатлиги бахшининг маҳорати юксаклигидан далолат берадими ёки пастлигини англатадими? Бизнингча, барқарор эпик формулаларнинг бундай кўшлиги ва уларнинг ўз ўрнида қўлланилиши Фозил Йўлдош ўғли ижро маҳоратинигина эмас, балки унинг эпик билимни пухта эгаллаганлигидан, эпик хотирасининг мустаҳкамлигидан далолат бериш билан бирга халқ эпоси услубини тўла, бенуксон намоиш этганлигидан далолат беради. Бундан ташқари, қўлланилган барча эпик формулалар ана шу нутқий парчага кучли ҳиссий қувват бағишлаган, улар ўзларининг рамзий ва мажозий мазмунлари билан монологга поэтик сирлилиқ ва жозиба ҳам касб этган.

Энди барқарор эпик формулаларнинг бадий қудрати ҳақида икки оғиз сўз. Бадийликнинг асосини, моҳиятини образлиқ ташкил этар экан, ҳар бир эпик формула бағрида яширинган образлар, уларнинг формулага бахш этган мазмун ва моҳиятини топиш лозим.

Ҳар бир эпик формула, агар икки мисрадан иборат бўлса, улардаги яширинган образлар доим тўрттадан иборат бўлади. Мана шу образлар ҳолати, кечинмаси, хатти-ҳаракати ва ҳоказо вазифалари бирикиб формуланинг мазмун ва моҳиятини, унинг эпик баёнда қўлланиш ўринларини белгилаб беради. Биргина мисол:

*Очилганда қизил гунча сўлмасин,
Дунёда мард киши ҳеч бир ўлмасин.*

Биринчи мисрада «қизил гул» (очилган қизил гул) ва паймона (сўлиш) образлари, иккинчи мисрада эса яна шу рамзий образларнинг аниқ номлари «мард киши» – очилган қизил ғунча, сўлиган ғунча – ўлим, кенг маънода «паймона» таъкидланган. Ана шу тўрт образнинг ўзаро рамзий боғлиқлиги, образлар қисматининг ўта ҳазин бўлмаслигининг тиланиши эпик шеърга ҳам эмотив, ҳам эвфоник, ҳам семантик моҳият бағишлайди. Эпос ижроси пайтида бахши ўз эпик хотираси воситасида сюжет воқеаларини бошқарар экан, ўзининг эпик билим хазинасидаги эпик формулалар мазмуни, моҳиятига асосланган ҳолда тасвирланаётган вазият ҳамда ҳолатлар эҳтиёжидан, талабидан келиб чиққан ҳолда тайёр эпик формулаларга мурожаат этади. Маълум бўладики, барқарор эпик формулалар ўзларининг семантикаси, оҳанги, ритмикаси ва метрикаси, қофия хусусиятлари билан ижодкор учун ижро жараёнида уммон тўлқинлари бағрида сузиб кетаётган кемага машғала бўлиб йўналиш кўрсатади; уларга илҳом беради. Тингловчилар онгини чулгаб, уларни асар воқеаларига бўлган қизиқишларини жонлантиради.

Хулоса қилиб айтганда, барқарор эпик формулаларнинг поэтик табиати, уларнинг универсаллик хусусиятлари ва семантик, метрик ва эвфоник табиати, образлар дунёси алоҳида тадқиқ этишга арзигулик илмий мавзулардан бири бўлиб, келгусида бу масалалар ҳақида батафсил тўхталиш ниятимиз йўқ эмас.¹

¹ Ушбу мақола «Ўзбек тили ва адабиёти» журналининг 1999 йилги 6-сониде (37–42-бетлар) босилган.

Жаббор
ЭШОНҚУЛ
(1967 йилда туғилган)



Жаббор Эшонқулов 1967 йил 5 майда Қашқадарё вилояти Қамашчи тумани Терсота қишлоғида туғилган. Тошкент давлат университетининг журналистика факультетини имтиёзли диплом билан тамомлаган (1991). Ўзбекистон Республикаси Фанлар академияси Алишер Навоий номидаги Тил ва адабиёт институти аспирантурасида (1991–94), докторантурасида (2000–03) таҳсил олган. 2009 йилдан ҳозирга қадар шу институтнинг Фольклор бўлимида катта илмий ходим, етакчи илмий ходим лавозимларида ишлаб келади. «Ўзбек фольклорида дев образи» мавзусида номзодлик (1996), «Ўзбек фольклорида туш ва унинг бадиий талқини» мавзусида докторлик (2010) диссертациясини ҳимоя қилган. «Фольклор: образ ва талқин» (1999), «Алпомиш» достонининг изоҳли лугати» (2006), «Этик тафаккур тадрижи» (2006), «Ўзбек фольклори библиографияси» (2008), «Наврўз нашидаси» (2009, ҳамк.), «Ўзбек фольклорида туш ва унинг бадиий талқини» (2011), «Алпомиш. Ўзбек халқ достони. Пулкан шоир варианты» (2012, ҳамк.), «Эртақлар китоби: ўзбек халқ эртақлари. Уч жилдлик» (2012, ҳамк.), «Наврўз кўшиқлари» (2013, ҳамк.), «Одамтой: ўзбек халқ эртақлари» (2014) каби китоблар муаллифи. Ўзбекистон халқ бахшиси Абдуназар Поёновдан «Алпомиш», «Рустамхон», «Олтин қобоқ» каби ўнга яқин достонларни ёзиб олган.

ЭПОС ВА МАРОСИМ

Эпос ва маросим ҳақида сўз кетганда, мутахассислар уларни бир-бирига боғлаб турувчи энг муҳим жиҳатни эпоснинг халқ ижодининг специфик намунаси сифатида маросим ва маросим фольклори билан бевосита алоқадорлигида кўришади.¹

Шуни айтиб ўтиш керакки, эпоснинг, айниқса, қаҳрамонлик дostonларининг бевосита маросим билан боғлиқ жиҳатлари ҳали етарли даражада ўрганилган эмас. Архаик эпосда, жумладан, мазкур мақоламизнинг таҳлил объекти бўлган «Алпомиш» дostonида ҳам маросимларнинг муҳим ўрин тутиши ва устувор қонуният кашф этиши кузатилади. Бироқ қаҳрамонлик эпоси биргина маросимлардан келиб чиқади ёки тугилади, деб хулосалаш масалани ўта жўн ҳал этиш бўлади. Маросим эпик формаларнинг трансформацияси орқали юзага чиқади. Ушбу архаик эпик форманинг бевосита маросим билан алоқадорлик томонларини тадқиқ этиш эпоснинг туб асосларини ёритишда ўта муҳимдир. Бу ўринда икки жиҳатга алоҳида тўхталиб ўтиш зарур:

Биринчидан, эпоснинг маросимлардаги ўрни ва функцияси. Бугунги кунда Ўзбекистоннинг жанубий вилоятларида давом этаётган қадимий анъана – тўйу томоша ва бошқа маросимларнинг бахшилар иштирокида ўтказилиши.

Иккинчидан, маросимларнинг эпосда акс этиши, яъни маросимларнинг эпос сюжетида тутган ўрни. «Алпомиш» дostonини таъбир жоиз бўлса, халқимизнинг кўҳна маросимлар, урф-одатлар, ирим-сирим, табуларнинг қомуси, деб аташ мумкин. Чунки ҳеч бир эпосда халқимизнинг маиший ҳаёти бунчалик кенг кўламда ўзининг бадий ифодасини топмаган. Фарзанднинг туғилишидан олдин овга чиқмоқ, суюнчи олмоқ, фарзанднинг туғилиши, фарзандга исм қўймоқ, этагига солмоқ, бешик тўй, тўй маслаҳати, жарчи қўймоқ, чуфуррон тўй, тўёна бермоқ, аташтириб бешиккертти қилмоқ, иккинчи исм қўймоқ, аташтириб рўмол ўрамоқ, қаллиққа бормоқ, совчи қўймоқ, шартлашиш (кураш, кўп-қари, пойга) куёв навқар, тўққизтовоқ, куёвтовоқ, ўтни айланмоқ,

¹ Путилов Б., Эпос и обряд // Фольклор и этнография. – Л.: Наука. 1974. – стр 76.

қиз яширди, вакил ота, вакилини бермоқ, чимилдик тутмоқ, ит ириллар, ойна кўрсатар, соч сийпатар, қўл ушлатар, куёвулоқ, юз очди, бақан ташламоқ, солим бермоқ, ўлан айтмоқ каби турли хил одат ва маросимларнинг «Алпомиш» эпосидан жой олиши муҳим аҳамиятга эга ва у махсус тадқиқотни талаб этади.

Эпос ва маросимни ўрганишда, биринчи навбатда, қиёсий типологик методнинг устуворлигини инкор этмаган ҳолда, структурал, лингвопоэтик ва руҳий таҳлил каби кўплаб методларга ҳам суяниш лозим бўлади. Қиёсий-типологик таҳлилда биринчидан, маросимларни ўзаро қиёсий ўрганиш мумкин бўлса, иккинчи томондан уни эпос ва эпосдаги мотивлар билан муқоясалаш имконияти туғилади. Лингвопоэтик ва руҳий таҳлил методлари эпос ва маросим семантикасини чуқурроқ ёритиб беришда асосий омил бўлади. Структурал метод эса эпос ва маросим тизимини ўрганишда муҳим аҳамият касб этади. Чунки архаик эпос билан маросим структураси ўзаро уйғун келишини кўрамыз.

Шомоннинг шажараси, унинг танланиши, ҳомий руҳлар кўмагида бўлиши, ўзга дунёга сафар, ёвуз руҳлар билан жанги, ўзга қиёфага эга бўлиши бу шомонлик маросимига хос хусусиятдир. Архаик, жумладан, «Алпомиш» эпосида ҳам шажарага алоҳида урғу берилиши, Ҳақимбекнинг туғилиши ва доимо пирлар кўмагида бўлиши, қаҳрамонликлар намойиш этиши, сафарга отланиши, ёвузликка (ёвуз руҳларга) қарши кураши, етти йиллик зиндон, яъни рамзий ўликлик ҳолатидан сўнг қайта тирилиб чиқиб, Култой қиёфасига кириши структурал жиҳатдан шомонлик маросими билан айнан бир хил эканлигини кўрамыз. Қолаверса, эпоснинг генетик хусусияти унинг жанр структураси ўрганиш орқали очилади.

Маросимнинг эпосда акс этиши ҳақида сўз кетар экан, унинг, асосан, икки: а) маиший турмушда ўз ижро ўрнига эга бўлиб, эпосда ҳам бадий акс этган (фарзанднинг туғилиши, исм қўйиш, бешиккерт қилмоқ, аташтириб рўмол ўрамоқ, совчи қўймоқ, қаллиқ ўйнамоқ ва ҳоказо; б) маиший турмушда ижро ўрни унутилиб, бадий ҳолатга кўчган (фарзанд туғилишидан олдин овга чиқиш, куёвга келин томонидан шартлар қўйилиши ва ҳ.к.) жиҳатларини тадқиқ этиш лозим бўлади.

«Алпомиш» достонида фарзанднинг туғилиши илоҳий хусусият кашф этади. Илоҳий туғилиш эса фольклорда етакчи мотивлардан бири бўлиб, у бир неча босқичлардан иборат. Биринчиси, ота-онанинг фарзандсизлик ҳолати. Бу бир томондан она уруғчилик билан боғлиқ тасаввурларнинг маросим ва дostonларимиз қатламида сақланиб қолганлигидан далолат берса, иккинчи томондан, дostonда рамзий маъно кашф этиб, пароканда элни бирлаштирадиган, ҳокимиятни мустаҳкамлайдиган янги авлод, янги алпнинг туғилишини англатади.

Қахрамоига исм берилиши билан боғлиқ ўринлар қисқа сатрларда айтилиб кетган бўлса-да, у дoston сюжетига муҳим аҳамиятга эга. Дoston қахрамони Ҳақимбек етти ёшга тўлганда Алпинбий бобосидан қолган ўн тўрт ботмон парли ёйни отгани учун «Алпомиш» деб аталади: «Шунда барча халойиқлар йиғилиб келиб айтди: ...бу Алпомиш алп бўлсин. Тўқсон алпнинг бири бўлиб санага ўтди».¹

Қадим маросимларда, хусусан, шомонликда маросимдан сўнг қахрамонга иккинчи исм берилган. Бу биринчидан шомоннинг эранлар томонидан танланганлигини ва руҳий камолатга етганлигини билдирса, иккинчи томондан унинг бошқа қиёфага кирганлигини, магик қудратга эга бўлганлигини ҳам кўрсатган. Бугунги кунда ҳам республикамизнинг жанубий вилоятларида баъзан оилада ўғил фарзанд туғилса, уни «орқалик» экан деб, ҳамда инсу жинс, ҳар хил ёмон руҳлардан асраш мақсадида болага дастлаб ёлгон исм берилади. Агар шундай қилинмаса, у хасталикка чалиниши мумкин деган қараш мавжуд. Маълум бир муддатдан сўнг кичик бир маросим ўтказилиб, болага ҳақиқий исм қўйилган.

Эпосда маросим ҳеч қачон батафсил тасвирланмайди, балки унинг муҳим нуқталари ўз аксини топган бўлади. Энг эътиборли жиҳати, маросим эпос тизимида сюжетни юзага келтириб, эпик характер касб этади. «Алпомиш» достонидаги Ҳақимбекка иккинчи исм берилиши билан боғлиқ ҳалқа олиб ташланса, дoston мазмунига жиддий путур этади. Демак, маросим маълум маъно-

¹ Алпомиш. Айтувчи Фозил Йўлдош ўғли. Нашрга тайёрловчилар: Ҳоди Зарифов ва Тўра Мирзаев. – Тошкент, Шарқ, 1998. – 18-бет.

да эпос сюжет халқасининг юзага келишига замин бўлиши билан бирга бевосита эстетик функция бажаради.

Достонда Сурхайл кампир Барчиннинг онасига қарата шундай дейди:

*Қозонда қайнаган ширбоз гўштмиди,
Шул қизингнинг агар боши бўшмиди.
Боши бўшми дейин, сендан сўрайман,
Келин қилиб бирор рўмол ўрайин.¹*

«Бошнинг бўшлиги» ҳали қизнинг бировга аталмаганлиги, ҳеч ким билан аҳду паймон қилмаганлиги ва ота-онасининг рози-ризолиги олинмаганлигини англатади. Барчин эса туғилгандаёқ «бешиккертти» қилинган эди. «Ана шунда Шоҳимардон пири Ҳақимбекка Ойбарчинни аташтириб, бешиккертти қилиб: бу иккови эр-хотин бўлсин, Ҳақимбек билан ҳеч ким баробар бўлмасин, омин Аллоху Акбар, – деб фотиҳани бетига тортди».²

Бешиккертти қилиш одати ва у билан боғлиқ маросимлар бугунги кунгача ҳам халқимиз ҳаётида сақланиб қолган. Бешиккерттида, албатта, бўлғуси келиннинг бошига рўмол ўралиб, бирор бир тилла тақинчоқ тақилган.

Бош кийим эса ҳамиша муқаддас саналган. О. Сухарева Ўрта Осиё халқлари бош кийимга алоҳида эътибор беришларини, ёшига қараб бош кийимлари ҳам ўзгариб борганлиги ва ҳар бир маросимда бош кийим муҳим аҳамият касб этганлигини таъкидлайди.

Қадимда эса бош ва бош кийим кўк билан боғланган. Шунинг учун бойбичанинг Сурхайл кампирга берган кескин жавобида ҳам, бир томондан, қизининг ёшлигида Ҳақимбек билан «бешиккертти» қилинганлиги таъкидланаётган бўлса, иккинчи томондан, улар икки дунё, икки олам вакили эканлигига ҳам ишорадир.

Барчиннинг элдан ажратилиб, баланд бир тепаликка ўтов тикиши достонда шундай тасвирланади: «Ўн минг уйли қўнғиротдан чиқариб, Барчиннинг ўтовини кўтариб, ху, анадай овлоқ тепанинг бошига тикиб қўйди. Бул ўтовда қирқин ка-

¹ Алпомиш. – 45-бет.

² Алпомиш. – 17-бет.

низлари билан Барчин ўтирди».¹ Бу ерда диққатимизни тортадиган икки жиҳатга тўхталиб ўтиш зарур. Биринчиси, Барчин ўтовнинг тепаликка тикилиши. Тепалик, тоғ бу қадимда маросимлар ўтказиладиган муқаддас жой ҳисобланган. Иккинчиси, ўтовнинг оқ ва бахмал эканлиги. Оқ ва қизил (бахмал) ранг, биринчи навбатда, икки олам (эркак ва аёл бирлигининг макони) ҳақидаги қадим тушунчаларни ўзида ифода этган. Шунинг учун ҳам бу икки ранг эпосда ҳам, маросимларда ҳам аниқ рамзий маънога эга.

Ўзбекистоннинг жанубий вилоятларида узатилаётган қиз тўй куни бирор бир қариндоши ёхуд қўшниларидан бириникида, яъни ўз уйидан узоқроқда бўлади. Қизнинг дугоналари узатилаётган қизни яширишиб, «қиз яширди» маросимини ўтказди. Куёв томондан танланган вакил бўлғиси келинни топиб олиши керак. Ана шу «қиз яширди» маросимидан сўнггина, бўлғуси келиндан вакиллар рози-ризолик олишади. Достонда ҳам айни маросим ўз аксини топган: «қадимги расми шундай бўлади, Барчинойни қиз опқочди қилади. ...Бир ерда буларни топиб олади».² Ана шу каби маросимлардан яхши хабардор бўлмасак, Барчиннинг ўтов тикиб, ўз элидан ажралиб чиқишини жуда жўн талқини қилишимиз табиий албатта. Аслида эса, «Алпомиш» каби классик эпосда, бирор бир детал ноўрин келмайди ва уларнинг ҳар бири ўзининг чуқур маъносига эга.

Барчиннинг алоҳида ўтов тикиб, ўз элидан ажралиб чиқиши, бу бир томондан қизнинг балоғатга етганидан далолат берса, иккинчи томондан унинг ихота қилинишини англатади.

«Қиз яшириш», яъни турмушга чиқаётган қизнинг жамоадан ажратилиши, унинг ихота қилиниши, яъни ҳар хил нохушликлардан, ёмон кўзлардан сақлаш учун қилинган амалий ҳаракат бўлиб, Барчиннинг тепаликка, ўтов тикиши эса ана шу қадим маросимнинг достондаги бадиий ифодасидир.

Сочнинг маросим ва фольклордаги ўрни, функцияси ва поэтик кўлами шу даражада улканки, буни биргина мақола ёки тадқиқот

¹ Алпомиш. – 64-бет.

² Алпомиш. – 166-бет.

доирасида ҳал этиш анчайин мушкул масала. Маросимда магик ҳаракатлар ритуал аҳамият касб этса, эпосда у бадиий кўринишга эга. Буни «Алпомиш» дostonидаги «соч сийпатар» ва шунга каби маросимларда кўришимиз мумкин.

Соч, ёл бу руҳга тегишли, бировнинг сочи ёхуд ёлига эгалик қилиш, унинг руҳга эгалик қилиш, уни ўзига тобе этиш билан баробар ҳисобланган. Фрээрер соч қадим маросимларда энг юксак мавқеда бўлганлигини, ибтидоий инсон сочни тараш, олдириш, куйдириш орқали табиат ва руҳга таъсир қилиш мумкин деб ҳисоблаганлигини таъкидлайди.¹

Фольклоршунос олим Аскар Мусакулов жаҳондаги кўпгина халқларнинг туғилиш, никоҳ, ўлим маросимлари билан бир қаторда соч олиниши ҳам инсон ҳаётидаги энг муҳим бўлиб, у осмон ғояси билан боғлиқ бўлганлигини ёзади.²

Соч сийпатар, умуман, сочининг ўрилиши бу қиз боланинг балоғатга етганлигини англатувчи унсурлардан бири бўлиб, у қадимий соч магияси билан боғлиқ маросимнинг трансформацияга учраган бир кўринишидир. Соч магияси, биринчи навбатда, ҳосилдорлик култига бўлган эътиқоддан келиб чиққан. «Алпомиш» дostonидаги «соч сийпатар» маросимида ҳам ана шундай қадим тасаввурлар ўз ифодасини топган.

Арқон, таёқ, ойна маросимларда энг кўп ишлатиладиган предметлардир. Уларни бирлаштириб турувчи жиҳат эса, бу учала жисм қадим тасаввурларга кўра икки дунё ўртасидаги чегара, белгини ифодалашидир. Шунинг учун куёв-келин йўлига ташланадиган арқон, таёқ (бақан) бу уларни бир дунёдан иккинчи бир дунёга қадам кўйганлигини англатган. Шунинг учун ҳам ҳомиладор аёл таёқ ёки арқондан ҳатламайди, оқар сувда чўмилмайди, тунда кўзгуга қарамайди, сочини кесмайди деган одатлар бугунги кунгача сақланиб қолган.

Ойна, аслида, сувнинг атрибути ҳисобланади, сув табиий хусусияти билан кўзгуга тенглаштирилган. Сув эса икки дунё ўртасидаги чегара. Шунинг учун ҳам сувнинг барча дин ва турли хил маросимлардаги ўрни жуда баланд.

¹ Фрээрер Дж., Фольклор в Ветхом завете. – М., 1989. стр. 263–265.

² Мусакулов А., Ўзбек халқ лирикаси. – Тошкент, Фан, 1995. – 97-бет.

«Кампир ўлди» маросими никоҳ тўйининг бир қисми ҳисобланади. Бу маросим баъзи жойларда келиннинг уйида, айрим худудларда келин куёвниқига олиб келингандан кейин амалга оширилган.

«Алпомиш» достонида у келин, яъни Барчиннинг уйида амалга оширилади: «Бахмал ўтовда чимилдиқ тутиб, куёв навкарлари билан билан куёвни киргизмоқчи бўлиб, бир неча хотинлар «кампир ўлди» бўлиб, ўлганига бир нима олиб, «ит ириллар» деган расмини қилиб, бунга ҳам бир нарса бериб, ҳар замон салом солиб, уйдан ичкари кириб, чимилдиққа ўтириб, олдига дастурхон солиб, қўйларнинг тўшини пишириб олиб келиб, буларнинг олдига қўйиб, хўп еб тўйиб, куёв навкарларга тўппи, рўмол, сармой бериб, ҳаммаси ўз расми-қаъдасини қилиб, куёв навкарлар чиқиб кетди, булар ҳам мазгилиги-жой-жойига қараб кетди».¹

Н. П. Лобачева бу маросим ўтган асрнинг ўрталарида Ўрта Осиёда яшовчи туркий халқларнинг барчасида учрашини таъкидлайди.² Бу маросим бугунги кунда сақланиб қолган. Сурхондарё, Қашқадарё вилоятларида худди дostonда айнан келтирилгани каби келин томонда амалга оширилади. Чимилдиқ тутилган уйга кирмоқчи бўлаётган куёв навкарларининг йўли тўсилиб, остонада турган бир кампир ит бўлиб «ириллайди». Одатда, ит бўлиб ириллайдиган кампир кайвони, ували-жували ва обрў-эътиборли, энг муҳими, келин томоннинг энг яқинларидан бири бўлиши керак.

Кампирнинг «улуши» берилгач, куёв ичкарига киритилади. Шундан сўнг «кампир ўлди» маросими бошланади. Унда яна ували-жували бир кампир келин-куёвга солинган ўринга ёш болани қучоқлаб ётиб олади. Атрофда турганлар «кампир ўлиб қолди», «кампир ўлиб қолди» дейишади. Сўнг кампир туш кўрганини айтади:

¹ Алпомиш. – 166–167-бет.

² Лобачева Н. П. Различные обрядовые комплексы в свадебном церемониале народов Средней Азии и Казахстана // Домусулманская верования и обряды в Средней Азии. – М.: Наука. 1975. – стр. 302–320.

*Туш кўрибман,
икки ёшни хуш кўрибман,
Олтин бешик бу ёнда
Олтин бешик у ёнда.
тоқ, эмас, жуфт кўрибман.
қўчқордай ул бир жонда,
Басолқи қиз бир жонда,
Кўркам савлатли,
Молу давлатли,
Фарзандли, неварали, чеварали кўрибман.*

Баъзи ўринларда «ўлган» кампирнинг тушини иккинчи бир кампир таъбири қилиб, тушдаги рамзларнинг нима маъно ифодалашини айтиб туради.

Бу ўринда, энг аввало, тушга тўхталиб ўтиш зарур бўлади. Чунки туш кўпчилик маросимларда, умуман инсон ҳаётининг барча нукталарида алоҳида аҳамият касб этган. Ибтидоий инсон ўзининг ўтмиши, бугуни ва келажагини ҳам тушсиз тасаввур эта олмаган. Бирор бир инсоннинг дунёга келиши, камол топиши, бахтли бўлиши ёки фалокатларга йўлиқиши тушларда аён бўлган.

Никоҳ эса ҳамма вақт ўлим ва туғилиш орасидаги муҳим бир восита, ҳаёт–ўлим–ҳаёт давомийлик циклининг бошланиши ҳисобланган.

Ўлиб тирилувчи маъбудлар ҳақидаги қадим тасаввурларга кўра, кекса қиш ер юзини тарк этгандан сўнг, у янги – баҳор қиёфасида дунёга келади. Ўлим йўқ экан, туғилиш ҳам бўлмайди; қиш ўлмаса, баҳор туғилмайди. Аслида, ўлим ва туғилиш бир ҳолатнинг икки кўриниши ҳалос.

Достондаги «кампир ўлди» маросимида ҳам худди ана шу нарса, яъни бир фасл (цикл) ўрнини, иккинчи бир фасл олганлиги, «кампир» ўлиб, янги оила дунёга келаётганлиги, мангу давомийлик циклининг рамзий ифодасидир.

Табиат фаслини кекса кампир қиёфасида тасаввур қилиш «Чой момо», «Суст хотин» маросимларида ўзининг янада ёрқинроқ ифодасини топган.¹

¹ Саримсоков Б., Ўзбек маросим фольклори. – Тошкент, 1986. –

Маълумки, ўлиб тирилувчи маъбудлар ҳақидаги кўплаб мифлар мавжуд. Бундай мифларга хос бўлган энг муҳим хусусият уларнинг табиат ва ҳосилдорлик культуни ўзида мужассам этгани ва уларнинг кўпчилиги, албатта, аёл қиёфасида бўлганидир. Ҳар фасл алмашганда эса уларга қурбонликлар қилиниб, махсус маросимлар ўтказилган. Қадим Мисрда Осириснинг ўлиб-тирилиши баҳор маросимларида томоша қилиб кўрсатилган.

Германияда янги никоҳ қурган келинчакларга ўлимни ифодаловчи сомондан қилинган кўгирчок кўрсатилган. Қари кампир кўринишидаги «Ўлим» келинчакнинг кўп фарзандли бўлишига ёрдам беради, деган тасаввур бўлган.

Кўпгина тадқиқотчилар ўлимнинг ҳосилдорлик ва серфарзандлик бўлишида кўрсатадиган таъсири ҳақида тасаввурлар никоҳ маросимларида жуда барқарор эканлигини таъкидлашади.

Шунинг учун ҳам оила ва мавсум маросимларини бир-бири билан узвий боғлиқ равишда ўрганилиши зарур. Зеро, оила маросимларининг барча қирралари мавсумий маросимларини ўрганиш орқали очилади.

Эпос ва маросим бир-бири билан чамбарчас боғлиқ жараён. Маросимларнинг тарихий илдизларини ёритишда эпосга мурожат этиш табиий. Эпосдаги мотивларни эса маросимлар билан қиёсий ўрганганимиздагина уларнинг мазмун-моҳияти янада тўлароқ очирилиши мумкин.

Дармон
ЎРАЕВА

(1967 йилда туғилган)



Дармон Саидахмедовна Ўраева 1967 йилда Туркменистон Республикаси Чоржўй шаҳрида туғилган. Бухоро давлат педагогика институтида (1984–88). Бухоро вилоятининг Олот шаҳридаги 1-ўрта мактабда ишлаган (1988–92). Бухоро давлат университети аспирантурасида ўқиган (1989–92). Бухоро давлат университети Ўзбек адабиёти кафедрасида ўқитувчи, катта ўқитувчи, доцент, профессор вазифаларида ишлаб келмоқда (1992 йилдан). «Ўзбек халқ лирик қўшиқларида параллелизмларнинг характери ва бадиий-композицион вазифалари» мавзуида номзодлик (1993), «Ўзбек мотам маросими фольклорининг жанрий таркиби, генезиси ва бадиияти» мавзуида докторлик (2005) диссертациясини ҳимоя қилган. Унинг «Ўзбек мотам маросими фольклори» (2004), «Ўзбекистон халқлари этнографияси ва фольклори» (2007, ҳамк.), «Ўзбек халқ озаки бадиий ижоди хрестоматияси» (2008, ҳамк.), «Охунжон Сафаров» (2010), «Бухор элда гул сайли» (2010, ҳамк.), «Авазхон» достонини коллежларда ўрганиш» (2011), «Рустамхон» достони бадиияти» (2011), «Ўзбек халқ қўшиқларида радиф» (2015), «Мақолларни синквейн усулида ўргатиш» (2015), «Жаҳон адабиёти атамаларининг изоҳли лугати» (2015) ва «Семург қўнар давлатманднинг бошига (фольклоршунос Маматқул Жўраев ижодий портретига чизгилар» (2017) каби монография, дарслик, ўқув қўлланмаси ва рисоалари чоп этилган.

МОТАМ АЛЛАЛАРИНИНГ ЎЗИГА ХОС ХУСУСИЯТЛАРИ

Мотам аллалари энг қадимги даврлардан анъана сифатида келаётган қадриятлар, урф-одатлар ва миллатимиз руҳиятига хос туйғуларни ўзига мужассамлантирганлиги билан диққатни тортади. Улар ўзбек мотам маросими фольклорининг мустақил, анъанавий жанрларидан бири бўлиб, ижтимоий ҳаётнинг муайян соҳаси билан изчил боғланган. Мотам аллалари чақалок ёки катталар ўлими юз беришига дахлдор табиий вазиятда ҳиссий-руҳий эҳтиёж муносабати билан ижро этилади. Уларнинг аниқ ижро ўрни, пайти, табиий ҳолати ва вазияти, махсус ижрочилари мавжуд. Мотам аллалари, аслида, болаларни ухлатиш ва тарбиялаш учун куйланадиган айтимлар билан генетик алоқадордир. Улар функционал алмашиниш ҳодисаси маҳсули сифатида вужудга келган.

Мотам аллалари мазмунан ғоятда дарднок, оҳанг жиҳатдан ўта мунгли бўлади. Улар одатдаги аллаларга нисбатан секин суръатда, оддий овоз солиш асосида гамгин руҳда куйланади. Йиғилар мотам маросимида унинг иштирокчилари руҳиятига таъсир кўрсатиб, уларни йиғлашга мажбур этса, мотам аллалари эса, аксинча, азадорларни тинчлантиришга, марҳумнинг абадий уйқусини бузмасликка ундайди.

Мотам аллаларининг матнлари анъанавий шаклга эга бўлиб, бадий жиҳатдан пишиқлиги, кучли ҳиссий таъсирчанлиги, поэтик сайқал топганлиги билан ажралиб туради. Уларнинг ҳар сатри ёки сатрлариаро «алла» сўзининг радиф сифатида ёхуд ҳар бир мисрадан кейин ёинки иккилик ёки тўртлик шаклидаги мустақил бандлардан сўнг «Олло, раббим, бир обло, ҳуя», «алла, во-алам-о, алла-ҳуя», «алла, ҳо, алла, алла-ё, бир обло» каби мураккаб такрорларнинг рефрен бўлиб келиши мотам аллаларига хос энг муҳим жанрий белгидир. Улар мотам аллалари таркибидаги мисра ва бандларни яхлитлаштириш учун ҳизмат қилади. Ўлим аллалари марҳумга абадий уйқу тилаш мақсадида куйланиши боис уларда «ухла» буйруқ феълига ҳам кўп дуч келинади.

Мотам аллаларининг келиб чиқишига қадимда ўлимни «уйқу» деб тушуниш етарли таъсир кўрсатган. Қадимий анимистик тасаввурларга кўра, ибтидоий одамлар ўлимни «уйғонмас уйқу» деб тушунганлар. Улар ўлган кишини ухлади, деб англаганлар. Бу тушунчаларнинг излари ҳозиргача сақланган бўлиб, эл орасида: «Ухлаганларни безовта қилманг, у ўлик билан баробар», – деган тушунчалар мавжуд. «Мангу уйқуга кетди», деган ибора ҳам шундан келиб чиққан. Халқ орасида киши ухлаганида, сув ичаётганида уни илон ҳам чакмайди, деган гаплар борлигини кексалар кўп эслатади. Хуллас, қадимда ўлим ҳодисаси мангу, абадий уйқуга кетиш қабилида изоҳланган. Ўлимни уйқу билан тенглаштириш эса уйқу учун ҳам, ўлим учун ҳам алла айтиш ҳолатининг юз беришига маълум даражада асос бўлган. Шунинг учун болани уйғоқлик олампдан уйқу олампга, марҳумни эса тириклар олампга кўчириш жараёнида, албатта, алла куйлаш одати шаклланган. Аллага нисбатан ором бағишловчи, хотиржамлик ҳада этувчи, янгича ҳаёт тарзи ато қилувчи магик восита сифатида қаралган. Унинг келиб чиқишида сўз сеҳрига ишончнинг ҳам ўзига хос таъсири бор.

Мотам аллаларига ислом динининг ўлимга йиғламасликни талаб қилувчи қоидалари ҳам таъсир кўрсатгани, шубҳасиз. Шу боисдан, мотам аллалари куйлана бошланиши билан азадорлар йигини тўхтатиб, унга жимгина қулоқ солиб турадилар. Чунки мотам аллалари ўлимнинг барҳақлиги, ҳаммага баробарлиги ва ҳамманинг бошида борлиги ҳақидаги ҳақиқатни бадиий баён этади. Улар ёшу катта, шоҳу гадо – барчага қадимданок айтиб келинади. Ушбу ҳақиқат мотам аллалари матни орқали ҳам тасдиқланади:

*На шоҳ қолди, на гадо, алла,
Аллалаб қўтардилар, алла.
Олиб кўчадан ўтадилар, алла.*

Умуман, мотам аллалари ўзига хос тарихий тараққиётни босиб ўтганлиги сезилиб туради. Даставвал ритуал-магик мақсадда куйлана бошланган мотам аллалари бугунги кунга келиб ижтимоий-этик вазифа бажармоқда. Улар ритуал айтим

эканлиги билан характерланади ва мотам маросимининг асосий жанрларидан бирини ташкил этади. Мотам аллалари ўзига хос куйланиши тартибига, бошланма ва тугалланмага эга. Улар, одатда, худога ва пайғамбарларга ҳамду сано айтиш билан бошланади:

*Аввал бошлаб худони ёд этайлик, алла,
Пайғамбарлар руҳини шод этайлик, алла,
Пайғамбарлар руҳига биздан салом, алла,
Иzzату икром билан шод этайлик, алла.*

Шундан сўнг ўлим алласининг мазмун-моҳияти таърифланиб, номланиш тарихи хусусида тўхтанилади:

*Алла – алланинг оти,
Алла – худонинг ёди.
Кимлар қўйди шу отни,
Пайғамбарлар авлоди.
Минг ўлиб, минг тирилар,
Пайғамбарнинг зурриёди.*

Ушбу мисралардан сўнг ўлим алласининг кимга атаб куйланаётганлигига алоҳида урғу бериб ўтилади:

*Алла – Оллоҳнинг ёди,
Оллоҳ – худонинг оти.
Бугина айтган аллам,
Онажонимнинг ёди.
Бугина онажоним,
Пайғамбарнинг зурриёди,
Обло, бир обло.*

Мотам аллаларини марҳумни сўнгги йўлга кузатишдан олдин йиғи айна авжига минган лаҳзада азадорларни бир қадар тинчлантириш, марҳумнинг руҳини безовта қилмасликка ундаш мақсадида ҳамда маййитни тупроққа топшириб қайтилган окшом ўтказиладиган «хотин ётди» деб номланувчи маросимда куйлайдилар. «Хотин ётди» маросими марҳумга шу окшом гўрда

кечадиган махсус савол-жавобдан муваффақиятли ўтиб, жаннатга етишиши учун мадад кўрсатиш, унга жаннатдан жой бериш мақсадида аёллар томонидан ўтказилади. Чунки жаннат аёлларга тегишли деб қаралади. Шу боис мотам аллалари марҳум учун жаннатдан жой сўраш мазмунидаги мисралар билан якунланади:

*Ал-омон – омонин бер,
Жаннатдан маконин бер.
Ҳар мусулмон банданинг
Беҳишдан маконин бер,
Алла, алла, алла-ҳуя.*

Катталар ўлими юз берганда куйланадиган мотам аллалари ижро ўрни ва пайтидан ташқари, ижрочилари ва мавзу тузилишига кўра ҳам ўзаро фарқ қилади. Масалан, тантанали дафн маросими жараёнида мотам аллаларини профессионал ижрочи аёл – аллагўй айтган аллаларнинг марҳум тилидан куйлаётган қисмида марҳумнинг қоронғу гўрида, танҳоликда кечаётган аҳволдан шикоят, зорланиши баён этилса, кейинги қисмида куйловчининг унга тинчлик, хотиржамлик тилаши, бу кун ҳамманинг бошида борлигини уқтириши, жигарга жаннатдан жой сўраши ифода этилади.

Чақалоқлар учун мотам алласи қуруқ бешик тебратиб туриб айтилади. Шунинг учун халқ орасида бешикни боласиз, бўш ҳолда тебратиш ёмон ирим қилинади. Чақалоқ ўлимида ижро этилувчи мотам аллалари бола ёшига қараб иккига бўлинади ва улар мазмунига кўра фаркланиб туради: 1) ҳали алла эшитиш насиб этмаган, бешикка беламай туриб вафот этган чақалоқларга бағишлаб куйланадиган мотам аллалари; 2) бешик ёшида (40 кунликдан 3 ёшгача) бўлган ва бевақт вафот этган гўдақлар учун куйланадиган мотам аллалари.

Ёш болалар учун мотам аллалари, одатда, садр тушиб ижро этилади. Улар кўпинча боланинг дунёдан тўймай кетганлигини, бу ўтли армон ота-оналар қалбини куйдириши мотиви етакчилик қилади. Чақалоқ ўлими алласини боланинг ота ёки она бибиси куйлаши мумкин. Баъзи ҳолларда чақалоқнинг онаси ёки бошқа яқин кекса аёл қариндоши ҳам куйлаши кузатилади.

Мотам маросимининг вербал кисмини ташкил этувчи мотам аллалари бадихатан яратилади. Уларнинг яратилишида мотам аллаларининг профессионал ижрочилари бўлмиш аллагўйларнинг роли катта. Мотам аллаларини ҳар ким айта олмайди. Аллагўйлар кўпроқ ёши ўтиб қолган кексарок тажрибали аёллардан иборат бўлади. Аллагўйлар гўяндалик қилмайди. Гўяндалар мотам маросимида йиғи магиясига ишониб, «йиғи марҳумга қайта жон бахш этилади» деган эътиқод билан йиғи уйғотиш вазифасини бажарсалар, аллагўйлар, аксинча, йиғини тўхтатишга, Оллоҳ омонатини топшириб, руҳи тинчиган марҳумни безовта қилмасликка чорлайди. Мотам аллалари халқнинг шунчаки ўлим орага солган мангу жудолик изтиробларини ифодаловчи қўшиқ эмас, улар, асосан, инсоннинг инсонга меҳру оқибатини, сўнги мурувватини намойиш этувчи меҳр байтлари ҳамдир. Чунки улар орқали марҳумга абадий уйқусида ором, хотиржамлик тиланади.

Мотам аллаларида ўлимдан зорланиш, шикоят қилиш, тақдирга тан бериш, марҳумга ачиниш, унинг абадий уйқусида хотиржамлик тилаш мотивлари етакчилик қилади. Улар реал воқеликни шахснинг кечинмалари орқали акс эттиради. Мотам аллаларининг яна бир муҳим белгиси шуки, уларни исталган вақтда, тўғри келган жойда ижро этиб бўлмайди. Ўлим юз бермаган лаҳзада мотам алласини куйлаш қаттиқ ирим қилинади, тақиқланади.

Мотам аллаларида поэтик мазмун жуда содда ва лўнда баён этилади. Уларнинг бадиияти халқ шеъриятидаги бошқа жанрлар бадиияти каби юксакдир. Уларда турли бадий санъатларни, сўз кўчимларини, композицион-стилистик воситаларни учратиш мумкин. Мотам аллалари, одатда, бармоқ вазнида яратилади. Улар бадихатан яратилиши боис вазн тузилиши ҳар хил ўлчовли бўлади. Шунингдек, уларда изчил банд тузилишига риоя қилинмайди, кўпинча иккилик ва тўртлик банд тузилишда учрайди. Мотам аллаларининг қофияланиш тартибида ҳам ранг-баранг ҳолатлар кўзга ташланади. Улар жонли халқ тилида яратилади. Мотам аллалари таркибида куйланувчи аксар тўртликлар йиғи-йўқлов, лирик қўшиқ, болаларни ухлатиш

учун куйланадиган алла сифатида ҳам ижро этилиши кузатилади. Бундай функционал алмашишлар юз беришига матнларнинг мазмунан ва руҳан яқинлиги асос бўлади. Бошқа жанрдаги асослардан мотам аллалари мазмунан марҳумга абадий уйқу тилашга қаратилганлиги, таркибида алла радифининг мавжудлиги билан ажралиб туради.

Хуллас, мотам аллалари ўзига хос жанрий белгилари билан ўзбек халқ оғзаки ижодида мустақил ўрни тугади. Улар инсонни нафақат тириклигида, балки ўлганида ҳам қадрлаш лозим эканлигини уқтириб туради.¹

¹ Ушбу мақола қуйидаги манба асосида тайёрланди: Ўраева Д. Мотам аллаларини жанрий белгилари // Ўзбек тили ва адабиёти. – Тошкент, 2005. – 1-сон. – с. 51–59.

Олим
ҚАЮМОВ
(1968 йилда туғилган)



Олим Садриддинович Қаямов 1968 йил 4 февралда Навоий вилояти Хатирчи тумани Хонқа қишлоғида туғилган. Низомий номидаги Тошкент давлат педагогика институти Навоий филиали (ҳозирги Навоий давлат педагогика институти)нинг Ўзбек филологияси факультетида ўқиган (1985–92). Шу орада ҳарбий хизматни ўтаган (1986–88). Навоий давлат педагогика институтида ўқитувчи (1992–95). ЎЗР ФА Алишер Навоий номидаги Тил ва адабиёт институти аспирантурасида таҳсил олган (1995–98). Навоий давлат педагогика институтида ўқитувчи, доцент, кафедра мудири лавозимларида ишлаган (1998–2011). Ҳозир Навоий давлат педагогика институти проректори (2011 йилдан). «Ўзбек фольклорида пари образи (генезиси ва поэтикаси)» мавзуда номзодлик диссертациясини ҳимоя қилган (1999). «Ўзбек шомон айтимлари» (2007), «Ўзбек фольклорида тарбия масаласи» (2009), «Эртак ва тарбия» (2009) каби рисолалар муаллифи.

ПАРИ ОБРАЗИНИНГ ГЕНЕЗИСИГА ДОИР МУЛОҲАЗАЛАР

Пари билан алоқадор халқ қарашларига доир материаллар таҳлилидан маълум бўлдики, бу образ Марказий Осиё халқларининг энг қадимий мифологик тасаввурлари тизимиغا

алоқадордир. Маълумки, пари ҳақидаги энг кўҳна маълумотларни ўзида ифода этган ёзма ёдгорлик «Авесто» бўлиб, унинг барча қисмларида бу образ «пайрика» номи билан қайд қилинган. Пайрика мифологик персонаж номи бўлиб, генетик жиҳатдан пари образининг архаик кўринишларидан бири ҳисобланади. Аммо «пайрика» образининг талқини борасида илмий адабиётларда яқдиллик йўқ.

Масалан, В. Гертернинг фикрича, «Авесто»даги пайрика ғайритабиий ҳусну жамолга эга бўлган соҳибжамол аёл – гетерлар, ёвуз соҳира, яъни фея маъносида қўлланилган. Олимнинг мулоҳазалари «пайрика» атамасининг этимологиясини этник номлар асосида изоҳлашга қаратилган. Яъни эронийлардан аввал яшаган қабила зардўштийликка эмас, балки ибтидоий эътиқодлардан бошқа бирига топинган ва шу сабабли «Авесто»да бу этник ном асосида юзага келган мифологик образ ёвуз кучлар сирасига киритилгаи. Бу фикр, назаримизда, баҳсталабдир.

«Авесто» талқинича, «пайрика» ёвуз куч тимсолидир. Эрон авестошуноси Б. Саркаратининг маълумотларига суянган А. Е. Бертельс бу ҳақда шундай ёзади: «Авесто» матнларидан бирида пари ҳақидаги тасаввурлар беақллилик ва жиннилик билан боғлаб талқин қилинади. Барча матнларда бу образ фақат ёвуз мавжудот сифатида тасвирланган. «Авесто»да битилишича, «айрим вайсақиларгина париларнинг яхшилик қилишига ишонадилар». Бу эса пари култи ва унга сиғиниш анъанаси зардўштийлик ақидалари ҳукмрон диний эътиқод сифатида кенг тарқалган даврларда ҳам айрим жойларда сақланиб қолганлигидан далолат беради»¹.

«Авесто»даги «пайрика» ёвуз куч сифатида тасвирланганлигига сабаб, унинг Ангро Майнью томонидан яратилганлигидир. «Яшт»нинг VIII фаслида айтилишича, оқ от қиёфасида намоён бўлувчи Тиштриянинг вазифаларидан бири – кечаси само ёритгичларига ҳамла қиладиган аёлсифат ёвуз махлуқ – пайрикаларга қарши курашиш. Тиштриянинг мардонавор зарбасига дош беролмаган пайрика «бамисоли замин билан осмон оралиғида

¹ Бертельс А. Е. Пери // Культура и искусство народов Средней Азии в древности и средневековье. М., 1979. стр. 126.

учаётган юлдузлардек тўкиладилар». Пайрикаларга қарши курашувчи эзгу тангрилардан яна бири – Митрадир. У куёш ботгач, «зулмат қаъридан бош кўтармоқчи бўлган пайрикаларни махв этади» (Яшт, X. 26)¹.

Пайрикалар эзгулик кучларига, ёруғлик ва ҳаёт тимсолларининг душмани сифатида тасвирланган. Улар Ахриманнинг ёвуз ибтидолари жам бўлган зулмат оламига мансубдирлар. «Авесто» битикчилари бу ҳақда шундай ёзадилар: «Ахриман жанг қилаётганларга ёрдам берсин деб, қора ибтидодан яратилган жуда кўп париларни ҳам жойлаштирди. Улар осмону фалакда чарх уриб айланаётган сайёралар теварагида бемалол юриш, истаган томонга қайрила олиш ва ҳаракат қилиш ўнғай бўлсин учун само ёритгичлари кўринишига кирадилар. Шу тариқа сайёраларга эврилган парилар кичикроқ руҳларни ўз домига тортишар, бошқаларга гўё нур таратгандай бўлиб, аслида, касаллик, оғриқ ва ўлимга маҳкум этар экан»².

«Авесто»да тасвирланишича, пайрикалар турли жониворлар қиёфасига ҳам кира олар экан. Масалан, пайрикалардан бири ит сувратида бўлиб, ўрмонда яшармиш. Агар уни учратган киши қилич билан ҳамла қилиб, итни иккига бўлиб ташласа, унинг жасаидан яна иккита кучук пайдо бўларкан³. Умуман, «Авесто»да пайрикалар сохибжамол аёл ва жонзот (ит, каламуш каби) кўринишида бўлиши қайд қилинган.

Париларнинг ит кўринишида намоён бўлиши ҳақидаги қарашлар ҳозир ҳам сақланган. Бухоро вилоятининг Олот туманидаги Кўккўз қишлоғида яшаган табиб Олия момонинг эътироф этишича, унинг парилари баъзан кечаси ит бўлиб келар экан. «Гуландом» номли – тожик халқ эртагида подшо болаларини эмизиб, катта қиладиган парилардан бири катта қора ит сувратида тасвирланган⁴.

¹ Мифы народов мира. Т. 2. М., 1992. стр. 286.

² Литвинский Б. А. Семантика древних верований и обрядов памирцев // Средняя Азия и ее соседи в древности и средневековье. М.; 1981. стр. 95.

³ Мифы народов мира. Т. 2. стр. 286.

⁴ Таджикские народные сказки. Составление и обработка Р. Амонова. Душанбе, 1972. стр. 283.

Жоннинг ит кўринишида намоён бўлиши тўғрисидаги мифологик қарашлар парининг бу жонивор сувратида тасаввур қилинишига асос бўлган. Чунки қадимги одамлар тасаввурга кўра, ёвуз кучлар тимсоли ҳисобланган ялмоғиз, жодугарлар ухлаган пайтларида уларнинг жони танани тарк этиб, қора ит шаклида оламини сайр этаркан. Ўлган одам руҳи ит кўринишини олади деб ўйлаганлар. Ўлган киши жасади устидан ит сакраб ўтиши руҳнинг қайтиши аломати деб қаралган. Поляклар эътиқодича, сувга чўкиб ўлган кишиларнинг руҳи ит сувратида намоён бўларкан¹.

Демак, одам ўлгач, унинг руҳи жониворлар сувратига энади, яъни «қайта тирилади» деган халқ қарашлари асосида парининг итга эврилиши мотиви келиб чиққан.

«Авесто»да тасвирланган пари (пайрика) образига хос асосий белгилар қуйидагилардан иборат: а) ёвузлик оламига мансублик; б) антропоморф (инсон кўринишида) ва зооморф (жонзот) қиёфасида намоён бўлиши; в) ҳусну жамолда беназирлик; г) эзгулик олами вакилларига қарши курашиш; д) сеҳр-жоду қудратига эгалик; е) девлар билан алоқадорлик.

Пайрика образи «сеҳргарлар» ва «девлар» билан ёнма-ён қўлланилиши ҳам қизиқарлидир. «Яшт» китобининг Ардвисура Анахитага бағишланган «Ардвисур яшт» деб аталган қисмида пари ва сеҳргар образлари билан алоқадор лавҳа мавжуд. Ахурамазданинг кўрсатмасига биноан, Зардўшт «девлар душмани», «эзгу ҳомий» Ардвисура Анахита шарафига қурбонлик қилишни урф қилган. Шундай қурбонликлардан бири ҳақида «Авесто»да қуйидагилар битилган:

Хошянгха Парадата унга қурбонлик қилмоқ учун,

Хара чўққисига –

Юз от, минг ҳўкиз ва ўн минг қўй олиб келди.

Ва у шундай хитоб қилди:

«Эй, олийҳиммат, қудратли Ардвисура Анахита!

Сен менга шундай омад бахш этгинки,

Токи мен барча кишварлару,

¹ Легенды, мифы и предания. М., 1992. стр. 20–23.

Девлар, одамлар,

Сеҳргарлар ва париларга ўз ҳукмимни ўтказга олай!»¹.

Бу матндан кўриниб турибдики, дастлабки мифологик ҳоқонлардан бири Хошйангаха Парадатанинг мурожаатида «пари ва сеҳргарлар» икки мустақил образ сифатида берилмоқда. Юқоридаги мурожаат анъанавий формула бўлиб, «Ардвисур яшт»да бир неча марта такрорланган. Унда пари образи дев, сеҳргар, капалак сингари ёвузликка хизмат қилувчи образлар сирасига киритилган.

Пайрика (пари) образи Ўрта Осиёда яшаган қадимги деҳқонларнинг зардўштийликдан бурунги мифологиясида шаклланган бўлиб, дастлаб ҳосилдорлик култи билан боглиқ ҳолда тасаввур қилинган. Зардўштийлик таълимоти келиб чикқач, эзгу кучлар тоифасига мансуб бўлган кўпгина мифологик образлар сингари пари ҳам ёвуз куч рамзига айлантирилган. Ахурамазда бошчилигидаги эзгулик кучларининг пари, дев каби ёвуз тимсолларга қарши мурасазис кураши мотивида зардўштийлик таълимотининг ўзидан аввалги эътиқодий инончларга қарши кураши ўз ифодасини топган.

Юқоридаги қисқача таҳлилдан сўнг биз пари образининг тарихий илдизлари ва мифологик образ сифатидаги ривожланиш босқичларини куйидагича даврлаштирдик:

пари – эзгуликка хизмат қилувчи ҳомий куч тимсоли (зардўштийликдан олдинги давр);

пари – ёвузлик оламига мансуб шайтоний куч тимсоли (зардўштийлик даври);

пари – мифологик ва бадий образ (зардўштийликдан кейинги давр).

Хуллас, пари образининг генезиси Турон заминда истиқомат қилган қадимги аждодларимизнинг зардўштийликдан аввалги мифологик тасаввурлари ва ҳосилдорлик култи ҳақидаги қарашларига бориб тақалади.²

¹ Литература древнего Востока. М.; 1984. стр. 17.

² Ушбу мақола куйидаги манба асосида чоп этилмоқда: Қаюмов О. Пари образининг генезисига доир мулоҳазалар // Ўзбек тили ва адабиёти. – Тошкент, 1998. – 4-сон. – 41–44-бетлар.

Абдумурод
ТИЛОВОВ
(1970 йилда туғилган)



Абдумурод Тилавов 1970 йил 23 октябрда Навоий вилояти Нурота тумани Деҳбаланд қишлоғида туғилган. Ўзбекистон миллий университетининг ўзбек филологияси факультетида таҳсил олган (1988–93). Шу университетнинг аспирантурасида ўқиган (1993–95). Мазкур олий даргоҳда ўқитувчи, катта ўқитувчи, доцент лавозимларида ишлаган (1996–2015). Ҳозирда Алишер Навоий номидаги Тошкент давлат ўзбек тили ва адабиёти университетида фаолият кўрсатмоқда (2016 йилдан). «Ўзбек халқ достонларидаги от образининг тарихий асослари ва бадиий талқини» мавзусида номзодлик диссертациясини ёқлаган (2000). «Қизиқарли топшимоқлар», «Қирқ ривоятга қирқ шарҳ», «Мактаб оиладан бошланади», «Тарбия китоби. 7 ёшдан 70 ёшгача», «Ибратли ривоятлар ва хислатли ҳикमतлар», «Энг сара аллалар», «Болаларга гап ўқтириш санъати» китоблари чоп этилган. Шунингдек, «Туркий халқлар эртаклари», «Маснавий»дан ҳикоялар», Абу Ҳанифанинг «Муснад», Султон Валаднинг «Маърифатнома», Ҳажжар Асқалонийнинг «Мунаббихот», Муҳаммад Законинг «Саодат асридан сабоқлар» китоблари унинг таржимасида тақдим қилинган.

ХАЛҚ ДОСТОНЛАРИДА ҚАНОТЛИ ОТЛАР

Халқ достонларидаги от образи муҳим аҳамиятга эгадир. Чунки у керак ўринларда, яъни қахрамон мушкул ҳолатларга тушиб

колганда ёрдамга келади ва мадад бўлади. Бундай отларнинг кўплаб ғайритабиий хусусиятлари мавжуд.

От образига хос мифик белгилардан бири бу отнинг куш билан боғлиқ ҳолда тасвирланиши, аниқроғи қанотли эканлигидир. От образининг бадиийлигини таъминлашда биргина деталнинг нақадар аҳамиятга эга эканлигини, инчунун, халқ бахчисининг тафаккур салоҳияти, бадиий маҳоратини кўрсатиш учун эпик отдаги мана шу хусусият ҳақида имкон қадар батафсилроқ тўхталишни мақсадга мувофиқ деб билдик.

Қанот отда ҳар доим ҳам кўринавермайди. Қахрамон ва оти мушкул аҳволда қолганда, отнинг талаби билан унинг баданига эгаси томонидан «симдай ботиб кетгувчи» қамчи урилади ва от кўкка кўтарилади. Қанот душман ўқидан сақланишда ва асосан, пойгада «қўл келади».

«Алпомиш» достонида Барчинойнинг биринчи шартни, ораси қирқ кунлик йўл бўлган Бобоҳон тоғигача от билан пойга қилиш эди. Кўкалдошлар шартни бузиб, Қоражон ва отини боғлаб, Бойчиборнинг оёғига гул мих қоқадилар. Боғланган банддан халос бўлиб, хафа турган Қоражонга от (аслида Ражабхўжа эшон. – А. Т.) далда беради, уни жасоратга ундайди:

*Дам шу дамдир, ўзга дамни дам дема,
Бошинг эсон, давлатингни кам дема,
Қолдим, деб Қоражон, сира гам ема.
Жабр қилгин бундай ҳайвон жонига,
Қамчи ургин гўшт кўтарган сонига,
Етказарман Бойсин – Кўнғирот хонига...¹*

Қоражон «жабр қилгач» Бойчиборнинг тўрт ярим газ қаноти ёзилиб, «яшиндай бўб» кўтарилади ва пировардида Бойчибор сўзининг устидан чиқади.

Қанотли от мотиви қардош халқлар оғзаки ижоди учун ҳам характерли ҳодиса. Масалан, бошқирд халқ достони «Урал

¹ Алпомиш, достон, айтувчи Фозил Йўлдош ўғли, Тошкент, 1987. – Б. 113. Бу лавҳа достонлардаги қахрамон отининг яна бир мифик хусусияти – унинг гапириш қобилиятига эгалигини кўрсатмоқда.

Ботир»да бош қахрамоннинг Оқ бўз оти ҳам қанотли тулпордир.¹ «Авазнинг арази» номли туркман халқ достонида эса Ғиротнинг отаси «оқ қушдан»лиги Гўрўғли тилидан айтилади.

Авалло, эпосдаги қанотли отнинг мифик асосларини очишга ҳаракат қиламиз. Қадим аجدодларимиз отларнинг қуш каби учишига ишонишган. Бу мифик тасаввурнинг изларини туркийлар яшаган худудларда олиб борилган қазилма ишлари натижалари кўрсатмоқда. Пазирик кўргони ва Бухоро яқинидаги Варахша кўргонидан, Мир Араб мадрасаси ёнидан чиққан қанотли от ҳайкаллари ва Самарқанддаги Афросиёб кўргони деворларидаги қанотли от тасвирлари аниқланган.

Радлов олтойлар юртига яқин бўлган эски турк қавмларининг илк юрти деб билинган Кам (Енисей) бўйларидаги Абакан (Минусинск)да олиб борилган қазилма ишлари давомида тош, суякдан ишланган бир неча ҳайвон фигуралари топилган. Бронза даврига оид деб кўрсатилаётган бу топилмалар орасида йиртқич қуш бошли отлар ҳам бор. Айни пайда бу топилмалар Эрмитаж музейида сақланмоқда.

Достонлардаги бу мотивнинг илдизлари кўп жиҳатдан отнинг асли қанотли эканлиги ҳақидаги афсона-ривоятларга ҳам бориб тақалади, фикримизча. Масалан, Онадўлидаги Абдал турклари орасидаги бир афсонага кўра, от бир замонлар ҳам қанотли, ҳам сузиш аъзосига эга бўлган муқаддас махлуқот бўлиб, Қоф тоғи (Кўҳи Қоф) ортидаги сут кўлида яшаган. Ўлимга чора қидириб юрган Хизр алайҳиссалом бир кун бу отларни кўриб қолади ва тутишга ҳаракат қилади. Уддалай олмагач, кўлга шароб қуйиб отларни беҳуш қилади, қанотларини синдириб ташлайди ва ер юзига келтириб бу отларни кўпайтиради.

Хоразм вилоятидаги Хазорасп туманининг халқ этимологияси билан боғлиқ афсонада ҳам айни шу мазмунни кўрамиз. Айтишларича, мингта учар отни (таъкид биздан. – А.Т.) тутиб олиш учун бу отлар сув ичиб кетадиган булоқ сувига беҳуш қилгувчи дори солиб кўядилар. Дориланган сувдан ичган отлар беҳуш бўлади ва кўлга тушади. Отларнинг қанотларини қирқадилар ва инсонларга хизмат қилишга мажбур қиладилар.

¹ Башкирский народный эпос. – М., – 1977. – С. 318.

Шундан кейин бу жой минг от маъносидаги «Хазорасп» деган ном билан юритилади.¹

Авшар турклари ҳам от асли канотли бўлиб, Одам Ато билан бирга ерга тушганлигига ишонишади. Гўёки Одам Ато бу суюкли хайвон қайтадан кўкка учиб кетмасин, деб унинг қанотларини синдириб ташлаган экан.²

Туркий халклар орасида машҳур «Оқ бўз от» ва «Кўк бўз от» афсонасидаги отларнинг учиш қобилиятига эга бўлганлигини бу ўринда эслатиб ўтиш жоиз. Озарбайжон фольклоршуноси М. Сейидов эса, Ғиротнинг олов – ўтдан каноти борлиги, «инсон кўзи тегиб», бу қанотлар эриб кетгани ҳақида ривоят мавжудлигини айтади.

Фикримизча, дostonларимиздаги отнинг қанотли бўлишида аждодларимизнинг от ҳақидаги мифик тасаввурлари, чунончи, бу тасаввурлар асосида вужудга келган юқоридаги каби афсона, ривоятларнинг таъсири бор.

Дostonлардаги отнинг қанот ёзиб кўкка сапчиши, елдек учиб, қахрамонни манзилига етказишига доир тавсифу тасвирларни, бир жиҳатдан, муболаға, ўхшатиш каби бадиият воситалари билан боғлаб талкин этиш, иккинчи томондан, туркийларнинг қадимги мифологик дунёқараши асосларидан келиб чиққан ҳолда таҳлил қилиш ҳам мумкин. Юқоридаги қарашларимиз буни исботлайди.

Отдаги бу мифик белгининг дoston учун аҳамияти борми? Ҳ. Зарипов отдаги қанот ҳақида тўхталиб, дostonлардаги отга нисбатан эртақлардаги отларда қанот кўпроқ аҳамият касб этишини айтади: «Борди-ю, Ғирот билан Бойчиборнинг барча хусусиятларини саклаб, қанотсиз тасаввур этсак, асарга ҳеч қандай путур етмайди. Масалан, Бойчиборнинг қаноти пойгачиларга етиб олиш учунгина хизмат қилади...»

Бизнинг фикримизча, пойга эпизодида отда пайдо бўлган мифик қанот дoston учун катта аҳамиятга эга. Бундан ташқари

¹ Бу ҳақда қаранг: Имомов К., Мирзаев Т., Саримсоков Б., Сафаров О. Ўзбек халқ оғзаки ижоди. Т., 1990. Б. 178-179.

² Хоразм вилояти, Хазорасп туманидаги бир қишлоқ номи «Авшар» деб аталади.

жанговар отнинг қанотли ҳолда тасвирланиши дostonчининг ба-
дий маҳорати билан ҳам боғлиқ. Сўзимизга аниқлик киритиш
мақсадида «Алпомиш» дostonидаги пойга эпизодини яна бир
бор эсга оламиз.

Қоражон боғланган банддан халос бўлиб, «отнинг устига мин-
ди, от оёғини босолмай турди. (Чунки Кўкалдошлар от оёғига ур-
ган гул михлар ялпоқ тизгача кирганди. – А. Т.) Қоражон «Пой-
гага бекор келган эканман»,¹ деб турган эди. У тушкун ҳолатда...
Пойгачиларга етиб олишдан умидини узган. Бундай оғир аҳволда
отнинг Кўкалдошларга етиб олиши мушкулгина эмас, мумкин
эмас эди. Нима қилиш керак? Ҳамма энди нима бўларкин, деб
дostonни жон қулоғи билан тинглаб турган вазиятда зукко бахши
отга қанот «беради», инчунун, тушкун кайфиятдаги тингловчи
психологиясига ҳам таъсир кўрсатади, унинг кайфиятини «жо-
йига туширади».

Бахши пойгада Бойчиборни қанотсиз ҳам «ўздириши» мум-
кин эди. Аммо у ҳолда тингловчида қаҳрамон отига нисбатан
ишончсизлик туғиларди.

Хулоса қилиб шуни айтиш мумкинки, дostonлардаги
қаҳрамоннинг отини исталган ўринда қанотсиз тасаввур этиб
бўлмайди. Отдаги қанотнинг, умуман, мифик белгиларнинг бў-
лиши ҳам бежиз эмас; бу белгилар дoston учун муҳим детал бў-
либ хизмат қилади. Фикримизча, халқ оғзаки ижоди намуналари-
даги отларда қанотнинг бўлиши, доно халқимизнинг отни қандай
яхши кўриши, унга меҳр бериши ва от билан кўплаб орзуларини
боғлагани билан ҳам чамбарчас боғлиқдир.

¹ Алпомиш. – Б. 75.

**XX АСРДА ЎЗБЕК ФОЛЬКЛОРШУНОСЛИГИ БЎЙИЧА
ҲИМОЯ ҚИЛИНГАН ДИССЕРТАЦИЯ ИШЛАРИ**

Докторлик диссертациялари

№	Фамилияси, исми-шарифи	Диссертация мавзуси	Ҳимоя қилган йили
1	Қодиров Муҳсин Халилович	Ўзбек халқ драмаси	1965
2	Зарифов Ҳоди Тиллаевич	Нашр қилинган ишлари бўйича фан доктори илмий даражаси берилган	1965
3	Раззоқов Ҳошимжон	Ўзбек халқ оғзаки ижодида сатира ва юмор	1970
4	Қобулниёзов Жуманиёз	Ўзбек фольклорининг шаклланиши ва тараққиёт йўллари	1973
5	Муродов Малик	Ўзбек «Гуруғли» дostonларининг жанр ва ғоявий-бадий хусусиятлари	1975
6	Саидов Муҳаммаднодир Собитович	Ўзбек халқ дostonчилигида бадий маҳорат масалалари	1976
7	Мирзаев Тура	Ўзбек халқ бахшиларининг маҳорати ва улар репертуарининг асосий хусусиятлари	1986
8	Имомов Комил	Ўзбек халқ насри жанрларининг генезиси ва поэтик трансформацияси	1986
9	Саримсоқов Баҳодир Исоқович	Ўзбек маросим фольклорининг жанрлар таркиби, генезиси ва поэтикаси	1987
10	Жалолов Ғайрат Орипович	Ўзбек халқ сеҳрли эргакларининг генезиси ва поэтикаси	1987
11	Абдуллаев Ҳамдам	Ўзбек-қорақалпоқ эпоси алоқалари ва типологияси	1988
12	Рўзимбоев Сафарбой	Хоразм халқ дostonларининг спецификаси, типологияси ва поэтикаси	1990
13	Мусина Ғолима Гайсиевна	Ўзбек халқ дostonларида хотин-қизлар образи	1990
14	Жуманазаров Умрзоқ Абдуразоқович	Ўзбек тарихий фольклорининг жанрлари состави ва уларнинг ғоявий-бадий хусусиятлари	1991
15	Мусақулов Абийр	Ўзбек халқ лирикасининг тарихий асослари	1995
16	Ёрматов Исомиддин Турғунович	Ўзбек халқ қаҳрамонлик эпоси поэтикаси («Алпомиш» дostonи мисолида)	1995
17	Жўраев Маматқул	Ўзбек халқ самовий афсоналарининг тарихий асослари	1996
18	Абдуллаев Рустам Самиғович	Марказий Осиё халқлари маросим мусикаси	1997

Ўмзодлик диссертациялари

№	Фамилияси, исми-шарифи	Диссертация мавзуси	Ҳимоя қилган йили
1	Зарифов Ҳоди Тиллаевич	«Маликаи айёр» дostonининг нашри учун берилган	1943
2	Афзалов Мансур Иноятович	«Фарход ва Ширин» дostonининг халқ вариантлари	1950
3	Тожибоев Ғозибой	Ғозил Йўлдош ўғлининг ижоди	1954
4	Собиров Охунжон	Ислom шоир Назар ўғли ижоди	1955

5	Алавия Музайяна	Ўзбек халқ кўшиқлари	1959
6	Саидов Муҳаммадноридир	«Малика Айёр» дostonи	1960
7	Муҳаммадиев Расул	Аския – ўзбек халқ ижоди жанри	1961
8	Жалолов Ғайрат Орипович	Ҳамза ва халқ оғзаки ижодиёти	1962
9	Муродов Малик	Ўзбек халқ дostonларида Гўруғли образи	1962
10	Жураев Ёкубжон	Ўзбек фольклорида давр образи	1963
11	Мирзаев Тўра	Алпомиш» дostonининг ўзбек вариантлари	1965
12	Очилов Темир	Маматкарим полвон» дostonининг тарихий асослари	1965
13	Аскарлов Сиддик	20-йиллар ўзбек адабиётида фольклор аънавалари	1966
14	Ашуров Тиловкул	Ўзбек халқ дostonларида юмор ва сатира яратиш йуллари ва воситалари	1967
15	Хусаинова Зубайда	Ўзбек тонишмоқларининг асосий хусусияти ва манбалари	1967
16	Имомов Комил	Ўзбек сатирик эртакларида ижтимоий мотивлар	1968
17	Мўминова Анаора Усмоновна	Ўзбек халқ эртакларида хотин-кизлар образи (реализм ва романтизм тенденциялари асосида)	1968
18	Шодиева Сиддика Файзиевна	«Соҳибкирон» дostonининг ғоявий-бадий хусусиятлари (эпоснинг турли версияларини киёсий ўрганиш тажрибаси)	1968
19	Миркамоллова Мархабо Абдухамидовна	Ўзбек-лакайлар фольклорида «Гўруғли» дostonларининг ўрни	1972
20	Рўзимбоев Сафарбой	Хоразм воҳаси ўзбек халқ кўшиқларининг ғоявий-бадий хусусиятлари	1972
21	Каххорлов Абдумўмин	«Келиной» туркуми дostonларининг ўзига хос хусусиятлари	1972
22	Жаҳонгиров Ғани	Ўзбек болалар фольклори	1973
23	Оқбўтаев Ҳайдар	Халқ китобларининг ғоявий-бадий хусусиятлари	1973
24	Ражабов Райимкул	«Зевархон» дostonининг генезиси, тарқалиши ва ғоявий-бадий хусусиятлари	1973
25	Очилов Камол	Ўзбек халқ меҳнат кўшиқлари (Қашқадарё вилояти материаллари асосида)	1974
26	Умаров Субхонкул	Ўзбек халқ дostonларида бош қаҳрамон талқини (Муҳаммадкул Жонмурот ўғли Пулкан репертуари мисолида)	1974
27	Аълоев Амин	Янги давр дostonларида традиция ва новаторлик масалалари	1975
28	Йўлдошева Фарида	Халқ қаҳрамони Насриддин Афанди образини типиклаштириш муаммоси	1975
29	Саримсоқов Баҳодир	Ўзбек адабиётида сажъ	1976
30	Абдуллаев Рустам	Катта ашула жанри ва унинг намояндалари	1982
31	Жуманазаров Умрзоқ Абдураззоқович	Ўзбек халқ тарихий кўшиқлари (спецификаси, таснифи ва поэтикаси)	1982
32	Мирзаева Муаззам Кодировна	Гўруғли» дostonларида наслий туркумлик проблемаси («Ҳасанхон» туркуми мисолида)	1982
33	Бобоев Маманазар	Ўзбек халқ эпосининг тарихийлик принциплари типологияси	1983

34	Мадаев Омонулла	Хоразм дostonлари ва уларнинг ўзига хос хусусиятлари	1983
35	Нурмуродов Йўлдош	Ўзбек фольклорининг ўрганилиши тарихи ва немис тилига илмий-адабий таржима қилиш проблемалари	1983
36	Обидова Маҳмуда	Рустам» туркум дostonларининг ғоявий-бадий хусусиятлари	1983
37	Алимов Саидкул	Ўзбек адабиётида адабий эртак жанрининг шаклланиши ва ривожланиши	1984
38	Йўлдошева Саодат	«Алпомиш» дostonининг поэтикаси (сюжетини ташкил этувчи мотивлар, ўхшатиш ва эпитет)	1984
39	Мусақулов Абийр	Ўзбек фольклорида терма (жанр хусусиятлари, классификацияси, поэтикаси)	1984
40	Қўшмоқов Муҳаммадали	Анъана ва бадиҳага ўйлик масалалари (Қўрғон дostonчилиқ мактаби вакили Эргаш Жуманбулбул ўғли репертуари мисолида)	1984
41	Ёрматов Исомиддин Турғунович	Ҳозирги ўзбек адабиётида фольклоризмлар типологияси	1985
42	Зуфаров Тўхтамурод Усмонович	Ўзбек халқ дostonларининг спецификаси ва уларининг бадий тасвир воситалари	1985
43	Турсунқулов Аббос	Ўзбек фольклорида биографик ва автобиографик асарлар ҳамда уларнинг ғоявий-бадий хусусиятлари	1985
44	Холиқулов Жўрабой	«Гурўғлининг туғилиши» дostonининг Гурўғли туркумини ривожлантиришдаги ўрни	1985
45	Қаландарова Марзия	1916 йил қўзғолонининг ўзбек фольклоридаги бадий талқини (тарихийлик, анъанавийлик ва новаторлик масаласи)	1985
46	Мамашуқуров Каюм	«Нурали» туркуми дostonларининг ғоявий-бадий хусусиятлари	1986
47	Жўраев Маматкул	Ўзбек халқ эртакларидаги «сеҳрли» рақамларнинг тарихий асослари ва поэтик вазибалари	1987
48	Турдимов Шомирза Ғаниевич	Ўзбек халқ лирик қўшиқларида поэтик рамз ва унинг функцияси	1987
49	Файзулла Аймоқ	Афғонистон ўзбекларининг халқ қўшиқлари	1987
50	Қозоқов Деҳқонбой	Ўзбек халқ сатирик қўшиқлари	1987
51	Носиров Содикжон	Ўзбек халқ оғзаки ижодида ижрочилиқ маҳорати (эртакчи ва аскиябозлар мисолида)	1988
52	Сапаров Ақтам	Ўзбек халқ дostonлари ритмикаси ва уни рус тилида тиклаш масалалари	1989
53	Бекмуродов Иброҳим	Ўзбек-қозоқ фольклор алоқалари	1990
54	Ёқуббекова Мунаввара Муҳамедовна	Ўзбек халқ аллаларининг жанр табиати ва бадий хусусиятлари	1990
55	Маҳмудова Клара	Фольклор ва замонавийлик (бадий ҳаваскорликнинг ривожланишида фольклорнинг роли)	1990
56	Холмирзаева Сайёра Шуқуровна	Ўзбек халқ эпосидаги бадий шартлиликнинг ўзига хос хусусиятлари	1990
57	Жуманиёзов Раҳимбой Маткаримович	«Юсуфбек ва Аҳмадбек» дostonи ва унинг тарихий асослари	1991
58	Эргашев Абдиолим	Шеробод дostonчилиқ мактаби	1991

59	Мирзаева Салима Раймжонова	Ўзбек афсун-дуоларининг жанр хусусиятлари ва бадийлиги	1993
60	Ўраева Дармон Саидахмедовна	Ўзбек халқ лирик қўшиқларида параллелизмларнинг характери ва бадий-композицион вазифалари	1993
61	Ҳайдаров Тоҳир Мирҳолиқович	«Гуруғли ва мифология синкретизми	1993
62	Бекназаров Қўшмурод	Ўзбек халқ маиший эртаклари (ўрганилиши, таснифи ва поэтикаси)	1994
63	Соатов Ғайрат	Ўзбек халқ анъанавий байрамлари таркибидаги фольклор асарларининг поэтик хусусиятлари	1994
64	Эгамқулов Бахтиёр Абдумавлонович	Эпик шеър ва эпик синкретизм	1994
65	Эшчоновна Гавҳар Отажоновна	«Отпик Ғариб ва Шохсанам» дostonининг вариантлари	1994
66	Қурбонова Нафиса Хусеновна	Ўзбек болалар маросим фольклори	1994
67	Қўчқоров Неъматулла Нормуродович	Ўзбек халқ олқишларининг жанр хусусиятлари ва бадийати	1994
68	Тоғасва Дилором Сотғибековна	Ўзбек оғзаки демонологик ҳикояларининг жанр хусусиятлари ва бадийати	1995
69	Шамсиева Бахтия Арифовна	Хорижий адабиётшуносликда ўзбек фольклори масалалари таҳлили	1995
70	Давлатов Сойибназар	Қаشقаларё воҳаси ўзбек тўй маросимлари фольклори	1996
71	Жумаева Салима Чўяновна	Ҳайвонлар ҳақидаги эртакларнинг генетик асослари ва спецификаси	1996
72	Матёқубов Ботир	Хоразм дostonларининг мусиқий хусусиятлари	1996
73	Жуманиёзов Баҳромбой	Ўзбек фольклорида ялмоғиз образи	1997
74	Мадраҳимова Назира Ёқубовна	«Ширин билан Шакар» дostonининг киёсий типологик таҳлили (Ўзбек ва қорақалпоқ версиялари асосида)	1997
75	Раҳмонов Тождин Латипович	Қадимги мифлар ўзбек фольклори эпик мотивларининг асоси сифатида	1997
76	Рўзимбоев Хуррам Сапарбоевич	Хоразм фольклорининг хорижда ўрганилиши тарихидан (XIX аср охири – XX аср бошлари)	1997
77	Эшонқулов Жаббор Солиевич	Ўзбек фольклорида дев образининг мифологик асослари ва бадий талқини	1997
78	Ғалиев Шамил	Ўзбек болалар ўйин фольклорининг таснифи ва поэтикаси	1998
79	Раҳмонов Баходир	Ўзбек халқ эпик шеър тузилиши	1998
80	Қосимов Нозим	Ўзбек халқ лапарлари (жанр спецификаси ва бадийати)	1998
81	Диванова Иқболлой	«Хурлико ва Ҳамро» дostonи вариантларининг киёсий таҳлили	1999
82	Исмонов Оқибатхон Олимжоновна	Ўзбек тўй маросим фольклорида «келинсалом» жанри (генезиси, спецификаси, поэтикаси)	1999
83	Қаюмов Олим Садриддинович	Ўзбек фольклорида пари образи (генезиси ва поэтикаси)	1999
84	Қуробоева Нарғиза	Хоразм тўй қўшиқлари	1999

М у н д а р и ж а

XX аср ўзбек фольклоршунослигининг ўзига хос хусусиятлари	3
Ғози Олим – «Алпомиш» достони	18
Элбек – Лапарлар	21
Ғулом Зафарий – Чиғатой-ўзбек халқ театруси	25
Ҳоди Зариф – Аршақ – шақ қахрамони	32
Буюк Каримий – Ўзбек халқ эртақларининг баъзи бир хусусиятлари	49
Музайяна Алавия – Ўзбек фольклорида ўлан жанри	64
Мансур Афзалов – Ҳайвонлар хақидаги эртақлар	79
Расул Муҳаммадиев – Аския жанри ва унинг тил хусусиятлари	89
Жуманиёз Қобулниёзов – «Ошиқ Махмуд» достони	101
Ҳошимжон Раззоқов – Эпик ижодда сатира, юмор ва комик қахрамон	107
Зубайда Ҳусайнова – Топишмоқ терминлари	120
Охунжон Собиров – «Махтумқули ва ўзбек бахшилари»	128
Тожибой Ғозибоев – «Ёзи билан Зебо» достонининг Наманган вариантлари	136
Ғани Жаҳонгиров – Болалар топишмоқлари	149
Темир Очилов – «Маматкарим Полвон» достонининг тарихий асослари	157
Муҳаммаднодир Саидов – «Малика Айёр» достонининг жанр хусусиятлари	170
Абдумўмин Қаҳхоров – Достончи Шерна хақида	182
Комилжон Имомов – Эртақчи ва эртақчилик анъаналари	189
Мухсин Қодиров – Қўғирчоқ ўйини	198
Ғайрат Жалолов – «Алпомиш» ва халқ эртақлари	210
Малик Муродов – Ўзбек халқ достонларида образ яратиш усуллари хақида баъзи мулоҳазалар	218

Муаззам Мирзаева – Ўзбек халқ дostonчилигида туркумлиқ	227
Сиддиқа Шодиева – «Сохибқирон» дostonи ва унинг вариантлари	234
Тўра Мирзаев – Фольклор ва унинг асосий хусусиятлари	249
Тўхтамурод Зуфаров – Дўмбиранинг асрори	265
Камол Очилов – Хирмон янчиш кўшиқлари	273
Тиловкул Ашуrow – Халқ дostonларида қахрамон-титанлар образи талқинига доир	286
Сафарбой Рўзимбоев – Хоразм воҳасидаги этнографик жараёнлар ва уларнинг эпик анъаналарга таъсири	295
Охунжон Сафаров – Болалар фольклори	307
Омонулла Мадаев – Халқ дostonлари генезисига доир	322
Фарида Йўлдошева – Насриддин Афанди образи ва латифанинг жанр хусусиятлари	334
Баходир Саримсоқов – Фольклоризмлар типологияси масаласига доир	346
Худойберган Эгамов – Мотив ва сюжет	359
Қаюм Мамашуқуров – «Нурали» туркум дostonлари ҳақида	373
Фармон Райҳонов – Халқ мақоллари ва топишмоқларида қофия	382
Жумабой Юсупов – Дафн маросими ва унинг эртақлардаги бадий кўчими	390
Саодатхон Йўлдошева – «Алпомиш» дostonи улуғланган миллий қадрият	398
Ғулом Ақрамов – Манистик мифология	406
Рустамбек Абдуллаев – Номоддий маданий мерос ва замон	414
Муҳаммадали Қўшмоқов – Мулла Эргаш – Булбул Эргаш	429
Абийр Мусақулов – Халқ лирикасида соч образининг тарихий-этнографик асослари	435
Мунаввара Ёқуббекова – Халқ кўшиқларида сўз сеҳри	446
Ботир Матёқубов – Ўзбек дostonларининг муסיқий хусусиятлари	454

Аббос Турсункулов – Автобиографик дostonларнинг жанр хусусиятлари	465
Исомиддин Ёрматов – Ўзбек халқ ирим айтимларининг жанр хусусиятлари	471
Умрзоқ Жуманазаров – Афсона ва ривоят жанрларининг ўзаро муносабати	483
Маматкул Жўраев – Ўзбекларнинг шамол билан боғлиқ мифологик тасавурлари	492
Шомирза Турдимов – Қаҳрамонлик эпосида аллпик тизими	507
Шорустам Шомусаров – Араб ва туркий халқлар эртаклари сюжетининг қиёсий таҳлили	521
Собит Авезов – Воқеабанд санамалар	534
Оқибатхон Исмонова – «Келинсалом» кўшиқларининг жанр хусусиятлари	544
Салима Мирзаева – Барқарор эпик формулалар поэтикасига доир	550
Жаббор Эшонқул – Эпос ва маросим	558
Дармон Ўраева – Мотам аллаларининг ўзига хос хусусиятлари	568
Олим Қаюмов – Пари образининг генезисига доир мулоҳазалар	575
Абдумурод Тиловов – Халқ дostonларида қанотли отлар	580

XX аср
ЎЗБЕК ФОЛЬКЛОРШУНОСЛИГИ

А н т о л о г и я

«O‘zbekiston milliy ensiklopediyasi»
Давлат илмий нашриёти
Тошкент – 2017

ISBN 978-9943-07-566-5



Мухаррир *Л. Ҳасанова*
Бадий мухаррир *А. Ёқубжонов*
Саҳифаловчи *Д. Ҳасанова*

Нашриёт лицензияси: АИ № 160. 14.08.2009 й.
10.12.2017 йилда босишга рухсат этилди.
Қоғоз бичими 60x90 ¹/₁₆. Офсет қоғозда босилди.
37,00 шартли босма табоқ, 32,00 нашриёт-ҳисоб табоғи.
Адади 300 нусха. Буюртма № 55.

«O‘zbekiston milliy ensiklopediyasi» Давлат илмий нашриёти
100011, Тошкент ш., Навоий кўчаси, 30-уй

«Ёшлар матбуоти» МЧЖ босмахонасида чоп этилди.
100113, Тошкент ш., Чилонзор–8, Қатортол кўчаси, 60-уй.

